

A C T A

SS. D. N.

P I I P P. I X.

EX QUIBUS EXCERPTUS EST

S Y L L A B U S

EDITUS DIE VIII DECEMBRIS MDCCCLXIV



ROMAE

TYPIS REV. CAMERAE APOSTOLICAE

MDCCCLXV.

EDITORES LECTORI

Postquam in lucem editus est Syllabus propositionum, quas SS. D. N. Pius PP. IX in plerisque Pontificatus sui Actis, ceu praecipua aetatis nostrae errorum capita notaverat; nonnullis visum est operae pretium futurum, si una cum Syllabo illa ipsa documenta coniungerentur, et veluti unum corpus in vulgus prodirent. Raros enim totam illam tum Litterarum encyclicarum, tum Allocutionum multitudinem, in quibus Syllabi propositiones reprobantur, possidere credibile est: et tamen eas conferre omnino oportet, si qui verum sensum, in quo illae sententiae pontificia auctoritate perstringuntur, elicere velint.

Accedit etiam, quod ingens quaedam commotio perditorum hominum hanc sollemnem promulgationem subsecuta est: quippe quamvis et alias iidem errores proscripti fuissent; haec tamen uno ictu unoque tempore iacta in universos pontificia Censura, mirum in modum ipsorum animos pupugit. Quapropter, cum re-

luctari adversus exploratam veritatem difficillimum sit; obscurare autem veritatem facillimum: hoc consuetum causae suae remedium poposcerunt, supremi Pontificis sententias pervertere, Eiusque auctoritatem et magisterium in invidiam adducere. Quod iniquissimum pugnandi artificium per se satis opportunum simpliciorum animis captandis, eludetur sane, si Pontificiae declarationes nativa se luce iis in primis se prodent, qui alios veritatem edocere officio suo tenentur.

Haec itaque animo nostro reputantes, tam facile opus, gratissimum bonis omnibus, necessarium vero aut valde utile iis qui curant animarum salutem, non esse omitendum arbitrati sumus. Evulgamus igitur Syllabum editum die octava mensis Decembris, unaque cum illo Acta omnia pontificia, in quibus recensitae propositiones merito exploduntur. Qua in re, ut lectorum utilitati melius per nos consultum foret, unicuique propositioni subiecta est allegatio documenti pontificii, ad quod refertur, et paginae numerus in qua documentum initium sumit. Acta vero, quae subsequuntur, ordine ipso temporum, quo lata sunt, recensentur.

**SYLLABUS PRAECIPUORUM
NOSTRAE AETATIS ERRORUM**



S Y L L A B U S

COMPLECTENS PRAECIPUOS NOSTRAE AETATIS ERRORES QUI NOTANTUR
IN ALLOGUTIONIBUS CONSISTORIALIBUS IN ENCYCLICIS ALIISQUE
APOSTOLICIS LITTERIS SANCTISSIMI DOMINI NOSTRI PII PAPAE IX.

§. I.

*Pantheismus, Naturalismus et Rationalismus
absolutus.*

I. Nullum supremum, sapientissimum, providentissimumque Numen divinum exsistit ab hac rerum universitate distinctum, et Deus idem est ac rerum natura et ideo immutationibus obnoxius, Deusque reapse fit in homine et mundo, atque omnia Deus sunt et ipsissimam Dei habent substantiam; ac una eademque res est Deus cum mundo, et proinde spiritus cum materia, necessitas cum libertate, verum cum falso, bonum cum malo, et iustum cum iniusto.

Alloc. *Maxima quidem 9 iunii 1862 (Vide inferius pag. 210.)*

II. Neganda est omnis Dei actio in homines et mundum.

Alloc. *Maxima quidem 9 iunii 1862 (pag. 210.)*

III. Humana ratio, nullo prorsus Dei respectu habito, unicus est veri et falsi, boni et mali arbiter, sibi ipsi

est lex et naturalibus suis viribus ad hominum ac populorum bonum curandum sufficit.

Alloc. *Maxima quidem* 9 iunii 1862 (pag. 210.)

IV. Omnes religionis veritates ex nativa humanae rationis vi derivant; hinc ratio est princeps norma, qua homo cognitionem omnium cuiuscumque generis veritatum assequi possit ac debeat.

Epist. encycl. *Qui pluribus* 9 novembris 1846 (pag. 3.)

Epist. encycl. *Singulari quidem* 17 martii 1856 (pag. 141.)

Alloc. *Maxima quidem* 9 iunii 1862 (pag. 210.)

V. Divina revelatio est imperfecta et siccirco subiecta continuo et indefinito progressui, qui humanae rationis progressioni respondeat.

Epist. encycl. *Qui pluribus* 9 novembris 1846 (pag. 3.)

Alloc. *Maxima quidem* 9 iunii 1862 (pag. 210.)

VI. Christi fides humanae refragatur rationi; divinaque revelatio non solum nihil prodest, verum etiam nocet hominis perfectioni.

Epist. encycl. *Qui pluribus* 9 novembris 1846 (pag. 3.)

Alloc. *Maxima quidem* 9 iunii 1862 (pag. 210.)

VII. Prophetiae et miracula in sacris Litteris exposita et narrata sunt poetarum commenta, et christiana fidei mysteria philosophicarum investigationum summa; et utriusque Testamenti libris mythica continentur inventa; ipseque Iesus Christus est mythica fictio.

Epist. encycl. *Qui pluribus* 9 novembris 1846 (pag. 3.)

Alloc. *Maxima quidem* 9 iunii 1862 (pag. 210.)

§. II.

Rationalismus moderatus.

VIII. Quum ratio humana ipsi religioni aequiparetur, iccirco theologicae disciplinae perinde ac philosophicae tractandae sunt.

Alloc. *Singulari quadam perfusi* 9 decembris 1854 (pag. 120.)

IX. Omnia indiscriminatim dogmata religionis christiana sunt obiectum naturalis scientiae seu philosophiae; et humana ratio historice tantum exulta potest ex suis naturalibus viribus et principiis ad veram de omnibus etiam reconditionibus dogmatibus scientiam pervenire, modo haec dogmata ipsi rationi tamquam obiectum proposita fuerint.

Epist. ad Archiep. Frising. *Gravissimas* 11 decembris 1862 (pag. 219.)

Epist. ad eumdem *Tuas libenter* 21 decembris 1863 (pag. 242.)

X. Quum aliud sit philosophus, aliud philosophia, ille ius et officium habet se submittendi auctoritati, quam veram ipse probaverit; at philosophia neque potest, neque debet ulli sese submittere auctoritati.

Epist. ad Archiep. Frising. *Gravissimas* 11 decembris 1862 (pag. 219.)

Epist. ad eumdem *Tuas libenter* 21 decembris 1863 (pag. 242.)

XI. Ecclesia non solum non debet in philosophiam unquam animadvertere, verum etiam debet ipsius philosophiae tolerare errores eique relinquere, ut ipsa se corrigat.

Epist. ad Archiep. Frising. *Gravissimas* 11 decembris 1862 (pag. 219.)

XII. Apostolicae Sedis, romanarumque Congregationum decreta liberum scientiae progressum impediunt.

Epist. ad Archiep. Frising. *Tuas libenter* 21 dec. 1863 (pag. 242.)

XIII. Methodus et principia, quibus antiqui Doctores scholastici Theologiam excoluerunt, temporum nostrorum necessitatibus scientiarumque progressui minime congruunt.

Epist. ad Archiep. Frising. *Tuas libenter* 21 decembris 1863 (*pag. 242.*)

XIV. Philosophia tractanda est, nulla supernaturalis revelationis habita ratione.

Epist. ad Archiep. Frising. *Tuas libenter* 21 decembris 1863 (*pag. 242.*)

N. B. Cum rationalismi systemate cohaerent maximum partem errores Antonii Günther, qui damnantur in Epist. ad Card. Archiep. Colonensem *Eximiam tuam* 15 Iunii 1857 (*pag. 165.*), et in Epist. ad Episc. Wratislaviensem *Dolore haud mediocri* 30 Aprilis 1860 (*pag. 178.*)

§. III.

Indifferentismus, Latitudinarismus.

XV. Liberum cuique homini est eam amplecti ac proferi religionem, quam rationis lumine quis ductus veram putaverit.

Litt. Apost. *Multiplices inter* 10 iunii 1851 (*pag. 87.*)

Alloc. *Maxima quidem* 9 iunii 1862 (*pag. 210.*)

XVI. Homines in cuiusvis religionis cultu viam aeternae salutis reperire aeternamque salutem assequi possunt.

Epist. encycl. *Qui pluribus* 9 novembris 1846 (*pag. 3.*)

Alloc. *Ubi primum* 17 decembris 1847 (*pag. 23.*)

Epist. encycl. *Singulari quidem* 17 martii 1856 (*pag. 141.*)

XVII. Saltem bene sperandum est de aeterna illorum omnium salute, qui in vera Christi Ecclesia nequaquam versantur.

Alloc. *Singulari quadam* 9 decembris 1854 (*pag. 120.*)

Epist. encycl. *Quanto conficiamur* 17 augustii 1863 (*pag. 226*)

XVIII. Protestantismus non aliud est quam diversa verae eiusdem christianaे religionis forma, in qua aequa ac in Ecclesia catholica Deo placere datum est.

Epist. encycl. *Nostis et Nobiscum* 8 decembris 1849 (pag. 50.)

§. IV.

*Socialismus, Communismus, Societas clandestinae,
Societas biblicae, Societas clericico-liberales.*

Eiusmodi pestes saepe gravissimisque verborum formulæ reprobantur in Epist. encycl. *Qui pluribus* 9 Novembris 1846 (pag. 3.); in Alloc. *Quibus quantisque* 20 April. 1849 (pag. 29.); in Epist. encycl. *Nostis et Nobiscum* 8 Decemb. 1849 (pag. 50.); in Allocut. *Singulari quadam* 9 Decemb. 1854 (pag. 120.); in Epist. encycl. *Quanto conficiamur* 10 Augusti 1863 (pag. 226.)

§. V.

Errores de Ecclesia eiusque iuribus.

XIX. Ecclesia non est vera perfectaque societas plane libera, nec pollet suis propriis et constantibus iuribus sibi a divino suo Fundatore collatis, sed civilis potestatis est definire, quae sint Ecclesiae iura ac limites, intra quos eadem iura exercere queat.

Alloc. *Singulari quadam* 9 decembris 1854 (pag. 120.)

Alloc. *Multis gravibusque* 17 decembris 1860 (pag. 188.)

Alloc. *Maxima quidem* 9 iunii 1862 (pag. 210.)

XX. Ecclesiastica potestas suam auctoritatem exercere non debet absque civilis gubernii venia et assensu.

Alloc. *Meminit unusquisque* 30 septembris 1861 (pag. 204.)

XXI. Ecclesia non habet potestatem dogmatice definiendi, religionem catholicae Ecclesiae esse unice veram religionem.

Litt. Apost. *Multiplices inter 10 iunii 1851* (pag. 87.)

XXII. Obligatio, qua catholici magistri et scriptores omnino adstringuntur, coarctatur in iis tantum, quae ab infallibili Ecclesiae iudicio veluti fidei dogmata ab omnibus credenda proponuntur.

Epist. ad Archiep. Frising. *Tuas libenter 21 decembris 1863* (pag. 242.)

XXIII. Romani Pontifices et Concilia oecumenica a limitibus suae potestatis recesserunt, iura Principum usurparunt, atque etiam in rebus fidei et morum definiendis errarunt.

Litt. Apost. *Multiplices inter 10 iunii 1851* (pag. 87.)

XXIV. Ecclesia vis inferendae potestatem non habet, neque potestatem ullam temporalem directam vel indirectam.

Litt. Apost. *Ad apostolicae 22 augusti 1851* (pag. 91.)

XXV. Praeter potestatem episcopatui inherentem, alia est attributa temporalis potestas a civili imperio vel expresse vel tacite concessa, revocanda propterea, cum libuerit, a civili imperio.

Litt. Apost. *Ad apostolicae 22 augusti 1851* (pag. 91.)

XXVI. Ecclesia non habet nativum ac legitimum ius acquirendi ac possidendi.

Alloc. *Nunquam fore 15 decembris 1856* (pag. 156.)

Epist. encycl. *Incredibili 17 septembris 1863* (pag. 236.)

XXVII. Sacri Ecclesiae ministri Romanusque Pontifex ab omni rerum temporalium cura ac dominio sunt omnino excludendi.

Alloc. *Maxima quidem 9 iunii 1862* (pag. 210.)

XXVIII. Episcopis, sine Gubernii venia, fas non est vel ipsas apostolicas litteras promulgare.

Alloc. *Nunquam fore* 15 decembris 1856 (*pag. 156.*)

XXIX. Gratiae a Romano Pontifice concessae existimari debent tamquam irritae, nisi per Gubernium fuerint imploratae.

Alloc. *Nunquam fore* 15 decembris 1856 (*pag. 156.*)

XXX. Ecclesiae et personarum ecclesiasticarum immunitas a iure civili ortum habuit.

Litt. Apost. *Multiplices inter* 10 iunii 1851 (*pag. 87.*)

XXXI. Ecclesiasticum forum pro temporalibus clericorum causis sive civilibus sive criminalibus omnino de medio tollendum est, etiam inconsulta et reclamante Apostolica Sede.

Alloc. *Acerbissimum* 27 septembris 1852 (*pag. 110.*)

Alloc. *Nunquam fore* 15 decembris 1856 (*pag. 156.*)

XXXII. Absque ulla naturalis iuris et aequitatis violatione potest abrogari personalis immunitas, qua clerici ab onere subeundae exercendaeque militiae eximuntur; hanc vero abrogationem postulat civilis progressus, maxime in societate ad formam liberioris regiminis constituta.

Epist. ad Episc. Montisregal. *Singularis Nobisque* 29 septembris 1864 (*pag. 255.*)

XXXIII. Non pertinet unice ad ecclesiasticam iurisdictionis potestatem proprio ac nativo iure dirigere theologicarum rerum doctrinam.

Epist. ad Archiep. Frising. *Tuas libenter* 21 decembris 1863 (*pag. 242.*)

XXXIV. Doctrina comparantium Romanum Pontificem Principi libero et agenti in universa Ecclesia, doctrina est quae medio aevo praevaluit.

Litt. Apost. *Ad apostolicae* 22 augusti 1851 (*pag. 91.*)

XXXV. Nihil vetat, alicuius Concilii generalis sententia aut universorum populorum facto, summum Pontificatum ab romano Episcopo atque Urbe ad alium Episcopum a-liamque civitatem transferri.

Litt. Apost. *Ad apostolicae* 22 augusti 1851 (*pag.* 91.)

XXXVI. Nationalis concilii definitio nullam aliam admit-tit disputationem, civilisque administratio rem ad hosce terminos exigere potest.

Litt. Apost. *Ad apostolicae* 22 augusti 1851 (*pag.* 91.)

XXXVII. Institui possunt nationales Ecclesiae ab aucto-ritate Romani Pontificis subductae planeque divisae.

Alloc. *Multis gravibusque* 17 decembris 1860 (*pag.* 188.)

Alloc. *Iamdudum cernimus* 18 martii 1861 (*pag.* 196.)

XXXVIII. Divisioni Ecclesiae in orientalem atque occi-dentalem nimia Romanorum Pontificum arbitria contulerunt.

Litt. Apost. *Ad apostolicae* 22 augusti 1851 (*pag.* 91.)

§. VI.

*Errores de societate civili tum in se, tum in suis
ad Ecclesiam relationibus spectata.*

XXXIX. Reipublicae status, utpote omnium iurium ori-go et fons, iure quodam pollet nullis circumscripto li-mitibus.

Alloc. *Maxima quidem* 9 iunii 1862 (*pag.* 210.)

XL. Catholicae Ecclesiae doctrina humanae societatis bono et commodis adversatur.

Epist. eneycl. *Qui pluribus* 9 novembris 1846 (*pag.* 3.)

Alloc. *Quibus quantisque* 20 aprilis 1849 (*pag.* 29.)

XLI. Civili potestati vel ab infideli imperante exercitiae competit potestas indirecta negativa in sacra; eidem proinde competit nedum ius quod vocant *exequatur*, sed etiam ius *appellationis*, quam nuncupant, *ab abusu*.

Litt. Apost. *Ad apostolicae* 22 augusti 1851 (pag. 91.)

XLII. In conflictu legum utriusque potestatis, ius civile praevalet.

Litt. Apost. *Ad apostolicae* 22 augusti 1851 (pag. 91.)

XLIII. Laica potestas auctoritatem habet rescindendi, declarandi ac faciendi irritas solemnes conventiones (vulgo *Concordata*) super usu iurium ad ecclesiasticam immunitatem pertinentium cum Sede Apostolica initas, sine huius consensu, immo et ea reclamante.

Alloc. *In Consistoriali* 1 novembbris 1850 (pag. 79.)

Alloc. *Multis gravibusque* 17 decembris 1860 (pag. 188.)

XLIV. Civilis auctoritas potest se immiscere rebus, quae ad religionem, mores et regimen spirituale pertinent. Hinc potest de instructionibus iudicare, quas Ecclesiae pastores ad conscientiarum normam pro suo munere edunt, quin etiam potest de divinorum sacramentorum administratione et dispositionibus ad ea suscipienda necessariis decernere.

Alloc. *In Consistoriali* 1 novembbris 1850 (pag. 79.)

Alloc. *Maxima quidem* 9 iunii 1862 (pag. 210.)

XLV. Totum scholarum publicarum regimen, in quibus iuventus christiana alicuius Reipublicae instituitur, episcopalibus dumtaxat seminariis aliqua ratione exceptis, potest ac debet attribui auctoritati civili, et ita quidem attribui, ut nullum alii cuicunque auctoritati recognoscatur ius immiscendi se in disciplina scholarum, in regimine studiorum, in graduum collatione, in delectu aut approbatione magistrorum.

Alloc. *In Consistoriali* 1 novembbris 1850 (pag. 79.)

Alloc. *Quibus luctuosissimis* 5 septembris 1851 (pag. 97.)

XLVI. Immo in ipsis clericorum seminariis methodus studiorum adhibenda civili auctoritati subiicitur.

Alloc. *Nunquam fore 15 decembris 1856 (pag. 156.)*

XLVII. Postulat optima civilis societatis ratio, ut populares scholae, quae patent omnibus cuiusque e populo classis pueris, ac publica universim Instituta, quae litteris severioribusque disciplinis tradendis et educationi iuventutis curandae sunt destinata, eximantur ab omni Ecclesiae auctoritate, moderatrice vi et ingerentia, plenoque civilis ac politicae auctoritatis arbitrio subiificantur ad imperantium placita ed ad communium aetatis opinionum amussim.

Epist. ad Archiep. Friburg. *Quum non sine 14 iulii 1864 (pag. 250.)*

XLVIII. Catholicis viris probari potest ea iuventutis instituendae ratio, quae sit a catholica fide et ab Ecclesiae potestate seiuncta, quaeque rerum dumtaxat naturallium scientiam ac terrenae socialis vitae fines tantummodo vel saltem primario spectet.

Epist. ad Archiep. Friburg. *Quum non sine 14 iulii 1864 (pag. 250.)*

IL. Civilis auctoritas potest impedire quominus sacrorum Antislites et fideles populi cum Romano Pontifice libere ac mutuo communicent.

Alloc. *Maxima quidem 9 iunii 1862 (pag. 210.)*

L. Laica auctoritas habet per se ius praesentandi episcopos et potest ab illis exigere ut ineant dioecesum pro-curationem antequam ipsi canonicam a S. Sede institutionem et apostolicas litteras accipient.

Alloc. *Nunquam fore 15 decembris 1856 (pag. 156.)*

LI. Immo laicum Gubernium habet ius deponendi ab exercitio pastoralis ministerii episcopos, neque tenetur

obedire Romano Pontifici in iis quae episcopatum et episcoporum respiciunt institutionem.

Litt. Apost. *Multiplices inter 10 iunii 1851* (pag. 87.)

Alloc. *Acerbissimum 27 septembris 1852* (pag. 110.)

LII. Gubernium potest suo iure immutare aetatem ab Ecclesia praescriptam pro religiosa tam mulierum quam virorum professione, omnibusque religiosis familiis indicere, ut neminem sine suo permissu ad solemnia vota nuncupanda admittant.

Alloc. *Nunquam fore 15 decembris 1856* (pag. 156.)

LIII. Abrogandae sunt leges quae ad religiosarum familiarum statum tutandum, earumque iura et officia pertinent; immo potest civile gubernium iis omnibus auxilium praestare, qui a suscepto religiosae vitae instituto deficere ac solemnia vota frangere velint; pariterque potest, religiosas easdem familias perinde ac collegiatas Ecclesias et beneficia simplicia etiam iuris patronatus penitus extinguere, illorumque bona et redditus civilis potestatis administrationi et arbitrio subiicere et vindicare.

Alloc. *Acerbissimum 27 septembris 1852* (pag. 110.)

Alloc. *Probe memineritis 22 ianuarii 1855* (pag. 129.)

Alloc. *Cum saepe 26 iulii 1855* (pag. 132.)

LIV. Reges et Principes non solum ab Ecclesiae iurisdictione eximuntur, verum etiam in quaestionibus iurisdictionis dirimendis superiores sunt Ecclesia.

Litt. Apost. *Multiplices inter 10 iunii 1851* (pag. 87.)

LV. Ecclesia a Statu, Statusque ab Ecclesia seiungendus est.

Alloc. *Acerbissimum 27 scptembris 1852* (pag. 110.)

§. VII.

Errores de Ethica naturali et christiana.

LVI. Morum leges divina haud egent sanctione, minimeque opus est ut humanae leges ad naturae ius conformentur aut obligandi vim a Deo accipient.

Alloc. *Maxima quidem* 9 innii 1862 (pag. 210.)

LVII. Philosophicarum rerum morumque scientia, itemque civiles leges possunt et debent a divina et ecclesiastica auctoritate declinare.

Alloc. *Maxima quidem* 9 iunii 1862 (pag. 210.)

LVIII. Aliae vires non sunt agnoscendae nisi illae, quae in materia positae sunt, et omnis morum disciplina honestasque collocari debet in cumulandis et augendis quovis modo divitiis ac in voluptatibus explendis.

Alloc. *Maxima quidem* 9 iunii 1862 (pag. 210.)

Epist. encycl. *Quanto conficiamur* 10 augusti 1863 (pag. 226.)

LIX. Ius in materiali facto consistit, et omnia hominum officia sunt nomen inane, et omnia humana facta iuris vim habent.

Alloc. *Maxima quidem* 9 iunii 1862 (pag. 210.)

LX. Auctoritas nihil aliud est nisi numeri et materia-
lium virium summa.

Alloc. *Maxima quidem* 9 iunii 1862 (pag. 210.)

LXI. Fortunata facti iniustitia nullum iuris sanctitati detrimentum affert.

Alloc. *Iamdudum cernimus* 18 martii 1861 (pag. 196.)

LXII. Proclamandum est et observandum principium quod vocant de *non-interventu*.

Alloc. *Novos et ante* 28 septembri 1860 (pag. 181.)

LXIII. Legitimis principibus obedientiam detrectare, immo et rebellare licet.

Epist. encycl. *Qui pluribus* 9 novembris 1846 (*pag. 3.*)

Alloc. *Quisque vestrum* 4 octobris 1847 (*pag. 19.*)

Epist. encycl. *Nostis et Nobiscum* 8 decembris 1849 (*pag. 50.*)

Litt. Apost. *Cum catholica* 26 martii 1860 (*pag. 169.*)

LXIV. Tum cuiusque sanctissimi iuramenti violatio, tum quaelibet scelestia flagitiosaque actio sempiternae legi repugnans, non solum haud est improbanda, verum etiam omnino licita, summisque laudibus efferenda, quando id pro patriae amore agatur.

Alloc. *Quibus quantisque* 20 aprilis 1849 (*pag. 29.*)

§. VIII.

Errores de matrimonio christiano.

LXV. Nulla ratione ferri potest, Christum evexisse matrimonium ad dignitatem sacramenti.

Litt. Apost. *Ad apostolicae* 22 augusti 1851 (*pag. 91.*)

LXVI. Matrimonii sacramentum non est nisi quid contractui accessorium ab eoque separabile, ipsumque sacramentum in una tantum nuptiali benedictione situm est.

Litt. Apost. *Ad apostolicae* 23 augusti 1851 (*pag. 91.*)

LXVII. Iure naturae matrimonii vinculum non est indissolubile, et in variis casibus divortium proprie dictum auctoritate civili sanciri potest.

Litt. Apost. *Ad apostolicae* 22 augusti 1851 (*pag. 91.*)

Alloc. *Acerbissimum* 27 septembris 1852 (*pag. 110.*)

LXVIII. Ecclesia non habet potestatem impedimenta matrimonium dirimentia inducendi, sed ea potestas civili auctorati competit, a qua impedimenta existentia tollenda sunt.

Litt. Apost. *Multiplices inter* 10 iunii 1851 (*pag. 87.*)

LXIX. Ecclesia sequioribus saeculis dirimentia impedimenta inducere coepit , non iure proprio, sed illo iure usa, quod a civili potestate mutuata erat.

Litt. Apost. *Ad apostolicae* 22 augusti 1851 (pag. 91.)

LXXX. Tridentini canones qui anathematis censuram illis inferunt, qui facultatem impedimenta dirimentia inducendi Ecclesiae negare audeant, vel non sunt dogmatici vel de hac mutuata potestate intelligendi sunt.

Litt. Apost. *Ad apostolicae* 22 augusti 1851 (pag. 91.)

LXXI. Tridentini forma sub infirmitatis poena non obligat, ubi lex civilis aliam formam praestituat, et velit hac nova forma interveniente matrimonium valere.

Litt. Apost. *Ad apostolicae* 22 augusti 1841 (pag. 91.)

LXXII. Bonifacius VIII votum castitatis in ordinatione emissum nuptias nullas reddere primus asseruit.

Litt. Apost. *Ad apostolicae* 22 augusti 1851 (pag. 91.)

LXXIII. Vi contractus mere civilis potest inter christianos constare veri nominis matrimonium; falsumque est, aut contractum matrimonii inter christianos semper esse sacramentum , aut nullum esse contractum , si sacramentum excludatur.

Litt. Apost. *Ad apostolicae* 22 augusti 1851 (pag. 91.)

Lettera di S. S. Pio IX al Re di Sardegna, 9 settembre 1852 (pag. 104.)

Alloc. *Acerbissimum* 27 septembris 1852 (pag. 110.)

Alloc. *Multis gravibusque* 17 decembris 1860 (pag. 188.)

LXXIV. Caussae matrimoniales et sponsalia suapte natura ad forum civile pertinent.

Litt. Apost. *Ad apostolicae* 22 augusti 1851 (pag. 91.)

Alloc. *Acerbissimum* 27 septembris 1852 (pag. 110.)

N. B. Huc referri possunt duo alii errores de clericorum coelibatu abolendo et de statu matrimonii statui virginitatis anteferendo. Confodiuntur, prior in Epist. encycl.

Qui pluribus 9 Novembris 1846 (pag. 3.), posterior in Litteris apost. Multiplices inter 10 Iunii 1851 (pag. 87.)

§. IX.

Errores de civili Romani Pontificis principatu.

LXXV. De temporalis regni cum spirituali compatibilitate disputant inter se christianae et catholicae Ecclesiae filii.

Litt. Apost. *Ad apostolicae* 22 augusti 1851 (pag. 91.)

LXXVI. Abrogatio civilis imperii, quo Apostolica Sedes potitur, ad Ecclesiae libertatem felicitatemque vel maxime conduceret.

Alloc. *Quibus quantisque* 20 aprilis 1849 (pag. 29.)

N. B. Praeter hos errores explicite notatos, alii complures implicite reprobantur, proposita et asserta doctrina, quam catholici omnes firmissime retinere debeant, de civili Romani Pontificis principatu. Eiusmodi doctrina luculenter traditur in Alloc. *Quibus quantisque* 20 Aprilis 1849 (pag. 29.); in Alloc. *Si semper antea* 20 Maii 1850 (pag. 70.); in Litt. apost. *Cum catholica Ecclesia* 26 Mart. 1860 (pag. 169.); in Alloc. *Novos* 28 Sept. 1860 (pag. 181.); in Alloc. *Iamdudum* 18 Mart. 1861 (pag. 196.); in Alloc. *Maxima quidem* 9 Iunii 1862 (pag. 210.)

§. X.

Errores qui ad liberalismum referuntur.

LXXVII. Aetate hac nostra non amplius expedit, religionem catholicam haberi tamquam unicam Status religionem, ceteris quibuscumque cultibus exclusis.

Alloc. *Nemo vestrum* 26 iulii 1855 (pag. 136.)

LXXVIII. Hinc laudabiliter in quibusdam catholici nominis regionibus lege cautum est, ut hominibus illuc immigrantibus liceat publicum proprii cuiusque cultus exercitium habere.

Alloc. *Acerbissimum* 27 septembris 1852 (pag. 110.)

LXXIX. Enimvero falsum est, civilem cuiusque cultus libertatem, itemque plenam potestatem omnibus attributam quaslibet opiniones cogitationesque palam publiceque manifestandi conducere ad populorum mores animosque facilius corrumpendos ac indifferentismi pestem propagandam.

Alloc. *Nunquam fore* 15 decembris 1856 (pag. 156.)

LXXX. Romanus Pontifex potest ac debet cum progressu, cum liberalismo et cum recenti civilitate sese reconciliare et componere.

Alloc. *Iamdudum cernimus* 18 martii 1861 (pag. 196.)

A C T A

SS. D. N.

P I I P P. I X.

EX QUIBUS EXCERPTUS EST

S Y L L A B U S

EPISTOLA ENCYCLICA

AD OMNES PATRIARCHAS, PRIMATES, ARCHIEPISCOPOS ET EPISCOPOS
DIE IX NOVEMBRIS ANNI MDCCCXLVI.

VENERABILES FRATRES

Salutem et Apostolicam Benedictionem.

Qui pluribus 1 iam abhinc annis una Vobiscum , Venerabiles Fratres , episcopale munus plenum laboris , plenum sollicitudinis pro viribus obire, ac Dominici gregis partem curae Nostrae commissam pascere nitebamur in montibus Israel , in rivis et pascuis uberrimis, ecce ob mortem clarissimi Praedecessoris Nostri Gregorii XVI , cuius certe memoriam , atque illustria et gloriosa facta aureis notis inscripta in Ecclesiae fastis semper admirabitur posteritas , praeter omnem opinionem , cogitationemque nostram , arcano divinae Providentiae consilio , ad Summum Pontificatum non sine maxima animi Nostri perturbatione ac trepidatione evecti fuimus. Etenim si semper grave admodum et periculosum Apostolici ministerii onus merito est habilum , atque habendum, hisce quidem difficillimis christianaे reipublicae temporibus vel maxime formidandum. Itaque infirmitatis Nostrae probe consciī , et gravissima supremi Apostolatus officia in tanta praesertim rerum vicissitudine considerantes , tristitiae et lacrimis Nos plane tradidissemus , nisi omnem spem poneremus in Deo salutari Nostro , qui numquam derelinquit sperantes in Eo, quique, ut potentiae suaे virtutem ostendat , ad suam regendam

Ecclesiam infirmiora identidem adhibet, quo magis magisque omnes cognoscant Deum ipsum esse, qui Ecclesiam admirabili sua providentia gubernat, atque tuetur. Illa etiam consolatio Nos vehementer sustentat, quod in animarum salute procuranda Vos socios et adiutores habeamus, Venerabiles Fratres, qui in sollicitudinis Nostrae partem vocati, omni cura et studio ministerium vestrum implere, ac bonum certamen certare contenditis. Hinc ubi primum in sublimi hac Principis Apostolorum Cathedra, licet immerentes, collocati in persona Beati Petri gravissimum munus ab ipso aeterno Pastorum Principe divinitus tributum accepimus pascendi ac regendi non solum agnos, universum scilicet Christianum populum, verum etiam oves, hoc est Antistites, nihil certe Nobis potius, nihil optabilius fuit, quam ut intimo caritatis affectu Vos omnes alloqueremur. Quamobrem vix dum ex more institutoque Decessorum Nostrorum in Nostra Lateranensi Basilica Summi Pontificatus possessionem suscepimus, nulla interposita mora has ad Vos Litteras damus, ut eximiam vestram excitemus pietatem, quo maiore usque alacritate, vigilantia, contentione custodientes vigilias noctis super gregem curae vestrae commissum, atque episcopali robore et constantia adversus terrimum humani generis hostem dimicantes, veluti boni milites Christi Iesu, strenue opponatis murum pro Domo Israel.

Neminem vestrum lalet, Venerabiles Fratres, hac nostra deploranda aetate acerrimum ac formidolosissimum contra catholicalm rem universam bellum ab iis hominibus conflari, qui nefaria inter se societate coniuncti sanam non sustinentes doctrinam, atque a veritate auditum avertentes, omnigena opinionum portenta e tenebris eruere, eaque totis viribus exaggerare, atque in vulgus prodere et disseminare contendunt. Horrescimus quidem animo, et acerbissimo dolore conficimur, cum omnia errorum monstra, et varias multiplicesque nocendi artes, insidias, machinationes mente recogitamus, quibus hi veritatis et lucis osores, et peritissimi fraudis artifices omne pietatis, iustitiae, honestatis studium in omnium animis restinguere, mores corrumpere, iura quaeque divina et humana perturbare, catholicam

religionem, civilemque societatem convellere, labefactare, immo, si fieri umquam posset, funditus everttere commoliuntur. Noscitis enim, Venerabiles Fratres, hos infensissimos christiani nominis hostes, caeco quodam insanientis impietatis impetu misere raptos, eo opinandi temeritate progredi, ut inaudita prorsus audacia *aperientes os suum in blasphemias ad Deum* ¹, palam publiceque edocere non erubescant, commentitia esse, et hominum inventa sacrosancta nostrae religionis mysteria, catholicae Ecclesiae doctrinam humanae societatis bono et commodis adversari, ac vel ipsum Christum et Deum eiurare non extimescant. Et quo facilius populis illudant, atque incautos praesertim et imperitos decipient, et in errores secum abripiant, sibi unis prosperitatis vias notas esse comminiscuntur, sibique philosophorum nomen arrogare non dubitant, perinde quasi philosophia, quae tota in naturae veritate investiganda versatur, ea respucere debeat, quae supremus et clementissimus ipse totius naturae auctor Deus singulari beneficio et misericordia hominibus manifestare est dignatus, ut veram ipsi felicitatem et salutem assequantur. Hinc praepostero sane et fallacissimo argumentandi genere numquam desinunt humanae rationis vim et excellentiam appellare, extollere contra sanctissimam Christi fidem, atque audacissime blaterant, eam humanae refragari rationi. Quo certe nihil dementius, nihil magis impium, nihil contra ipsam rationem magis repugnans fingi, vel excogitari potest. Etsi enim fides sit supra rationem, nulla tamen vera dissensio, nullumque dissidium inter ipsas inveniri umquam potest, cum ambae ab uno eodemque immutabilis aeternaeque veritatis fonte Deo Optimo Maximo oriantur, atque ita sibi mutuam opem ferant, ut recta ratio fidei veritatem demonstret, tueatur, defendat; fides vero rationem ab omnibus erroribus liberet, eamque divinarum rerum cognitione mirifice illustret, confirmet atque perficiat. Neque minori certe fallacia, Venerabiles Fratres, isti divinae revelationis inimici humanum progressum summis laudibus efferentes, in catholicam

¹ Apocalyps. XIII. 6.

religionem temerario plane , ac sacrilego ausu illum inducere vellent , perinde ac si ipsa religio non Dei , sed hominum opus esset , aut philosophicum aliquod inventum , quod humanis modis perfici queat. In istos tam misere delirantes percommode quidem cadit , quod Tertullianus sui temporis philosophis merito exprobabat , qui *Stoicum* , et *Platonicum* , et *Dialecticum Christianismum protulerunt* 1. Et sane cum sanctissima nostra religio non ab humana ratione fuerit inventa , sed a Deo hominibus clementissime patefacta , tum quisque vel facile intelligit , religionem ipsam ex eiusdem Dei loquens auctoritate omnem suam vim acquirere , neque ab humana ratione deduci , aut perfici umquam posse. Humana quidem ratio , ne in tanti momenti negotio decipiatur et erret , divinae revelationis factum diligenter inquirat oportet , ut certo sibi constet Deum esse loquutum ac Eisdem , quemadmodum sapientissime docet Apostolus , rationabile obsequium exhibeat 2. Quis enim ignorat vel ignorare potest , omnem Deo loquenti fidem esse habendam , nihilque rationi ipsi magis consentaneum esse , quam iis acquiescere , firmiterque adhaerre , quae a Deo , qui nec falli nec fallere potest , revelata esse considererit ?

Sed quam multa , quam mira , quam splendida praesto sunt argumenta , quibus humana ratio luculentissime evinci omnino debet , divinam esse Christi religionem , et *omne dogmatum nostrorum principium radicem desuper ex caelorum Domino acceptissimum* 3 , ac propterea nihil fide nostra certius , nihil securius , nihil sanctius existare , et quod firmioribus innitatur principiis. Haec scilicet fides vitae magistra , salutis index , vitiorum omnium expultrix , ac virtutum foecunda parens et altrix , divini sui auctoris et consummatoris Christi Iesu nativitate , vita , morte , resurrectione , sapientia , prodigiis , vaticinationibus confirmata , supernae doctrinae luce undique resfulgens , ac caelestium divitiae-

1 Tertull. de Praescript. cap. VIII.

2 Ad Rom. XIII. 1.

3 S. Ioann. Chrysost. Homil. I. in Isai.

rum ditata thesauris , tot Prophetarum praedictionibus , tot miraculorum splendore , tot Martyrum constantia , tot Sanctorum gloria vel maxime clara et insignis salutares proferens Christi leges , ac maiores in dies ex crudelissimis ipsis persecutionibus vires acquirens , universum orbem terra marique , a solis ortu usque ad occasum , uno Crucis vexillo pervasit , atque idolorum profligata fallacia , errorum depulsa caligine , triumphatisque cuiusque generis hostibus omnes populos , gentes , nationes utcumque immanitate barbaras , ac indole , moribus , legibus , institutis diversas divinae cognitionis lumine illustravit , atque suavissimo ipsius Christi iugo subiecit , annuntians omnibus pacem , annuntians bona . Quae certe omnia tanto divinae sapientiae , ac potentiae fulgore undique collucent , ut cuiusque mens et cogitatio vel facile intelligat christianam fidem Dei opus esse . Itaque humana ratio ex splendidissimis hisce , aequa ac firmissimis argumentis clare aperteque cognoscens Deum eiusdem fidei auctorem existere , ulterius progredi nequit , sed quavis difficultate ac dubitatione penitus abiecta , atque remota , omne eidem fidei obsequium praebeat oportet , cum pro certo habeat a Deo traditum esse quidquid fides ipsa hominibus credendum , et agendum proponit .

Atque hinc plane appareat in quanto errore illi etiam versentur , qui ratione abutentes , ac Dei eloquia tamquam humanum opus existimantes , proprio arbitrio illa explicare , interpretari temere audent , cum Deus ipse vivam constituerit auctoritatem , quae verum legitimumque caelestis suaे revelationis sensum doceret , constabiliret , omnesque controversias in rebus fidei , et morum *infallibili* iudicio dirimeret , ne fideles circumferantur omni vento doctrinae in nequitia hominum ad circumventionem erroris . Quae quidem viva , et *infallibilis* auctoritas in ea tantum viget Ecclesia , quae a Christo Domino supra Petrum totius Ecclesiae Caput , Principem et Pastorem , cuius fidem numquam defecuram promisit , aedificata suos legitimos semper habet Pontifices sine intermissione ab ipso Petro ducentes originem in eius Cathedra collocatos , et eiusdem etiam doctrinae , dignitatis , honoris ac po-

testatis haeredes et vindices. Et quoniam ubi Petrus ibi Ecclesia ¹, ac Petrus per Romanum Pontificem loquitur ², et semper in suis successoribus vivit, et iudicium exercet ³, ac praestat quaerentibus fidei veritatem ⁴, idcirco divina eloquia eo plane sensu sunt accipienda, quem tenuit ac tenet haec Romana Beatissimi Petri Cathedra, quae omnium Ecclesiarum mater et magistra ⁵ fidem a Christo Domino traditam, integrum inviolatamque semper servavit, eamque fideles edocuit, omnibus ostendens salutis semitam, et incorruptae veritatis doctrinam. Haec siquidem principalis Ecclesia, unde unitas Sacerdotalis exorta ⁶, haec pietatis metropolis, in qua est integra christiana religionis ac perfecta soliditas ⁷, in qua semper Apostolicae Cathedrae viguit Principatus ⁸, ad quam propter potiorem principalitatem necesse est omnem convenire Ecclesiam, hoc est qui sunt undique fideles ⁹, cum qua quicumque non colligit, spargit ¹⁰. Nos igitur, qui inscrutabili Dei iudicio in hac veritatis Cathedra collocati sumus, egregiam vestram pietatem vehementer in Domino excitamus, Venerabiles Fratres, ut omni sollicitudine et studio fideles curae vestrae concreditos assidue monere, exhortari connitamini, ut hisce principiis firmiter adhaerentes numquam se ab iis decipi, et in errorem induci patientur, qui abominabiles facti in studiis suis humani progressus obtentu fidem destruere, eamque rationi impie subiucere ac Dei eloquia invertere contendunt, summamque Deo ipsi iniuriam inferre non reformidant, qui caelesti sua religione hominum bono atque saluti clementissime consulere est dignatus.

¹ S. Ambros. in Psal. 40.

² Concil. Chalced. Act. 2.

³ Synod. Ephes. Act. 3.

⁴ S. Petr. Chrysol. Epist. ad Eutich.

⁵ Concil. Trid. Sess. VII. de Baptis.

⁶ S. Cyprian. Epist. 55. ad Cornel. Pontif.

⁷ Litter. Synod. Ioan. Constantinop. ad Hormisd. Pontif. et Sozom. Histor. Lib. 3. cap. 8.

⁸ S. August. Epist. 162.

⁹ S. Irenaeus Lib. 3. contra haereses cap. 3.

¹⁰ S. Hieronym. Epist. ad Damas. Pontif.

Iam vero probe noscitis, Venerabiles Fratres, alia errorum monstra et fraudes, quibus huius saeculi filii catholicam religionem, et divinam Ecclesiae auctoritatem, eiusque leges acerrime oppugnare, et tum sacrae, tum civilis potestatis iura conculcare conantur. Huc spectant nefariae molitiones contra hanc Romanam Beatissimi Petri Cathedram, in qua Christus posuit inexpugnabile Ecclesiae suac fundatum. Huc clandestinae illae sectae e tenebris ad rei tum sacrae, tum publicae exitium et vastitatem emersae, atque a Romanis Pontificibus Decessoribus Nostris iteratio anathemate damnatae suis Apostolicis Litteris ¹, quas Nos Apostolicae Nostrae potestatis plenitudine confirmamus, et diligenter servari mandamus. Hoc volunt vaferimae Biblicae Societates, quae veterem haereticorum artem renovantes, divinarum Scripturarum libros contra sanctissimae Ecclesiae regulas vulgaribus quibusque linguis translatos, ac perversis saepe explicationibus interpretatos, maximo exemplarium numero, ingentique expensa omnibus cuiusque generis hominibus etiam rudioribus gratuito impertiri, obtrudere non cessant, ut divina tradizione, Patrum doctrina, et catholicae Ecclesiae auctoritate reiecta, omnes eloquia Domini privato suo iudicio interpretentur, eorumque sensum pervertant, atque ita in maximos elabantur errores. Quas Societas suorum Decessorum exempla aemulans recol. mem. Gregorius XVI, in cuius locum meritis licet imparibus suffecti sumus, suis Apostolicis Litteris reprobavit ², et Nos pariter damnatas esse volumus. Huc spectat horrendum, ac vel ipsi naturali rationis lumini maxime repugnans de cuiuslibet religionis indifferentia sistema, quo isti veteratores, omni virtutis et vitii, veritatis et erroris, honestatis et turpidinis sublato discrimine, homines in cuiusvis religionis cultu aeternam salutem assequi posse commiscuntur, perinde ac si ulla umquam esse posset participatio iustitiae cum iniquitate, aut societas lucis ad tenebras, et conven-

¹ Clemens XII Const. *In eminenti*, Bened. XIV Const. *Providas*, Pius VII Const. *Ecclesiam a Iesu Christo*, Leo XII Const. *Quo graviora*.

² Gregor. XVI in Litteris Encyclicis ad omnes Episcopos, quarum initium: *Inter praecipuas machinationes*.

tio Christi ad Belial. Huc spectat foedissima contra sacrum clericorum caelibatum conspiratio , quae a nonnullis etiam , proh dolor ! ecclesiasticis viris fovet, qui propriae dignitatis misere oblii, se voluptatum blanditiis et illecebris vinci et deliniri patiuntur ; huc perversa in philosophicis praesertim disciplinis docendi ratio, quae improvidam iuventutem miserandum in modum decipit, corruptit , eique fel draconis in calice Babylonis propinat ; huc infanda, ac vel ipsi naturali iuri maxime adversa de *Communismo* , uti vocant , doctrina , qua semel admissa , omnium iura , res, proprietates, ac vel ipsa humana societas funditus everterentur ; huc tenebricosissimae eorum insidiae, qui in vestitu ovium, cum intus sint lupi rapaces , mentita ac fraudulenta purioris pietatis , et severioris virtutis , ac disciplinae specie humiliter irreppunt, blande capiunt, molliter ligant, latenter occidunt, hominesque ab omni religionis cultu absterrent , et dominicas oves maculant atque discerpunt. Huc denique, ut cetera, quae Vobis apprime nota ac perspecta sunt , omittamus , tetrica tot undique volantium, et peccare docentium voluminum ac libellorum contagio, qui apte compositi, ac fallaciae et artificii pleni, immanibusque sumptibus per omnia loca in christiana plebis interitum dissipati, pestiferas doctrinas ubique disseminant, incautorum potissimum mentes, animosque depravant, et maxima religioni inferunt detimenta. Ex hac undique serpentium errorum colluvie, alque effrenata cogitandi , loquendi , scribendique licentia mores in deterius prolapsi, sanctissima Christi spreta religio, divini cultus improbata maiestas , huius Apostolicae Sedis divexata potestas, Ecclesiae oppugnata alque in turpem servitutem redacta auctoritas, Episcoporum iura conculcata , matrimonii sanctitas violata , cuiusque potestatis regimen labefactatum , ac tot alia tum christiana, tum civilis reipublicae damna, quae communibus lacrimis una Vobiscum flere cogimur, Venerabiles Fratres.

In tanta igitur religionis, rerum ac temporum vicissitudine de universi Dominici gregis salute Nobis divinitus commissa vehementer solliciti, pro Apostolici Nostri ministerii officio nihil certe inausum, nihilque intentatum relinquemus , quo cunctae christia-

nae familiae bono tolis viribus consulamus. Verum praeclaram quoque vestram pietatem, virtutem, prudentiam summopere in Domino excitamus, Venerabiles Fratres, ut caelesti ope freti una Nobiscum Dei, Eiusque Sanctae Ecclesiae causam pro loco, quem tenetis, pro dignitate, qua insigniti estis, impavide defendatis. Vobis acriter pugnandum esse intelligitis, cum minime ignoretis quibus quantisque intemerata Christi Iesu Sponsa vulneribus afficiatur, quantoque acerrimorum hostium impetu divexetur. Atque in primis optime noscitis, vestri muneric esse catholicam fidem episcopali robore tueri, defendere, ac summa cura vigilare, ut grex Vobis commissus in ea stabilis et immotus persistat, *quam nisi quisque integrum, inviolatumque servaverit, absque dubio in aeternum peribit* 1. In hanc igitur fidem tuendam, atque servandam pro pastorali vestra sollicitudine diligenter incumbite, neque umquam desinite omnes in ea instruere, confirmare nutantes, contradicentes arguere, infirmos in fide corroborare, nihil umquam omnino dissimulantes ac ferentes, quod eiusdem fidei puritatem vel minimum violare posse videatur. Neque minori animi firmitate in omnibus fovete unionem cum Catholica Ecclesia, extra quam nulla est salus, et obedientiam erga hanc Petri Cathedram, cui tamquam firmissimo fundamento tota sanctissimae nostrae religionis moles innititur. Pari vero constantia sanctissimas Ecclesiae leges custodiendas curate, quibus profecto virtus, religio, pietas summopere vigent et florent. Cum autem *magna sit pietas prodere latebras impiorum, et ipsum in eis, cui serviunt, diabolum debellare* 2, illud obsecrantes monemus, ut omni ope et opera multiformes inimicorum hominum insidias, fallacias, errores, fraudes, machinationes fideli populo detegere, eumque a pestiferis libris diligenter avertere, atque assidue exhortari velitis, ut impiorum sectas, et societas fugiens tamquam a facie columbri, ea omnia studiosissime devitet, quae fidei, religionis, morumque integritati adversantur. Qua de re numquam omnino sit,

1 Ex Symbolo *Quicumque*.

2 S. Leo Serm. VIII. cap. 4.

ut cassetis praedicare Evangelium, quo christiana plebs magis in dies sanctissimis christianaे legis praeceptionibus erudita crescat in scientia Dei, declinet a malo , et faciat bonum , atque ambulet in viis Domini. Et quoniam nostis Vos pro Christo legatione fungi, qui se mitem et humilem corde est professus, quique non venit vocare iustos, sed peccatores, relinquens nobis exemplum, ut sequamur vestigia eius ; quos in mandatis Domini delinquentes, atque a veritatis et iustitiae semita aberrantes inveneritis , haud omittite eos in spiritu lenitatis et mansuetudinis paternis monitis, et consiliis corripere atque arguere, obsecrare , increpare in omni bonitate, patientia et doctrina, cum *saepe plus erga corrigen-dos agat benevolentia, quam austertas, plus exhortatio, quam comminatio, plus caritas, quam potestas* ¹. Illud etiam totis viribus praeslare contendite, Venerabiles Fratres, ut fideles caritatem sectentur , pacem inquirant , et quae caritatis et pacis sunt, sedulo exequantur, quo cunctis dissensionibus, inimiciis, aemulationibus, simultatibus penitus extinctis, omnes se mutua caritate diligent , atque in eodem sensu , in eadem sententia perfecti sint , et idem unanimes sentiant , idem dicant , idem sapiant in Christo Iesu Domino Nostro. Debitam erga Principes , et potestates obedientiam ac subiectionem christiano populo inculcare satigate, edocentes iuxta Apostoli monitum ² non esse potestatem nisi a Deo, eosque Dei ordinationi resistere , adeoque sibi damnationem acquirere, qui potestati resistunt, atque idcirco praeceptum potestati ipsi obediendi a nemine umquam citra piaculum posse violari, nisi forte aliquid imperetur, quod Dei et Ecclesiae legibus aduersetur.

Verum cum nihil sit, quod alios magis ad pietatem, et Dei cultum assidue instruat, quam eorum vita et exemplum, qui se divino ministerio dedicarunt ³, et cuiusmodi sunt Sacerdotes, eiusmodi plerumque esse soleat et populus, pro vestra singulari sapientia

¹ Concil. Trident. Sess. XIII. cap. 1. de Riformat.

² Ad Roman. XII. 1. 2.

³ Concil. Trid. Sess. XXII. Cap. 1. de Reform.

perspicitis, Venerabiles Fratres, summa cura et studio Vobis esse elaborandum, ut in Clero morum gravitas, vitae integritas, sanctitas, atque doctrina eluceat, et ecclesiastica disciplina ex Sacrorum Canonum praescripto diligentissime servetur, et ubi collapsa fuerit, in pristinum splendorem restituatur. Quapropter, veluti praecclare scitis, Vobis summopere cavendum, ne cuiquam, iuxta Apostoli praeceptum, cito manus imponatis, sed eos tantum sacris initietis ordinibus, ac sanctis tractandis admoveatis mysteriis, qui accurate exquisiteque explorati, ac virtutum omnium ornatu, et sapientiae laude spectati, vestris dioecesisibus usui et ornamento esse possint, atque ab iis omnibus declinantes, quae Clericis ventita, et attendentes lectioni, exhortationi, doctrinae, *exemplum sint fidelium in verbo, in conversatione, in caritate, in fide, in castitate* ¹, cunctisque afferant venerationem, et populum ad christianae religionis institutionem fingant, excitent, atque inflamment. *Melius enim profecto est*, ut sapientissime monet immortalis memoriae Benedictus XIV Decessor Nosler, *pauciores habere ministros, sed probos, sed idoneos, atque utiles, quam plures qui in aedificationem Corporis Christi, quod est Ecclesia, nequidquam sint valituri* ². Neque vero ignoratis, maiori diligentia Vobis in illorum praecipue mores, et scientiam esse inquirendum, quibus animarum cura et regimen committitur, ut ipsi tamquam fideles multiformis gratiae Dei dispensatores plebem sibi concreditam sacramentorum administratione, divini verbi praedicatione ac bonorum operum exemplo continenter pascere, iuvare, eamque ad omnia religionis instituta, ac documenta informare, atque ad salutis semitam perducere studeant. Intelligitis nimirum Parochis officii sui ignaris, vel negligentibus, continuo et populorum mores prolabi, et christianam laxari disciplinam, et religionis cultum exsolvi, atque convelli, ac vitia omnia et corruptelas in Ecclesiam facile invehi. Ne autem Dei sermo, *qui vivus, et efficax, et pene-*

¹ Ad Timoth. 4. 12.

² Bened. XIV in Epist. Encycl. ad omnes Episcopos cuius initium : *Ubi primum.*

trabilior omni gladio ancipiti ¹ ad animarum salutem est institutus, ministrorum vitio infructuosus evadat, eiusdem divini verbi praeconibus inculcare, praecipere numquam desinite, Venerabiles Fratres, ut gravissimum sui munera officium animo reputantes, evangelicum ministerium non in persuasilibus humanae sapientiae verbis, non in profano inanis et ambitiosae eloquentiae apparatu et lenocinio, sed in ostensione spiritus et virtutis religiosissime exerceant, ut recle tractantes verbum veritatis, et non semelipsos, sed Christum Crucifixum praedicantes, sanctissimae nostrae religionis dogmata, pracepta iuxta catholicae Ecclesiae et Patrum doctrinam gravi ac splendido orationis genere populis clare aperteque annuncient, peculiaria singulorum officia accurate explicent, omnesque a flagitiis deterreant, ad pietatem inflament, quo fideles Dei verbo salubriter imbuti atque refecti vitia omnia declinent, virtutes sectentur, atque ita aeternas poenas evadere, et caelestem gloriam consequi valeant. Universos ecclesiasticos viros pro pastorali vestra sollicitudine et prudentia assidue monete, excitate, ut serio cogitantes ministerium, quod accepserunt in Domino, omnes proprii munera partes diligentissime impleant, domus Dei decorem summopere diligent, atque intimo pietatis sensu sine intermissione instant obsecrationibus et precibus, et Canonicas horas ex Ecclesiae pracepto persolvant, quo et divina sibi auxilia ad gravissima officii sui munera obeunda impetrare, et Deum christiano populo placatum ac propitium reddere possint.

Cum autem, Venerabiles Fratres, vestram sapientiam minime fugiat, idoneos Ecclesiae ministros nonnisi ex optime institutis clericis fieri posse, magnamque vim in recta horum institutione ad reliquum vitae cursum inesse, pergit omnes episcopalis vestri zeli nervos in id potissimum intendere, ut adolescentes clerici vel a teneris annis tum ad pietatem solidamque virtutem, tum ad litteras severioresque disciplinas, praesertim sacras, rite informantur. Quare Vobis nihil antiquius, nihil potius esse debet, quam

¹ Ad Hebr. 4. V. 12.

omni opera, sollertia, industria clericorum Seminaria ex Tridentinorum Patrum praescripto 1 instituere, si nondum existunt, atque instituta, si opus fuerit, amplificare, eaque optimis moderatoribus, et magistris instruere, ac intentissimo studio continenter ad vigilare, ut inibi iuniores clerici in timore Domini, et ecclesiastica disciplina sancte, religioseque educentur, et sacris potissimum scientiis iuxta catholicam doctrinam ab omni prorsus cuiusque erroris periculo alienis, et Ecclesiae traditionibus, et sanctorum Patrum scriptis, sacrisque caeremoniis, ritibus sedulo, ac penitus excolantur, quo habere possitis navos atque industrios operarios, qui ecclesiastico spiritu praediti, ac studiis recte instituti valeant in tempore dominicum agrum diligenter excolere, ac strenue proeliari proelia Domini. Porro cum Vobis compertum sit ad ecclesiastici ordinis dignitatem, et sanctimoniam retinendam et conservandam pium spiritualium exercitiorum institutum vel maxime conducere, pro episcopali vestro zelo tam salutare opus urgere, omnesque in sortem Domini vocatos monere, hortari ne intermittatis, ut saepe in opportunum aliquem locum iisdem peragendis exercitis secedant, quo, exterioribus curis sepositis, ac vehementiori studio aeternarum divinarumque rerum mediationi vacantes, et contractas de mundano pulvere sordes detergere, et ecclesiasticum spiritum renovare possint, atque expoliantes veterem hominem cum actibus suis, novum induant, qui creatus est in iustitia, et sanctitate. Neque Vos pigeat si in Cleri institutione et disciplina paulo diutius immorati sumus. Etenim minime ignoratis multos existere, qui errorum varietatem, inconstantiam, mutabilitatemque pertaesit, ac sanctissimam nostram religionem profitendi necessitatem sentientes, ad ipsius religionis doctrinam, pracepta, instituta eo facilius, Deo bene iuvante, amplectenda, colenda adducentur, quo maiori Clerum pietatis, integritatis, sapientiae laude, ac virtutum omnium exemplo, et splendorceteris antecellere conspexerint.

Ceterum, Fratres Carissimi, non dubitamus, quin Vos omnes ardenti erga Deum et homines caritate incensi, summo in Ecclesiam amore inflammati, angelicis pene virtutibus instructi, episcopali fortitudine, prudentia muniti, uno eodemque sanctae voluntatis desiderio animati, Apostolorum vestigia sectantes, et Christum Iesum Pastorum omnium exemplar, pro quo legatione fungimini, imitantes, quemadmodum decet Episcopos, concordissimis studiis facti forma gregis ex animo, sanctitatis vestrae splendore clerum populumque fidelem illuminantes, atque induti viscera misericordiae, et condolentes iis, qui ignorant et errant, devias ac pereuntes oves evangelici Pastoris exemplo amanter quaerere, persequi, ac paterno affectu vestris humeris impetrare, ad ovile reducere, ac nullis neque curis, neque consiliis, neque laboribus parcere umquam velitis, quo omnia pastoralis munieris officia religiosissime obire, ac omnes dilectas Nobis oves pretiosissimo Christi Sanguine redemptas, et curae vestrae commissas a rapacium luporum rabie, impetu, insidiis defendere, easque ab venenatis pascuis arcere, ad salutaria propellere, et qua opere, qua verbo, qua exemplo ad aeternae salutis portum deducere valeatis. In maiori igitur Dei et Ecclesiae gloria procuranda viriliter agite, Venerabiles Fratres, et omni alacritate, sollicitudine, vigilantia in hoc simul elaborate, ut omnibus erroribus penitus depulsis, vitiisque radicus evulsis, fides, religio, pietas, virtus maiora in dies ubique incrementa suscipiant, cunctaque fideles abiicientes opera tenebrarum, sicut filii lucis ambulent digne Deo per omnia placentes, et in omni opere bono fructificantes. Atque inter maximas angustias, difficultates, pericula, quae a gravissimo episcopali vestro ministerio hisce praesertim temporibus abesse non possunt, nolite umquam terreri, sed confortamini in Domino, et in potentia virtutis Eius, *qui nos in congreessione nominis sui constitutos desuper spectans, volentes comprobat, adiuvat dimicantes, vincentes coronat* 1. Cum autem Nobis nihil gratius, nihil iucundius, nihil optabilius quam Vos omnes, quos diligimus in

1 S. Cyprian. Epist. 77. ad Nemesianum et ceteros Martyres.

visceribus Christi Iesu, omni affectu, consilio, opera iuvare, atque una Vobiscum in Dei gloriam et catholicam fidem tuendam, propagandam toto pectore incumbere, et animas salvas facere, pro quibus vitam ipsam, si opus fuerit, profundere parati sumus, venite, Fratres, obtestamur, et obsecramus, venite magno animo, magna fiducia ad hanc Beatissimi Apostolorum Principis Sedem, Catholicae unitatis centrum, atque Episcopatus apicem, unde ipse Episcopatus, ac tota eiusdem nominis auctoritas emersit, venite ad Nos quotiescumque Nostrae, et eiusdem Sedis auctoritatis ope, auxilio, praesidio Vos indigere noveritis.

In eam porro spem erigimur fore, ut Carissimi in Christo Filii Nostri Viri Principes pro eorum pietate, et religione in memoriam revocantes *regiam potestatem sibi non solum ad mundi regimen, sed maxime ad Ecclesiae praesidium esse collatam* ¹, et Nos cum Ecclesiae causam, tum eorum regni agere, et salutis, *ut provinciarum suarum quieto iure potiantur* ², communibus nostris votis, consiliis, studiis sua ope et auctoritate faveant, atque ipsius Ecclesiae libertatem incolumentem defendat, ut *et Christi dextera eorum defendatur imperium* ³.

Quae omnia ut prospere, feliciterque ex sententia succedant, adeamus cum fiducia, Venerabiles Fratres, ad thronum gratiae, atque unanimes in humilitate cordis nostri Patrem misericordiarum et Deum totius consolationis enixis precibus sine intermissione obsecremus, ut per merita Unigeniti Filii sui infirmitatem nostram omnium caelestium Charismatum copia cumulare dignetur, atque omnipotenti sua virtute expugnet impugnantes nos, et ubique augeat fidem, pietatem, devotionem, pacem, pro Ecclesia sua sancta, omnibus adversitatibus et erroribus penitus sublatis, optatissima tranquillitate fruatur, ac fiat unum ovile et unus pastor. Ut autem clementissimus Dominus facilis inclinet aurem suam in preces nostras et nostris annuat votis, deprecaticem

¹ S. Leo Epist. 156. alias 125. ad Leonem Augustum.

² S. Leo Epist. 43. alias 34. ad Theodosium Augustum.

³ Idem ibid.

apud Ipsum semper adhibeāmus sanctissimam Dei Genitricem Immaculatam Virginem Mariam, quae nostrum omnium dulcissima mater, mediatrix, advocata et spes fidelissima ac maxima fiducia est, cuius patrocinio nihil apud Deum validius, nihil praesentius. Invocemus quoque Apostolorum Principem, cui Christus ipse tradidit claves regni caelorum, quemque Ecclesiae suae petram constituit, adversus quam portae inferi praevalere numquam poterunt et Coapostolum eius Paulum, atque omnes Sanctos caelites, qui iam coronati possident palmam, ut desideratam divinae propitiationis abundantiam universo christiano populo impetrent.

Denique caelestium omnium munera auspicem, et potissimae Nostrae in Vos caritatis testem, accipite Apostolicam Benedictiōnem, quam ex intimo corde depromptam Vobis ipsis, Venerabiles Fratres, et omnibus Clericis, Laicisque Fidelibus curae vestrae concreditis amantissime impertimur.

Datum Romae apud Sanctam Mariam Maiorem, die IX Novembris anno MDCCCXLVI, Pontificatus Nostri anno primo,

ALLOCUTIO

HABITA IN CONSISTORIO SECRETO DIE IV OCTOBRIS
ANNI MDCCCXLVII.

VENERABILES FRATRES

Quisque vestrum ¹, Venerabiles Fratres, optime noscit quibus quantisque divinae nostrae religionis documentis, monumentisque Hierosolyma urbs, et universa Palestinae regio mirandum in modum undique res fulgeant, *ubi et visui et tactui se tota ingerunt humanae sacramenta salutis* ². Siquidem ibi Unigenitus Dei Filius Christus Iesus Dominus Noster propter nimiam, qua nos dilexit, caritatem obumbrata Divinitatis suae maiestate servilem formam indutus et in similitudinem hominum factus ex intacta Davidica Virgine nasci, vitamque suam agere, ac magna miracula operari est dignatus, tribuens peccatoribus misericordiam, aegris salutem, errantibus veritatem, caecis lucem, mortuis vitam. Ibi ad universum humanum genus a peccati iugo et daemonis captivitate vindicandum saevissimam passionem, acerbissimamque crucis mortem sustinuit confusione contempta, ac post triduum *devictae mortis spoliis onustus* ³, divina sua potentia surrexit; ibi quadraginta dierum spatio saepius apparens discipulis suis, ac loquens de regno Dei, postquam illos in fide et caritate roboravit, eisque praecepit, ut euntes in mundum universum praedicarent evangelium omni creaturae, ac docerent serva-

¹ Huc refertur *Propositio 63.*

² S. Leo Epist. ad Iuvenal. Episc. Hierosolymit.

³ S. Ansel. Serm. 52. de Paschat

re omnia quaecumque ipsis mandaverat, magnis revelatis mysteriis, magnisque confirmatis sacramentis, in conspectu sanctae multitudinis triumphans, et captivam dicens captivitatem super omnes caelos ad dexteram Dei Patris concessurus adscendit. Ibi ad Apostolos suos, illuminandos corroborandos atque ad renovandam terrae faciem, veteresque tenebras abigendas, misso sancto Paraclito Spiritu, voluit, ut Apostoli ab Hierosolyma ipsa urbe evangelicae praedicationis opus ordirentur, antequam in omnem dispergerentur orbem. Quae cum ita sint, merito atque optimo iure christiani populi sancta illius regionis loca omni pietatis, religionis et venerationis affectu semper sunt prosequuti. Postquam vero tristissimis rerum ac temporum vicibus regiones illae e christianorum Imperatorum dominatione abreptae fuere, Romani Pontifices Decessores Nostri, et catholici Principes vehementer optantes gravissimis fidelium necessitatibus occurrere, eosque ab iniustissima et crudelissima, qua premebantur, servitute vindicare, variis temporibus nihil intentatum reliquerunt, ut loca ipsa ab infidelium eriperent potestate. Hinc Hierosolymitana Ecclesia, cui ab Innocentio III Praedecessore Nostro in Concilio Lateranensi quarto Patriarchalis dignitas suit confirmata, summo semper in honore habita peculiarem Romanorum Pontificum curam et sollicitudinem sibi comparavit. Qui quidem Romani Pontifices etiam postquam sacra eadem loca ab infidelibus iterum occupata fuere, immo et cum vix ulla de illis recuperandis spes affulgeret, Latinos Patriarchas Hierosolymitanos renuntiare et constituere haudquaquam intermiserunt, licet eos a residendi obligatione solvere, quamdiu loca ipsa ab infidelibus delinerentur, ac spirituali illorum fidelium bono alia ratione pro viribus consulere debuerint.

Nos certe de illa Dominici gregis parte vel maxime solliciti, ac summa erga ipsas regiones piatile affecti, vel ab ipso Nostri Pontificatus exordio nihil antiquius habuimus, quam ut Latini Ritus Patriarcha Hierosolymae iterum in sua sede posset consistere. Cum autem, Deo bene iuvante, difficultates omnes, prout summopere optabamus, penitus sublatas esse conspexerimus, nihilque nunc temporis obslet, quominus ipse Patriarcha Ecclesiae suae curam

praesens agere valeat, nullam moram interponendam duximus, ut huiusmodi res pro maiore Dei gloria atque illorum fidelium utilitate ad optatum exitum adduceretur. Quamobrem tanti momenti negotium iuxta prudentem Nostrae Congregationis de Propaganda Fide sententiam absolvendum curavimus, atque Apostolicas Litteras die decimo kalendas proximi mensis Augusti huius anni annulo Piscatoris obsignatas dedimus, quibus totius rei rationem explicavimus. Et quoniam Venerabilis Frater Daulus Augustus Foscolo, qui Latino Hierosolymitano Patriarchatu potiebatur, se illo abdicavit, et Nos eiusmodi abdicatione accepta atque approbata, ipsum Venerabilem Fratrem a vinculo, quo Hierosolymitanae Ecclesiae obstringebatur, solvimus, idcirco ad novi Patriarchae electionem procedere existimavimus. Itaque commemoratae Congregationis suffragio in Latinum Patriarcham Hierosolymitanum eligere constituimus dilectum Filium Presbyterum Iosephum Valerga, qui singulari integritate, pietate, doctrina, prudentia, ac rerum gerendarum dexteritate spectatus, et huic Petri Cathedrae ex animo addictus, ac Missionarii munere in Syria, Mesopotamia et Perside egregie perfunctus, gravia rei catholicae negotia sibi commissa sedulo scienterque conficienda curavit. Quapropter in eam spem erigimur fore, ut ipse praeclaris hisce dotibus praeditus, easdem caelesti ope fretus ad Patriarchatus locum deferat, atque ad catholicae praesertim religionis incrementum et concredi sibi populi utilitatem maiori alacritate et studio exhibere, atque exercere contendat. Haec sunt, Venerabiles Fratres, quae Vobis communicanda censuimus, dum pro certo habemus, Vos una nobiscum assiduas fervidasque Deo Optimo Maximo preces cum gratiarum actione esse oblato, quo communibus nostris votis clementissime annuens, divina sua gratia efficere velit, ut in illis regionibus, ubi *quilibet christianus habitans ad Evangelii cognoscendam virtutem non solum paginarum eloquiis, sed ipsorum locorum testimoniis eruditur* ¹, catholica fides maiora in dies incrementa suscipiat, ac prospere feliciterque vigeat et floreat.

¹ S. Leo, ibidem.

Atque hic, Venerabiles Fratres, clare aperteque declaramus, tum in hac re, tum in aliis quibusque Nostras omnes curas, cogitationes, studia ab omni prorsus cuiuslibet humanae politices ratione vel maxime aliena eo spectare, ut sanctissima Christi religio, et doctrina ubique terrarum cunctis populis magis magisque affulgeat. Etsi enim exoptemus, ut Viri Pincipes, quibus a Domino data est potestas, avertentes aures suas a fraudulentis et perniciosis consiliis, et custodientes iustitiae legem, ac secundum Dei voluntatem ambulantes, Eiusque sanctae Ecclesiae iura, et libertatem tuentes, pro eorum religione, ac benignitate suorum populum felicitatem prosperitatemque procurare non desistant, tamen vehementer dolemus in diversis locis nonnullos e populo existere, qui Nostro nomine temere abutentes, et gravissimam Personae Nostrae, ac Supremae Dignitati iniuriam inferentes, debitam erga Principes subiectionem denegare, et contra illos turbas, pravosque motus concitare audent. Quod certe a nostris consiliis adeo abhorrere constat, ut in nostris Encyclicis Litteris ad omnes Venerabiles Fratres Episcopos, die nona mensis Novembris superiori anno datis, haud omiserimus inculcare debitam erga Principes, et Potestates obedientiam, a qua iuxta christiana legis paeceptum, nemo citra piaculum deflectere unquam potest, praeterquam scilicet ubi forte aliquid iubeatur, quod Dei, et Ecclesiae legibus aduersetur.

Quid Vobis videtur?

Auctoritate Omnipotentis Dei, Sanctorum Apostolorum Petri et Pauli, ac Nostra, Dilectum Filium Presbyterum Iosephum Valer-
ga ad Patriarchatum Latinum Hierosolymitanum evehimus, eum-
que in illius Ecclesiae Patriarcham et Pastorem praeficimus, pro-
ut in decreto et schedula consistorialibus exprimetur.

In nomine Patris ☧, et Filii ☧, et Spiritus Sancti ☧, Amen.

ALLOCUTIO

HABITA IN CONSISTORO SECRETO DIE XVII DECEMBRIS
ANNI MDCCCXLVII.

VENERABILES FRATRES

Ubi primum ¹ nullis certe Nostris meritis, sed inscrutabili Dei iudicio in hac Principis Apostolorum Cathedra collocati catholicae Ecclesiae gubernacula tractanda suscepimus, Apostolicae Nostrae sollicitudinis curas in Hispaniam convertimus, quemadmodum optime noscitis, Venerabiles Fratres. Hinc intimo Nostri cordis dolore considerantes gravissima damna, quibus ob tristes rerum vicissitudines magna illa et inclita Dominici gregis portio premebatur, divitem in misericordia Deum assiduis enixisque precibus humiliter obsecrare numquam destitimus, ut afflictis illis Ecclesiis opem afferre, easque a misero, in quo versabantur, statu revocare dignaretur. Atque pro Apostolici Nostri ministerii debito, et singulari paternae caritatis affectu, quo illustrem illam nationem prosequimur, nihil certe Nobis potius fuit, quam ut sanctissimae nostrae Religionis negotia ibi componere studeremus. Cum autem felicis recordationis Gregorius XVI Praedecessor Noster incepisset suis instruere Pastoralibus nonnullas illius Regni Dioeceses in dissitis transmarinis regionibus sitas, in id peculiares Nostras curas intendimus, ut aliis pluribus ipsius Regni vacantibus Ecclesiis in continentि etiam positis novos valeremus dare Antistites eo munere dignos, atque ita perficere quod idem Deces-

¹ *Huc refertur Propositio 16.*

sor Noster morte praeventus absolvere minime potuerat. Quamobrem Venerabilem Fratrem Ioannem Archiepiscopum Thessalonicensem virum integritate, doctrina, prudentia, ac rerum gerendarum peritia praestantem cum Nostris ad Carissimam in Christo Filiam Nostram Mariam Elisabeth Reginam Catholicam Litteris, atque opportunis facultatibus et instructionibus in Hispaniam misimus, ut quidquid ad sanandas inibi contritiones Israel, atque ad catholicae religionis bonum promovendum conduceret, omni studio curaret, atque inter alia efficeret ut viduatas illic Ecclesias idoneis Pastoribus concrederemus. Itaque, clementissimo misericordiarum Patre volis studiisque Nostris opitulante, evenit, ut summa animi nostri consolatione nonnullos, veluti nostis, in illis regionibus Antistites iam constituere potuerimus, atque in praesentia multas alias Hispaniarum Cathedrales et Metropolitanas Ecclesias diu vacantes canonico suorum Pastorum regimini et procuracyi tradere, atque ita divini Nominis gloriae, catholicae Religionis bono, ac spirituali illarum dilectorum ovium saluti consulere valeamus. Quod quidem futurum confidimus, cum ex relatione commemorati Venerabilis Fratris Delegati Nostri, atque ex actis maturo examine ab ipso confectis agnoverimus, viros ipsis Dioecesis regendis ac moderandis destinatos eas habere dotes, quae ad pastorale munus rite utiliterque obeundum requiruntur. In eam autem spem erigimur fore, ut quamprimum aliarum illius Regni Ecclesiarum viduitati prospicere possimus, utque rebus iam nunc in meliorem conditionem vergentibus, et favente etiam Catholica Maiestate Sua in aliis porro atque aliis religionis negotiis, in quae idem Venerabilis Frater Delegatus Noster studiosissime incumbit, vota et consilia Nostra felicem dante Domino exitum assequantur.

Alia etiam longe amplissima sub alio magno Principe regio est, in qua catholicae Religionis res diuturnis gravioribusque calamitatibus afflictae ipsum recolenda memoriae Decessorem nostrum multos per annos sollicitum habuerant, et praecipuas Nostras curas sibi pariter vindicarunt. Evidem optavissemus hoc ipso die Vos certiores facere de bono exitu, quem aliqua ex par-

te Nostras ipsas curas habuisse confidebamus. Non defuere autem quidam ephemeridum scriptores, qui id ipsum feliciter evenisse affirmarint. Nos tamen nihil adhuc annuntiare Vobis possumus nisi firmam spem, qua sustentamur fore, ut omnipotens et misericors Deus propitius respiciat super Ecclesiae suae filios tantis inibi tribulationibus conflictatos, et sollicitudini benedicat, qua statum catholicae Religionis in meliorem illic conditionem adducere connitimus.

Nunc porro Vobiscum communicamus, Venerabiles Fratres, summam admirationem, qua intime affecti fuimus, ubi scriptum, a quodam viro ecclesiastica Dignitate insignito elucubratum, tipisque editum, ad Nos pervenit. Namque idem vir in huiusmodi scripto de quibusdam loquens doctrinis, quas Ecclesiarum regionis suae traditiones appellat, et quibus huius Apostolicae Sedis iura coarctare intendit, haud erubuit asserere, traditiones ipsas a Nobis in pretio haberi. Absit enimvero, Venerabiles Fratres, ut mens aut cogitatio Nobis unquam fuerit vel minimum declinare a Maiorum institutis, aut abstinere ab huius Sanctae Sedis auctoritate sarta tecta conservanda, atque tuenda. Habemus equidem in pretio peculiares traditiones; sed eas tantum, quae a Catholicae Ecclesiae sensu non discrepent, praesertim vero illas reveremur ac firmissime tuemur, quae cum aliarum Ecclesiarum traditione, atque in primis cum hac sancta Romana Ecclesia plane congruant, ad quam, ut S. Irenaei verbis utamur, *propter potiorrem principalitatem necesse est omnem convenire Ecclesiam, hoc est eos, qui sunt undique fideles, in qua semper ab his, qui sunt undique, conservata est ea, quae est ab Apostolis traditio* 1.

At aliud insuper est, quod animum Nostrum vehementer angit et urget. Ignotum certe Vobis non est, Venerabiles Fratres, multos hostium Catholicae veritatis in id praesertim nostris temporibus conatus suos intendere; ut monstruosa quaeque opinionum portenta aequiparare doctrinae Christi, aut cum ea commiscere vellent, atque ita impium illud de cuiuslibet religionis *indifferen-*

lia systema magis magisque propagare commoliuntur. Novissime autem, horrendum dictu! inventi aliqui sunt qui eam nomini, et Apostolicae dignitati nostrae contumeliam imposuerunt, ut Nos veluli participes stultitiae suae, et memorati nequissimi systematis fautores traducere non dubitarint. Hi nimirum ex consiliis , a Religioni Catholicae sanctitate haud certe alienis , quae in negotiis quibusdam ad civilem pontificiae Ditionis procurationem spectantibus benigne ineunda duximus publicae commoditati et prosperitati ampliandae , atque ex venia nonnullis eiusdem Ditionis hominibus initio ipso Pontificatus Nostri clementer impertita , coniicere voluerunt, Nos ita benevole sentire de quocumque hominum genere, ut nedum Ecclesiae filios, sed ceteros etiam utut a Catholica unitate alieni permaneant, esse pariter in salutis via , atque ad aeternam vitam pervenire posse arbitremur. Desunt Nobis prae horrore verba ad novam hanc contra Nos , et tam atrocem iniuriam detestandam. Amamus equidem intimo cordis affectu homines universos, non aliter tamen quam in caritate Dei, et Domini nostri Iesu Christi , qui venit quaerere et salvum facere quod perierat, qui pro omnibus mortuus est , qui omnes homines vult salvos fieri , et ad agnitionem veritatis venire ; qui misit proinde discipulos suos in mundum universum praedicare evangelium omni creaturae, denuntians eos , qui crediderint et baptizati fuerint, salvos fore, qui vero non crediderint, condemnatum iri. Veniant igitur qui salvi fieri volunt ad columnam et firmamentum veritatis, quod Ecclesia est , veniant scilicet ad veram Christi Ecclesiam, quae in suis Episcopis summoque omnium capite Romano Pontifice successionem habet Apostolicae auctoritatis nullo tempore interruptam , quae nihil unquam potius habuit quam ut praedicaret, atque omni ope custodiret ac tueretur doctrinam ex Christi mandato ab Apostolis annunciatam ; quae inde ab Apostolorum aetate in mediis omne genus difficultibus crevit, et per totum orbem miraculorum splendore inclyta , Martyrum sanguine amplificata , Confessorum et Virginum nobilitata virtutibus, Patrum testimentiis scriptisque sapientissimis corroborata viguit, vigetque in cunctis terrae plagis, et perfecta fidei, sa-

cramentorum, sacrique regiminis unitate refulget. Nos qui, licet indigni, praesidemus in suprema hac Petri Apostoli Cathedra, in qua Christus Dominus eiusdem Ecclesiae suae fundamentum posuit, nullis ullo unquam tempore curis laboribusque abstinebimus, ut per ipsius Christi gratiam eos qui ignorant, et errant ad unicam hanc veritatis et salutis viam adducamus. Meminerint autem quicumque ex adverso sunt, transiturum quidem coelum et terram, sed nihil praeterire unquam posse ex verbis Christi, neque in doctrina commutari, quam a Christo Ecclesia Catholica custodiendam, tuendam, et praedicandam accepit.

Post haec haud possumus, quin Vobis, Venerabiles Fratres, loquamur de doloris acerbitate, qua confecti fuimus, propterea quod paucis ante diebus in hac alma Urbe Nostra catholicae Religionis arce et centro nonnulli paucissimi illi quidem homines prope delirantes reperiri potuerint, qui vel ipsum humanitatis sensum abiicientes cum maximo aliorum ipsius Urbis civium fremitu et indignatione minime exhorruerunt palam publiceque triumphare in luctuosissimo intestino bello nuper inter Helvetios excitato. Quod fatale sane bellum Nos intimo corde ingemiscimus, tum ob effusum illius nationis sanguinem, fraternalaque caedem, et atroces, diuturnas, funestasque discordias, odia, dissidia, quae ex civilibus potissimum bellis in populos redundare solent, tum ob detrimenta, quae inde catholicae rei obvenisse accepimus, et ob ventura adhuc timemus, tum denique ob deploranda sacrilegia in primo conflictu commissa, quae commemorare animus refudit.

Ceterum dum haec lamentamur, humillimas Deo totius consolationis agimus gratias, qui in multitudine misericordiae suae non desinit Nos consolari in omni tribulatione Nostra. Etenim inter tantas angustias non leve certe Nobis solatium afferunt et prosperi sacrarum Missionum eventus, et strenui evangelicorum Ministrorum labores, qui apostolico zelo incensi, gravissima quaeque pericula atque discrimina invicti despicientes, in remotissimis regionibus populos ab errorum tenebris, morumque feritate ad catholicae veritatis lumen, omnemque virtutis et humanitatis cultum traducere, ac pro Dei gloria et animarum salute fortiter pugnare non

desinunt, et pientissima ac plane eximia catholicorum populorum studia, qui Nostris desideriis mirifice obsecundantes non levia afflictæ pauperum Hibernorum genti subsidia praebere haud intermisserunt, quīque tum largitionibus ad Nos etiam missis, tum assiduis ad Deum precibus omnem opem conferre non cessant, ut sanctissima Christi fides atque doctrina longe lateque ubique gentium, ubique terrarum felici faustoque progressu magis magisque propagetur. Quae praeclara opera, omni certe laudum praeconio digna, dum peculiari gratissimi animi Nostri testificatione prosequimur, a clementissimo bonorum omnium largitore Deo humiliter poscimus, ut fidelibus suis uberem pro illis retribuat in aeternitate mercedem.

Habetis, Venerabiles Fratres, quae Vobis hodierno die significanda iudicavimus. Cum autem hanc Nostram Allocutionem in publicum emittere censuerimus, hac occasione sermonem nostrum ad alios quoque Venerabiles Fratres, universi catholici Orbis Patriarchas, Archiepiscopos, Episcopos, toto cordis affectu convertimus, eosque omnes et singulos obsecramus, atquehortamur in Domino ut stabili inter se concordia et caritate coniuncti, atque arctissimo fidei et observantiae vinculo Nobis et huic Petri Cathedrae obstricti, perfecti sint in eodem sensu et in eadem sententia, atque humanis quibusque sepositis rationibus, et solum Deum ob oculos habentes, Eiusque auxilium iugis, fervidisque precibus implorantes, nihil vigilantiae, nihil laboribus unquam praetermittant, ut episcopali fortitudine, constantia, prudentia praelientur praelia Domini, et maiori usque alacritate dilectas oves eorum curae commissas ab venenatis pascuis averlant, ad salutaria propellant, easque nunquam patiantur decipi doctrinis variis et peregrinis, sed strenue a rapacium luporum insidiis, et impetu defendant, itemque errantes in omni bonitate, patientia, et doctrina ad veritatis et iustitiae semitam reducere contendant, ut et illi divina auxiliante gratia occurrant in unitatem fidei, et agnitionem Filii Dei, atque ita fiant nobiscum unum ovile et unus pastor.

ALLOCUTIO

HABITA CAIETAE IN CONSISTORIO SECRETO DIE XX APRILIS
ANNI MDCCCXLIX.

VENERABILES FRATRES

Quibus, quantisque ¹ malorum procellis summo cum animi Nostri dolore Pontifícia Nostra ditio, omnisque fere Italia miserandum in modum iactetur ac perturbetur, nemo certe ignorat, Venerabiles Fratres. Atque utinam homines tristissimis hisce rerum vicibus edocti aliquando intelligent, nihil ipsis perniciosius esse posse, quam a veritatis, iustitiae, honestatis et religionis semitis deflectere, ac nequissimis impiorum consiliis acquiescere, eorumque insidiis, fraudibus et erroribus decipi atque irretiri! Evidem uniuersus terrarum orbis probe noscit, atque testatur, quae quantaque fuerit paterni atque amantissimi animi Nostri cura et sollicitudo in vera solidaque Pontificiae Nostrae ditionis populorum utilitate tranquillitate, prosperitate procuranda et quis tantae Nostrae indulgentiae et amoris fructus extiterit. Quibus quidem verbis callidissimos tantorum malorum artifices dumtaxat damnosus, quin ullam maximaे populorum parti culpam tribuere velimus. Verumtamen deplorare cogimur, multos etiam e populo ita misere fuisse deceptos, ut aures suas a Nostris vocibus ac monitis avertentes, illas fallacibus quorumdam magistrorum doctrinis praebuerint, qui relinquentes iter rectum, et per vias tenebrosas ambulantes ²,

¹ Huc referuntur Propositiones 40 — 64 — 76.

² Prov. c. 2. v. 13.

eo unice spectabant, ut imperitorum praesertim animos menlesque magnificis falsisque promissis in fraudem et in errorem inducerent, ac plane compellerent. Omnes profecto norunt, quibus laudum paeconiis fuerit ubique concelebrata memoranda illa et amplissima venia a Nobis ad familiarum pacem, tranquillitatem, felicitatemque procurandam concessa. Ac neminem latet, plures ea venia donatos non solum suam mentem vel minimum haud immutasse, quemadmodum sperabamus, verum etiam eorum consiliis et molitionibus acrius in dies insistentes nihil unquam inausum nihilque intentatum reliquisse, ut civilem Romani Pontificis Principatum, eiusque regimen, uti iamdiu machinabantur, labefactarent et funditus everterent, ac simul acerrimum sanctissimae nostrae religioni bellum inferrent. Ut autem id facilius consequi possent, nihil antiquius habuere, quam multitudines in primis convocare, inflammare, easque assiduis magnisque motibus agitare, quos vel Nostrarum concessionum praetextu continenter fovere et in dies augere summopere studebant. Hinc concessiones in ipso Nostri Pontificatus initio a Nobis ultro ac libenter datae non solum optatos fructus haud emittere, sed ne radices quidem agere umquam potuere, cum peritissimi fraudum architecti iisdem concessionibus ad novas concitandas agitationes abuterentur. Atque in hoc vestro consessu, Venerabiles Fratres, facta ipsa vel leviter attingere, ac raptim commemorare ea sane mente censuimus, ut omnes bonae voluntatis homines clare aperteque cognoscant, quid Dei et humani generis hostes velint, quid optent, quidque ipsis in animo semper fixum destinatumque sit.

Pro singulari Nostro in subditos affectu dolebamus, ac vehementer angebamur, Venerabiles Fratres, cum assiduos illos populares motus tum publicae tranquillitati et ordini, tum privatae familiarum quieti ac paci tantopere adversos videremus, nec preferre poteramus crebras illas pecuniarias collectas, quae variis noninibus non sine levi civium incommodo et dispendio postulabantur. Itaque mense Aprili anno 1847 per publicum Edictum Nostri Cardinalis a publicis negotiis omnes monere haud omisimus, ut ab eiusmodi popularibus conventibus et largitionibus sese absti-

nerent, atque ad propria pertractanda negotia animum mentemque denuo converterent, omnemque in Nobis fiduciam collocarent, ac pro certo haberent, paternas Nostras curas cogitationesque ad publica commoda comparanda unice esse conversas, quemadmodum iam pluribus ac luculentissimis argumentis ostenderamus. Verum salutaria haec Nostra monita, quibus tantos populares motus compescere et populos ipsos ad quietis et tranquillitatis studia revocare nitebamur, pravis quorumdam hominum desideriis et machinationibus vehementer adversabantur. Itaque indefessi agitationum auctores, qui iam alteri ordinationi iussu Nostro ab eodem Cardinali ad rectam utilemque populi educationem promovendam editae obstiterant, vix dum monita illa Nostra noverunt, haud destitere contra ipsa ubique in clamare et acriori usque studio incautas multitudines commovere, eisque callidissime insinuare ac persuadere, ne illi tranquillitati a Nobis tantopere exoptatae se umquam dare vellent, cum insidiosum in ea lateret consilium, ut populi quodammodo indormirent, atque ita in posterum duro servitutis iugo facilius opprimi possent. Atque ex eo tempore plurima scripta typis quoque edita, atque acerbissimis quibusque contumeliis, conviciis, minisque plenissima ad nos missa fuere, quae oblivione sempiterna obruimus, flammisque tradidimus. Ut autem inimici homines fidem aliquam facerent falsis periculis, quae in populum impendere clamitabant, haud reformidarunt mentitiae cuiusdam coniurationis, ab ipsis apposite excogitatae, rumorem ac metum in vulgus spargere, ac turpissimo mendacio vociferari, eiusmodi coniurationem initam esse ad urbem Romam civili bello, caedibus ac funeribus funestandam, ut novis institutionibus penitus sublatis atque deletis, pristina gubernandi forma iterum reviviseret. Sed huius falsissimae coniurationis praetextu inimici homines eo spectabant, ut populi contemptum, invidiam, furorem contra quosdam lectissimos quoque viros virtute, religione praestantes et ecclesiastica etiam dignitate insignes nefarie commoverent atque excitarent. Probe nostis, in hoc rerum aeslu civicam militiam fuisse propositam, ac tanta celeritate collectam, ut rectae illius institutioni et disciplinae consuli minime potuerit.

Ubi primum ad publicae administrationis prosperitatem magis magisque procurandam opportunum fore censuimus Status Consultationem instituere, inimici homines occasionem exinde statim arripiuere, -ut nova Gubernio vulnera imponerent ac simul efficerent, ut huiusmodi institutio, quae publicis populorum rationibus magnae utilitati esse poterat, in damnum ac perniciem cederet. Et quoniam eorum opinio impune iam invaluerat, ea institutione et Pontificii regiminis indolem ac naturam immutari, et Nostram auctoritatem Consultorum iudicio subiici, idcirco eo ipso die, quo illa Status Consultatio inaugurata fuit, haud omisimus turbulentos quosdam homines, qui Consultores comitabantur, gravibus severisque verbis serio monere, eisque verum huius institutionis finem clare aperteque manifestare. Verum perturbatores numquam desinebant deceptam populi partem maiore usque impetu sollicitare, et quo facilius asseclarum numerum habere et augere possent, tum in Pontificia Nostra ditione, tum apud exteris quoque gentes insigni prorsus impudentia atque audacia evulgabunt, eorum opinionibus et consiliis Nos plane assentire. Memineritis, Venerabiles Fratres, quibus verbis in Nostra Consistoriali Allocutione, die 4 mensis Octobris anno 1847 ad Vos habita, universos populos serio commonere et exhortari haud omiserimus, ut ab eiusmodi veteratorum fraude studiosissime caverent. Interim vero pervicaces insidiarum et agitationum auctores, ut turbas metusque continenter alerent et excitarent, mense Ianuario superioris anni incautorum animos inani externi belli rumore territabant, atque in vulgus spargebant, bellum idem internis conpirationibus et malitiosa Gubernantium inertia foveri ac sustentatum iri. Nos ad tranquillanos animos, et insidiantium fallacias refellendas nulla quidem interposila mora die 10 Februarii ipsius anni voces eiusmodi omnino falsas et absurdas esse declaravimus illis nostris verbis, quae omnes probe cognoscunt. Atque in eo tempore carissimis nostris subditis, quod nunc Deo bene iuvante eveniet, praenuntiavimus, futurum scilicet, ut innumerabiles filii ad communis omnium fidelium Patris domum, ad Ecclesiae nempe Statum propugnandum convolarent, si arctissima illa grati animi vincula,

quibus Italiae Principes, populi intime inter se obstringi debabant, dissoluta fuissent, ac populi ipsi suorum Principum sapientiam, eorumque iurum sanctitatem vereri, ac tolis viribus tueri et defendere neglexissent.

Etsi vero Nostra illa verba nuper commemorata tranquillitatem brevi quidem temporis spatio iis omnibus attulere, quorum voluntas continuae adversabatur perturbationi, nihil tamen valuere apud infensissimos Ecclesiae et humanae societatis hostes, qui novas iam turbas, novos tumultus concitaverant. Siquidem calumniis insistentes, quae ab ipsis, eorumve similibus contra Religiosos Viros divino ministerio addictos, et bene de Ecclesia meritos disseminatae fuerant, populares iras omni impetu adversus illos excitarunt atque inflamarunt. Neque ignoratis, Venerabiles Fratres, nihil valuisse Nostra verba ad populum die 10 Martii superioris anni habita, quibus Religiosam illam familiam ab exilio et dispersione eripere magnopere studebamus.

Cum inter haec notissimae illae rerum publicarum conversiones in Italia et Europa evenirent, Nos iterum Apostolicam Nostram attollentes vocem die 30 Martii eiusdem anni haud omisimus universos populos etiam atque etiam monere, hortari, ut et catholicae Ecclesiae libertatem vereri, et civilis societatis ordinem tegere, et omnium iura tueri, et sanctissimae nostrae Religionis pracepta exequi, et in primis christianam in omnes caritatem exercere omnino studerent, quandoquidem si haec ipsi agere neglexissent, pro certo haberent, quod Deus ostenderet, se populorum dominatorem esse.

Iam vero quisque vestrum plane noscit quomodo in Italianam Constitutionarii regiminis forma fuerit inventa, et quomodo Statutum a Nobis die 14 Martii superioris anni Nostris Subditis concessum in lucem prodierit. Cum autem implacabiles publicae tranquillitatis et ordinis hostes nihil antiquius haberent, quam omnia contra Pontificium Gubernium conari, et populum assiduis motibus, suspicionibus exagitare, tum qua scriptis in lucem editis, qua Circulis, qua Societatibus, et aliis quibusque artibus nunquam intermittebant Gubernium atrociter calumniari, eique inertiae, dol-

et fraudis notam inurere, licet Gubernium ipsum omni cura et studio in id incumberet, ut Statutum tantopere exoptatum maiore, qua fieri posset, vulgaretur celeritate. Atque hic universo terrarum orbi manifestare volumus eo ipso tempore homines illos in suo constantes proposito subvertendi Pontificiam ditionem totamque Italiam, Nobis proposuisse non iam Constitutionis, sed Reipublicae proclamationem, veluti unicum tum Nostrae, tum Ecclesiae Status incolumitatis perfugium atque praesidium. Subit adhuc nocturna illa hora, et versantur Nobis ante oculos quidam homines, qui a fraudum architectis misere illusi ac decepti illorum ea in re causam agere, atque eamdem reipublicae proclamationem Nobis proponere non dubitabant. Quod quidem, praeter innumera alia et gravissima argumenta, magis magisque demonstrat, novarum institutionum petitiones et progressum, ab huiusmodi hominibus tantopere praedicalum, eo unice spectare, ut assiduae foveantur agitationes, ut omnia iustitiae, virtutis, honestatis, religionis principia usquequaque penitus tollantur, atque horrendum et luctuosissimum, ac vel ipsi naturali rationi et iuri maxime adversum *Socialismi*, vel etiam *Communismi*, uli appellant, sistema cum maximo totius humanae societatis detrimento et exitio quaquaversus inducatur, propagetur, ac longe lateque dominetur.

Sed quamvis haec tetrica conspiratio, vel potius haec diuturna conspirationum series clara esset et manifesta, tamen, Deo sic permittente, multis illorum fuit ignota, quibus communis tranquillitas tot sane de causis cordi summopere esse debebat. Atque etsi indefessi turbarum moderatores gravissimam de se suspicionem darent, tamen non defuere quidam bonae voluntatis homines, qui amicam illis manum praebuere, ea forsitan spe freti fore, ut eos ad moderationis et iustitiae semitam reducere possent.

Interim belli clamor per universam Italiam extemplo pervasit, quo Pontificiae Nostrae ditionis subditorum pars commota atque abrepta ad arma convolavit, ac Nostrae voluntati obsistens eiusdem Pontificiae ditionis fines praetergredi voluit. Nostis, Venerabiles Fratres, quomodo debitas tum Summi Pontificis, tum Supremi Principis partes obeuntes iniustis illorum desideriis obstiteri-

mus, qui Nos ad illud bellum gerendum pertrahere volebant, qui-que postulabant, ut inexpertam iuventutem subitario modo col-lectam, ac militaris artis peritia et disciplina numquam exultam, et idoneis ductoribus bellicisque subsidiis destitutam ad pugnam, id est ad certam caedem compelleremus. Atque id a Nobis ex-petebatur qui licet immerentes inscrutabili Divinae providentiae consilio ad Apostolicae Dignitatis fastigium evecti, ac vicariam Christi Iesu hic in terris operam gerentes a Deo, qui est auctor pacis et amator caritatis, missionem accepimus, ut omnes popu-los, gentes, nationes pari paterni amoris studio prosequentes, omnium saluti tolis viribus consulamus, et non iam ut homines ad clades mortemque impellamus. Quod si quicumque Princeps non-nisi iustis de causis bellum aggredi numquam potest, ecquis tam consilii et rationis expers umquam erit, qui plane non videat, catholicum orbem merito atque optimo iure longe maiorem iusti-tiam, gravioresque causas a Romano Pontifice requirere, si Pon-tificem ipsum alicui bellum indicere et inferre conspiciat? Quam-obrem Nostra Allocutione, die 29 Aprilis superiori anno ad Vos habita, palam publiceque declaravimus, Nos ab illo bello omnino esse alienos. Atque eodem tempore insidiosissimum profecto munus tum voce, tum scripto Nobis oblatum, ac non solum Personae Nostrae vel maxime iniuriosum, verum etiam Italiae perniciosissimum repudiavimus, reiecamus, ut scilicet Italicae cuiusdam Rei-publicae regimini praesidere vellemus. Evidem singulari Dei miseratione gravissimum loquendi, monendi, hortandique munus a Deo ipso Nobis impositum implendum curavimus, atque adeo confidimus, Nobis illud Isaiae improperari non posse: *Vae mihi quia tacui.* Utinam vero paternis nostris vocibus, monitis,hortationibus suas nostri omnes filii praebuissent aures!

Memineritis, Venerabiles Fratres, qui clamores, qui tumul-tus a turbulentissimae factionis hominibus excitati fuere post Allocutionem a Nobis nunc commemoratam, et quomodo civile Ministerium Nobis fuerit impositum nostris quidem consiliis, ac prin-cipiis, et Apostolicae Sedis iuribus summopere adversum. Nos quidem iam inde infelicem Italici belli exitum futurum animo pro-

speximus, dum unus ex illis Ministris asserere non dubitabat, bellum idem, Nobis licet invitis ac reluctantibus, et absque Pontificia benedictione, esse duraturum. Qui quidem Minister gravissimam Apostolicae Sedi inferens iniuriam haud extimuit propone-re, civilem Romani Pontificis Principatum a spirituali eiusdem potestate omnino esse separandum. Atque idem ipse haud multo post ea de Nobis palam asserere non dubitavit, quibus Summum Pontificem ab humani generis consortio eiiceret quodammodo et dissociaret. Iustus et misericors Dominus voluit Nos humiliare sub potenti manu Eius, cum permiserit, ut plures per menses veritas ex una parte, mendacium ex altera acerrimo inter se dimicarent certamine, cui attulit finem novi Ministerii electio, quod postea alteri locum cessit, in quo ingenii laus cum peculiari tum publici ordinis tutandi, tum legum observandarum studio erat coniuncta. Verum effraenata pravarum cupiditatum licentia et audacia in dies caput altius extollens longe grassabatur, ac Dei hominumque hostes diurna ac saeva dominandi, diripiendi, ac destruendi siti incensi nihil iam aliud optabant, quam iura quaeque divina et humana subyterere, ut eorum desideria possent explere. Hinc machinationes iamdiu comparatae palam publiceque emicuerunt, et viae humano sanguine respersae, et sacrilegia numquam satis deploranda commissa, et inaudita prorsus violentia in Nostris ipsis Quirinalis Aedibus infando ausu Nobis illata. Quocirca tantis oppressi angustiis cum ne dum Principis, sed ne Pontificis quidem partes libere obire possemus, non sine maxima animi Nostrri amaritudine a Sede Nostra discedere debuimus. Quae luctuosissima facta in publicis Nostris protestationibus enarrata hoc loco iterum recensere praeterimus, ne funesta illorum recordatione communis noster recrudescat dolor. Ubi vero seditiosi homines Nostras illas neverunt protestationes, maiore furentes audacia, et omnia omnibus minitantes nulli neque fraudis, neque doli, neque violentiae generi pepercerunt, ut bonis omnibus iam pavore prostratis maiorem usque terrorem iniicerent. Ac postquam novam illam Gubernii formam, ab ipsis *Giunta di Stato* appellatam, invexere, ac penitus sustulerunt duo Consilia a Nobis instituta, totis

viribus allaborarunt, ut novum cogeretur Consilium, quod *Constituentis Romanae* nomine nuncupare voluerunt. Refugit quidem animus, ac dicere reformidat quibus quantisque fraudibus ipsi usi fuerint, ut eiusmodi rem ad exitum perducerent. Hic vero haud possumus, quin meritas maiori Pontificiae ditionis Magistratum parti laudes tribuamus, qui proprii honoris et officii memor res munere se abdicare maluerunt, quam ullo modo manum operi admovere, quo eorum Princeps et amantissimus Pater legitimo suo civili Principatu spoliabatur. Illud tandem consilium fuit coactum, et quidam Romanus Advocatus vel in ipso suae primae orationis exordio ad congregatos habitae, omnibus clare aperte que declaravit, quid ipse cunctique alii sui socii horribilis agitationis auctores sentirent, quid vellent, et quo spectarent. *Lex*, ut ille inquiebat, *moralis progressus est imperiosa et inexorabilis*, ac simul addebat, sibi, ceterisque iamdiu in animo fixum esse, temporale Apostolicae Sedis dominium ac regimen funditus revertere, licet modis omnibus eorum desideriis a Nobis fuisse obsecundatum. Quam declarationem in hoc vestro consessu commemorare voluimus, ut omnes intelligent pravam huiusmodi voluntatem non coniectura, aut suspicione aliqua a Nobis turbarum auctoribus fuisse attributam, sed eam universo terrarum orbi palam publice que ab illis ipsis manifestatam, quos vel ipse pudor ab eadem proferenda declaratione revocare debuisset. Non liberiores igitur institutiones, non utiliorem publicae administrationis pro curationem, non providas cuiusque generis ordinationes huiusmodi homines cupiebant, sed civilem Apostolicae Sedis principatum, potestatemque impetere, convellere, ac destruere omnino volebant. Ac eiusmodi consilium, quantum in ipsis fuit, ad exitum deduxerunt illo *Romanae*, uti vocant, *Constituentis* decreto die 9 Februarii huius anni edito, quo nescimus, an maiori iniustitia contra iura Romanae Ecclesiae, adiunctamque illis Apostolici ob eundi muneris libertatem, vel maiori subditorum Pontificiae ditionis damno et calamitate, Romanos Pontifices a temporali Gubernio tum iure tum facto decidisse declararunt. Non levi quidem moerore ob tam tristia facta confecti fuimus, Venerabiles Fratres,

atque illud in primis vel maxime dolemus, quod Urbs Roma Catholicae veritatis et unitatis centrum, virtutis ac sanctitatis magistra per impiorum ad eam quotidianie confluentium hominum operam, omnibus gentibus, populis, nationibus tantorum malorum auctrix appareat. Verumtamen in tanto animi Nostri dolore pergratum Nobis est posse affirmare, longe maximam tum Romani Populi, tum aliorum Pontificiae Nostrae ditionis populorum partem Nobis, et Apostolicae Sedi constanter addictam a nefariis illis machinationibus abhorruisse, licet tot tristium eventuum spectatrix extiterit. Summae quoque consolationi Nobis fuit Episcoporum, et Cleri Pontificiae Nostrae ditionis sollicitudo, qui in mediis periculis, et omne genus difficultatibus ministerii et officii sui partes obire non destiterunt, ut populos ipsos qua voce, qua exemplo a motibus illis, nefariisque factionis consiliis averterent.

Nos certe in tanto rerum certamine atque discrimine nihil intentatum reliquimus, ut publicae tranquillitati et ordini consuleremus. Multo enim tempore antequam tristissima illa Novembribus facta evenirent, omni studio curavimus, ut Helvetiorum copiae, Apostolicae Sedis servitio addictae, atque in Nostris Provinciis degentes, in urbem deducerentur, quae tamen res contra Nostram voluntatem ad exitum minime fuit perducta eorum opera, qui mense Maio Ministrorum munere fungebantur. Neque id solum, verum etiam ante illud tempus, nec non et postea tum publico praesertim Romae ordini tuendo, tum inimicorum hominum audaciee comprimendae curas Nostras convertimus ad alia militum praesidia comparanda, quae, Deo ita permittente, ob rerum ac temporum vicissitudines Nobis defuere. Tandem post ipsa luctuosissima Novembribus facta haud omisimus Nostris litteris, die quinta Ianuarii datis, omnibus indigenis Nostris militibus etiam alque etiam inculcare, ut religionis et militaris honoris memores iuratam suo Principi fidem custodirent, ac sedulam impenderent operam, quo ubique tum publica tranquillitas, tum debita erga legitimum Gubernium obedientia ac devotio servaretur. Neque id tantum, verum etiam Helvetiorum copias Romam petere iussimus, quae huic Nostrae voluntati haudquaquam obsequitae

sunt, cum praesertim supremus illarum Ductor in hac re haud recte atque honorifice se gesserit.

Atque interim factionis moderatores maiore in dies audacia et impetu opus urgentes tum Nostram Personam, tum alios qui Nostro adhaerent lateri horrendi cuiusque generis calumniis et contumeliis lacerare non intermittebant; ac vel ipsis Sacrosancti Evangelii verbis et sententiis nefarie abuti non dubitabant, ut in vestimentis ovium, cum intrinsecus sint lupi rapaces, imperitam multitudinem ad prava quaeque eorum consilia et molimina pertraherent, atque incautorum mentes falsis doctrinis imbuerent. Subditi vero temporali Apostolicae Sedis ditioni, et Nobis immobili fide addicti merito atque optimo iure a Nobis exposcebant, ut eos a tot gravissimis, quibus undique premebantur, angustiis, periculis, calamitatibus et iacturis criperemus. Et quoniam nonnulli ex ipsis reperiuntur qui nos veluti causam (innocuam licet) tantarum perturbationum suspiciunt, siccirco isti animadvertant velimus, Nos quidem ut primum ad supremam Apostolicam Sedem evecli fuimus, paternas Nostras curas et consilia, quemadmodum supra declaravimus, eo certe intendisse, ut Pontificiae Nostrae ditionis populos omni studio in meliorum conditionem adduceremus, sed inimicorum ac turbulentorum hominum opera factum esse, ut consilia illa Nostra in irritum cederent, contra vero factiosis ipsis, Deo permittente, contigisse, ut ad exitum perducere possent quae a longo ante tempore moliri ac tentare omnibus quibusque malitia artibus numquam desliterant. Itaque id ipsum, quod iam alias ediximus, hic iterum repetimus, in tam gravi scilicet ac luctuosa tempestate, qua universus fere terrarum orbis tantopere iactatur, Dei manum esse agnoscendam, Eiusque vocem audiendam, qui eiusmodi flagellis hominum peccata et iniquitates punire sollet, ut ipsi ad iustitiae semitas redire festinent. Hanc igitur vocem audiant qui erraverunt a veritate, et derelinquentes vias suas convertantur ad Dominum; audiant etiam illi, qui in hoc tristissimo rerum statu magis de privatis propriis commodis, quam de Ecclesiae bono, et rei catholicae prosperitate solliciti

sunt, ac meminerint nihil prodesse homini si *mundum universum lucretur, animae vero suae detrimentum patiatur*; audiant et pii Ecclesiae filii, ac praestolantes in patientia salutare Dei, et maiore usque studio emundantes conscientias suas ab omni inquinamento peccati, miserations Domini implorare, Eique magis magisque placere, ac iugiter famulari contendant.

Atque inter haec Nostra ardentissima desideria haud possumus eos non monere speciatim et redarguere, qui decreto illi, quo Romanus Pontifex omni civilis sui impérii honore ac dignitate est spoliatus, plaudunt, ac decretum idem ad ipsius Ecclesiae libertatem felicitatemque procurandam vel maxime conducere asserunt. Hic autem palam publiceque profitemur, nulla Nos dominandi cupiditate, nullo temporalis Principatus desiderio haec loqui, quandoquidem Nostra indoles et ingenium a quavis dominatione profecto est alienum. Verumtamen officii nostri ratio postulat, ut in civili Apostolicae Sedis Principatu tuendo iura possessionesque Sanctae Romanae Ecclesiae, atque eiusdem Sedis libertatem, quae cum totius Ecclesiae libertate et utilitate est coniuncta, totis viribus defendamus. Et quidem homines, qui commemorato plaudentes decreto tam falsa et absurdā affirmant, vel ignorant, vel ignorare simulant, singulari prorsus Divinae providentiae consilio factum esse, ut Romano Imperio in plura regna, variasque ditiones diviso, Romanus Pontifex, cui a Christo Domino totius Ecclesiae regimen et cura fuit commissa, civilem Principatum hac sane de causa haberet, ut ad ipsam Ecclesiam regendam, eiusque unitatem tuendam plena illa potiretur libertate, quae ad supremi Apostolici ministerii munus obeundum requiritur. Namque omnibus compertum est, fideles populos, gentes, regna numquam plenam fiduciam et observantiam esse praestitura Romano Pontifici, si illum alicuius Principis, vel Gubernii dominio subiectum, ac minime liberum esse conspicerent. Siquidem fideles populi, et regna vehementer suspicari, ac vereri numquam desinerent, ne Pontifex idem sua acta ad illius Principis, vel Gubernii, in cuius dilione versarentur, voluntatem conformaret, atque iccirco actis illis hoc prae-

textu saepius refragari non dubitarunt. Et quidem dicant vel ipsi hostes civilis Principatus Apostolicae Sedis, qui nunc Romae dominantur, quanam fiducia et observantia ipsi essent excepturi hortationes, monita, mandata, constitutiones Summi Pontificis, cum illum cuiusvis Principis, aut Gubernii imperio subditum esse cognoscerent, praesertim vero si cui subasset Principi, inter quem et Romanam ditionem diuturnum aliquod ageretur bellum?

Interea nemo non videt quibus quantisque vulneribus in ipsis Pontificiae ditionis regionibus Immaculata Christi sponsa nunc afficiatur, quibus vinculis, qua turpissima servitute magis magisque opprimatur, quantisque angustiis visible illius Caput obruatur. Ecquis enim ignorat, Nobis communicationem cum Urbe Roma, illiusque Nobis carissimo Clero, et universo Pontificiae ditionis Episcopatu, ceterisque fidelibus ita esse praepeditam, ut ne epistles quidem, de ecclesiasticis licet ac spiritualibus negotiis agentes, vel mittere, vel accipere libere possimus? Quis nescit, Urbem Romam principem catholicae Ecclesiae Sedem in praesentia, pro dolor! silvam frementium bestiarum esse factam, cum ea omnium nationum hominibus redundet, qui vel apostatae, vel haeretici, vel *Communismi*, uti dicunt, aut *Socialismi* magistri, ac summo contra catholicam veritatem odio animati tum voce, tum scriptis, tum aliis quibusque modis omnigenos pestiferos errores docere, disseminare, omniumque mentes et animos pervertere conantur, ut in Urbe ipsa, si fieri umquam posset, catholicae religionis sanctitas, et irrefrabilis fidei regula depravetur? Cui iam notum, auditumque non est, in Pontificia ditione Ecclesiae bona, redditus, possessiones ausu temerario et sacrilego occupatas, augustissima tempa suis ornamentis nudata, religiosa Coenobia in profanos usus conversa, Virgines Deo sacras vexatas, leclissimos, atque integerrimos Ecclesiasticos, Religiososque viros crudeliter insectatos, in vincula coniectos, et occisos, sacros clarissimos Antislites vel ipsa Cardinalitia dignitate insigne a propriis gregibus dire avulsos, et in carcerem abreptos? Atque haec tanta facinora contra Ecclesiam, eiusque iura, et libertatem admittuntur tum in Pontificiae di-

tionis locis, tum alibi, ubi homines illi, vel eorum similes dominantur, eo scilicet tempore, quo iidem ipsi libertatem ubique proclamat, ac sibi in votis esse configunt, ut suprema Summi Pontificis potestas, a quovis prorsus vinculo expedita, omni libertate fruatur.

Iam porro neminem latet in qua tristissima ac deploranda conditione carissimi Nostri versentur Subditi eorumdem hominum opera, qui tanta adversus Ecclesiam flagitia committunt. Publicum enim aerarium dissipatum, exhaustum, commercium intermissum ac pene extinctum, ingentes pecuniae summae optimatibus viris aliisque impositae, privatorum bona ab illis, qui se populorum rectores et effraenatarum cohortium ductores appellant, direpta, bonorum omnium tremefacta libertas, eorumque tranquillitas in summum discrimen adducta, ac vita ipsa sicarii pugioni subiecta, et alia maxima et gravissima mala ac damna, quibus continenter cives tantopere affliguntur atque terrentur. Haec scilicet sunt illius prosperitatis initia, quam Summi Pontificatus osores Pontificiae ditionis populis annunciant atque promittunt.

In magno igitur et incredibili dolore, quo ob tantas tum Ecclesiae, tum Pontificiae Nostrae ditionis populorum calamitates intime excruciamur, probe noscentes officii Nostri rationem omnino postulare, ut ad calamitates ipsas amovendas ac propulsandas omnia conaremur, iam inde a die quarta Decembris proximi superioris anni omnium Principum, et Nationum opem, auxiliumque implorare, et exposcere haud omisimus. Ac Nobis temperare non possumus, quin Vobiscum, Venerabiles Fratres, nunc communiciemus singularem illam consolationem, qua affecti fuimus, cum iidem Principes, et populi, etiam illi qui catholicae unitatis vinculo Nobis minime sunt coniuncti, propensissimam eorum erga Nos voluntatem luculentis sane modis testari ac declarare studuerint. Quod quidem dum acerbissimum animi Nostri dolorem mirifice lenit atque solatur, magis magisque demonstrat quomodo Deus Ecclesiae suae Sanctae semper propitius adsistat. Atque in eam spem erigimur fore, ut omnes intelligent, gravissima illa mala, quibus in hac tanta temporum asperitate populi, ac regna

vexantur, ex sanctissimae nostrae religionis contemplu suam duxisse originem, nec aliunde solatium ac remedium habere posse, quam ex divina Christi doctrina, Eiusque Sancta Ecclesia, quae virtutum omnium foecunda parens et altrix, atque expultrix vitiorum, dum homines ad omnem veritatem ac iustitiam instituit, eosque mutua caritate constringit, publico civilis societatis bono, et ordini mirandum in modum consulit ac prospicit.

Postquam vero omnium Principum opem imploravimus, ab Austria, quae Pontificiae Nostrae ditioni ad Septentrionem finitima est, auxilium eo sane libentius efflagitavimus, quod ipsa non solum temporali Apostolicae Sedis dominio tuendo egregiam suam semper operam navaverit, verum etiam quod nunc ea profecto spes affulgeat fore, ut ab illo Imperio iuxta ardentissima Nostra desideria, iustissimasque Nostras postulationes notissima quaedam eliminentur principia ab Apostolica Sede perpetuo improbata, ac propterea inibi Ecclesia in suam restituatur libertatem cum maximo illorum fidelium bono atque utilitate. Quod quidem dum non mediocri animi Nostri consolatione significamus, plane non dubitamus, quin id Vobis non leve afferat gaudium.

Idem auxilium a Gallica Natione expostulavimus, quam singulari paterni animi Nostri benevolentia et affectu prosequimur, cum illius Nationis Clerus, Populusque fidelis omnibus quibusque filialis devotionis et observantiae significationibus Nostras calamitates at angustias lenire ac solari studuerit.

Hispaniae quoque opem invocavimus, quae de Nostris angustiis vehementer anxia atque sollicita alias catholicas Nationes primum excitavit, ut filiali quodam foedere inter se initio communem fidelium Patrem ac Supremum Ecclesiae Pastorem in propriam Sedem reducere contenderent.

Hanc denique opem ab utriusque Siciliae Regno efflagitavimus, in quo hospitamur apud illius Regem, qui in veram solidamque suorum populorum felicitatem promovendam totis viribus incumbens tanta religione ac pietate refulget, ut suis ipsis populis exemplo esse possit. Etsi vero nullis verbis exprimere possimus, quanta cura et studio idem Princeps eximiam suam filialem in Nos de-

votionem omnium officiorum genere, et egregiis factis assidue testari, et confirmare laetatur, tamen praeclara eiusdem Principis in Nos merita nulla unquam delebit oblivio. Neque taciti ullo modo praeterire possumus pietatis, amoris et obsequii significaciones, quibus eiusdem Regni Clerus, et Populus Nos prosequi numquam destitit, ex quo Regnum ipsum attigimus.

Quamobrem in eam spem erigimur fore, ut, Deo bene iuvante, catholicae illae gentes Ecclesiae, eiusque Summi Pontificis communis omnium fidelium Patris causam pree oculis habentes ad civilem Apostolicae Sedis Principatum vindicandum, ad pacem et tranquillitatem subditis Nostris restituendam quamprimum accurtere properent, ac futurum confidimus, ut sanctissimae nostrae religionis, et civilis societatis hostes ab urbe Roma, totoque Ecclesiae Statu amoveantur. Atque id ubi contigerit, omni certe vigilantia, studio, contentione a Nobis erit curandum, ut illi omnes errores, et gravissima propulsentur scandala, quae cum bonis omnibus tam vehementer dolere debuimus. Atque in primis vel maxime allaborandum, ut hominum mentes ac voluntates impiorum fallaciis, insidiis et fraudibus miserandum in modum deceptae collustrentur sempiterna veritatis lumine, quo homines ipsi funestissimos errorum et vitiorum fructus agnoscant, atque ad virtutis, iustitiae et religionis semitas amplectendas excitentur et inflammantur. Optime enim noscitis, Venerabiles Fratres, horrenda illa et omnigena opinionum monstra, quae ex abyssi puteo ad exitium et vastitatem emersa longe iam lateque cum maximo religionis, civilisque societatis detimento invaluere, ac debacchantur. Quas perversas pestiferasque doctrinas inimici homines seu voce, seu scriptis, seu publicis spectaculis in vulgus disseminare numquam intermittunt, ut effraenata cuiusque impietatis, cupiditatis, libidinis licentia magis in dies augeatur et propagetur. Hinc porro illae omnes calamitates, exitia et lucitus, quibus humanum genus, ac universus fere terrarum orbis tantopere est funestatus et funestatur. Neque ignoratis cuiusmodi bellum contra sanctissimam nostram religionem in ipsa quoque Italia nunc geratur, quibusque fraudibus et machinationibus tetricimi ipsius

religionis et civilis societatis hostes imperitorum praesertim animos a fidei sanctitate, sanaque doctrina avertere, eosque aestuantibus incredulitatis fluctibus demergere atque ad gravissima quaeque peragenda facinora compellere conentur. Atque ut facilius eorum consilia ad exitum perducere, et horribiles cuiusque seditionis et perturbationis motus excitare ac fovere possint haereticorum hominum vestigiis inhaerentes, suprema Ecclesiae auctoritate omnino despacta, plane non dubitant Sacrarum Scripturarum verba, testimonia, sententias privato proprio, pravoque sensu invocare, interpretari, inverttere, detorquere, ac per summam impietatem sanctissimo Christi nomine nefarie abuti non reformidant. Neque eos pudet palam publiceque asserere, tum cuiusque sanctissimi iuramenti violationem, tum quamlibet scelestam, flagitosamque actionem sempiternae ipsi naturae legi repugnantem non solum haud esse improbandam, verum etiam omnino licitam, summisque laudibus efferendam quando id pro patriae amore, ut ipsi dicunt, agatur. Quo impio ac praepostero argumentandi genere ab eiusmodi hominibus omnis prorsus honestas, virtus, iustitia penitus tollitur, atque nefanda ipsius latronis et sicarii agendi ratio per inauditam impudentiam defenditur et commendatur.

Ad ceteras innumeratas fraudes, quibus catholicae Ecclesiae inimici continenter utuntur, ut incautos praesertim et imperitos ab ipsius Ecclesiae sinu avellant et abripiant acerrimae etiam, ac turpissimae accedunt calumniae, quas in Personam nostram intendere et comminisci non erubescunt. Nos quidem nullis licet nostris meritis illius hic in terris vicariam gerentes operam, *qui cum malediceretur non maledicebat, cum pateretur non comminabatur*, acerbissima quaeque convicia in omni patientia, ac silentio perferre, et pro consequentibus, et calumniantibus Nos orare numquam omisimus. Verum cum debitores simus sapientibus, et insipientibus, omniumque saluti consulere debeamus, haud possumus, quin ad praecavendam praesertim infirmorum offenditionem, in hoc vestro Consessu a Nobis reiiciamus falsissimam illam et omnium tetricam calumniam, quae contra Personam humilitatis Nostrae per recentissimas quasdam ephemeridas est evulga-

ta. Etsi vero incredibili horrore affecti fuimus ubi illud commen-
tum legimus, quo inimici homines Nobis, et Apostolicae Sedi
grave vulnus inferre commoliuntur, tamen nullo modo vereri pos-
sumus, ne eiusmodi turpissima mendacia vel leviter offendere
queant supremam illam veritatis Cathedram, et Nos, qui nullo me-
ritorum suffragio in ea collocati sumus. Et quidem singulari Dei
misericordia divinis illis nostri Redemptoris verbis uti possumus:
Ego palam loquutus sum mundo.... et in occulto loquutus sum nihil. Atque hic, Venerabiles Fratres, opportunum ducimus ea
ipsa iterum dicere et inculcare, quae in Nostra praesertim Allo-
cutione ad Vos die 17 Decembris anno 1847 habita declaravimus,
inimicos scilicet homines, quo facilius veram germanamque ca-
tholicae religionis doctrinam corrumpere, aliosque decipere, et in
errorem inducere queant, omnia comminisci, omnia moliri, omnia
conari, ut vel ipsa Apostolica Sedes eorum stultitiae particeps et
fautrix quodammodo appareat. Nemini autem ignotum est, quae
tenebricosissimae, aequae ac perniciosissimae societates, et sectae
a fabricatoribus mendacii, et perversorum dogmatum cultoribus
fuerint variis temporibus coactae, et institutae, ac variis nomini-
bus appellatae, quo eorum deliramenta, systemata, molimina in
aliorum animos tutius instillarent, incautorum corda corrumpen-
tent, ac latissimam quibusque sceleribus impune patrandis viam
munirent. Quas abominabiles perditionis sectas, non solum ani-
marum saluti, verum etiam civilis societatis bono et tranquillitati
vel maxime infestas, atque a Romanis Pontificibus Decessoribus
Nostris damnatas, Nos ipsi iugiter detestati sumus, ac Nostris En-
cyclicis Litteris die 9 Novembris anno 1846 ad universos Eccle-
siae Antistites datis condemnavimus, et nunc pariter suprema
Nostra Apostolica auctoritate iterum damnamus, prohibemus,
atque proscribimus.

At hac Nostra Allocutione haud sane voluimus vel omnes erro-
res enumerare, quibus populi misere decepti ad tantas impellun-
tur ruinas, vel singulas percensere machinationes, quibus inimici
homines, et catholicae religionis perniciem moliri, et arcem Sion
usqueaque impetere, et invadere contendunt. Quae hactenus

dolenter commemoravimus satis superque ostendunt ex perversis grassantibus doctrinis , atque ex iustitiae et religionis contemptu eas oriri calamitates et exilia , quibus nationes , et gentes tanto-pere iactantur. Ut igitur tanta amoveantur damna , nullis neque curis, neque consiliis, neque laboribus, neque vigiliis est parcendum, quo tot perversis doctrinis radicibus evulsis, omnes intelligent, veram solidamque felicitatem virtutis , iustitiae , ac religionis exercitio inniti. Itaque et Nobis, et Vobis, atque aliis Venerabilibus Fratribus totius Catholici orbis Episcopis summa cura, studio, contentione in primis est allaborandum , ut fideles populi ab venenatis pascuis amoli, atque ad salutaria deducti , ac magis in dies enutriti verbis fidei et insidiantium hominum fraudes et fallacias agnoscant, devitent, ac plane intelligentes, timorem Domini bonorum omnium esse fontem , et peccata atque iniquitates provocare Dei flagella , studeant declinare a malo, et facere bonum. Quocirca inter tantas angustias non levi certe laetitia perfundimur, cum noscamus quanta animi firmitate et constantia Venerabiles Fratres catholici orbis Antistites Nobis , et Petri Cathedrae firmiter addicti una cum obsequente sibi Clero ad Ecclesiae causam tuendam, eiusque libertatem propugnandam strenue conitantur, et qua Sacerdotali cura et studio omnem impendant operam, quo et bonos magis magisque in bonitate confirment, et errantes ad iustitiae semitas reducant , et pervicaces religionis hostes tum voce, tum scriptis redarguant atque refellant. Dum autem has meritas debitasque laudes ipsis Venerabilibus Fratribus tribuere laetamur, eisdem animos addimus, ut divino auxilio freti pergent alacriori usque zelo ministerium suum implere, ac praeliari praelia Domini, et exaltare vocem in sapientia et fortitudine ad sanandas contritiones Israel. Iuxta haec non desinant adire cum fiducia ad thronum gratiae, ac publicis, privatisque precibus insistere, et fidelibus populis sedulo inculcare , ut omnes ubique poenitentiam agant, quo misericordiam a Deo consequantur, et gratiam inveniant in auxilio opportuno. Nec vero intermittent viros ingenio, sanaque doctrina praestantes hortari, ut ipsi quoque sub

eorum et Apostolicae Sedis ductu populorum mentes illustrare, et serpentium errorum tenebras dissipare studeant.

Hic etiam Carissimos in Christo Filios Nostros Populorum Principes et Rectores obtestamur in Domino , atque ab ipsis exposcimus ut serio ac sedulo considerantes quae ei quanta damna ex tot errorum ac vitiorum colluvie in civilem societatem redundant , omni cura, studio, consilio in id potissimum incumbere velint, ut virtus, iustitia, religio ubique dominantur , ac maiora in dies incrementa suscipiant. Alque universi populi, gentes, nationes, earumque Moderatores assidue ac diligenter cogitent et meditentur, omnia bona in iustitiae exercitio consistere , omnia vero mala ex iniuitate prodire. Siquidem *iustitia elevat gentem, miseros autem facit populos peccatum* 1.

Antequam autem dicendi finem faciamus, haud possumus, quin gratissimi animi nostri sensus illis omnibus carissimis atque amantissimis filiis palam publiceque testemur , qui de Nostris calamitatibus vehementer solliciti singulari prorsus erga Nos pietatis affectu suas Nobis oblationes mittere voluerunt. Etsi vero piae huiusmodi largitiones non leve Nobis afferant solatium , tamen fateri debemus , paternum cor Nostrum non mediocri angi angustia, cum summopere timeamus, ne in tristissima hac rerum publicarum conditione iidem carissimi filii suaे in Nos caritati nimium indulgentes largitiones ipsas proprio etiam incommodo ac detimento facere velint.

Denique, Venerabiles Fratres, Nos quidem investigabilibus sapientiae Dei consiliis, quibus gloriam suam operatur, plane acquiescentes , dum in humilitate cordis Nostri maximas Deo agimus gratias, quod Nos dignos habuerit pro nomine Iesu contumeliam pali, et aliqua ex parte conformes fieri imagini Passionis Eius, parati sumus in omni fide, spe, patientia, et mansuetudine acerbissimos quosque labores, aerumnas perferre, atque ipsam animam nostram pro Ecclesia ponere, si per Nostrum sanguinem ipsius Ecclesiae calamitatibus consulere possemus. Interim vero,

Venerabiles Fratres , ne intermittamus dies noclesque assiduis fervidisque precibus divitem in misericordia Deum humiliter orare et obsecrare, ut per merita Unigeniti Filii sui omnipotenti sua dextera Ecclesiam suam sanctam a tantis, quibus iactatur, procellis eripiat, utque divinae suae gratiae lumine omnium errantium mentes illustret, et in multitudine misericordiae suae omnium praevaricantium corda expugnet, quo cunctis ubique erroribus depulsis cunctisque amotis adversitatibus, omnes veritatis et iustitiae lucem adspiciant, agnoscant, atque occurrant in unitatem fidei, et agnitionis Domini Nostri Iesu Christi. Atque ab Ipso, qui facit pacem in sublimibus, qui est pax nostra, suppliciter etiam exposcere numquam desinamus, ut malis omnibus, quibus christiana respublica vexatur, penitus avulsi, optatissimam ubique pacem, et tranquillitatem facere velit. Ut vero facilius annuat Deus precibus nostris suffragatores apud Eum adhibeamus, atque in primis Sanctissimam immaculatam Virginem Mariam, quae Dei mater et nostra, quaeque mater misericordiae, quod quaerit invenit, et frustrari non potest. Suffragia quoque imploremus Beati Petri Apostolorum Principis, et Coapostoli eius Pauli, omniumque Sanctorum caelitum, qui iam facti amici Dei cum ipso regnant in caelis, ut clementissimus Dominus, eorum intervenientibus meritis ac precibus, fidelem populum ab iracundiae suae terroribus liberet, semperque protegat, ac divinae suae propitiationis abundantia laetificet.

EPISTOLA ENCYCLICA

AD ARCHIEPISCOPOS ET EPISCOPOS ITALIAE DIE VIII DECEMBRIS
ANNI MDCCCXLIX.

VENERABILES FRATRES

Salutem et Apostolicam Benedictionem.

Nostis et Nobiscum ¹ una conspicitis, Venerabiles Fratres, quanta nuper perversitate invaluerint perdimi quidam veritatis, iusticiae et honestatis cuiusque inimici, qui sive per fraudem, omnisque generis insidias, sive palam et tanquam fluctus feri maris despumantes confusiones suas, effraenatam cogitandi, loquendi et impia quaeque audiendi licentiam quaquaversus diffundere contendunt inter fideles Italiae populos, et catholicam Religionem in Italia ipsa labefactare, ac, si fieri unquam posset, funditus evertente commoliuntur. Apparuit tota diabolici eorum consilii ratio tum aliis nonnullis in locis, tum in alma praesertim Urbe, Supremi Pontificatus Nostri Sede, in qua, Nobis abire inde coactis, liberius, paucis licet mensibus, debacchati sunt; ubi divinis humanisque rebus nefario ausu commiscendis, eo tandem illorum furor pervenit, ut spectatissimi Urbani Cleri, et Praesulum sacra inibi iussu Nostro impavide curantium turbata opera et auctoritate despecta, vel ipsi interdum miseri aegroti cum morte collectantes, cunctis destituti religionis subsidiis, animam inter procacis aliquius meretricis illecebras emittere cogebantur.

¹ Huc referuntur Syllabi Propositiones 18 — 63.

Iam vero etsi deinceps Romana eadem Urbs, et aliae Pontificiae ditionis provinciae, Deo miserante, per Catholicarum Nationum arma civili Nostro regimini restitutae fuerint, ac bellorum tumultus in aliis pariter regionibus Italiae cessaverit, non destitutere tamen nec sane desistunt improbi illi Dei hominumque hostes a nefando suo opere, sin minus per apertam vim, aliis certe fraudulentis nec semper occultis modis urgendo. Verum infirmitati Nostrae supremam totius Dominici gregis curam in tanta temporum difficultate sustinenti, et peculiaribus huiusmodi Ecclesiarum Italiae periculis vehementer afflictae, non levis inter aerumnas consolatio est ex pastorali Vestro studio, Venerabiles Fratres, cuius multa Nobis documenta, et in medio praeteritae tempeslatis turbine non defuerant, et nova in dies clarioraque obveniunt. Ipsa autem rei gravitas urget Nos, ut pro debito apostolici officii Fraternitatibus Vestris, in Nostrae sollicitudinis partem vocatis, aciores sermone atque hortationibus nostris addamus stimulos ad praelianda constanter una Nobiscum praelia Domini, atque ad ea omnia concordibus animis providenda ac praeslanda, quibus, Deo benedicente, et damna reparentur quaecumque Religioni sanctissimae per Italiam illata iam sint, et imminentia in posterum pericula propulsentur.

Inter multiplices fraudes, quibus praedicti Ecclesiae hostes utili consueverunt ad Italorum animos a Fide catholica abalienandos, asserere etiam, et quaquaversus clamitare non erubescunt, catholicam Religionem Italae Gentis gloriae, magnitudini et prosperitati adversari ac propterea opus esse, ut illius loco Protestantium placita et conventicula inducantur, constituantur et propagentur, quo Italia pristinum veterum temporum, scilicet ethnicorum, splendorem iterum acquirere possit. In quo sane illorum commento haud facile quis existimaverit, num detestanda magis et vesanae impietatis malitia, vel impudentia mentientis improbitatis.

Etenim spirituale emolumenntum ut de potestate tenebrarum in Dei lumen translati et iustificati Gratia Christi haeredes simus secundum spem vitae aeternae, hoc scilicet animarum emolumenntum, a catholicae Religionis sanctitate dimanans, eius profecto est

pretii, ut quaecumque huius mundi gloria et faustitas in comparatione illius plane in nihilum esset computanda. « Quid enim prodest homini si mundum universum lucretur , animae vero suae detrimentum patiatur ? aut quam dabit homo commutationem pro anima sua ¹ » ? At vero tantum porro abest, ut temporalia illa detimenta Italorum Genti ob verae Fidei professionem acciderint, ut immo Religioni catholicae in acceptis referre illa debeat si Romano labante Imperio non in eam conditionem deciderit, in quam Assyrii et Chaldaeи, Medi, Persaeque et Macedones Populi, multos antea dominati per annos commutata deinceps temporum vice, dilapsi fuerant. Etenim nemo prudens ignorat , per sanctissimam Christi Religionem effectum esse, ut Italia non solum a tot ac tantis, quibus obruebatur, errorum tenebris fuerit erepta, verum etiam ut inter antiqui illius Imperii ruinas, et barbarorum tota Europa grassantium incursiones, ad eam nihilominus gloriam et magnitudinem p[re]caeteris totius mundi nationibus se provectam conspiceret, ut per sacram Petri cathedram singulari Dei beneficio in ipsam collocatam latius atque solidius praesideret religione divina, quam praefuerat olim dominatione terrena.

Atque ex ipso hoc Apostolicae habendae Sedis singulari privilegio, et ex Religione catholica firmiores exinde in Italiae Populis radices obtinente alia porro permulta , eademque insignia beneficia profecta sunt. Siquidem sanctissima Christi Religio verae sapientiae magistra , humanitatis vindex , ac virtutum omnium foecunda parens , avertit quidem Italos ab infelicis illius gloriae splendore , quam illorum maiores in perpetuo bellorum tumultu, in externorum oppressione , atque in longe maximo hominum numero , ex eo quod vigebat iure belli , ad durissimam captivitatem redigendo posuerant , sed una simul Italos ipsos Catholicae veritatis luce collustratos ad sectandam iustitiam et misericordiam, atque adeo ad praeclera etiam pietatis in Deum , et beneficentiae erga homines aemulanda opera excitavit. Hinc in praecipuis Italiae urbibus admirari est , sacra templa , et alia

Christianorum temporum monumenta , haudquaquam per cruentos labores hominum sub captivitate gementium , sed ingenuo vivificae caritatis studio confecta , et pia cuiusque generis instituta , quae sive ad Religionis exercitia , sive ad educationem iuventutis , et litteras , artes , disciplinas rite excolendas , sive ad miserorum aegritudines et indigentias sublevandas comparata sunt. Haec igitur divina Religio , in qua tot quidem nominibus Italiae salus , felicitas et gloria continetur , haec scilicet Religio illa est , quam ab Italiae populis reiiciendam inclamat ? Lacrimas cohibere non possumus , Venerabiles Fratres , dum conspicimus aliquos nunc Italos reperiri , improbos adeo , misereque illusos , ut pravis impiorum hominum plaudentes doctrinis in tantam Italiae perniciem conspirare cum ipsis non reformidant.

Sed vero ignotum vobis non est , Venerabiles Fratres , praeci-
puos illos huius scelestissimae machinationis architectos eo tan-
dem spectare , ut populos omni perversarum doctrinarum vento
agitatos , ad subversionem impellant totius ordinis humanarum
rerum , atque ad nefaria novi *Socialismi* et *Communismi* syste-
mata traducant. Norunt autem et longo multorum saeculorum
experimento comprobatum vident , nullam sibi consensionem spe-
rari posse cum Ecclesia catholica , quae scilicet in custodiendo
divinae revelationis deposito nihil unquam detrahi patitur pro-
positis Fidei veritatibus , nihil illis per nova hominum commenta
admisceri. Idcirco consilium inierunt de Italis populis tradu-
cendis ad Protestantium placita et conventicula ; in quibus ut il-
los decipient , non aliud esse dictitant , quam diversam verae eius-
dem christianaे Religionis formam , in qua , aequa ac in Ecclesia
catholica , Deo placere datum sit. Interea minime ignorant , pro-
futurum summopere impiae suae causae principium illud , quod in
Protestantium placitis praecipuum est , de Sacris scilicet Scriptu-
ris privato uniuscuiusque iudicio intelligendis. Exinde enim fa-
cilius sibi fore confidunt , ut primo quidem Sacris ipsis Litteris
perperam interpretatis abutantur ad errores suos , quasi Dei no-
mine , diffundendos ; subinde autem ut homines superbissima illa

de divinis rebus iudicandi licentia inflatos propellant ad communia ipsa iusti, honestique principia in dubium revocanda.

Absit tamen, Venerabiles Fratres, ut Italia, ex qua, ob Sedem Apostolici Magisterii Romae constitutam, nationes aliae incorruptos salutaris doctrinae latices haurire solitae sunt, siat illis in posterum lapis offensionis et petra scandali; absit, ut dilecta haec Dominicae Vineae pars in direptionem cedat omnium bestiarum agri; absit ut Itali Populi, venefico Babylonici calicis haustu dementati, parricidalia contra matrem Ecclesiam arma suscipiant. Nobis quidem, uti et Vobis, in haec tanti periculi tempora occulto Dei iudicio reservatis, cavendum omnino est, ne fraudes atque impetus hominum contra Italiae Fidem conspirantium extimescamus, nostris quasi viribus superandos; cum nostrum consilium et fortitudo sit Christus, et sine quo nihil possumus, per ipsum cuncta possimus ¹. Agite igitur, Venerabiles Fratres, advigilate impensius super creditum gregem, eumque a rapacium luporum insidiis et aggressionibus tueri contendite. Communicate invicem consilia, pergite, ut iam instituistis, coetus habere inter Vos, ut malorum initii, et praecipuis pro locorum diversitate periculorum fontibus communi investigatione perspectis, sub auctoritate ac ductu Sanctae huius Sedis promptiora illis remedia comparare valeatis, atque ita una Nobiscum concordissimis animis, totoque pastoralis studii robore curas laboresque Vestros, Deo adiuvante, in id conferatis, ut omnes hostium Ecclesiae impetus, artes, insidia, molimina irrita fiant.

Ea vero ut in irritum cadant, satagendum omnino est, ne populus de Christiana Doctrina, ac de Lege Domini parum instrutus, et diurna in multis grassantium vitiorum licentia hebetatus, paratas sibi insidias, et propositorum errorum pravitatem agnoscere vix possit. A Vesta igitur pastorali sollicitudine vehementer exposcimus, Venerabiles Fratres, ut nunquam intermittatis omnem adhibere operam, quo crediti Vobis fideles sanctissima Religionis nostrae dogmata ac praecepta, pro cuiusque captu, diligenter

¹ Ex S. Leone Magno Epist. ad Rusticum Narbonensem.

edoceantur, simulque moneantur, et excitentur omnimodis ad vi-
tam moresque suos ad illorum normam componendos. Inflammate
in eum finem Ecclesiasticorum hominum zelum, illorum praeser-
tim, quibus animarum cura demandata est, ut serio meditantes
ministerium, quod acceperunt in Domino, et habentes ob oculos
Tridentini Concilii praescripta ¹, maiori usque alacritate, prout
temporum ratio postulat, in christiana plebis instructionem in-
cumbant, et sacra eloquia, ac salutis monita in omnium cordibus
inserere studeant, annunciando ipsis cum brevitate et facilitate
sermonis vicia, quae eos declinare, et virtutes, quas sectari oport-
eat, ut poenam aeternam evadere, et caelestem gloriam consequi
valeant.

Speciatim vero procurandum est, ut fideles ipsi impressum in
animis habeant, alteque defixum dogma illud sanctissimae nostrae
Religionis, quod est de necessitate catholicae Fidei ad obtainendam
salutem ². Hunc in finem summopere conducet, ut in publicis ora-
tionibus fideles laici una cum Clero agant identidem peculiares
Deo gratias pro inestimabili catholicae Religionis beneficio, quo
ipsos omnes clementissime donavit, atque ab eodem Misericor-
diarum Patre suppliciter petant, ut eiusdem Religionis profes-
sionem in regionibus nostris tueri, et inviolatam conservare di-
gnetur.

Interea Vobis certe peculiaris erit cura, ut fideles omnes tem-
pestive a Fraternitatibus Vestris suscipiant Sacramentum Confir-
mationis, per quod summo Dei beneficio specialis gratiae robur
confertur ad Fidem catholicam in gravioribus etiam periculis con-
stanter profitendam. Nec porro ignoratis, eundem in finem pro-
desse, ut ipsi a peccatorum sordibus, per sinceram illorum dete-
stationem, et Sacramentum Poenitentiae expiati, saepius devote
percipient sanctissimum Eucharistiae Sacramentum, in quo spiri-

¹ Sess. V. cap. 2. — Sess. XXIV. cap. 4. et 7. de Ref.

² Hoc dogma a Christo acceptum, et inculcatum a Patribus atque a
Conciliis, habetur etiam in Formulis Professionis Fidei, tum in ea scilicet,
quae apud Latinos, tam in ea, quae apud Graecos, tum in alia, quae apud
ceteros Orientales Catholicos in usu est.

tualem esse constat animarum cibum et antidotum, quo libere-mur a culpis quotidianis, et a peccatis mortalibus praeservemur, atque adeo symbolum unius illius corporis, cuius Christus caput existit, cuique nos, tanquam membra, arctissima fidei, spei et caritatis connexione adstrictos esse voluit, ut idipsum omnes diceremus, nec essent in nobis schismata 1.

Evidem non dubitamus, quin Parochi, eorumque adiutores et Sacerdotes alii, qui certis diebus, iejuniorum praesertim tempore, ad praedicationis ministerium destinari consueverunt, auxiliarem Vobis operam sedulo in his omnibus sint praeslituri. Attamen illorum opera adiungere interdum oportet extraordinaria subsidia Spiritualium Exercitiorum, et Sacrarum Missionum, quas, ubi operariis idoneis commissae fuerint, valde uliles benedicente Domino esse constat tum fovendae bonorum pietati, tum peccatoribus, et longo etiam vitiorum habitu depravatis hominibus ad salutarem poenitentiam excitandis, atque adeo ut fidelis populus crescat in scientia Dei, et in omni opere bono fructificet, et uberioribus caelestis gratiae auxiliis munitus a perversis inimicorum Ecclesiae doctrinis constantius abhorreat.

Ceterum in his omnibus Vestrae, ac Sacerdotum Vobis auxiliantium curae eo inter alia spectabunt, ut fideles maiorem horrorem concipient illorum scelerum, quae cum aliorum scandalo patrantur. Nostis enim, quantum diversis in locis excreverit eorum numerus, qui Sanctos Caelites, vel ipsum quoque Sacrosanctum Dei Nomen palam blasphemare audent, aut in concubinatu vivere dignoscuntur cum incestu interdum coniuncto, aut Festis diebus servilia opera apertis etiam officinis exercent, aut Ecclesiae praecepta de ieuniis ciborumque delectu pluribus quoque adstantibus contemnunt, aut alia diversa crimina simili modo committere non erubescunt. Meminerit igitur, Vobis instantibus, fidelis populus et serio consideret magnam peccatorum huiusmodi gravitatem et severissimas poenas, quibus illorum auctores plectendi erunt tum pro reatu cuiusque criminis proprio, tum pro spi-

1 Ex Trid. Sess. XIII. Decr. *de SS. Euchar. Sacramento*, cap. 2.

rituali periculo, in quod fratres suos pravi sui exempli contagione induxerunt. Scriptum est enim: *Vae mundo a scandalis.... Vae homini illi, per quem scandalum venit 1.*

Inter diversa insidiarum genera, quibus vaferimi Ecclesiae humanaeque Societatis inimici populos seducere annituntur, illud certe in praecipuis est, quod nefariis consiliis suis iamdiu paratum in novae Artis librariae pravo usu invenerunt. Itaque in eo toti sunt, ut impios libellos et Ephemerides ac Pagellas mendacii, calumniarum, et seductionis plenas edere in vulgus, ac multiplicare quotidie non intermittent. Immo et praesidio usi Societatum Biblicarum, quae a Sancta hac Sede iamdudum damnatae sunt ², Sacra etiam Biblia praeter Ecclesiae regulas ³ in vulgarem linguam translata, atque adeo corrupta, et in pravum sensum infando ausu detorta diffundere, illorumque lectionem sub Religionis obtentu fideli plebi commendare non verentur. Hinc pro sapientia Vestra optime intelligitis, Venerabiles Fratres, quanta Vobis vigilantia, et sollicitudine adlaborandum sit, ut fideles oves a pestifera illorum lectione prorsus abhorreant; atque ut de divinis nominatim Litteris meminerint, neminem hominum id sibi arrogare posse, ut suae prudentiae innixus illas ad suos sensus contorquere praesumat contra eum sensum, quem tenuit, et tenet S. Mater Ecclesia; cui quidem soli a Christo Domino mandatum est, ut Fidei depositum custodiat, ac de vero divinorum eloquiorum sensu, et interpretatione iudicet ⁴.

1 Matthaei XVIII.

2 Extant ea super re, praeter alia praecedentia Decreta, Encyclicheae Litterae Gregorii XVI datae postridie Nonas Maii 1844, quae incipiunt — *Inter praecipuas machinationes* — cuius sanctiones Nos quoque inculcavimus in Encycl. Epist. data 9 Novembris 1846.

3 Vid. Reg. 4 ex iis, quae a Patribus in Conc. Tridentino delectis conscriptae, et a Pio IV approbatae fuerunt in Const. *Dominici gregis* 24 Mart. 1564: et additionem eidem factam a Congr. Indicis, auctoritate Ben. XIV 17 Jun. 1757 (quae praemitti solent Indici Libr. prohibitor.)

4 Vid. Tridentinum Sess. IV. in Decret. *De editione et usu Sacrorum Librorum.*

Ad ipsam vero pravorum Librorum contagionem comprimendam perutile erit, Venerabiles Fratres, ut quicumque penes Vos sint insignis, sanaeque doctrinae Viri alia parvae item molis scripta, a Vobis scilicet antea probata, edant in aedificationem Fidei, ac salutarem populi instructionem. Ac Vestrae hinc curae erit, ut eadem scripta, uti et alii incorruptae pariter doctrinae, probataeque utilitatis libri ab aliis conscripti, prout locorum ac personarum ratio suggesserit, inter fideles diffundantur.

Omnes autem, qui una Vobiscum in defensionem Fidei allaborent, eo speciatim spectabunt, ut pletatem, venerationem, atque observantiam erga supremam hanc Petri Sedem, qua Vos, Venerabiles Fratres, tantopere excellitis, in vestrorum fidelium animis insinuent, tueantur, alteque defigant. Meminerint scilicet fideles populi, vivere hic, et praesidere in Successoribus suis Petrum Apostolorum Principem ¹, cuius dignitas in indigno etiam eius haerede non deficit ². Meminerint, Christum Dominum posuisse in hac Petri Cathedra inexpugnabile Ecclesiae suae fundatum ³, et Petro ipsi claves dedisse Regni Caelorum ⁴, ac propterea orasse, ut non deficeret fides eius, eidemque mandasse, ut confirmaret in illa fratres ⁵; ut proinde Petri Successor Romanus Pontifex in universum Orbem teneat primatum, et verus Christi Vicarius, totiusque Ecclesiae Caput, et omnium Christianorum Pater et Doctor existat ⁶.

In qua sanc erga Romanum Pontificem populorum communione, et obedientia tuenda, brevis et compendiosa via est ad illos in Catholicae veritatis professione conservandos. Neque enim fieri potest, ut quis a Catholica Fide ulla unquam ex parte rebellet, nisi et auctoritatem abiiciat Romanae Ecclesiae, in qua extat

¹ Ex Actis Ephesini Concilii Act. III. et S. Petro Chrysologo Epist. ad Eutychen.

² S. Leo M. Sermon. in anniv. assumpt. sua.

³ V. Matthaei XVI. 18.

⁴ Matthaei XVI. 19.

⁵ Lucae XXII. 31. 32.

⁶ Ex Concilio Oecumenico Florentino in Definit. seu Decr. Unionis.

eiusdem Fidei irreformabile Magisterium a Divino Redemptore fundatum , et in qua propterea semper conservata fuit ea , quae est ab Apostolis traditio. Hinc non modo antiquis haereticis , sed etiam recentioribus Protestantibus , quorum ceteroquin tanta in reliquis suis placitis discordia est, illud commune semper fuit, ut auctoritatem impugnarent Apostolicae Sedis , quam nullo prorsus tempore, nullaque arte aut molimine, ne ad unum quidem ex suis erroribus tolerandum inducere potuerunt. Idcirco hodierni etiam Dei et humanae Societatis hostes nihil inausum relinquunt , ut Italos populos a Nostro Sanctaeque eiusdem Sedis obsequio divellant; rati nimirum tum demum posse sibi contingere , ut Italiam ipsam impietate doctrinae suae , novorumque systematum peste contaminent.

Atque ad pravam hanc doctrinam , et systemata quod attinet , nolum iam omnibus est, illos eo potissimum spectare, ut libertatis et aequalitatis nominibus abutentes , exitiosa *Communismi* et *Socialismi* commenta in vulgus insinuent. Constat autem , ipsis seu *Communismi* , seu *Socialismi* magistris , diversa licet via ac methodo agentibus , illud demum commune esse propositum , ut operarios atque alios inferioris praesertim status homines suis deceptos fallaciis , et faustioris conditionis promissione illusos , continuis commotionibus exagitent , atque ad graviora paullatim facinora exerceant ; ut postmodum illorum opera uti possint ad superioris cuiusque Auctoritatis regimen oppugnandum , ad expilandas, diripiendas vel invadendas Ecclesiae primum, ac deinde aliorum quorumcumque proprietates , ad omnia tandem violanda divina humanaque iura , in divini cultus destructionem atque in subversionem totius ordinis civilium Societatum. In tanto autem Italiae discrimine Vestrum munus est , Venerabiles Fratres , omnes pastoralis studii nervos intendere, ut fidelis populus agnoscat perversa huiusmodi placita et systemata, si ab illis decipi se patiatur , in aeternam pariter ac temporalem eius perniciem fore cessura.

Moneantur itaque fideles curae Vestrae concreti , pertinere omnino ad naturam ipsam humanae societatis, ut omnes Auctori-

tati obtemperare debeant legitime in illa constitutae; nec quidquam commutari posse in praceptis Domini, quae in Sacris Litteris ea super re annuntiata sunt. Scriptum est enim: « Subiecli « estote omni humanae creaturae propter Deum sive regi, quasi « praecellenti, sive ducibus, tanquam ab eo missis ad vindictam « malefactorum, laudem vero bonorum; quia sic est voluntas Dei, « ut benefacientes obmutescere faciatis imprudentium hominum « ignorantiam: quasi liberi, et non quasi velamen habentes mali- « tiae libertatem, sed sicut servi Dei 1 ». Et rursus: « Omnis a- « nima potestatibus sublimioribus subdita sit: non est enim po- « testas nisi a Deo: quae autem sunt, a Deo ordinatae sunt: Ita- « que qui resistit potestati, Dei ordinationi resistit: Qui autem « resistunt, ipsi sibi damnationem acquirunt 2 ».

Sciant praeterea, esse pariter naturalis atque adeo incommutabilis conditionis humanarum rerum, ut inter eos etiam, qui in sublimiori auctoritate non sunt, alii tamen aliis, sive ob diversas animi, aut corporis dotes, sive ob divitias, et externa huiusmodi bona praevaleant: nec ullo libertatis et aequalitatis obtentu fieri unquam posse, ut aliena bona, vel iura invadere, aut quomodolibet violare licitum sit. Perspicua hoc quoque in genere, et passim inculcata extant in Sacris Litteris divina pracepta, quibus nedum ab occupatione alienarum rerum, sed ab ipso etiam eius desiderio districte prohibemur 3.

Sed meminerint insuper pauperes, et miseri quicunque homines quantum ipsi debeant Catholicae Religioni, in qua intemerata viget, et palam praedicatur Christi doctrina; qui beneficia in pauperes, vel miseros collata perinde haberi a se declaravit, ac si facta sibi ipsi fuissent 4: atque omnibus praenuntiatam voluit peculiarem rationem, quam in die Iudicii habiturus est de iisdem misericordiae operibus, sive scilicet ad praemia aeternae vi-

1 S. Petri Epist. I. Cap. II. 13. seq.

2 S. Pauli Epist. ad Romanos XIII. 1. seq.

3 Exodi XX. 45. 17. — Deuteronomii V. 19. 21.

4 Matthaei XVIII. 15. XXV. 40. 45.

tae fidelibus tribuenda, qui illis vacaverint, sive ad illos, qui ea neglexerint, aeterni ignis poena multandos 1.

Ex qua Christi Domini praenuntiatione, aliisque Illius circa divitiarum usum, earumque pericula severissimis monitis 2, in Ecclesia Catholica inviolate custoditis, factum porro est, ut pauperes et miseri apud Catholicas gentes in longe mitiore, quam apud alias quaslibet, conditione versentur. Atque hi quidem in regionibus nostris uberiora adhuc subsidia obtinerent, nisi plura instituta, quae Maiorum pietate comparata fuerant ad ipsorum levamen, extincta nuper repetitis publicarum rerum commotionibus, aut direpta fuissent. De reliquo pauperes nostri, Christo ipso docente, meminerint, non esse cur tristes sint de conditione sua: quandoquidem in paupertate ipsa facilior eis parata via est ad obtinendam salutem, dummodo scilicet suam indigentiam patienter sustineant, et non r  tantum, sed spiritu pauperes sint. Ait enim: « Beati pauperes spiritu, quoniam ipsorum est regnum Caelorum 3 ».

Sciat etiam fidelis populus universus, veteres Reges ethnica-
rum Gentium, aliosque in illis publicarum rerum Praesides multo gravius frequentiusque abusos fuisse potestate sua; atque hinc Religioni nostrae sanctissimae in acceptis referendum esse cognoscat, si Principes Christianorum temporum reformidantes, Religione admonente, *iudicium durissimum*, quod *his, qui praesunt, fieri*; et destinatum peccantibus supplicium sempiternum, in quo *potentes potenter tormenta patientur* 4, iustiori erga subiectos populos et clementiori regimine utuntur.

Agnoscant denique crediti Vestris Nostrisque curis fideles, veram perfectamque hominum libertatem, et aequalitatem in Christianae Legis custodia positam esse; quandoquidem Deus Omnipotens, qui fecit *pusillum et magnum*, et cui *aequaliter cura est*

1 Matthaei XXV. 34. seq.

2 Matthaei XIX. 23. seq. — Lucae VI. 4. XVIII. 22. seq. — Epist. Iacobii V. 1. seq.

3 Matthaei V. 3.

4 Sapientiae VI. 6. 7.

de omnibus 1, non subtrahet personam cuiusquam, nec verebitur magnitudinem cuiusquam 2, ac diem statuit in quo iudicaturus est Orbem in aequitate 3, in suo unigenito Christo Iesu, qui venturus est in gloria Patris sui cum Angelis suis, et tunc reddet unicuique secundum opera eius 4.

Quod si fideles iidem paterna suorum Pastorum monita, et commemorata superius Christianae Legis mandata despicientes, a supradictis hodiernarum machinationum promotoribus decipi se patientur, et in perversa *Socialismi* et *Communismi* systemata conspirare cum illis voluerint, sciant serioque considerent, thesaurizare se sibimetipsis apud Divinum Iudicem thesauros vindictae in die irae, nec quidquam interea ex conspiratione illa temporalis in populum utilitatis, sed nova potius miseriarum et calamitatum incrementa obventura. Non enim datum hominibus est, novas stabilire societas et communiones naturali humana- rum rerum conditioni adversantes; atque idcirco conspirationum huiusmodi, si per Italiam dilatarentur, non alias esse exitus posset, nisi ut hodierno publicarum rerum statu per mutuas civium contra cives aggressiones, usurpationes, caedes labefactato funditusque convulso, pauci tandem aliqui, multorum spoliis locupletati, summum in communi ruina dominatum arriperent.

Iam vero ad fidelem populum avertendum ab impiorum insidiis, et in professione custodiendum Catholicae Religionis, atque ad veras virtutis opera excitandum, magna, ut probe scitis, vis est in illorum vita et exemplo, qui divinis se ministeriis manciparunt. Verum, proh dolor! non defuere per Italiam aliqui, pauci illi quidem, Viri Ecclesiastici, qui ad Ecclesiae hostes transfugae non minimo illis ad fideles decipiendos adiumento fuerunt. Sed Vobis certe, Venerabiles Fratres, novo illorum lapsus stimulo fuit, ut acriori in dies studio in Cleri disciplinam advigiletis. Atque hic in futurum quoque tempus, pro eo ac debemus, pro-

1 Sapientiae VI, 8.

2 Ibidem.

3 Actorum XVII. 31.

4 Matthaei XVI. 27.

spicere cupientes , temperare Nobis non possumus , quin commendemus denuo , quod in prima nostra ad totius Orbis Episcopos Encyclica Epistola inculcavimus ¹ , nempe ut nemini cito manus imponatis ² , sed in Ecclesiasticae Militiae delectu maiorem usque diligentiam adhibeatis. De iis praesertim , qui sacris Ordinibus iniciari desiderent , inquirere et diu multumque investigare opus est , num ea doctrina , gravitate morum , et divini cultus studio commendentur , ut certa spes affulgeat fore , ut tanquam lucernae ardentes in Domo Domini , eorum vivendi ratione , atque opera aedificationem et spiritualem Vestro gregi utilitatem afferre queant.

Quoniam vero ex Monasteriis recte administratis ingens in Ecclesia Dei splendor atque utilitas dimanat , et Regularis etiam Clericus adiutricem Vobis in procuranda animarum salute operam navat , Vobis ipsis , Venerabiles Fratres , in mandatis damus , primum quidem ut religiosas familias cuiusque Dioecesis Nostro nomine certiores faciatis , Nobis peculiares aerumnas ingemiscentibus , quas multae illarum in recenti calamitoso tempore perpessae sunt , non levi interea consolationi fuisse animorum patientiam , atque in virtutis , et Religionis studio constantiam , quibus plurimi ex religiosis hominibus ad exemplum se commendarunt ; etsi aliqui non defuerint , qui suae professionis obliiti cum magno bonorum scandalo , et Nostro fratrumque suorum dolore turpissime praevericati sunt : deinde vero , ut Praesides earumdem Familiarum , et superiores , ubi opus fuerit , illarum Moderatores Nostris verbis adhortemini , ut pro sui officii debito , nulli parcant curae atque industriae , quo Regularis Disciplina , ubi servatur , magis in dies vigeat et floreat , ubi vero detrimentum aliquod passa fuerit , omnino reviviscat et redintegretur . Moneant instanter iidem Praesides , arguant , increpent religiosos illarum Alumnos , ut serio considerantes quibus se votis Deo obstrinxerunt , illa diligenter reddere studeant , suique Instituti regulas inviolate custodiant ,

¹ Die 9 Novembris 1846.

² I. ad Timoth. V. 22.

et mortificationem Iesu in suo corpore circumferentes ab iis omnibus abstineant, quae propriae vocationi adversantur, et operibus instent, quae caritatem Dei ac proximi, perfectaeque virtutis studium praeseferant. Caveant praesertim supradicti Ordinum Moderatores, ne ulli ad religiosa Instituta aditum faciant, nisi cuius antea vitam, mores atque indolem accuratissime expenderint; ac deinde illos tantum ad religiosam professionem admittant, qui tyrocinio rite posito ea dederint verae vocationis signa, ut iudicari merito possit, ipsos non alia de causa religiosam vitam amplecti, nisi ut Deo unice vivant, et suam atque aliorum salutem pro cuiusque Instituti ratione procurare possint. Super his autem deliberatum fixumque Nobis est, ut ea omnino serventur, quae ad Religiosarum Familiarum bonum statuta praescriptaque sunt in Decretis a Nostra Congregatione super Statu Regularium die 25 Ianuarii superiori anno editis, et Apostolica Nostra Auctoritate sancitis.

Post haec ad Saecularis Cleri delectum revocato sermone, commendatam in primis volumus Fraternitatibus Vestris instructiōnem, et educationem minorum Clericorum; quandoquidem idonei Ecclesiae Ministri vix aliter haberi possunt, quam ex illis, qui ab adolescenlia et prima ipsa aetate ad sacra eadem officia rite informati fuerint. Pergite igitur, Venerabiles Fratres, omnem impendere industriam atque operam, quo sacrae militiae Tyrones a teneris annis, quoad eius fieri poterit, in Ecclesiastica Seminaria recipientur, atque inibi, tanquam novellae plantationes succrescentes in circuito Tabernaculi Domini, ad vitae innocentiam, religionem, modestiam et ecclesiasticum spiritum conformatur, simulque litteras et minores maioresque disciplinas, praesertim sacras addiscant a selectissimis magistris, qui scilicet doctrinam sectentur ab omni cuiusque erroris periculo alienam.

Quoniam vero haud facile Vobis continget Minorum omnium Clericorum eruditionem in Seminariis perficere, et ceteros etiam ex laicorum ordine adolescentes ad pastoralem Vestram sollicitudinem pertinere non est dubium, excubate insuper, Venerabiles Fratres, aliis omnibus publicis privatisque scholis, et quantum

in Vobis est omni ope atque industria adnitimini, ut tota in illis studiorum ratio ad Catholicae doctrinae normam exigatur, et conveniens in illas iuventus ab idoneis et probitate ac religione spectatis Magistris ad veram virtutem, bonasque artes et disciplinas instituta, opportunis muniatur praesidiis, quibus structas sibi ab impiis insidias agnoscat, et exiliales eorumdem errores devitet, atque ita sibi et christiana, ac civili reipublicae ornamento et utilitati esse possit.

Eo autem in genere praecipuam Vobis, planeque liberam auctoritatem et curam vindicabis super Professoribus Sacrarum Disciplinarum, et in reliquis omnibus quae Religionis sunt, aut Religionem proxime attingunt. Advigilate, ut in tota quidem scholarum ratione, sed in his maxime quae Religionis sunt, libri adhibeantur ab erroris cuiusque suspicione immunes. Commonete Animarum Curatores, ut seduli Vobis adiutores sint in iis, quae scholas respiciunt infantium et iuvenum primae aetatis; quo destinentur ad illas Magistri, et Magistrae probatissimae honestatis, et in pueris aut puellis ad Christianae Fidei rudimenta instituendis libri adhibeantur a Sancta hac Sede probati. Qua in re dubitare non possumus, quin Parochi ipsi exemplo illis sint, et Vobis sedulo instantibus, in pueros ad Christianae Doctrinae primordia instruendos quotidie magis incumbant, eamque instructionem ad graviores sui muneric partes omnino pertinere meminerint 1. Idem vero admonendi erunt, ut in suis sive ad pueros, sive ad reliquam Plebem instructionibus habere ob oculos non omittant Catechismum Romanum, quem ex Decreto Tridentini Concilii, et S. Pii V immortalis memoriae Decessoris Nostri iussu editum, alii porro Summi Pontifices, ac nominatim fel. record. Clemens XIII cunctis animarum Pastoribus denuo commendatum voluit, tanquam *ad pravarum opinionum fraudes removendas, et veram,*

1 Tridentinum Sess. XXIV. 4. — Bened. XIV Constit. *Etsi minime*
7 Febr. 1742.

sanamque doctrinam propagandam, stabiendumque opportu-
nissimum subsidium 1.

Haud sane mirabimini, Venerabiles Fratres, si de his fusiori aliquantulum calamo scripsimus. Enimvero prudentiam Vestram minime fugit, periculo hoc tempore Vobis Nobisque ipsis omni industria atque opera, ac magna animi firmitate connitendum et invigilandum esse in illis omnibus, quae Scholas, et puerorum ac iuvenum utriusque sexus instructionem et educationem attin-gunt. Nostis enim, hodiernos Religionis, humanaeque Societatis inimicos, diabolico plane spiritu, in id suas omnes artes conferre, ut iuveniles mentes et corda a prima ipsa aetate pervertant. Idcirco etiam nihil intentatum, nihil prorsus inausum relinquunt, ut Scholas et Instituta quaelibet iuventutis educationi destinata, ab Ecclesiae auctoritate, et a Sacrorum Pastorum vigilantia omni ex parte subducant.

Iuxta haec firma spe sustentamur fore, ut carissimi in Christo Filii Nostri omnes Italiae Principes Fraternitatibus Vestris potenti patrocinio suo adfuturi sint, quo in supradictis omnibus muneri Vestro uberius satisfacere valeatis; nec dubitamus, quin iidem ipsi Ecclesiam, et omnia tam spiritualia quam temporalia eius iura tueri velint. Id quidem religioni congruum est, avitaeque pietati, qua se in exemplum animatos ostendunt. Illorum quoque sapientiam non latet, initia malorum omnium, quibus tantopere affligimur, a detrimentis repetenda esse, quae Religioni Ecclesiaeque Catholicae iamdiu, praesertim vero a Protestantium ae-tate, irrogata fuerant. Perspiciunt scilicet, ex depresso saepius sacrorum Antistitum auctoritate, et ex crescente in dies multorum in divinis et Ecclesiasticis praeceptis impune violandis temerita-te, factum fuisse, ut minueretur pariter populi obsequium erga Civilem Potestatem, et hodiernis publicae tranquillitatis inimicis

1 In Encyclicis Litteris ea de re ad omnes Episcopis datis 14 Iunii 1761.

planior inde pateret via ad seditiones contra Principem commovendas. Perspiciunt etiam, ex occupatis non raro direptisque, ac palam divenditis temporalibus bonis ad Ecclesiam legitimo proprietatis iure spectantibus, contigisse, ut decrescente in populi reverentia erga proprietates religionis destinatione consecratas, multi hinc faciliores praeberent aures audacissimis novi *Socialismi* et *Communismi* assertoribus, qui alias pariter aliorum proprietates occupari ac dispertiri, aut alia quavis ratione in omnium usum converti posse comminiscuntur. Perspiciunt insuper recidisse paullatim in civilem Potestatem impedimenta illa, quae iamdiu multiplici fraude comparata fuerant ad cohibendos Ecclesiae Pastores, ne sacra sua Auctoritate uti libere possent. Perspiciunt denique calamitatum, quibus urgemur, nullum aliud invenire posse promptius et maioris virtutis remedium, quam ut refloreat in tota Italia splendor Religionis Ecclesiaeque Catholicae, in qua diversis hominum conditionibus, et indigentiis opportunissima praesto esse praesidia non est dubium.

Siquidem (verbis utimur S. Augustini) « Catholica Ecclesia non « solum ipsum Deum, sed etiam proximi dilectionem atque cari- « tatem ita complectitur, ut omnium morborum, quibus pro pec- « catis suis animae aegrotant, omnis apud illam medicina pra- « polleat. Ipsi pueriliter pueros, fortiter iuvenes, quiete senes, « prout cuiusque non corporis tantum, sed et animi aetas est, « exercet et docet. Ipsi feminas viris suis non ad explendam li- « bidinem, sed ad propagandam sobolem, et ad rei familiaris so- « cietatem casta, et fideli obedientia subiicit; et viros coniugibus « non ad illudendum imbecilliores sexum, sed sinceri amoris le- « gibus praeficit. Ipsi parentibus filios libera quadam servitute « subiungit, parentes filiis pia dominatione praeponit. Ipsi fratri- « bus fratres Religionis vinculo firmiore atque arctiore, quam san- « guinis, nectit, omnemque generis propinquitatem et affinitatis « necessitudinem, servatis naturae, voluntatisque nexibus, mutua « caritate constringit. Ipsi dominis servos non tam conditionis « necessitate, quam officii delectatione docet adhaerere; et domi-

« nos servis, summi Dei communis Domini consideratione placabiles, et ad consulendum magis, quam coercendum propensiores facit. Ipsa cives civibus, gentes gentibus, et prorsus homines primorum parentum recordatione non societate tantum, sed quadam etiam fraternitate coniungit. Docet reges prospicere populis, monet populos se subdere regibus. Quibus honor debatur, quibus affectus, quibus reverentia, quibus timor, quibus consolatio, quibus admonitio, quibus exhortatio, quibus disciplina, quibus obiurgatio, quibus supplicium, sedulo docet, ostendens quemadmodum et non omnibus omnia, et omnibus caritas, et nulli debeatur iniuria 1 ».

Nostrum igitur Vestrumque est, Venerabiles Fratres, ut nulli parcentes labori, nulla unquam difficultate deterriti, toto pastoralis studii robore tueamur in Italis populis cultum catholicae Religionis, et non solum obsistamus alacriter impiorum conatibus, qui Italiam ipsam ab Ecclesiae sinu avellere commoliuntur, sed etiam degeneres illos Italiae filios, qui iam eorumdem artibus seduci se passi fuerint, ad salutis viam revocare annitamur

Verumtamen cum omne datum optimum et omne donum perfectum desursum descendat, adeamus cum fiducia ad thronum gratiae, Venerabiles Fratres, et caelestem lumen et misericordiarum Patrem publicis privatisque precibus orare suppliciter atque obsecrare non intermittamus, ut per merita Unigeniti Filii sui Domini nostri Iesu Christi, avertens faciem suam a peccatis nostris, omnium mentes et corda virtute gratiae suae propitius illustret, ac rebelles quoque ad se compellens voluntates, Ecclesiam sanctam novis victoriis et triumphis amplificet; quo in tota Italia, immo et ubique terrarum, merito pariter ac numero populus eius serviens augeatur. Invocemus etiam sanctissimam Dei Genitricem Immaculatam Virginem Mariam, quae praevalido apud Deum patrocinio suo quod quaerit invenit, et frustrari non potest, atque una Petrum Apostolorum Principem, et Coapostolum eius Paulum

1 S. Augustini de Moribus Cathol. Ecclesiae, Lib. I.

omnesque sanctos Coelites, ut Clementissimus Dominus, eorum intervenientibus precibus, flagella iracundiae suae a fidelibus populis avertat; et cunctis, qui Christiana professione censentur, tribuat propitius per gratiam suam et illa respuere, quae huic inimica sunt nomini, et ea, quae sunt apta, sectari.

Demum, Venerabiles Fratres, Nostrae in Vos studiosissimae voluntatis testem accipite Apostolicam Benedictionem, quam intimo cordis affectu, Vobis ipsis et Clericis, Laicisque fidelibus, vigilantiae Vestrae concreditis, peramanter impertimur.

Datum Neapoli, in Suburbano Portici, die VIII Decembris anni MDCCCXLIX. Pontificatus Nostri anno IV.

ALLOCUTIO

HABITA IN CONSISTORIO SECRETO DIE XX MAII
ANNO MDCCCL.

VENERABILES FRATRES

Si semper **1** antea, Venerabiles Fratres, admirabilem Dei Optimi Maximi in re catholica tuenda providentiam extitisse cognovimus, postremis hisce potissimum annis caelestem illam vim, qua Deus Ecclesiae suae usque ad consummationem saeculi sese adfuturum promisit, mirandum in modum fulgere perspeximus. Universo enim, qua late patet, terrarum orbi notae ac pervulgatae sunt tristissimae rerum vicissitudines, quibus Nos vehementer afflicti ab hac Nostra Sede sexdecim et amplius menses exsulare coacti fuimus, itemque comperta atque explorata sunt acerbissima et nunquam satis deploranda tempora, quibus tenebrarum princeps suam omnem contra Ecclesiam et hanc Apostolicam Sedem rabiem evomere, atque in hac ipsa quoque Urbe, catholicae veritatis centro, cum incredibili Nostro, Vestroque et omnium bonorum luctu debacchari visus est. Atque omnes norunt quomodo iustus et misericors Dominus, qui perculit et sanat, mortificat et vivifcat, dederit ad inferos et reducit, praesentibus manifestisque suae bonitatis praesidiis consolatus Nos fuerit in tribulatione Nostra, et Nostras preces gemitusque, ac totius Ecclesiae vota propitio et sereno vultu respiciens luctuosissimam illam atque ab inferis excitatam tempestatem sedare, et carissimos Pontificiae Nostrae di-

1 *Huc refertur Syllabi Propositio 76.*

tionis populos ab infelici illo, in quo misere iacebant, statu eripere, Nosque in hanc almam Urbem ipsis populis p^raet laetitia gestientibus atque omni catholico orbe exultante, reducere sit dignatus. Itaque cum post Nostrum in Urbem redditum hodierno die Vos primum alloquuturi simus, nihil certe Nobis potius, quam ut maximas atque immortales Omnipotenti Deo pro tantis beneficiis agamus gratias, ac meritis laudibus prosequamur inclytas illas Nationes et Principes, qui a Deo ipso excitati de Nobis deque hac Apostolica Sede optime mereri, et suis opibus, consiliis et armis civilem eiusdem Sedis Principatum tueri ac defendere, et publicam quietem et ordinem huic Urbi et Pontificiae ditioni restituere tam vehementer laetati sunt.

Atque gratissimi Nostri animi sensus, et Nostrarum laudum praecconium merito sibi vindicat carissimus in Christo Filius Noster Ferdinandus II utriusque Siciliae Rex illustris. Ipse enim pro eximia sua religione, vix dum de Nostro Caietam adventu certior factus, nulla interposita mora ad Nos advolans una cum Augusta sua Coniuge Maria Theresia omnes singularis suae pietatis ac filialis prorsus devotionis et obsequii significationes Christi in terris Vicario exhibere vehementer gaudens, Nos munifico hospitio exceptit, ac toto tempore, quo in suo Regno morati sumus, quovis officiorum genere Nos cumulare nunquam intermisit, veluti Vos ipsi testes locupletissimi fustis, Venerabiles Fratres. Cum autem aliae quoque Nationes ad civilem Apostolicae huius Sedis Principatum tutandum accurrerunt, idem Princeps suas ipse copias ducere voluit. Quae quidem egregia pientissimi Regis in Nos et eamdem Sedem merita animo Nostro ita infixa haerent, ut iucundam eorum memoriam nulla unquam delere possit oblivio. Nunc vero magno cum honore et perenni grati animi Nostri testimonio nominanda a Nobis est clarissima Gallorum Natio militari gloria et in hanc Apostolicam Sedem obsequio, atque aliis tot sane non minibus illustris, cuius propensissimam in Nos voluntatem et beneficia experti sumus. Siquidem illa Natio, eiusque Reipublicae inclytus Praeses afflictis nostris et Pontificiae ditionis rebus oc-

currens, nullisque sumptibus parcens strenuos suos Duces, militesque mittendos decrevit, qui multis gravibusque perfuncti laboribus hanc potissimum Urbem misere divexatam atque prostratam ab infelici, qua premebatur, conditione liberarunt, vindicarunt ac Nos in ipsam Urbem reducere tantopere gloriati sunt. Qua quidem in laude, et grati animi Nostri significatione coniunctum quoque omnino volumus carissimum in Christo Filium Nostrum Franciscum Iosephum Austriae Imperatorem, Hungariae Regem Apostolicum, et Bohemiae Regem illustrem, qui pro avita sua pietate, et in hanc Petri Cathedram observantia validissimam suam opem et operam in civilem huius Apostolicae Sedis Principatum tuendum omni alacritate et studio conferens Pontificias praesertim Aemiliae, Piceni et Umbriae Provincias victricibus suis copiis ab iniusta ac tristi dominatione eripuit, easque legitimo Nostro et eiusdem Sedis regimini restituit. Gratissima quoque recordatione praecipuam rationem habere debemus erga Nos meritorum carissimae in Christo Filiae Nostrae Mariae Elisabeth Hispaniarum Reginae Catholicae, eiusque Gubernii: nam, veluti optime scitis, ubi nostras accepit calamitates, nihil antiquius habuit, quam singulari cura catholicas gentes ad communis omnium fidelium Patris causam propugnandam statim excitare, ac valentes suas deinde mittere copias ad Romanae Ecclesiae possessiones tuendas. Atque hic, Venerabiles Fratres, nullo modo taciti praeterire possumus aliorum praeclarissimorum Principum, illorum etiam qui huic Petri Cathedrae minime consociantur, propensissimam erga Nos voluntatem, qui, licet suas copias haud miserint, tamen eorum operam in temporalibus Nostris et Romanae Ecclesiae iuribus rationibusque tuendis impendere studuerunt. Quocirca iis quoque omnibus debitas meritasque habemus et agimus gratias, atque ipsis Nos summopere gratos esse profitemur. Qua quidem in re nemo admirari non potest summam illius omnia fortiter suaviterque regentis et moderantis Dei providentiam, qui in hac quoque tanta temporum perturbatione et acerbitate effecit, ut vel ipsi Principes cum Romana Ecclesia minime coniuncti civilem

eiusdem Ecclesiae Principatum sustinerent, defenderent, quo Romanus Pontifex singulari eiusdem divinae providentiae consilio per tot iam continentia saecula optimo quoque iure potitur, ut in universae Ecclesiae regimine sibi divinitus commisso supremam suam Apostolicam auctoritatem toto orbe ea plane libertate possit exercere, quae ad Summi Pontificatus munus obeundum ac totius Dominici gregis salutem procurandam tantopere est necessaria. Debitae autem laudis et honoris testimonium omnibus eorumdem Principum et Nationum apud Nos et hanc S. Sedem Oratoribus, atque Administris deferimus, qui pro suorum Principum et Nationum erga Nos voluntate ac studiis Personam Nostram ante discessum tutati sunt, ac Nos tum in exilio tum in reditu semper sunt comitati. Tot vero tantisque singularis pietatis, impensi amoris, devotissimi obsequii, ac largissimae liberalitatis officiis ab universo catholico orbe affecti fuimus, ut vehementer cuperemus in hoc Vestro consessu non solum singulis civitatibus et oppidis, sed unicuique etiam hominum iterum debitas pro suis erga Nos meritis persolvere gratias ac tribuere laudes, nisi longius quam par est haec Nostra excurrere deberet oratio. Verumtamen silentio praeterire non possumus illustria sane et mira fidei, pietatis, amoris et liberalitatis testimonia, quibus Nos prosequuti sunt, Venerabiles Fratres, totius catholici orbis Antistites, qui maximae Nobis laetitiae fuerunt. Namque ipsi, quamvis in gravissimis angustiis ac difficultatibus constituti, sacerdotali tamen fortitudine et zelo ministerium suum implere et bonum certamen certare, et tum voce, tum salutaribus scriptis, tum episcopalibus conventibus Ecclesiae causam, iura, libertatem impavide defendere, et commissi sibi gregis saluti prospicere nunquam cessarunt. Atque haud possumus quin gratissimi Nostri animi sensus Vobis quoque profiteamur, Venerabiles Fratres S. E. R. Cardinales, qui summam certe consolationem et solatium Nobis attulisti, quandoquidem Nostrarum calamitatum socii alque participes, invicto animo dura perpessi, et graviora quaeque pro Ecclesia Dei subire parati amplissimum, quem in eadem Ecclesia obtinetis, dignitatis

gradum omni virtute sustinere, Nosque in tanto rerum certamine et discrimine Vestris consiliis atque laboribus iuvare nunquam omisistis. Cum igitur maximo Dei beneficio res ita conversae fuerint, ut in hanc Apostolicam Sedem inter summas non solum huius almae Urbis, sed omnium etiam populorum gratulationes redire potuerimus, nihil certe Nobis omnibus potius esse debet, quam in humilitate cordis Nostri assiduas atque immortales ipsi clementissimo miserationum Domino agere gratias, qui fecit Nobiscum misericordiam suam, itemque Sanctissimae Dei Genitrici Immaculatae Virgini Mariae, cuius potentissimo patrocinio salutem Nostram acceptam referimus.

Hactenus, Venerabiles Fratres, ea raptim commemoravimus quae Nobis iucunditati fuerunt, nunc vero pro supremi Nostri Apostolici ministerii debito haud possumus quin de iis loquamur, quae cor Nostrum intime sollicitant, angunt et premunt. Noscitis enim, Venerabiles Fratres, tetterimum sane atque inexorabile bellum excitatum inter lucem et tenebras, inter veritatem et errorrem, inter vitium et virtutem, inter Belial et Christum, neque ignoratis quibus nefariis artibus et molitionibus inimici homines et sanctissimae nostrae Religionis res ubique affligere ac prostrare, et omnium Christianarum virtutum germen radicitus evelgere, et effraenatam impiamque opinandi vivendique licentiam quaquaversus propagare, et imperitae praesertim multitudinis, atque improvidae iuventutis animos mentesque omnigenis, perversis perniciosisque erroribus inficere, corrumpere, et iura omnia divina et humana subvertere, et si fieri unquam posset, catholicam Ecclesiam funditus delere, Sanctamque hanc Petri Cathedram expugnare connituntur. Ac nemo non videt quibus quantisque malis et damnis Christi ovile Nobis concreditum, ac vel ipsa humana societas a tenebrarum potestate, non sine magno animi Nostri dolore, undique afflictetur et divexetur. Itaque Nobis Vobisque, Venerabiles Fratres, si umquam alias, nunc certe summa animorum consensione omnique vigilantia, zelo, contentione, et qua opere, qua verbo, qua exemplo strenue est allaborandum,

ut opposentes murum pro Domo Israel impavide praeliemur praelia Domini. Nos quidem licet infirmitatis Nostrae concii, tamen omnipotentis Dei auxilio suffulti, pro supremi Nostri Apostolici munieris officio « *propter Sion non tacebimus, et propter Hierusalem non quiescemos* ¹ »; et continenter aspicientes in auctorem fidei et consummatorem Iesum, nullis certe curis, nullis consiliis, nullis laboribus unquam parcemus, ut possimus suffulcire domum, corroborare templum, et Ecclesiae reparare ruinas omniumque saluti prospicere; prompti ac parati Nostram ipsam pro Christo Iesu Eiusque Sancta Ecclesia quam libentissime profundere vitam. Atque hoc loco ad omnes Venerabiles Fratres catholici orbis Antistites in sollicitudinis Nostrae partem vocatos Nostram orationem convertentes, dum illis denuo vehementer gratulamur de praeclaris eorum pro Dei gloria et animarum salute laboribus, animos eis denuo addimus, ut in hoc horribili contra divinam nostram religionem bello ipsi unanimes uno ore id ipsum invicem sentientes et confortati in Domino et in potentia virtutis Eius, sumentes in omnibus scutum inexpugnabile fidei, atque assumentes gladium spiritus, quod est verbum Dei, progrediantur, ut adhuc fecerunt, alacriori in dies studio, sua episcopali virtute, constantia, prudentia pro ipsa sanctissima religione intrepide decertare, atque inimicorum hominum conatibus obsistere, tela retundere, impetus frangere, et gregem sibi commissum ab illorum insidiis et impetu defendere atque ad salutis semitas deducere. Insuper ab ipsis Venerabilibus Fratribus exposcimus, ut numquam intermittent ecclesiasticos potissimum viros monere, hortari, excitare, quo orationi instantes, spiritu ferventes, ac pie sancteque viventes praebeant in omnibus se ipsos exemplum bonorum operum, et Dei gloriae, et animarum salutis zelo incensi, atque arctissimo inter se caritatis vinculo obstricti accipient armaturam Dei, et concordissimis animis, coniunctisque viribus in aciem prodeant, ac sub proprii Antistitis ductu dies noctesque

¹ Isai. 62. 1.

sacerdotalem vocem attollant, Dei legem, et Eius Sponsae Ecclesiae praeceptiones christiano populo diligenter annuntient. Pergant quoque ipsi Venerabiles Fratres eisdem ecclesiasticis viris inculcare, ut christiana plebi insidiantium hominum fallacias et fraudes detegant, ac fideles edoceant, miserias omnes et calamitates in populos ex peccatis semper redundasse ac redundare, et veram solidamque felicitatem in christianae legis custodia consistere, et idcirco nihil intentatum relinquant, ut omnes odientes malum, et adhaerentes bono incedant per viam mandatorum Dei, ut errantes de errorum tenebris et vitiorum coeno emergant, et convertantur ad Dominum.

Iam vero, Venerabiles Fratres, Vobiscum communicamus summam certe consolationem, qua inter tantas angustias affecti fui-
mus, ubi cognovimus Decreta a carissimo in Christo Filio Nostro Francisco Iosepho Austriae Imperatore, Hungariae Rege Apostolico, et Bohemiae Rege illustri edita, quibus pro egregia sua religione Nostris, et Venerabilium Fratrum amplissimi sui Imperii Antistitum votis et postulationibus obsequutus, maxima cum sui nomi-
nis gloria, et ingenti bonorum omnium exultatione optatissimam catholicae Ecclesiae libertatem alaci et libentissimo animo cum suis Administris in Imperio suo adserere est orsus. Quocirca ei-
dem clarissimo Imperatori et Regi de tam insigni re, catholico Principe plane digna, meritas tribuimus laudes ac vehementer in Domino gratulamur. Atque bona profecto spe nitimur fore ut ipse religiosissimus Princeps pro suo erga Ecclesiam studio prae-
clarum eiusmodi opus prosequi, perficere ac suis in rem catholi-
cam meritis cumulum afferre velit.

Verum dum hac utebamur consolatione acerbissimus sane accessit dolor, quo vehementer angimur et premimur, videntes quomodo sanctissimae nostrae Religionis res in alio catholico Regno nunc affligantur, et sacra Ecclesiae atque huius S. Sedis conculcentur iura. Probe intelligitis, Venerabiles Fratres, Nos hic loqui de Subalpino Regno, ubi, quemadmodum omnes ex privatis nuntiis, publicisque Litteris iam cognoscunt, lex Ecclesiae iuri-

bus ac solemnibus cum hac Apostolica Sede initis conventionibus adversa fuit promulgata , et hisce diebus summo animi Nostri moerore praeclarissimus Taurinensium Antistes Venerabilis Frater Aloisius Fransonii militari manu ab episcopalibus suis sedibus avulsus , et cum magno Taurinensis Urbis ac totius illius Regni bonorum luctu in arcem est deductus. Nos itaque , prout rerum gravitas, atque officii Nostri ratio in tuendis Ecclesiae iuribus postulabat, nulla interiecta mora per Nostrum Cardinalem a publicis negotiis primum de commemorata lege, postmodum vero de iniuria et vi egregio Antistiti illata statim apud illud Gubernium reclamavimus. Atque interea dum inherentem cordi Nostro amaritudinem ea spe solamur , fore ut eiusmodi reclamationes optatum assequantur exitum, Nos haud omittemus alia Allocutione de ecclesiasticis illius Regni negotiis agere, Vosque certiores facere, cum id opportunum esse censuerimus.

Post haec abstinere non possumus quin pro paterna Nostra sollicitudine erga illustrem Belgarum gentem, quae catholicae Religionis studio semper enituit, Nostrum exprimamus dolorem, cum inibi rei catholicae pericula impendere prospiciamus. Sed futurum confidimus ut Serenissimus ille Rex, et ii omnes qui in eo Regno summam rerum procurationem gerunt, pro eorum sapientia animadvententes quantopere catholica Ecclesia eiusque doctrina ad temporalem quoque populorum tranquillitatem prosperitatemque conduceat, salutarem eiusdem Ecclesiae vim sartam tectam haberi velint , ac Sacros ipsius Ecclesiae Antistites et Ministros eorumque optimam operam tegere ac tueri studeant.

Cum autem Apostolica illa caritas, qua omnes populos et nationes in Christo complectimur, ita Nos urgeat, ut nihil prorsus aliud tam vehementer optemus , quam ut omnes occurrant in unitatem fidei et agnitionis Filii Dei, verba Nostra ad illos omnes qui a Nobis dissident toto cordis affectu convertimus , eosque obtestamur in Domino , ut depulsa errorum caligine veritatis lucem aspiciant, et ad sinum confugiant Sanctae Matris Ecclesiae , atque ad

hanc Petri Cathedram , in qua Christus eiusdem Ecclesiae suae fundamentum posuit.

Denique, Venerabiles Fratres, ne desistamus unquam , maiore qua possumus contentione, humillimas fervidasque clementissimo bonorum omnium largitori Deo adhibere preces , ut per merita Unigeniti Filii Sui Domini Nostri Iesu Christi, Eiusque Sanctissimae Genitricis Immaculatae Virginis Mariae , ac Beatorum Apostolorum Petri et Pauli , omniumque sanctorum Caelitum Ecclesiam suam sanctam ab omnibus adversitatibus eripiat , eamque ubique gentium , ubique terrarum maioribus ac splendidioribus triumphis exornet et augeat, ac Nos uberrimis suae bonitatis donis in dies cumulet, et Principibus atque Nationibus de Nobis optimo meritis amplitudinem rependat omnis verae felicitatis , atque universo terrarum Orbi optatissimam pacem largiatur.

ALLOCUTIO

HABITA IN CONSISTORIO SECRETO DIE I NOVEMBRIS
ANNI MDCCCL.

VENERABILES FRATRES

In Consistoriali ¹ Oratione, qua Vos alloquuti fuimus XIII kalendas Iunii huius anni, haud praetermisimus, Venerabiles Fratres, commemorare paucis verbis, ac dolere Vobiscum, quae in carissimi in Christo Filii Nostri Sardiniae Regis ditione contra Ecclesiae ius gesta nuper statutaque fuerant, atque una significavimus consilium Nobis esse, ut super his accuratiorem in Consessu Vestro sermonem opportuno alio tempore institueremus. Ea vero spe sustentabamur fore, ut iniuriis illic Ecclesiae illatis aliquod interea remedium afferretur, quod annuntiare Vobis possemus. Sed quoniam longe admodum abfuit ut res ex sententia succederet, Nostri tandem officii esse duximus, ut ratione in hoc negotio a Nobis adhibita ab ipsis eius rei exordiis brevissime repellita, queramur et graviori oratione reclamemus contra ea omnia, quae tum in continentibus, tum etiam in transmarinis supradictae ditionis regionibus decreta in Ecclesiae iniuriam, aut facta sunt.

Nostis, Venerabiles Fratres, sollemnem Conventionem, quae die 27 Martii anni 1841 inter Pontificium et Regium Legatum inita fuit, et quam sine mora tum Gregorius XVI recol. mem. Decessor Noster, tum Carolus Albertus fel. rec. Sardiniae Rex ratam habuerunt et confirmarunt; nostis scilicet hanc Conventio-

¹ *Huc referuntur Syllabi Propositiones 43 — 44 — 45.*

nem eo prorsus spectasse, ut Ecclesiasticae immunitates, quae in Ditione illa ex sanctione Sacrorum Canonum diuturno multorum saeculorum decursu viguerant, quaeque recentiori tempore pactis conventis, et Romanorum Pontificum benignitate, aliqua ex parte relaxatae fuerant, novis adhuc ac multo arctioribus limitibus continerentur. Atque hinc non defuere in Subalpinis provinciis qui de indulgentia Decessoris nostri ea in re, quasi de nimis ampla concessione mirarentur; et Regium quoque Gubernium nonnullos annos abstinuit ab eiusdem Conventionis legibus in transmarinum suum Sardiniae Regnum inducendis. Iam vero idem Gubernium anno 1848 novam a Nobis Conventionem postulavit, et die 14 Septembris eius anni Regius Legatus Legato a Nobis deputato litteras tradidit eiusmodi Conventionis formulam proponentes, paucis distinctam articulis, quos prooemium quoddam haud levis sane momenti praecederet. Pervidit facile Legatus Noster postulationem ea, qua explicabatur, amplitudine ac verbis admitti prorsus non posse; immo nec agi in postulatione ipsa de mutua aliqua concessione paciscenda; quandoquidem nihil in ea proponebatur, in quo Gubernium ullam, ne levissimam quidem, obligacionem erga Ecclesiam contrahere videretur. Itaque Noster idem Legatus novos proposuit articulos Gubernii votis meliori, qua fieri posse censuit, ratione consentaneos, quibus et alios adiunxit in id spectantes, ut Ecclesia omni pene civilis immunitatis usu caritura hanc saltem iacturam liberiore in reliquis suae auctoritatis exercitio compensaret. Declaravit tum Regius Legatus, postulatum se novas a suo Gubernio instructiones, ut plene ad proposita respondere posset. Ignoramus equidem an instructiones illae Romanam umquam advenerint; sed coniicere licet Regium Gubernium rem distulisse propter notissimas calamitates, quae Italiam pene universam subinde afflixerunt, quaeque Nos ipsos a tota nostra civili ditione discedere coegerunt. Postea, tranquillatis rebus, dum prope Neapolim tempus praestolaremur, quo in Urbem redire opportunum foret, novus illuc ad Nos missus est [Extraordinarius Legatus, cui mandatum inter alia erat, ut intermissam de Conventione tractationem repeteret. Attamen postquam de aliis ne-

gotiis egisset, revocatum se declaravit a Regio Gubernio, ac re necdum inchoata discessit. Itaque sperare licuit, Regiis Ministris opportunius visum fuisse, ut tractatio illa in tempus magis idoneum, post Nostrum scilicet in Urbem redditum, remitteretur.

Attamen paucos post menses accepimus, Regium ipsum Ministerium detulisse ad Regni Comitia novam Legem de Clericorum et Ecclesiarum immunitate penitus abolenda, de iudicio etiam super Patronorum nominationibus ad Beneficia Ecclesiastica Tribunalibus Laicis attribuendo, nec non de aliis nonnullis, sive eodem, sive posteriori tempore, contra Ecclesiae ius, aut non sine Religionis periculo statuendis.

Ut primum de huiusmodi Legis propositionibus significatum Nobis est, reclamari contra illam iussimus tum a Cardinali Nostro Pro-Secretario Status, tum etiam a Nostro Apostolico Nuntio tunc Augustae Taurinorum degente. Sed utraque reclamatione cedente in irritum, expostulare paulo post oportuit contra ipsas, quas memoravimus, novitates ab utroque legibus ferendis Consilio approbatas, et Regia statim auctoritate sancitas. In quo eius rei progressu atque exitu non illud modo dolendum, quod Sanctissima Ecclesiae iura, quae ex Canonum sanctionibus in tot saeculorum diuturnitate viguerant, facto ipso violata et proculcata fuerint, sed etiam quod plures ex Deputatis ac Senatoribus Regni, qui in publica utriusque Consilii deliberatione verba fecerunt, et quorum sententia vicit, eam sibimetipsis seu Laicæ Potestati auctoritatem asserere non dubitaverint, ut sollemnes Conventiones super usu illorum eorumdem iurium cum Sede Apostolica initas, sine huius consensu, immo et ea reclamante rescindere, et declarare, ac facere irritas valeant.

Videtis qualia et quam gravis momenti haec sint, Venerabiles Fratres: perspicitis cuiusmodi futura esset sacrarum rerum conditio, si suus Ecclesiae iuribus honor non sit, si despiciantur illius Canones, si nulla diurnae possessionis ratio habeatur, si tandem neque sua stet fides pactis inter Sanctam hanc Sedem et Civilem Potestatem rite conventis. Nec porro ignoratis non solum Religionis, sed etiam Civilis Ordinis, ac publicae privataeque rei

omnino interesse, ut Ecclesiasticae eadem Conventiones sanctae atque intemeratae habeantur; quandoquidem earum vi ac iure contempto èt labefactato, aliorum quoque publicorum privatorumque pactorum ratio concideret.

Iniuriis per memoratas novas sanctiones Ecclesiae et Sanctae huic Sedi illatis aliae insuper brevi intervallo additae sunt, cum scilicet Regii Administris et Iudices Laici duos praesertim sacros Antistites Nostros Venerabiles Fratres Archiepiscopum Turritanum, et Archiepiscopum Taurinensem in ius vocarunt; et illum quidem domi suae carceris loco detinuerunt, hunc vero deduxerunt militari manu in Castrum Regiae Urbis, ac tandem utrumque eorum civili poena multarunt; non aliam quidem ob causam, nisi quod pro suo pastorali munere instructiones ad Parochos dererant de ratione, qua in novae Legis conspectu suae et suarum ovium Deum timentium conscientiae consulere valerent. Ita igitur id sibi arrogavit Civilis Auctoritas, ut de instructionibus iudicaret, quas Ecclesiae Pastores ad conscientiarum normam pro suo munere ediderant.

Postmodum alia his eademque gravior accessit iniuria, postquam Nobilis quidam Vir, quem inter praecipuos supradictae iustissimae Legis suasores extitisse omnes noverant, qui abnuebat a facto illo suo palam improbando, indignus Archiepiscopi Taurinensis auctoritate iudicatus est, cui extrema morientium Sacra menta administrari possent. Hac scilicet occasione et Archiepiscopus idem militari manu a sua Ecclesia avulsus atque in severioris custodiae Castrum detrusus est, et Parochus e Religiosa Familia Servorum B. M. V., qui ei pro officio paruerat, una cum Religiosis Sodalibus suis e Taurinensi Coenobio per vim expulsi, atque in alia asportati sunt: quasi vero ad Laicam Potestatem pertinere possit, ut de divinorum Sacramentorum administratione et dispositionibus ad ea suscipienda necessariis decernat.

Nec salis. Ipsa haec de Sacramentorum ministerio causa, et alia insuper de novis pro conscientiarum regula instructionibus antea iam a memorato Archiepiscopo, ex mandato etiam Nostro datis, delatae sunt ad Taurinense Appellationis Tribunal; a quo

statim die 23 mensis Septembris decretum est, ut Archiepiscopus mandaretur extra fines Regiae ditionis, atque ut omnia Archiepiscopatus bona sequestro retinerentur. Eodem fere tempore, die videlicet 21 eiusdem mensis, Tribunal Appellationum Regni Sardiniae similia decrevit contra Venerabilem Fratrem Archiepiscopum Calaritanum, cui criminis datum est, quod generalibus verbis (nullius scilicet expresso nomine) declaraverat Censuras Ecclesiasticas ab iis facto ipso contractas, qui Episcopali Aedium immunitatem violando partem quandam Episcopalis Tabularii intrare per vim ausi fuerant. Horum igitur Decretorum vi iidem Antistites a possessione ac procuratione deiecti sunt temporalium bonorum reddituumque ad Sacerdotia sua pertinentium, et alter quidem in Gallias, alter vero in Nostram hanc Almam Urbem venire coactus.

Verum alia quoque sunt, ac non levia quidem, quae Subalpinum Gubernium contra Ecclesiae iura, vel in Religionis detrimentum, statuit ac gessit. Inter quae non possumus non lamentari vehementer de funestissima Lege, quam inde a die 4 Octobris Anni 1848 super publica institutione, et publicis privatisque seu maiorum seu minorum disciplinarum scholis editam fuisse cognovimus. Totum illarum regimen, Episcopalibus Seminariis aliqua ratione exceptis, attributum ea in Lege habetur Regio Ministro, atque auctoritatibus eidem subditis; et ita quidem attributum, ut in Articulo 58 legis eiusdem statuatur ac declaretur, nullum alii cuicumque auctoritati fore ius immiscendi se in disciplina scholarum, in regimine studiorum, in graduum collatione, in delectu aut approbatione Magistrorum. Hinc in Catholica illa ditione scholae cuiusque generis, atque adeo cathedrae etiam sacrarum disciplinarum, quarum ea in Lege mentio fit, nec non puerorum institutio ad elementa Christianae Fidei, quam eadem Lex inter minorum Ludimagistrorum officia annumerat, ab Episcoporum auctoritate subtrahuntur. Ac ne quis ea de re dubitare valeat, in memorato Articulo ipsi etiam Directores spiritus inter eos recensentur, qui a Regio Ministerio sive ab auctoritatibus ei subditis, absque ullo alterius cuiuscumque auctoritatis interventu, deligi-

atque approbari possunt. Igitur sacri Pastores nedum privati in iustissime sunt praecipua illa auctoritate, quam a multis retro saeculis in plurima saltem studiorum instituta ex Pontificiis, Regiisque Constitutionibus, atque ex primaevae fundationis lege potiebantur, sed nec liberum ipsis est in ea advigilare, quae in scholiarum regimine doctrinam Fidei, christianos mores, aut divini cultus causam attingunt.

Evidem sperare iuvat fore, ut saltem in executione illius Legis, aliqua Episcopalis Auctoritatis ratio habeatur. Ipsam tamen perniciosos fructus iam peperisse dignoscitur ex pestiferis opinio-nibus, et placitis irreformabili Ecclesiae doctrinae contrariis, quae non in liberioris tantum editionis libellis pagellisque spar-guntur quotidie in vulgus, sed ab aliquo etiam in publicis scholis Doctore instillantur in mentes adolescentium, et publice propugnantur. Verba desunt, Venerabiles Fratres, quibus dolorem explicemus longe acerbissimum, quem ex notitia huius rei, haud ita pridem ad Nos perlata, concepimus. Nulla quidem interposita mora providimus, ut eadem de re accuratius cognosceremus; et nihil porro a Nobis desiderari patiemur, quod ad officium pertineat custodiendae Fidei, et confirmandi in illa fratres infirmitati Nostrae divinitus attributum.

Novissime, ut scitis, missus a Subalpino Gubernio ad Nos fuerat unus ex Primoribus spectatus Vir, ut tractationes instauraret Ecclesiasticis rebus cum Sancta hac Sede componendis. Illum tamen haudquaquam admittere potuimus ad litteras, Legationis suae testes, consueto sollemni more Nobis reddendas. Ipse enim sive cum privatim ad Nos adiit, sive in sermonibus cum Cardinali Nostro Pro-Secretario Status iterum iterumque habitis, de supradicta de Immunitatibus Lege ita loquutus est, ut Laicam Potestatem in ea contra sanctiones Canonum, et contra initarum cum Sede Apostolica Conventionum fidem promulganda suo prorsus iure usam fuisse contenderet. Hinc eorum, quae deinde con-tigerant, culpam transferebat in Clerum Sacrosque Antistites, maxime autem in Venerabilem Fratrem Archiepiscopum Taurinensem, ob suam in pastoralibus officiis constantiam in severiori

tunc custodia retentum. De hoc scilicet praestantissimo Praesule gravius querebatur, quasi de homine quietis ac tranquillitatis populi parum studioso; atque idcirco id se a Regio Gubernio in praecipuis mandatis habuisse declarabat, ut Nos induceret ad eumdem Antistitem in aliud extra Regiam ditionem munus transferendum. Post haec opus non est ut alia explicemus, quae deinceps inter illum et Cardinalem praedictum mutuo sermone incassum tentata sunt ad aliquam rerum componendarum viam reperiendam. Interim vero tantum abfuit, ut Gubernium a sua agendi ratione cessaret; quin potius illo ipso tempore prodierint, atque ad effectum perductae fuerint supradictae Tribunalium saecularium in ecclesiasticis causis novissimae Sententiae tum contra memoratum Archiepiscopum, tum contra Archiepiscopum Calaritanum.

Ceterum de supradictis Ecclesiarum Clericorumque immunitibus notum omnibus esse volumus, Nos, qui tractationes alterum ante annum a Subalpino Gubernio propositas minime recusavimus, hodie pariter non abhorrere a Canonum sanctionibus circa immunitates ipsas pro loco ac tempore moderandis, prout scilicet opportunum in Domino visum fuerit, ac dummodo Ecclesia aliis in rebus liberiori suorum iurium exercitio potiatur. Non enim defecit in Nobis studium paternae benevolentiae, quo Romanos Pontifices Decessores Nostros inclytam Sabaudiae Domum prosequutos fuisse compertum est: dolemus insuper calamitates et aerumnas, quibus in eius ditione Fratres Filiique Nostri in his rerum adiunctis haud leviter anguntur; ideoque et prompti sumus ad opportuna in eorum levamen adhibenda remedia; ex constanti nimirum instituto Sanctae huius Romanae Ecclesiae, quae veluti amantissima mater filiis succurrere in angustia ac tribulatione positis, et Apostolica Auctoritate sua ad sanandas contritiones Israel uti iugiter consuevit. Hac tamen Auctoritate, quae Nobis in aedificationem non in destructionem data est, haudquaquam uti possumus, ubi non de alio agatur, nisi ut quae in Ecclesiae iniuriam, quae in contemptum Sacrorum Canonum, quae contra sollemnes Conventiones, immo et ad ipsam quarumcumque Con-

ventionum rationem labefactandam ; quae tandem contra Sacerdotes et praecipuos ipsos Ecclesiae Praesules pastorali suo munere circa conscientiarum moderationem , Sacramentorumque administrationem fungentes deliberata, decreta, aut facta illic dolimus , patientia , connivenlia et concessionibus nostris approbare quodammodo videamur.

Absit , Venerabiles Fratres , ut Auctoritate Nostra in Ecclesiae et Catholicae rei detrimentum abuti umquam velimus. Immo divino praesidio nixi omnem industriam atque operam in id constanti animo collocabimus, ut Religionis utilitati prospiciamus, et sanctissima Ecclesiae iura sarta tecta habeamus. Iuxta haec igitur attollentes hodie in sollemni hoc Conventu Nostram Apostolicam vocem, reclamamus maiorem in modum contra ea, quae superius enarravimus , et contra alia omnia , quae sive in Continente sive in Transmarinis regionibus Summo Taurinensi Principi subditis contra Ecclesiae ius , aut in Religionis damnum gesta quomodolibet aut tentata sunt ; et ab omnibus, ad quos pertinet, gravissime exoscimus , ut desistant a vexandis Ecclesiae Pastoribus sacrumque Ministris , et illata illic Sacrae Rei damna reparare festinent.

Interea ne intermittamus, Venerabiles Fratres, Deo Misericordiarum Patri humiles orationes et obsecrationes offerre , et invocato etiam piissimo interventu Immaculatae Deiparae Virginis, et SS. Apostolorum Petri et Pauli, ab Eo suppliciter poscere, ut dilectam illam Dominicae Vineae partem dextera sua tegat et brachio sancto suo defendat.

DAMNATIO

Et prohibitio Operis in sex tomis hispanico idiomate editi, sub titulo: *Defensa de la autoridad de los Gobiernos y de los Obispos contra las pretenciones de la Curia Romana, por Francisco de Paula G. Vigil. Lima 1848.*

AD PERPETUAM REI MEMORIAM

Multiplices ¹ inter gravissimasque, quibus undique preminur, officii Nostri curas, et maximas huius temporis calamitales, quae in gliscenti rerum omnium novitate animum Nostrum sollicitant anguntque vehementer, illud accedit magnopere dolendum, quod Libri perniciosissimi e latebris Iansenistarum aliorumque huius generis hominum in diem erumpant, quibus huius saeculi filii in persuasilibus humanae sapientiae verbis loquuntur perversa, ut abducant discipulos post se. Apostolici itaque Nostri Ministerii ratio postulat, ut Libros istiusmodi solemniorem in modum ad Catholicae Religionis puritatem ac venerandam Ecclesiae disciplinam tuendam conservandamque proscribamus et damnemus, ac Dominicum gregem a Pastorum Principe Iesu Christo humiliati nostrarae commissum ab exitiosa illorum lectione et retentione tamquam a venenalis pascuis omni sollicitudine praeservare et averttere non praetermiltamus.

Iam vero cum in lucem prodiisse acceperimus Librum seu Opus, sex tomis constans, hispanico idiomate exaratum, cui titulus « *Defensa de la autoridad de los Gobiernos y de los Obispos contra las pretenciones de la Curia Romana, por Francisco de Paula G. Vigil. Lima 1848* », atque ex ipsa Operis inscriptione sa-

¹ Huc referuntur Syllabi Propositiones 15 — 21 — 23 — 30 — 51 — 54 — 68 — 74.

tis intellexerimus, auctorem esse hominem in hanc Apostolicam Sedem malevolo animo affectum, haud omisimus illud pervulvere, ac facili negotio, quamvis non sine maximo cordis Nostri moerore, eumdem Librum plures Pistoriensis Synodi errores dogmatica Bulla *Auctorem Fidei* fel. rec. Pii VI Decessoris Nostri iam confixos renovantem, aliisque pravis doctrinis et propositionibus iterum iterumque damnatis undique redundantem, novimus atque perspeximus.

Auctor enim, licet Catholicus, ac divino Ministerio, ceu fertur, mancipatus, ut indifferentismum ac rationalismum, quo se infectum prodit, securius, ac impune sequatur, denegat, Ecclesiae inesse potestatem dogmatically definiendi, Religionem Ecclesiae Catholicae esse unice veram Religionem, docetque cuique liberum esse eam amplecti ac profiteri Religionem, quam rationis lumine quis ductus veram putaverit: legem caelibatus impudenter aggreditur, et Novatorum more statum coniugalem anteponit statui virginitatis: potestatem, qua Ecclesia donata est a suo Divino Institutore, stabiendi impedimenta Matrimonium dirimentia a Principibus terrae dimanare tuetur, eamque Christi Ecclesiam sibi arrogasse impie affirmat: Ecclesiae et personarum immunitatem, Dei ordinatione et canonicis sanctionibus constitutam, a iure civili ortum habuisse asserit, nec illum pudet defendere, maiori aestimatione et obsequio prosequendam esse domum Oratoris alicuius Nationis quam templum Dei viventis: Gubernio laico attribuit ius deponendi ab exercitio pastoralis ministerii Episcopos, quos Spiritus Sanctus posuit regere Ecclesiam Dei: suadere nititur iis, qui clavum tenent publicarum rerum, ne obedient Romano Pontifici in iis, quae Episcopatum et Episcoporum respiciunt institutionem: Reges aliosque Principes, qui per Baptismum facti sunt membra Ecclesiae, subtrahit ab eiusdem Ecclesiae iurisdictione non secus ac Reges paganos, quasi Principes Christiani in rebus spiritualibus et ecclesiasticis non essent filii ac subditi Ecclesiae: imo caelestia terrenis, sacra profanis, summa imis monstruose permiscens, docere non veretur, terrenam potestatem in quaequestionibus iurisdictionis dirimendis superiorem esse Ecclesia, quae

colnmna est et firmamentum veritatis : tandem ut alios quamplures omittamus errores , eo audaciae et impietatis progreditur , ut Romanos Pontifices et Concilia Oecumenica a limitibus suae potestatis recessisse, iura Principum usurpasse, atque etiam in rebus fidei, et morum definiendis errasse infando ausu contendat.

Quamquam vero tot ac tanta in eodem Opere contineri errorum capita cuique facile innotescat; attamen Praedecessorum Nostrorum vestigiis inhaerentes mandavimus, ut in nostra Universalis Inquisitionis Congregatione praefatum Opus in examen adduceretur, ac postea eiusdem Congregationis iudicium Nobis referretur. Porro Ven. Fratres Nostri S. R. E. Cardinales Inquisitores Generales, praevia eiusdem Operis censura, et perpensis Consulitorum suffragiis, memoratum Opus, tamquam continens doctrinas et propositiones respective *scandalosas, temerarias, falsas, schismaticas, Romanis Pontificibus et Conciliis Oecumenicis iniuriosas, Ecclesiae potestatis, libertatis, et iurisdictionis eversivas, erroneas, impias, et haereticas*, damandum atque prohibendum censuerunt.

Hinc Nos , audita praedictorum relatione , et cunctis plene ac mature consideratis , de consilio praefatorum Cardinalium , atque etiam motu proprio, ex certa scientia, deque Apostolicae potestatis plenitudine memoratum Opus , in quo doctrinae ac propositiones, ut supra notatae, continentur, ubicumque et quocumque alio idiomate, seu quavis editione, aut versione hoc usque impressum, vel in posterum, quod absit, imprimendum, tenore praesentium damnamus et reprobamus , atque legi ac retineri prohibemus , eiusdemque Operis impressionem , descriptionem , lectio nem, retentionem , et usum omnibus et singulis Christifidelibus , etiam specifica et individua mentione , et expressione dignis, subpoena excommunicationis per contrafuentes ipso facto , absque alia declaratione , incurrenda , a qua nemo a quoquam , praeterquam a Nobis, seu Romano Pontifice pro tempore existente , nisi in mortis articulo constitutus , absolutionis beneficium obtinere queat, omnino interdicimus.

Volentes, et Auctoritate Apostolica mandantes, ut quicumque Librum, seu Opus praedictum penes se habuerint, illud statim atque praesentes Litterae innotuerint, locorum Ordinariis, vel haereticae pravitatis Inquisitoribus tradere atque consignare tenentur. In contrarium facientibus non obstantibus quibuscumque.

Ut autem eaedem praesentes Litterae ad omnium notiliam facilius perducuntur, nec quisquam illarum ignorantiam allegare queat, volumus, et Auctoritate praefata decernimus, illas ad valvas Basilicae Principis Apostolorum, et Cancellariae Apostolicae, nec non Curiae Generalis in Monte Citorio, et in Acie Campi Florae in Urbe per aliquem ex Cursoribus nostris, ut moris est, publicari, illarumque exempla ibidem affixa relinqui: sic vero publicatas, omnes et singulos, quos concernunt, perinde afficere, et arctare, ac si unicuique illorum personaliter notificatae et intimatae fuissent; ipsarum autem praesentium Litterarum transumptis, seu exemplis, etiam impressis, manu alicuius Notarii publici subscriptis, et sigillo personae in Ecclesiastica dignitate constitutae munitis, eamdem prorsus fidem tam in iudicio, quam extra illud ubique locorum haberri, quae haberetur eisdem praesentibus, si exhibitae forent, vel ostensae.

Datum Romae apud S. Petrum, sub Annulo Piscatoris, die X Iunii, anno MDCCCL. Pontificatus Nostri Anno Quinto.

A. CARD. LAMBRUSCHINI

DAMNATIO

*Et prohibitio Operis , cui titulus – *Iuris Ecclesiastici Institutiones Ioannis Nepomuceni Nuytz, in Regio Taurinensi Athenaeo Professoris* – Itemque – *In Ius Ecclesiasticum universum Tractationes, Auctoris eiusdem.**

AD PERPETUAM REI MEMORIAM

Ad Apostolicae ¹ Sedis fastigium sola miserentis Dei clemencia , nullo suffragio meritorum evecti , atque a caelesti Patrefamilias vineae suae custodiendae praepositi , omnino officii Nostri , ac muneris esse ducimus , si qua noxia germina excrevisse noscamus , ea succidere , atque evellere stirpilus , ne in Dominici agri perniciem altius radices agant , ac diffundantur. Et sane quum iam inde ab Ecclesiae surgentis exordio , tamquam in igne aurum , probari oportuerit electorum fidem , idcirco Apostolus vas electionis monitos iam tum fideles voluit surrexisse quosdam , qui « *convertunt et conturbant Evangelium Christi* ² », quibus falsas doctrinas disseminantibus , Fideique deposito detrahentibus « *etiamsi Angelus evangelizet, praeterquam quod evangelizatum est* » , anathema diceretur. Et quamquam infensissimi veritatis hostes profligati semper victique ceciderint , nunquam tamen destiterunt assurgere , acriusque exerere vires , quibus universam , si fieri posset , Ecclesiam labefactare niterentur. Hinc profanas manus iniicientes in Sancta , Apostolicae huius Sedis praerogativas , et iura invadere , Ecclesiae constitutionem perversere , atque integrum Fidei depositum pessum dare ausu impio

¹ *Huc referuntur Syllabi Propositiones 24 — 25 — 34 — 35 — 36 — 38 — 41 — 42 — 65 — 66 — 67 — 69 — 70 — 71 — 72 — 73 — 74 — 75.*

² Ad Gal. 1.

contenderunt. Porro etsi Nobis magno solatio sit Christi Servatoris promissio , qua portas inferi numquam contra Ecclesiam praevalituras edicit , non possumus tamen non intimo cruciari animi angore, gravissimam animorum perniciem considerantes , quam ex effraeni pravos libros edendi licentia, perversaque impudentia ac scelere quidlibet contra divina ac sacra audendi latius in dies manare comperimus.

Iam vero in hac librorum undique grassantium peste , locum sibi vindicat Opus sic inscriptum : « *Iuris Ecclesiastici Institutiones Ioannis Nepomuceni Nuytz, in Regio Taurinensis Athenaeo Professoris;* » itemque : « *In Ius Ecclesiasticum universum Tractationes Auctoris, eiusdem* », cuius nefarii Operis doctrina ex una illius Athenaei Cathedra sic diffusa est, ut selectae ex eo aca-tholicae theses ad disputandum propositae sint prolytis ephebis , qui lauream, seu doctoris gradum consequi adspirarent. In his vero libris, ac thesibus in speciem adserendi iura Sacerdotii atque Imperii ii traduntur errores, ut pro salutaris doctrinae praecipitis venenata omnino pocula iuventuti porrigantur. Auctor siquidem pravis suis propositionibus, earumque commentis , illa omnia , a Romanis Pontificibus Praedecessoribus Nostris, praesertim Ioanne XXII , Benedicto XIV , Pio VI , ac Gregorio XVI , atque a tot Conciliorum decretis, praesertim a Lateranensi IV, Florentino ac Tridentino damnata iamdiu ac reiecta sunt, quodam fuco novitatis adspersa, atque illita Auditoribus proponere suis, ac typis edere non erubuit. Quandoquidem palam et aperte in editis dicti Auctoris libris asseritur : « Ecclesiam vis inferendae potestatem non habere, neque potestatem ullam temporalem directam vel indirectam. Divisioni Ecclesiae in Orientalem atque Occidentalem nimia Romanorum Pontificum arbitria contulisse ; praeter potestatem Episcopatui inhaerentem , aliam esse attributam temporalem a civili imperio, vel expressae vel tacite concessam, revocandam propterea cum libuerit a civili imperio : civili potestati, vel ab infideli imperante exercitae competere potestatem indirectam negativam in sacra : civilem potestatem, ab Ecclesiastica, si damno afficiatur, sibi consulere per potestatem indirectam negativam in sa-

cra ; illi competere nedum ius, quod vocant , *exequatur*, sed vero etiam appellationem ab abusu ; in conflictu legum utriusque potestatis, ius Civile praevalere; nihil vetare alicuius Concilii generalis sententia, aut universorum popolorum facto, Summum Pontificatum ab Romano Episcopo, atque Urbe ad alium Episcopum, aliquam Civitatem transferri ; nationalis Concilii definitionem nullam aliam admittere disputationem , et civilem administrationem, rem ad hosce terminos exigere posse: doctrinam comparantium libero Principi Romanum Pontificem , et agendi in universa Ecclesia , doctrinam esse, quae medio aevo praevaluit , effectusque adhuc manere : de temporalis regni cum spirituali compatibilitate disputare inter se Christianae et Catholicae Ecclesiae filios ». Plura quoque de Matrimonio falsa asseruntur: « Nulla ratione ferri posse Christum evexisse Matrimonium ad dignitatem Sacramenti ; Matrimonii Sacramentum non esse nisi quid contractui accessoriū, ab eoque separabile, ipsumque Sacramentum in una tantum nuptiali benedictione situm esse: iure naturae Matrimonii vinculum non esse indissolubile : Ecclesiam non habere potestatem impedimenta Matrimonium dirimentia inducendi, sed eam civili potestati competere, a qua impedimenta existentia tollenda sint : causas Matrimoniales, et Sponsalia suapte natura ad forum civile pertinere; Ecclesiam sequioribus saeculis dirimentia impedimenta inducere coepisse, non iure proprio sed illo iure usam, quod a civili potestate mutuata erat ; Tridentinos Canones 1, qui anathematis censuram illis inferunt , qui facultatem impedimenta dirimentia inducendi Ecclesiae negare audeant, vel non esse dogmaticos, vel de hac mutuata potestate intelligendos ». Quin addit: « Tridentinam formam sub infirmitatis poena non obligare ubi lex civilis aliam formam praestituat , et velit hac nova forma interveniente Matrimonium valere: Bonifacium VIII. votum castitatis in Ordinatione emissum nuptias nullas reddere primum asseruisse ». Plura denique de potestate Episcopali , de poenis haereticorum et schismaticorum , de Romani Pontificis infallibilitate, de Conciliis

temere atque audacter in hisce libris proposita occurrunt, quae persequi singillatim, ac referre in tanta errorum colluvie omnino taedeat.

Quapropter compertum est, Auctorem per huiusmodi doctrinam, ac sententias eo intendere, ut Ecclesiae constitutionem, ac regimen pervertat, et Catholicam fidem plane destruat; siquidem ne errantes in viam possint redire iustitiae, externo iudicio, et potestate coercitiva Ecclesiam privat, de Matrimonii natura, ac vinculo falsa sentit, ac docet, et ius statuendi, vel relaxandi impedimenta dirimentia Ecclesiae denegat, et civili addicit potestati; denique sic Ecclesiam eidem civili imperio subditam esse per summum nefas asserit, ut ad potestatem civilem directe, vel indirecte conferat quidquid de Ecclesiae regimine, de personis, rebusque Sacris, de iudicali Ecclesiae foro Divina est institutione, vel Ecclesiasticis legibus sancitum, atque adeo impium renovat Protestantium systema, quo fidelium Societas in servitutem redigitur civilis imperii. Quamquam vero nemo est qui non intelligat perniciosum huiusmodi, pravumque sistema errores instaurare iamdiu Ecclesiae iudicio profligatos, tamen ne simplices, atque imperiti decipientur, admonere omnes de pravae doctrinae insidiis ad Nostrum pertinet Apostolatum; expedit siquidem « ut ibi damna fidei sarciantur, ubi non potest fides sentire defectum 5. » Propterea de unitate atque integritate Catholicae fidei ex Apostolici ministerii officio solliciti, ut fideles omnes perversam auctoris doctrinam devitent, fidemque a Patribus per hanc Apostolicam Sedem, columnam et firmamentum veritatis, acceptam constanter teneant, memoratos libros, in quibus recensitae nefariae opiniones continentur ac defenduntur, accurato primum examini subiecimus, ac deinde Apostolicae censurae gladio percellere ac damnare decrevimus.

Itaque acceptis consultationibus in Theologica et sacrorum Canonum facultatibus Magistrorum, acceptisque suffragiis VV. FF. NN. S. R. E. Cardinalium Congregationis Supremae et Univer-

salis Inquisitionis, motu proprio ex certa scientia ac matura deliberatione Nostra, deque Apostolicae potestatis plenitudine praedictos libros, tamquam continentes propositiones et doctrinas respective falsas, temerarias, scandalosas, erroneas, in S. Sedem iniuriosas, eiusdem iuribus derogantes, Ecclesiae regimen, et divinam eius constitutionem subvertentes, schismaticas, haereticas, Protestantismo eiusque propagationi faventes, et in haeresim et in sistema iamdiu ut haereticum damnatum in Luthero, Baio, Marsilio, Patavino, Janduno, Marco Antonio De-Dominis, Richerio, Laborde et Pistoriensibus, aliisque ab Ecclesia pariter damnatis inducentes, necnon et Canonum Concilii Tridentini eversivas, reprobamus, damnamus ac pro reprobatis et damnatis ad omnibus haberi volumus et mandamus. Praecipimus idcirco, ne quisquam fidelium cuiuscumque conditionis et gradus, etiam si specifica et individua mentione dignus esset, audeat praefatos libros ac theses apud se retinere, aut legere sub poenis suspensionis a divinis quoad Clericos, et quoad laicos excommunicationis maioris ipso facto incurrendis, quarum absolutionem et relaxationem Nobis et Successoribus Nostris Romanis Pontificibus reservamus, excepto tantum quoad excommunicationem mortis articulo. Mandamus quoque Typographis ac Bibliopolis, cunctisque et singulis cuiuscumque gradus et dignitatis, ut quoties praedicti libri ac theses ad eorum manus pervenerint, deferre teneantur Ordinariis sub iisdem respective poenis, nempe quoad Clericos suspensionis a divinis, quoad laicos excommunicationis maioris superius comminatis. Neque tantum memoratos libros ac theses, sed alias, aliosque quoscumque sive scriptis, sive typis exaratos libros, vel forte exarandos et imprimendos, in quibus eadem nefaria doctrina renovetur ex integro, aut in parte, sub iisdem poenis superius expressis damnamus, reprobamus, atque legi, imprimi, retineri omnino prohibemus.

Hortamur tandem in Domino, et obsecramus, Venerabiles Fratres, quos Nobiscum pastoralis zelus et Sacerdotalis constantia coniungit, ut pro sibi commisso docendi ministerio omni sollicitudine vigilantes in custodia gregis Christi, oves suas a tam vene-

natis pascuis, hoc est ab horum librorum lectione avertere satagent; et quoniam « veritas cum minime defenditur, opprimitur ¹ », murum aeneum, et columnam ferream sese constituant pro domo Dei contra vaniloquos et seductores, qui divina atque humana iura sus deque miscentes neque Caesari quae sunt Caesaris, neque quae Dei sunt, Deo ipsi reddentes, Sacerdotium et imperium committunt inter se, atque adeo impetere utrumque, atque everttere connituntur.

Ut autem praesentes Litterae omnibus innotescant nec quisquam illarum ignorantiam praetexere et allegare valeat, volumus ac iubemus, ipsas ad valvas Basilicae Apostolorum Principis, et Cancellariae Apostolicae, necnon Curiae Generalis in Monte Citorio, et in acie Campi Florae de Urbe per aliquem ex Cursoribus Nostris, ut moris est, publicari, illarumque exempla ibi affixa relinqui; sic vero affixas ac publicatas perinde omnes afficere, ad quos spectant, ac si unicuique illorum personaliter notificatae atque intimatae fuissent. Praesentium quoque Litterarum transumptis etiam impressis, manu alicuius publici Notarii subscriptis et Sigillo personae in Ecclesiastica dignitate constitutae munitis, eamdem fidem in iudicio et extra haberi volumus, quae eisdem his haberetur, si forent exhibitae vel ostensae.

Datum Romae, apud sanctum Petrum, sub Annulo Piscatoris,
die XXII Augusti, an. MDCCCLI. Pontificatus Nostri Anno Sexto.

A. CARD. LAMBRUSCHINI

¹ S. Felix III. dist. 83.

ALLOCUTIO

HABITA IN CONSISTORIO SECRETO DIE V SEPTEMBRIS
ANNI MDCCCLII.

VENERABILES FRATRES

Quibus luctuosissimis ¹ perturbationibus et calamitatibus obtristissimas rerum conversiones multos per annos inclyta Hispana Natio de catholica Ecclesia, et hac S. Sede tot illustribus, gloriissimisque factis optime merita, miserandum in modum fuerit exagitata, quaeque gravissima, et nunquam satis deploranda mala amplissimi illius Regni Ecclesiis, Episcopatibus, Capitulis, Monasteriis, cunctoque Clero, Populoque fideli incubuerint, et quae saeva deinde clades Catholicam Religionem, Sacrorum Antistites, ecclesiasticosque viros afflixerit, divexarit, quaeque adversus sacrae Ecclesiae iura, eiusque bona, libertates, et adversus huius Apostolicae Sedis dignitatem, auctoritatemque ibidem fuerint perpetrata, universo, qua late patet, terrarum orbi, ac Vobis multo magis compertum, exploratumque est, Venerabiles Fratres. Atque optime scitis quanta cura et studio rec. me. Gregorius XVI Praedecessor Noster expostulationes, querimonias, preces adhibuerit, nihilque intentatum reliquerit, ut afflictis illic, ac prostratis religionis rebus succurreret, mederetur et consuleret. Neque ignoratis, qua sollicitudine Nos, vix dum licet immerentes, inscrutabili Dei iudicio in eiusdem Decessoris Nostri locum suffecti, et in hac sublimi Principis Apostolorum Cathedra collocati fuimus, praecipuas paterni Animi Nostri curas, cogitationesque ad claris-

¹ Huc referatur Syllabi Propositio 45.

simam illam Nationem convertimus, quo ecclesiasticas ibi res, quantum fieri posset, ad Sacrorum Canonum normam componere, et inflictæ Ecclesiae vulnera sanare possemus. Quamobrem postquam certiores facti fuimus, praecipuas quasdam, ac potiores conditiones, et cautiones a Nobis antea praescriptas fuisse admis-sas, ac in tuto positas, carissimæ in Christo Filiae Nostræ Mariae Elisabeth postulationibus alacri, ac libentissimo animo obsecun-dantes ad Eam, ut probe nostis, misimus Venerabilem Fratrem Ioannem Archiepiscopum Thessalonicensem opportunis facultati-bus et instructionibus munitum, qui apud ipsam Catholicam Ma-iestatem Apostolici Delegati, ac deinde suo tempore Nostri et hu-ius S. Sedis Nuntii munus obiret, omnemque suam operam eccl-eiasticis ibi negotiis tractandis, ordinandis, sedulo ac sollicite im-penderet. Ac meministis, Venerabiles Fratres, nihil Nobis potius, nihil antiquius fuisse, quam illius Regni Ecclesias, legitimo pas-tore a longo iam tempore pene omnes misere viduatas, idoneis Antistitibus in primis committere, Nostrasque in id curas, Deo bene iuvante, et Ipsi carissimæ in Christo Filiae Nostræ ope-ra, non levi certe animi Nostri consolatione optatum exitum ha-buisse.

Iam vero Vobis significamus Nostras sollicitudines pro aliis sacris ecclesiasticisque illius Regni rebus componendis susceptas, ob propensam præsertim eiusdem carissimæ in Christo Filiae Nostræ in Religionis bonum voluntatem haud cecidisse irritas. Si-quidem post diuturnam operosamque tractationem Conventio inter Nos et Reginam Catholicam est inita, quam delecti ex utraque par-te Plenipotentiarii subscrípserunt, Nomine quidem Nostro idem Ve-nérabilis Frater Ioannes Archiepiscopus Thessalonicensis, Nomine autem Reginae dilectus Filius Nobilis Vir Eques Emmanuel Ber-tran de Lis a publicis Maiestatis Suae negotiis. Quam Conventio-nem ab eadem Regina et a Nobis ipsis, auditio consilio VV. FF. NN. S. R. E. Cardinalium Congregationis negotiis ecclesiasticis extraordinariis propositae, iam ratam habitam, Vobis exhiberi mandavimus una cum Apostolicis nostris Litteris, quibus Conven-

tionem ipsam confirmavimus, ut omnia clarius et plenius agnoscere possitis.

Illud quidem Nobis vel maxime cordi fuit, ut sanctissimae nostrae Religionis incolumenti, et spiritualibus Ecclesiae rebus studiosissime consuleremus. Itaque constitutum perspicietis, Catholicam Religionem cum omnibus suis iuribus, quibus ex divina sua institutione et Sacrorum Canonum sanctione potitur, ita unice in eo Regno, veluti antea, vigere ac dominari debere, ut omnis alias cultus plane sit amotus et interdictus. Hinc cautum quoque est, ut instituendi ac docendi ratio in cunctis tum Universitatibus, tum Collegiis, tum Seminariis, tum publicis privatisque scholis cum eiusdem catholicae religionis doctrina plane congruat, atque Episcopi aliquique Dioecesani Antistites, qui ex proprii ministerii officio in catholicae doctrinae puritatem tuendam, propagandam, et in christianam iuventutis educationem procurandam totis viribus incumbere debent, nullo prorsus umquam praepediantur impedimento, quominus publicis etiam scholis sedulo advigilare, et in illas pastoralis sui munera partes libere exercere possint. Ac pari studio ecclesiasticae auctoritatis libertatem dignitatemque asserendam curavimus. Etenim non solum statutum est Sacrorum praesertim Antistites ad Episcopalem eorum iurisdictionem exercendam plena libertate pollere, quo catholicam fidem et ecclesiasticam disciplinam tueri, et morum honestatem in christiano populo tutari, et optimam iuvenum, eorum potissimum qui in sortem Domini vocantur, institutionem procurare, et alia omnia proprii ministerii munera explere valeant; verum etiam decretum est omnes Regni Magistratus eorum operam praestare debere, quo ab omnibus ecclesiasticae auctoritati et dignitati debitus exhibeat honor, observantia et obedientia. Accedit etiam, ut praestantisima Regina, eiusque Gubernium iisdem Episcopis valido suo patrocinio et praesidio omnem opem ferre profiteantur, cum ab ipsis pro pastorali munere illorum potissimum hominum improbitas est cohibenda, et coercenda audacia, qui fidelium mentes pervertere, moresque corrumpere nefarie commoliuntur, et a proprio grege detestabilis ac dira perversorum librorum pestis atque per-

nicies est avertenda ac profliganda. Et quoniam relatum ad Nos est, ex nova Dioecesum divisione maiora spiritualia bona in illius Regni fideles redundant, iccirco novam huiusmodi circumscriptionem Nostra auctoritate, et ipsius Reginae consensu peragendum statuimus, atque Apostolicas de hac re suo tempore profereamus Litteras, postquam ea omnia fuerint perspecta et statuta, quae ad rem ipsam perficiendam sunt necessaria. Cum autem Religiosae Familiae pie institutae, ac recte administratae maximo sint Ecclesiae et civili societati usui et ornamento, quantum in Nobis fuit haud omisimus eniti, ut illic Regulares Ordines conserventur, restituantur, augeantur. Atque in eam profecto spem erigimur fore, ut propter avitam eiusdem carissimae in Christo Filiae Nostrae pietatem, et eximiam Hispaniae Nationis religionem ipsi Regulares Ordines ibi pristina dignitate ac splendore fruantur. Ne quid autem Religionis bono quavis ratione officere possit, non solum constitutum est, Leges, Ordinationes et Decreta quaecumque Conventioni adversantia de medio sublata omnino esse ac penitus abrogata, verum etiam sancitum, ut cetera omnia, quae ad ecclesiasticas res et personas pertinent, de quibus in Conventione nulla est habita mentio, iuxta canonicam et vigentem Ecclesiae disciplinam exiguntur et administrari plane debant.

Nec vero ea praetermisimus, quae ad temporale Ecclesiae bonum possunt pertinere. Omni enim studio et contentione vindicandum ac tuendum curavimus ius, quo Ecclesia pollet, acquirendi scilicet et possidendi quaecumque bona stabilia et frugifera, veluti innumera prope Conciliorum acta et Sanctorum Patrum sententiae et exempla, et Praedecessorum Nostrorum Constitutiones apertissime loquuntur, sapientissime docent ac demonstrant. Atque utinam ubique gentium, ubique terrarum possessiones Deo eiusque Sanctae Ecclesiae dicatae semper inviolatae fuissent, et homines debita illas reverentia essent prosequuti! Evidem haud cogeremur deflere plurima, omnibusque notissima mala et damna in civilem ipsam societatem derivata ex iniusta prorsus et sacrilega ecclesiasticarum rerum ac bonorum spoliatione et direptio-

ne, quae ad funestissimos quosque ac perniciosissimos *Socialismi* et *Communismi* errores fovendos magna ex parte viam munivit. Iam porro in Conventione constabilitum, firmatumque conspiciens Ecclesiae ius novas acquirendi possessiones, ac simul sancitum, ut proprietas bonorum omnium, quae vel in praesentia possidet, vel in posterum acquiret, integra et inviolabilis omnino habeatur atque persistat. Hinc constitutum etiam fuit, ut, nulla interposita mora, Ecclesiae illa omnia statim restituantur bona, quae nondum divendita fuere. Verum cum ex gravibus ac fide dignis testimentiis acceperimus, nonnulla ex iisdem bonis nondum alienatis ita in deterius esse prolapsa, et administrationis incommodis obnoxia, ut evidens constet Ecclesiae utilitas, si illorum pretium in publici aeris alieni reditus numquam quavis alia ratione transferendos convertatur, eiusmodi permutationi indulgendum esse censuimus, postquam vero bona ipsa fuerint Ecclesiae restituta.

Omnem quidem dedimus operam, ut Episcopi, Capitula, Seminaria, Parochi congruis ac stabilibus potiantur redditibus, qui Ecclesiae perpetuo addicti, ab ea libere erunt administrandi. Et si vero hi reditus cum antiqua Hispani Cleri dote conferri non possint, et ob temporum asperitatem minores, quam Nos optavissimus, existant; tamen probe noscentes, qua singulari religione et pietate idem Hispaniarum Clerus summopere praestet, plane non dubitamus, quin ipse in divina voluntate conquiescens, et omni virtutum genere magis in dies undique refulgens, in vineam Domini naviter scienterque excolendam alacriori usque sollicitia et studio incumbat, cum praesertim per ecclesiasticam libertatem in Conventione sancitam iis omnibus expeditus sit impedimentis, quae antea libero sacri ministerii exercitio adversabantur, atque ita Populorum obsequium, amorem et veneracionem sibi magis magisque conciliet et deviciat. Ceterum cum plenum ac liberum acquirendi ac possidendi ius fuerit sancitum ac servatum, patet Hispanis Ecclesiis aditus ad ampliores obtinendos reditus, quibus et maiori divini cultus splendori, et decentiori Cleri sustentationi facilius et commodius consulatur. Atque id felicioribus temporibus ex regia carissimae in Christo Fi-

liae Nostrae munificentia, eiusque Gubernii studio, et ex egregia ac perspecta Hispanae Nationis religione futurum Nobis pollicemur. Ex iis, quae raptim cursimque commemoravimus, intelligitis, Venerabiles Fratres, quo studio Nostras omnes curas in ecclesiasticis Hispaniae rebus instaurandis posuerimus, ac futurum confidimus, ut, divina adspirante gratia, in amplissimo illo Regno catholica Ecclesia, eiusque salutaris doctrina quotidie magis latissime dominetur, vigeat et efflorescat.

Nunc vero noscatis velimus, dilectissimum in Christo Filium Nostrum Leopoldum II Magnum Etruriae Ducem et Lucensium Ducem pro egregia sua pietate vehementer optasse, ut vigentes in Etruria leges quodammodo ordinari et componi possent cum iis omnibus, quae ecclesiasticas leges respiciunt. Itaque enixis precibus a Nobis efflagitavit, ut nonnulla interea temporis conciliare vellemus, cum eidem religiosissimo Principi in animo fixum destinatumque sit, plenam cum hac Apostolica Sede in posterum inire Conventionem, qua in regionibus ei subiectis ecclesiasticalrum rerum regimini et rationibus prospere consulatur. Quocirca firma ac certa spe freti fore, ut idem dilectissimus in Christo Filius Noster eiusmodi Conventionem iuxta Nostra desideria, maiori qua fieri potest celeritate, sit initurus, illius votis obsecundantes aliqua capita a VV. FF. NN. S. R. E. Cardinalibus eiusdem Congregationis Negotiis ecclesiasticis extraordinariis propositae perpensa, interim constituta fuere, quae a Nobis et ab ipso Principe rata habita sunt. Quibus quidem capilibus, seu articulis inter cetera constitutum est, ut Episcopi omnem habeant libertatem in iis omnibus peragendis, quae ad sacrum pertinent ministerium, ac in scripta et opera quae de rebus ad religionem spectantibus tractant, censuram ferant, ut propriam eorum episcopalem auctoritatem libere adhibeant ad fideles a prava quavis lectione tum religioni, tum moribus perniciosa arcendos, ac simul cautum, ut omnes cum hac B. Petri Cathedra catholicae veritatis et unitatis centro libere communicare valeant, et causae omnes spirituales et ecclesiasticae sacrae potestatis iudicium unice et omnino spectare debeant ex sacrorum Canonum praescri-

pto. Non levi autem iucunditate affecti fuimus, propterea quod idem dilectissimus in Christo Filius Noster haud omisit Nobis polliceri et profiteri, se omnem suam opem et operam esse collaturum ad sanctissimam nostram religionem tutandam, ad divinum cultum tuendum, et ad publicam morum honestatem foven-
dam, ac valido suo auxilio praesto futurum, quo Sacrorum Antistites episcopalem eorum auctoritatem libere exerceant. Quocirca confidimus, ut, Deo bene iuvante, earum, quas indulsimus, rerum usus in Ecclesiae utilitatem cedat, iis insuper difficultatibus penitus amotis, quae hucusque eiusdem Ecclesiae libertati obsti-
terunt.

Denuo certiores Vos facimus, Nostras iam convertisse curas ad catholicae religionis res in longinqua regione componendas, ac Nos magnas spe sustentari fore, ut Conventio possit iniri, quae iuxta Nostra et vestra desideria Ecclesiae iuribus, rationibus ac prosperitati respondeat. Ac vel maxime optaremus, ut huiusmodi exemplum omnes earum dissitarum partium regiones, quarum populos praecipuo caritatis affectu in Domino prosequimur, imitari properarent, quo penitus averterentur plurima et maxima damna, quibus in nonnullis praesertim earumdem partium regionibus immaculata Christi sponsa cum summo animi Nostri dolore affligitur ac divexatur. Atque hic haud possumus, quin illis Venerabilibus Fratribus vehementer gratulemurs, eisque meritas debitasque tribuamus laudes, qui in tristissima licet conditione ibi constituti, tamen haud omittunt episcopali eorum zelo, et firmitate Ecclesiae causam strenue tueri, eiusque iura impavide defendere, ac dilectorum ovium saluti sollicite prospicere.

Haec erant, Venerabiles Fratres, quae Vobis hodierno die significanda existimavimus. Reliquum est, ut nunquam desinamus dies noctesque in humilitate cordis Nostri, et in sinceritate fidei, firmitate spei, et caritatis ardore assiduas clementissimo misericordiarum Patri adhibere preces, ut omnipotenti sua dextera, quae mari et ventis imperat, Ecclesiam suam sanctam a tantis, quibus iactatur, procellis eripiatur, eamque a solis ortu usque ad occasum novis ac splendidioribus triumphis exornet et augeat.

LETTERA

**DATA DA SUA SANTITÀ A S. M. IL RE VITTORIO EMMANUELE
LI 9 SETTEMBRE 1852 SUL MATRIMONIO CIVILE**

La lettera 1, che V. M. Ci ha fatto tenere in data 25 luglio ultimo in séguito d' altra da Noi direttale , ha dato motivo di consolazione al Nostro cuore , riconoscendo in quella un' interpellazione , che un Sovrano cattolico dirige al Capo della Chiesa sul gravissimo argomento del progetto di legge sui matrimonii civili. Questa prova di rispetto verso la nostra SS. Religione, che V. M. Ci presenta , ben dimostra il retaggio glorioso , che Le fu trasmesso dagli augusti suoi Antenati ; l'amore cioè alla fede da quelli professata, per cui abbiamo ferma fiducia , che V. M. saprà conservarne puro il deposito a beneficio di tutti i suoi sudditi a fronte della malvagità dei tempi, che corrono.

Questa lettera Ci chiama ad eseguire i doveri dell' Apostolico Nostro Ministero, dandole una risposta franca e decisa : e ciò facciamo tanto più volentieri , in quanto che V. M. Ci assicura , che terrà questa risposta in molto conto. Senza entrare a discutere il contenuto nei fogli dei Ministri Regii che la M. V. Ci ha inviati , nei quali si pretende di fare l' apologia della legge del 9 aprile , insieme al progetto dell'altra sul matrimonio civile, facendo derivare quest'ultima dagl'impegni contratti nella pubblicazione della prima ; senza rimarcare , che quest'apologia si fa nel momento stesso , in cui pendono le trattative iniziate per la conciliazione

dei diritti della Chiesa violati da quelle leggi senza qualificare alcuni principii, che in detti fogli si esternano evidentemente contrarii alla sana dottrina della Chiesa; Ci proponiamo soltanto di esporre colla brevità, che conviene ai limiti di una lettera, la dottrina Cattolica su tale argomento. Da questa dottrina V. M. rileverà quanto occorre, affinchè questo affare così importante sia messo in regola; la qual cosa tanto più siamo convinti di poter ottenere, in quanto che i suoi Ministri hanno dichiarato di non consentire mai a fare una proposizione contraria ai precetti della Religione, qualunque sieno le opinioni prevalenti.

È domma di fede essere stato elevato il matrimonio da N. S. G. C. alla dignità di Sagramento, ed è dottrina della Chiesa cattolica che il Sacramento non è una qualità accidentate aggiunta al contratto, ma è di essenza al matrimonio stesso, cosicchè l'unione coniugale tra i cristiani non è legittima, se non nel matrimonio Sacramento, fuori del quale non vi è che un prelto concubinato. Una legge civile che, supponendo divisibile pei cattolici il Sacramento dal contratto di matrimonio, pretenda di regolarne la validità, contraddice alla dottrina della Chiesa, invade i diritti inalienabili della medesima, e praticamente parifica il concubinato al Sacramento del matrimonio, sanzionando legittimo l'uno come l'altro.

Nè la dottrina della Chiesa sarebbe posta in salvo, nè bastantemente sarebbero garantiti i diritti della Chiesa stessa, ove venissero adottate nella discussione del Senato le due condizioni accennate dai Ministri della M. V.: 1.^o cioè, che la legge tenga per validi i matrimonii regolarmente celebrati al cospetto della Chiesa: 2.^o che quando siasi celebrato un matrimonio, che la Chiesa non riconosce per valido, la parte, che più tardi vuole uniformarsi ai suoi precetti, non sia tenuta di perseverare in una convivenza condannata dalla religione. Imperciocchè in quanto alla prima condizione, o s'intendono per validi i matrimonii regolarmente celebrati avanti alla Chiesa, e in questo caso la disposizione della legge è superflua, che anzi sarebbe una vera usurpazione del potere legittimo, se la legge civile pretendesse di cono-

scere e giudicare , se il Sacramento del matrimonio sia stato regolarmente celebrato *in faciem Ecclesiae*; o si vogliono intendere per validi avanti la medesima quei soli matrimonii contratti *regolarmente* , cioè secondo le leggi civili, ed anche in questo caso si va a violare un diritto , che è di esclusiva competenza della Chiesa.

Per la secoda condizione poi , lasciandosi ad una delle parti la libertà di non perseverare in una convivenza illecita, stante la nullità del matrimonio , perchè non celebrato innanzi la Chiesa , nè in conformità alle sue leggi , si lascierebbe sussistere come legittima avanti al potere civile una unione , che viene dalla legge condannata. Ambedue poi le condizioni non distruggendo il supposto, dal quale parte la legge in tutte le sue disposizioni di separare cioè il Sacramento dal contratto, lasciano sussistere la opposizione di sopra ricordata tra la legge stessa e la dottrina della Chiesa intorno al matrimonio.

Non vi è pertanto altro mezzo di conciliazione che , ritenendo Cesare quello che è suo, lasci alla Chiesa ciò, che ad essa appartiene. Il potere civile disponga pure degli effetti civili , che derivano dalle nozze , ma lasci alla Chiesa il regolarne la validità fra i cristiani. La legge civile prenda le mosse dalla validità od invalidità del matrimonio , come sarà dalla Chiesa determinata , e partendo da questo fatto, che è fuori della sua sfera il costituirlo, disponga allora degli effetti civili.

La lettera poi della M. V. Ci chiama a chiarire altre propozizioni , che abbiam rilevate dalla medesima. E primieramente V. M. dice d' aver saputo da un canale , che Ella deve credere ufficiale , che la proposta della suddetta legge non fu riguardata da Noi come ostile alla Chiesa. Abbiamo voluto su questo proposito parlare, prima della sua partenza da Roma, col ministro di V. M. conte Bertone , il quale Ci ha assicurato sull' onor suo , di avere scritto unicamente ai Ministri di V. M. , che il Papa non poteva nulla opporre, se conservati al Sacramento tutti i suoi sacri diritti e la libertà che gli compete, si fossero volute fare delle leggi riguardanti solo gli effetti civili del matrimonio.

V. M. aggiunge, che queste stesse leggi, le quali sono in vigore presso certi Stati limitrofi al Regno del Piemonte, non hanno impedito alla S. Sede di riguardarli con occhio di benevolenza e di amore. A questo risponderemo che la stessa S. Sede non si è mai acquietata sui fatti, che si citano, e sempre ha reclamato contro queste leggi appena ne conobbe l'esistenza, conservandosi anche adesso ne' nostri archivii i documenti delle fatte rimostranze: ma queste proteste non hanno mai impedito nè impediscono di amare i cattolici di quelle nazioni, che furono costrette a sottoporsi all'esigenza di queste leggi. Dovremo forse non amare i cattolici del Regno di V. M., quand'anche si trovassero nella dura necessità di subire questa legge? Mai no! Diremo di più; dovranno in Noi cessare i sentimenti di carità verso la M. V. nel caso si trovasse trascinata (che Dio nol permetta mai) a sanzionarla? La Nostra carità si raddoppierebbe, e con zelo maggiore dirigeremmo più fervide preghiere a Dio, supplicandolo a non voler ritrarre la sua mano onnipotente dal capo di V. M. e a volerla soccorrere più che mai coi lumi e colle ispirazioni della sua grazia.

Intanto però non possiamo a meno, anzi sentiamo tutto il debito che Ci corre, di prevenire il male per quanto da Noi dipende, e dichiariamo a V. M. che, se la S. Sede ha reclamato altra volta contro questa legge, oggi più che mai è stretta dal dovere di farlo verso il Piemonte, e nei modi i più solenni, perchè appunto il Ministero di V. M. invoca gli esempi di altri Stati, dei quali funesti esempi incombe a Noi il dovere di impedire la riproduzione, ed anche perchè, procedendosi allo stabilimento di una tal legge in tempo che sono aperte le trattative per la conciliazione di altri affari, una tal circostanza potrebbe forse somministrare l'occasione di far supporre che vi fosse una qualche connivenza per parte della S. Sede. Ci sarebbe veramente penoso un tal passo, ma come esonerarcene avanti a Dio, che ci affidò il regime della sua Chiesa, e la custodia de' suoi diritti? Solo la M. V. potrebbe arrecarci questo grande conforto col togliercene l'occasione, ed una sola sua asserzione in proposito compirebbe

la consolazione che abbiamo provato nell' essersi a Noi diretta , e quanto più sollecita sarà la sua risposta , tanto Ci riuscirà più gradita, come quella che Ci solleverà da un pensiero che assai affligge il Nostro cuore , ma che saremmo costretti di sentire nella sua piena estensione , quando uno stretto dovere di coscienza reclamasse da Noi quest'atto solenne.

Ora Ci resta di chiarire l'equivoco in cui è V. M. circa l'amministrazione della diocesi di Torino. E senza trattenerla soverchiamente su questo punto Noi le dimandiamo solo di avere la pazienza di leggere due Nostre lettere a Lei dirette in data 7 Settembre e 9 Novembre 1849. Il suo ministro in Roma, conte Bertone, ora in Torino , potrà anche riferirle a questo proposito una Nostra riflessione a lui esternata , e che ora ripetiamo con tutta ingenuità a V. M. Insistendo egli sulla nomina dell'amministratore della diocesi di Torino, facemmo ad esso osservare che il Ministero piemontese essendosi reso responsabile della riprovevole carcerazione e dell' esiglio di mons. Arcivescovo , ha ottenuto un fine che non conosciamo se fosse nelle sue vedute, ha cioè ottenuto che il Prelato abbia incontrato la simpatia e il rispetto di una grande parte del cattolicesimo dimostratosi in tante maniere , per cui siamo stati oggi posti nell' impossibilità di andare incontro all'ammirazione dello stesso cattolicesimo con privare monsig. Arcivescovo dell'amministrazione della sua diocesi.

Finalmente rispondiamo all' ultima osservazione che V. M. Ci esterna addebitando ad una parte del Clero piemontese e pontificio, di far guerra al suo Governo e di eccitare i sudditi alla rivolta contro di Lei e contro le sue leggi. Una tale asserzione Ci sembrerebbe del tutto inverosimile se non ci fosse scritta da V. M., la quale assicura di averne in mano i documenti ; ed in questo caso è fuori di dubbio che debbono esser puniti i rei nei debiti modi. Ci duole solo di non conoscere questi documenti per non sapere quali sieno i membri del Clero che si sarebbero accinti alla pessima impresa di eccitare una rivoluzione al Piemonte. Questa ignoranza Ci pone nella necessità di non poterli punire ; se mai però s' intendessero per eccitamento alla rivolta gli scritti, che per

parte del Clero sono comparsi per opporsi al progetto di legge sul matrimonio , diremo che , prescindendo dai modi che qualcuno avesse potuto adoperare , il Clero ha fatto il suo dovere. Noi scrivemmo a V. M. che la legge non è cattolica, e se la legge non è cattolica è obbligato il Clero di avvertire i fedeli anche a fronte del pericolo che incorre. Maestà, Noi Le parliamo anche a nome di G. C. , del quale siamo Vicario , quantunque indegni , e nel suo santo Nome Le diciamo di non sanzionare questa legge che è fertile di mille disordini.

La preghiamo poi di volere ordinare che sia messo un freno alla stampa che ribocca continuamente di bestemmie e d' immoralità. I peccati che derivano dalla licenza di parlare e di scrivere, sono senza numero. Deh ! per pietà che questi peccati non si riversino mai sopra chi, avendone il potere , non ne impedisse la cagione ! V. M. si lamenta del Clero, ma questo Clero è stato sempre in questi ultimi anni avvilito, bersagliato , calunniato , deriso da quasi tutti i fogli che si stampano nel Piemonte. Non si potrebbero ridire tutte le villanie e le rabbiose invettive scagliate e che si scagliano contro questo Clero. Ed ora perchè esso si accinge a difendere la verità e la purità della fede , dovrà questo Clero forse incontrare la disgrazia della M. V.? Noi non possiamo persuadercene, e Ci abbandoniamo volentieri alla speranza di vedere dalla M. V. sostenuti i diritti della Chiesa, protetti li suoi ministri, e liberato il suo popolo dal pericolo di sottostare a certe leggi, che seco portano l' impronta della decadenza della religione e della moralità negli Stati.

Pieni di questa fiducia alziamo al cielo le mani , pregando la Santissima Trinità a far discendere la benedizione apostolica sopra l' augusta sua Persona e tutta la reale Famiglia.

Datum Castri Gandulphi, die XIX Septembris MDCCCLII.

ALLOCUTIO

HABITA IN CONSISTORIO SECRETO DIE XXVII SEPTEMBRIS
ANNI MDCCCLII.

VENERABILES FRATRES

Acerbissimum ¹ Vobiscum, Venerabiles Fratres, hodie communicamus dolorem, quo iamdiu intime premimur ob maxima, et nunquam satis lugenda damna, quibus plures ab hinc annos Catholica Ecclesia in Neogranatensi Repubblica miserandum in modum afflititur, atque vexatur. Quod nunquam fore putavissemus, cum omnes noscant, quibus praecipuae benevolentiae significationibus haec Apostolica Sedes illam Rempublicam fuerit prosequuta, et qua alacritate felicis recordationis Gregorius XVI Praedecessor Noster ad religionis, et spirituale illius gentis bonum omni studio procurandum, atque ad mutuae amicitiae vincula magis magisque obstringenda Rempublicam ipsam p[re]e aliis omnibus Americae regionibus non modo primum recognoverit, sed etiam Apostolicam Nunciaturam ibi constituerit. Atque eo magis dolemus, quod adhuc irritae fuere curae omnes tum ab eodem Praedecessore Nostro, tum a Nobis ipsis summa contentione apud illud Gubernium adhibitae, ut tot catholicae religioni illata amoverentur damna, ac nefariae et iniustissimae de medio tollerentur leges ibi a civili potestate cum maximo fidelium detimento contra divinam Ecclesiae institutionem, eiusque veneranda iura, et libertatem contra supremam huius Apostolicae Sedis potestatem, contra

¹ Huc referuntur Syllabi Propositiones 31 — 51 — 53 — 55 — 67 — 73 — 74 — 78.

sacrorum Antistites, et ecclesiasticos viros latae atque sancitae. Noverat enim idem Decessor Noster, legem ibi mense Aprili anno 1845 fuisse promulgatam, qua inter alia statuitur, ut, vix dum alia apud illam laicæ potestatis tribunalia accusatio adversus ecclesiasticos viros, ac vel ipsos Episcopos fuisse admissa, non solum Sacerdotes Domini aliique Clerici, sed etiam Episcopi, quos Spiritus Sanctus posuit regere Ecclesiam Dei, ab omni sui ministerii exercitio se abstinere, ac proprii munieris partes aliis committere debeant, constitutis quoque carceris, exsilii, et aliis poenis in eos omnes, qui id agere noluissent. Quapropter ipse Praedecessor Noster, nulla interposita mora, suas eodem anno ad illius Reipublicae Praesidem misit Litteras, quibus legem illam omni certe reprehensione dignissimam vehementer improbavit, ac simul summopere expostulavit, ut eadem lex statim abrogaretur, et Ecclesiae iura sarta, tecta haberentur. Nos autem, postquam inscrutabili Dei iudicio ad hanç Principis Apostolorum Cathedram evecti, totius Ecclesiae gubernacula tractanda suscepimus, afflictis inibi sanctissimae nostrae religionis rebus consulere vel maxime cupientes iam inde ab anno 1847 ad eiusdem Neogranatensis Reipublicae Praesidem scripsimus Litteras. Quibus quidem Litteris significantes, quantopere de illa Dominici gregis parte solliciti et anxii essemus, et quo singulari paternae Nostrae caritatis studio opportuna vellemus adhibere remedia ad sanandas ibi contritiones Israel, lamentati sumus vehementer deplorandam conditionem, in qua versabatur Ecclesia. Neque praetermisimus iisdem Litteris inter alia summopere conqueri de binis illis praesertim iam conceptis decretis, quorum altero proponebatur, ut, hac Apostolica Sede minime consulta, decimae tollerentur; altero autem, ut hominibus illuc immigrantibus liceret publicum proprii cuiusque cultus exercitium habere. Atque commemorata improbantes decreta etiam atque etiam efflagitavimus, ut illa nullum nunquam obtinerent exitum, ut Ecclesia suis omnibus iuribus, ac plena frueretur libertate.

Ea porro spe nitebamus fore, ut Neogranatense Gubernium has Nostras voces, monita, expostulationes, querelas, quae ex aman-

tissimi aeque ac afflictissimi communis omnium fidelium Patris corde erumpebant, pronis vellet auribus excipere. Verum incredibili animi Nostri dolore Vobis nunciare cogimur, hostiles violentosque in Christi Ecclesiam impetus quotidie magis, ac duabus praesertim ab hinc annis, adeo esse factos, ut nova et gravissima Ecclesiae ipsi per laicam potestatem indesinenter inflictia sint vulnera. Etenim, Venerabiles Fratres, non solum iniustissimae illae leges, de quibus dolenter loquuti sumus, minime sublatae fuerunt, verum etiam aliae ab utroque illius Gubernii Consilio legibus ferendis praeposito sunt conditae, quibus sanctissima Ecclesiae et huius Sanctae Sedis iura maiorem in modum violantur, oppugnantur et proculcantur. Namque inter alia iam inde a mense Maio superioris anni lex prodiit contra Religiosas Familias, quae pie institutae, recteque administratae magno christiana et civili reipublicae usui et ornamento esse solent. Ea enim lege confirmatur expulsio Religiosae Societatis Iesu Familiae, quae illuc primum arcessita ac tantopere exoptata, de re catholica et civili illic optime merebatur; atque eadem lege vetatur, ne ulla in Neogranatensis Reipublicae territorio Societas institui possit, quae *passiva*, ut dicunt, obedientiae vinculo potissimum obstringatur. Insuper eadem lege iis omnibus promittitur auxilium, qui a suscepto religiosae vitae instituto deficere, ac solemnia vota frangere velint, ac Venerabili Fratri Emmanueli, illius ecclesiasticae provinciae Archiepiscopo vigilantissimo, viro summis Nostris et huius Apostolicae Sedis praconiis decorando, interdicitur exercere facultatem ei ab hac Apostolica Sede iam inde ab anno 1835 tributam, visitandi scilicet Religiosas illius regionis Familias, et regularem restituendi disciplinam. Eodem subinde mense et anno alia sancita lex est, qua Ecclesiasticum Forum de medio omnino tollitur, ac declaratur, causas omnes ad idem forum pertinentes, ac vel ipsas tum Archiepiscopi, tum Episcoporum causas sive civiles sive criminales ante laicalia tribunalia ab illius Reipublicae Magistratibus in posterum esse iudicandas. Postmodum, die nempe vigesima septima eiusdem mensis Maii anno 1851, de Parochis nominandis promulgata lex est, qua Nationalia Consilia men-

titum falsumque ius designandi Parochos a Praeside illius Reipublicae ad quemdam excogitatum Parochialem Conventum, quem *Cabildo parroquial* appellant, ex cuiusque Paroeciae patribusfamilias praesertim comparatum transferunt, ut, cum aliqua Paroecia suo fuerit Parocho orbata, ille Conventus novum Parochum nominare queat. Aliibus insuper eiusdem legis articulis prohibentur Sacrorum Antistites ullum seu sacrae visitationis, seu alio quocumque iure percipere emolumentum; atque eidem Parochiali Conventui tribuitur potestas pro suo arbitrio statuendi et immutandi tam Parochorum redditus, quam impendia sacris functionibus necessaria; et alia statuuntur, quibus ecclesiasticae proprietatis iura violentur ac delentur. Post haec die primo mensis Iunii eiusdem anni 1851 alia sancita est lex, qua vetatur, ne Canonicales Cathedralium Ecclesiarum Praebendae conferantur, nisi postquam a maiore Provincialium cuiusque Dioecesis Consiliorum parte id pro eorum arbitrio fuerit statutum. Aliae deinde promulgatae sunt leges, quibus et omnibus data est facultas se liberandi ab onere solvendi census, qui polissimam ecclesiasticorum reddituum partem constituunt, soluta dimidia pretii parte Gubernio, et Archiepiscopalis Seminarii sanctae Fidei de Bogota bona Nationali Collegio adiudicata, ac suprema in idem Seminarium inspectio laicæ potestati attributa. Neque silentio praetereundum, per novam illius reipublicae constitutionem postremis hisce temporibus sancitam inter alia ius quoque liberae institutionis defendi et omnimodam omnibus tribui libertatem, ut quisque suas cogitationes, ac monstrosa quaeque opinionum portenta typis quoque in vulgus edere et privalim publiceque quemlibet cultum profiteri valeat.

Videlis profecto, Venerabiles Fratres, quam teterimum ac sacrilegum bellum catholicae Ecclesiae a Neogranatensis Reipublicae Moderatoribus sit indictum, et quae quantaeque iniuriae eidem Ecclesiae, eiusque sacris iuribus, Pastoribus, Ministris, ac supremæ Nostræ et Sanctæ huius Sedis auctoritati fuerint illatae. Cum autem enunciatae leges iam inde ab eodem anno 1851 executioni fuerint mandatae, iam tum sacrorum Antistites, et ecclesiastici viri, qui catholicis sensibus vere animati nefariis illis de-

cretis merito, atque optimo iure reclamabant et obsistebant, summo cum fidelium populorum damno crudeliter vexati, et in gravissima quaeque adducti fuere discrimina. Siquidem et sacra Episcoporum oppressa auctoritas, et Parochorum ministerium vinculis constrictum atque irrelatum, et optimi divinae legis praecones in carcerem detrusi, et cuiusque gradus Clerici ad egestatem redacti, omnibusque malis et aerumnis obnoxii. Atque in primis Venerabilis Frater Emmanuel Iosephus de Monsquera, vigilantissimus Sanctae Fidei de Bogota Archiepiscopus gravioribus fuit angustiis et laboribus exagitatus eam scilicet ob causam, quod praestantissimus ille Antistes singulari pietate, doctrina, prudentia, consilio praecellens, et apostolico zelo plane incensus pro sui muneric debito contra illas impias leges sapienter fortiterque protestari, ac saeculi licentiae, et pravis impiorum hominum consiliis invicte resistere, ac Dei et Ecclesiae causam strenue propugnare nunquam intermisit. Quo autem potissimum praetextu Neogranatense Gubernium uti voluerit ad clarissimum illum di vexandum Antistitem, accipite, Venerabiles Fratres. Cum enim in illis regionibus mos invaluerit, ut sexto quoque mense habentur experimenta ad eorum periclitandam doctrinam, qui vacantibus parochialibus Ecclesiis sunt praeficiendi, Neogranatense Gubernium per legem ibi iamdiu contra Canonicas sanctiones sanctam sibi temere ius arrogavit non solum cogendi Episcopos ad id sexto quoque mense redeunte peragendum, verum etiam compellendi Metropolitanum, aut vicinorem Antistitem ad idem praestandum si quis Antistes commemorato tempore eiusmodi experimenta minime habuisset. Huius igitur legis vi ipsum Gubernium anno 1851 eidem clarissimo Sanctae Fidei de Bogota Archiepiscopo denuntiare non dubitavit, ut eadem experimenta indiceret. Et quoniam idem Archiepiscopus adversae valetudinis conflictabatur incommodis, iccirco illius Vicarius generalis Gubernio respondens sui Antistitis nomine iniustum hanc petitionem cunctando repellendam esse existimavit, veritus praesertim, ne praedictam de nominandis Parochis legem quodammodo ipse probare videtur. Ob hanc itaque rectam ac prudentem agendi rationem, omni

certe laude dignam, ab illo Vicario habitam, idem ad laicalia tribunalia fuit accusatus, a proprii muneric exercitio interdictus, palam publiceque comprehensus, ac deinceps carceri per duos menses, ac per sex captivitati, seu detentioni damnatus, aliisque afflictatus poenis. Atque in hac re illud vel maxime dolendum, Venerabiles Fratres, quod Vicarius Capitularis vacantis Ecclesiae Antiochensis, quae vicinior est Bogotae, Neogranatensis Gubernii sensibus et consiliis turpiter obsequens haud timuit, Kalendis Martii huius anni, Edictum emittere, quo contra suum Metropolitanum insurgens, et in eius iurisdictionem invadens de illius Archidioecesis Paroeciis concursus contra Canonicas Sanctiones indexit. Ubi id Nostras pervenit ad aures, nulla interiecta mora, eidem Vicario Capitulari scripsimus Litteras, quibus tantum eius facinus gravibus severisque, uti par erat, verbis reprehendentes et damnantes, illi mandavimus, ut ab incepto statim desisteret, ne Nos, licet inviti, in ipsum ea cogeremur decernere, quae Sacrorum Canonum severitas, et Apostolici Nostri ministerii ratio postulabant. Interim vero ipse pientissimus Archiepiscopus suo munere provide sapienterque fungens continuo Edictum edidit, quo iustissime docebat, nullum irritumque esse Edictum ab illo Vicario Capitulari adversus Sacrorum Canonum praescripta promulgatum, ac simul omni iure vetabat, ne quis eidem Edicto suas aures ullo modo praebere unquam vellet. Tum vero illud Deputatorum Consilium in proprium Pastorem magis magisque irruens non dubitavit spectatissimum Archiepiscopum, sicut violatarum legum reum, accusare, et Neogranatensis Senatus haud veritus est tam iniustum et impium admittere accusationem. Atque ex infanda illa lege, quam, uti ab initio diximus, rec. me. Gregorius XVI, Praedecessor Noster reprobaverat, denuntiatum est eidem Archiepiscopo, ut suam iurisdictionem remitteret, eamque alii ecclesiastico viro deferret. Hac tam iniqua denuntiatione accepta, ille religiosissimus doctissimusque Antistes, egregius ac strenuus rei catholicae, et Ecclesiae iurium propugnator paratus aspera quaeque propter iustitiam pati, sapientissimum verissimumque dedit responsum, quo invicta episcopal is sui animi fortitudine clare

aperteque declaravit, se nunquam posse eam dimittere potestatem, quam sibi unice a Deo, atque ab hac Apostolica Sede collatam esse probe noscebat. Hinc Neogranatense Gubernium haud extinxuit, maximo cum omnium bonorum luctu et indignatione, non solum Archiepiscopalis mensae redditus sequestro ponere, verum etiam proprium Archiepiscopum, de illa Archidioecesi summopere meritum ac tot sane nominibus illustrem, pellere in exsilio. Qui quidem Antistes gravissimo deinde morbo correplu, cum e Neogranatensis Reipublicae territorio protinus decidere haud potuerit, in quamdam villam, quae a Bogotensi civitate iter duorum dierum distat, se recipere est coactus. Cum autem inter plurimos spectatissimos viros Minister quoque inclytae exterae Nationis ibi commorans tam indigna re commotus sua officia apud illud Gubernium interponenda curaverit, visum est Gubernium idem propendere ad id dumtaxat permittendum, ut scilicet ipse Archiepiscopus exsularet, statim ac iter aggredi posset. Neque id satis. Hisce namque diebus tristissimi venerunt nuntii, ex quibus pari animi Nostri amaritudine accepimus, Venerabilem Fratrem Episcopum de Cartagena, ac Dilectum Filium Vicarium Capitularem Dioecesis S. Marthae, similem de paroeciarum concursu denuntiationem ab illo accepisse Gubernio, eisque ipsissima ingruere discrimina, propterea quod summa cum eorum nominis laude denuntiationem ipsam respuere non dubitarunt. Perlatum quoque ad Nos est, ea ipsa de causa eamdem Venerabili Fratri Episcopo Neo-Pampilonensi impendere procellam, cum ipse etiam paratus sit ad sui muneric partes splendide obeundas, et ad Ecclesiae iura fortiter constanterque tuenda. Atque eiusmodi vexationibus, iniuriis, contumeliis subiecti quoque fuere alii illius Reipublicae lectissimi ecclesiastici viri, ac vel ipse Noster et huius S. Sedis Legatus. Etenim semel atque iterum in illis Consiliis inter maxima et horrenda cuiusque generis contra Christi hic in terris Vicarium, et hanc Apostolicam Sedem convicia propositio facta fuit dimittendi eumdem Nostrum Legatum, qui ea, qua par erat, prudentia et fortitudine Nostro nomine tot nefariis et sacrilegis ausis reclamare non praetermisit. Omittimus autem hic commemorare

novas alias leges a nonnullis e Deputatorum Consilio propositas, quae irreformabili Catholicae Ecclesiae doctrinae, eiusque sanctissimis iuribus omnino adversantur. Itaque nihil dicimus de illis conceptis decretis, quibus proponebatur, ut Ecclesia nempe a Statu seiungeretur, ut Regularium Ordinum, piorumque Legatorum bona oneri mutuum dandi omnino subiicerentur, ut omnes abrogarentur leges, quae ad Religiosarum Familiarum statum tutandum, earumque iura et officia tuenda pertinent, ut civili auctoritati tribueretur ius erigendi et circumscribendi Dioeceses, et Canonicorum Collegia, ut ecclesiastica iis conferretur iurisdictio, qui a Gubernio nominati fuissent. Nihil dicimus de alio illo decreto, quo matrimonii Sacramenti mysterio, dignitate, sanctitate omnino despecta, eiusque institutione et natura prorsus ignorata et eversa, atque Ecclesiae in Sacramentum idem potestate penitus spreta, proponebatur iuxta iam damnatos haereticorum errores, atque adversus Catholicae Ecclesiae doctrinam, ut matrimonium tamquam civilis tantum contractus haberetur, et in variis casibus divortium proprie dictum sanciretur, omnesque matrimoniales causae ad laica deferrentur tribunalia, et ab illis iudicarentur; cum nemo ex Catholicis ignoret, aut ignorare possit, matrimonium esse vere et proprie unum ex septem Evangelicae legis Sacramentis a Christo Domino institutum, ac propterea inter fideles matrimonium dari non posse, quin uno eodemque tempore sit Sacramentum, atque ictus quamlibet aliam inter Christianos viri et mulieris, praeter Sacramentum, coniunctionem cuiuscumque etiam civilis legis vi factam nihil aliud esse nisi turpem atque exilialem concubinatum ab Ecclesia tantopere damnatum, ac proinde a conjugali foedere Sacramentum separari nunquam posse, et omnino spectare ad Ecclesiae potestatem ea omnia decernere, quae ad idem Matrimonium quovis modo possunt pertinere. Atque haec omnia omissimus, propterea quod etiamsi hae leges ab aliquibus e Deputatorum Consilio fuere propositae, tamen plerique Deputati ac Senatores, Deo bene iuvante, eas leges reiiciendas esse decrevere, et horruerunt tot iam gravibus inflictis Ecclesiae vulneribus alia nova imponere vulnera.

In tanta autem acerbitate Nos recreat singularis tum Bogotensis Archiepiscopi, tum aliorum illius Reipublicae Antistitum religio , pietas ac sacerdotalis fortitudo et constantia. Ipsi enim probe memores loci, quem tenent, dignatis, qua insigniti sunt, sacramenti, quo in solemni inauguratione se obstrinxerunt, illustribus Archiepiscopi vestigiis insistentes maxima cum eorum laude haud intermiserunt episcopalem tollere vocem contra tot illatas Ecclesiae iniurias, ac promptissimi sunt pro ipsius Ecclesiae defensione ad omnia subeunda pericula. Neque parum Nos quoque reficit egregia Neogranatensium populorum virtus , pietas , qui longe maxima ex parte summopere dolentes , et indignantes tam iniqua ac tristia contra eorum religionem et Antislites facta, nihil antiquius habent , quam publicis luculentisque testimonii ostendere, sibi maxime cordi esse et catholicam profiteri religionem , et suos Antislites summa observantia et amore prosequi , ac Nobis et huic Apostolicae Sedi catholicae veritatis et unitatis centro, firmiter adhaerere.

Iam porro, Venerabiles Fratres , vix dum Nobis innotuit , tam prava et nunquam satis improbanda consilia in Neogranatensi Republica contra Ecclesiam, eiusque sacra iura, bona , Pastores, Ministros suscepit ac perfecta fuisse , nunquam destitimus per nostrum Cardinalem a publicis Nostris Negotiis apud illud Gubernium iteratis expostulationibus reclamare et conqueri adversus tot gravissimas eidem Ecclesiae et huic Apostolicae Sedi illatas iniurias. Attamen, dolentes et inviti dicimus, nihil Nostrae voces, clamores et questus profecerunt , nihil illorum Antistitum quærlae valueret, qui proprii ministerii munere in exemplum fungentes, Nostrisque paternis Litteris confirmati haud omiserunt opponere murum pro Domo Israel. Itaque ut fideles illic degentes sciant, et universus orbis agnoscat quam vehementer a Nobis improbentur ea omnia , quae ab illius Reipublicae Moderatoribus contra Religionem, Ecclesiam, eiusque leges, Pastores, Ministros, et contra huiusmodi Beati Petri Cathedrae iura et auctoritatem gesta sunt, pastoralem Nostram in amplissimo Vestro Consessu vocem apostolica libertate attollentes praedicta omnia decreta, quae

ibi a civili potestate tanto cum Ecclesiasticae auctoritatis , et hu-
ius S. Sedis contemptu , ac tanta cum Religionis , et sacrorum
Antistitum iactura, ac detrimento sancita sunt, improbamus, da-
mnamus, et irrita prorsus ac nulla declaramus. Praeterea eos
omnes, quorum opera et iussu illa edita sunt , gravissime mo-
nemus, ut serio reputent poenas et censuras, quae adversus sa-
crarum personarum, et rerum, atque ecclesiasticae potestatis et
libertatis violatores , profanatores , et Ecclesiae atque huius A-
postolicae Sedis iurium usurpatores ab Apostolicis Constitutio-
nibus, sacrisque Conciliorum canonibus sunt constitutae.

Utinam vero Nostris hisce vocibus, monitis, querelis tandem
aliquando illi ipsi dociles praebeant aures , quorum opera tot
tantisque malis oppressa ingemiscit Ecclesia; utinam huius moe-
stissimae et amantissimae Matris aspectu commoti illam saluti-
fera poenitentia consolari, eiusque gravissima vulnera lacrimis
abstergere, ac damna statim reparare properent, atque ita haud
exspectare et experiri velint, quam iratus iudex Deus in illos
exurgat, qui suam Ecclesiam polluere, violare , et affligere au-
dent. Nos autem, Venerabiles Fratres, nunquam intermittamus
dies noctesque clementissimum misericordiarum Patrem et Deum
totius consolationis assiduis fervidisque precibus orare et obse-
crale , ut divina sua gratia omnes errantes ad veritatis , iusti-
tiae, et salutis seminas reducere velit, ac simul omnipotenti sua
virtute efficiat, ut Ecclesia sua sancta tum ibi, tum alibi nefariis
impiorum hominum consiliis tam vehementer afflita ac di-
vexata ponat luctum, squalorem abiiciat, et induat vestes iucun-
ditatis suae, atque a solis ortu usque ad occasum splendidiori-
bus in dies augeatur et exornetur triumphis.

ALLOCUTIO

HABITA IN CONSISTORIO SECRETO DIE IX DECEMBRIS
ANNI MDCCCLIV.

VENERABILES FRATRES

Singulari quadam ¹ perfusi laetitia exultamus in Domino, Venerabiles Fratres, cum Vos hodierno die lateri Nostro frequentes adstare videamus, quos Nostrum gaudium et coronam iure possumus nuncupare. Vos enim pars estis eorum, quibuscum communicamus labores et curas in pascendo humilitati Nostrae concordito dominico grege universo, in tutandis iuribus catholicae religionis, eique novis adiungendis sectatoribus, qui iustitiae et veritatis Deum in sinceritate fidei colant, et venerentur. Itaque quod olim Christus Dominus dixit Apostolorum Principi: « Tu aliquando conversus confirma fratres tuos », id ipsum Nobis, qui in eius locum, licet immerentes, divina benignitate suffecti sumus, hac oblata opportunitate praestandum videtur, ut Vobis nimirum, Venerabiles Fratres, verba faciamus, non ut Vos aut commoneamus officii, aut languentes excitemus, quos inflammatos studio novimus divini Nominis gloriae propagandae, sed ut tamquam voce ipsa Beatissimi Petri, qui vivit vivetque in Successoribus suis recreati, atque erecti novo veluti robore muniamini ad quaerendam commissarum ovium salutem ad Ecclesiae causam in tanta asperitate temporum animose ac fortiter sustinendam.

¹ Huc referuntur Syllabi Propositiones 8 — 17 — 19.

Neque vero deliberandum fuit, cuius potissimum adhibeamus patrocinium apud caelestem Patrem lumen, ut eo adiuvante alloqui Vos fructuose possimus; siquidem cum ea de causa apud Nos conveneritis, ut conspirantibus animis studia, curasque conferremus amplificando honori augustae Genitricis Dei Mariae, Sanctissimam ipsam Virginem, Sapientiae Sedem ab Ecclesia nuncupatam, iteratis precibus obsecravimus, ut impetrare Nobis radium velit sapientiae caelestis, qua collustrati ea Vobis loquamur, quae et incolumenti et prosperitati Ecclesiae Dei maximo-pere sint profutura. Iamvero ex hac tamquam arce religionis intentibus Nobis errorum monstra, quae per catholicum orbem hac difficillima aetate grassantur, nihil opportunius visum est quam illa Vobis indicare, ut ad eadem debellanda vires exeratis vestras, Venerabiles Fratres, qui custodes praepositi estis, et speculatores domui Israel.

Existere etiam nunc dolendum est impium incredulorum genus, qui omnem, si fieri posset, exterminatum vellent religionis cultum, eisque adnumerandi in primis sunt clandestinarum societatum gregales, qui nefario inter se foedere coniuncti nullas non adhibent artes, ut quibusque violatis iuribus rem et sacram et publicam perturbent, evertant; in quos profecto verba illa cadunt divini Reparatoris: « Vos ex patre diabolo estis, et opera patris vestri vultis facere ». Hos si excipiamus, fatendum est praesentis aetatis homines generatim abhorrire ab incredulorum pravitate, et inclinationem quamdam animorum ostendere erga religionem et fidem. Sive enim facinorum ob atrocitatem, quae superiori praesertim saeculo perpetrata incredulis tribuenda sunt, quaeque animus meminisse reformidat, sive ob metum seditionum ac tumultuum, qui miserandum in modum convellunt, afflictant nationes et regna, sive denique divini spiritus opera, qui spirat ubi vult, imminutum esse patet perditorum numerum, qui incredulitate se iacent, et gloriantur; contra vero commendari audi-mus interdum vitae ac morum honestatem, excitatumque praeter-ea novimus in animis hominum admirationis sensum catholicam

erga religionem , quae quidem in omnium incurrit oculos tamquam lux solis.

Non exiguum hoc est bonum , Venerabiles Fratres , et quidam quasi ad veritatem progressus , sed tamen multa adhuc sunt , quae a veritate plane assequenda absterrent homines et remorantur.

Sunt enimvero plenique , qui rebus publicis tractandis praepositi fautores se religionis , et adsertores dicant , illam laudibus attollant , humanaeque societati quam maxime accommodatam , atque utilēm praedicent ; nihilominus eius moderari disciplinam volunt , sacros ministros regere , sacrorum procurationem altin gere , uno verbo civilis intra status limites coercere nituntur Ecclesiam , eique dominari , quae tamen sui iuris est , divinoque consilio nullius imperii terminis contineri debet , sed ad ultimas terras propagari , omnesque complecti gentes ac nationes , ut sempiternae illis beatitatis iter designet , expeditat . Et , proh dolor ! dum haec loquimur , Venerabiles Fratres , in Subalpina ditione proposita lex est , qua regularia et ecclesiastica instituta de medio tolluntur , et Ecclesiae iura plane conculcantur , atque , si fieri potest , delentur . Sed tamen de re tam gravi hoc ipso in loco alias agemus . Utinam vero qui libertati obsistunt catholicae religionis agnoscant aliquando quantopere publicae rei bono ipsa conducat , quae sua cuique civium observanda proponit , et inculcat officia ex caelesti , quam accepit , doctrina ; utinam persuadere sibi tandem velint quod olim Zenoni Imperatori scribebat Sanctus Felix Praecessor Noster : « Nihil esse utilius Principibus , « quam sinere Ecclesiam uti legibus suis , hoc enim illis esse sa- « lutare , ut cum de causis Dei agitur , regiam voluntatem Sa- « cerdotibus Christi studeant subdere , non praeferre » .

Sunt praeterea , Venerabiles Fratres , viri quidam eruditione praestantes , qui religionem munus esse fatentur longe praestantissimum a Deo hominibus datum , humanam nihilominus rationem tanto habent in prelio , tantopere extollunt , ut vel ipsi religioni aequiparandam stultissime putent . Hinc ex vana ipsorum opinione theologicae disciplinae perinde ac philosophicae tractan-

dae sunt ; cum tamen illae fidei dogmatibus innitantur , quibus nihil firmius , nihil stabilius , istae vero humana explicitentur atque illustrentur ratione , qua nihil incertius , ultiote quae varia est pro ingeniorum varietate , innumerisque fallaciis et praestigiis obnoxia . Ita quidem reiecta Ecclesiae auctoritate difficillimis quibusque , reconditisque quaestionibus latissimus patuit campus , ratioque humana infirmis suis confisa viribus licentius excurrens turpissimos in errores lapsa est , quos hic referre nec vacat nec lubet , quippe Vobis probe cognitos atque exploratos , qui in religionis et civilis rei detrimentum , illudque maximum redundarunt . Quamobrem istis hominibus , qui plus aequo vires efferunt humanae rationis , ostendere oportet , plane id esse contrarium verissimae illi sententiae Doctoris gentium : « Si quis putet se aliquid esse , cum nihil sit , ipse se seducit ». Demonstrandum illis est quantae sit arrogantiae pervestigare mysteria , quae revelare nobis dignatus est clementissimus Deus , eademque assequi , complectique audere humanae mentis imbecillitate et angustiis , cum longissime ea vires excedant nostri intellectus , qui ex Apostoli eiusdem dicto captivandus est in obsequium fidei .

Atque huiusmodi humanae rationis sectatores , seu cultores potius , qui eam sibi certam veluti magistram proponunt , eiusque ductu fausta sibi omnia pollicentur , obliti certe sunt quam grave et acerbum ex culpa primi parentis inflictum sit vulnus humanae naturae , quippe quod et obfusae tenebrae menti , et prona effecta ad malum voluntas . Hinc celeberrimi ex antiquissima aetate philosophi quamvis multa paeclare scripserint , doctrinas tamen suas gravissimis erroribus contaminarunt ; hinc assiduum illud certamen quod in nobis experimur , de quo loquitur Apostolus : « Sentio in membris meis legem repugnantem legi mentis meae ». Nunc quando ex originis labe in universos Adami posteros propagata extenuatum esse constet rationis lumen , et ex pristino iustitiae atque innocentiae statu miserrime deciderit humanum genus , ecquis satis esse rationem ducat ad assequendam veritatem ? Ecquis in tantis periculis , atque in tanta virium infirmitate ne labatur et corruat , necessaria sibi neget ad salutem religionis divi-

nae, et gratiae caelestis auxilia? quae quidem auxilia benignissime iis largitur Deus, qui humili prece eadem flagitent, cum scriptum sit: « Deus superbis resistit, humilibus autem dat gratiam ». Idcirco conversus olim ad Patrem Christus Dominus altissima veritatum arcana patefacta haud esse affirmavit prudentibus et sapientibus huius saeculi, qui ingenio doctrinaque sua superbiunt, et praestare negant obsequium fidei, sed vero humilibus ac simplicibus hominibus, qui fidei divinae oraculo nuntiuntur et conquiescent. Salutare hoc documentum eorum animis inculcatis oportet, qui humanae rationis vim usque adeo exaggerant, illius ut ope mysteria ipsa scrutari audeant atque explicare, quo nihil ineptius, nihil insanius. Revocare illos contendite a tanta mentis perversitate exponentes nimirum nihil esse praestabilius a providentia Dei concessum hominibus, quam fidei divinae auctoritatem, hanc nobis esse quasi facem in tenebris, hanc ducem quam sequamur ad vitam, hanc necessariam prorsus esse ad salutem, utpote quod « Sine fide impossibile est placere Deo, et qui non crediderit condemnabitur ».

Errorem alterum nec minus exitiosum aliquas catholici orbis partes occupasse non sine moerore novimus, animisque insedisse plerumque catholicorum, qui bene sperandum de aeterna illorum omnium salute putant, qui in vera Christi Ecclesia nequaquam versantur. Idcirco percontari saepenumero solent, quaenam futura post obitum sit eorum sors et conditio, qui catholicae fidei minime addicti sunt, vanissimisque adductis rationibus responsum praestolantur, quod pravae huic sententiae suffragetur. Absit, Venerabiles Fratres, ut misericordiae divinae, quae infinita est, terminos audeamus apponere; absit ut perscrutari velimus arcana consilia et iudicia Dei, quae sunt abyssus multa, nec humana queunt cogitatione penetrari. Quod vero Apostolici Nostri muneris est, Episcopalem vestram et sollicitudinem et vigilantiam excitatam volumus, ut, quantum potestis contendere, opinionem illam impiam aequa ac funestam ab hominum mente propulsetis, nimirum quavis in religione reperiri posse aeternae salutis viam. Ea qua praestalis solertia ac doctrina demonstretis commissis curae

vestrae populis miserationi ac iustitiae divinae dogmata catholicae fidei neutiquam adversari. Tenendum quippe ex fide est extra Apostolicam Romanam Ecclesiam salvum fieri neminem posse, hanc esse unicam salutis arcam, hanc qui non fuerit ingressus, diluvio peritum; sed tamen pro certo pariter habendum est, qui verae religionis ignorantia laborent, si ea sit invincibilis, nulla ipsos obstringi huiusce rei culpa ante oculos Domini. Nunc vero quis tantum sibi arroget, ut huiusmodi ignorantiae designare limites queat iuxta populorum, regionum, ingeniorum, aliarumque rerum tam multarum rationem et varietatem? *Enimvero cum soluti corporeis hisce vinculis videbimus Dèum sicuti est, intelligemus profecto quam arcto pulcroque nexu miseratio ac iustitia divina copulentur;* quamdiu vero in terris versamur mortali hac gravati mole quae hebetat animam, firmissime teneamus ex catholicâ doctrina unum Deum esse, unam fidem, unum baptisma; ulterius inquirendo progredi nefas est. Ceterum prout caritatis ratio postulat assiduas fundamus preces, ut omnes quaquaversus gentes ad Christum convertantur, communique hominum saluti pro viribus inserviamus, neque enim abbreviata est manus Domini, gratiaeque caelestis dona nequaquam illis defutura sunt, qui hac luce recreari sincero animo velint et postulent. Huiusmodi veritates desigendae altissime sunt fidelium mentibus, ne falsis corrumpi queant doctrinis eo spectantibus, ut religionis foveant indifferentiam, quam ad exitium animarum serpere latius videmus ac roborari.

Praecipuos contra errores hactenus expositos, quibus maxime hoc tempore oppugnatur Ecclesia, vestram opponite, Venerabiles Fratres, et virtutem et constantiam, ad eosque profligandos, planeque delendos habeatis Ecclesiasticos viros necesse est laboris socios et adiutores. Immortaliter quidem gaudemus catholicum Clerum nihil praetermittere, nihil molestiarum defugere, ut officio suo, ac muneri cumulate satisfaciat; atque adeo non asperitate et longitudine itineris, non ullo incommodorum metu retardari quominus regiones pertingat terrarum marisque tractu disiunctissimas, ut efferatas ibi gentes ad humanitatem, et chri-

stianae legis disciplinam salubriter instituat ; gaudemus pariter, Clerum ipsum in tetricae luis calamitate, quae tot oppida , tot frequentissimas urbes funestavit , adeo alacriter obivisse quaelibet caritatis officia , ut vitam profundere ad salutem proximorum pulcrum sibi ac decorum existimaverit. Quo sane arguento magis constabit , catholica in Ecclesia , quae unice vera est , inextinctum ardere pulcherrimum caritatis ignem , quem Christus venit mittere in terram ut accendatur. Vidimus enim religiosas mulieres in adiuvandis aegris cum Clero certasse , neque mortis adspectu fuisse deterritas , quam pleraque constantissime oppetiverunt : cuius inusitatae fortitudinis exemplo illi ipsi obstupefacti admiratione sunt , qui a catholica fide dissentiunt.

Est hoc Nobis iure laetandum , Venerabiles Fratres , verumtamen illud ad animi Nostri curam grave et acerbum , quibusdam in locis non deesse ex Clero aliquos , qui non semet exhibeant in omnibus ut ministros Christi , et dispensatores mysteriorum Dei. Hinc deest christiano populo divini verbi pabulum , unde nutriatur ad vitam , hinc infrequens sacramentorum usus , quibus tanta vis inest ad Dei gratiam vel conciliandam vel retinendam. Monendi hi quidem sunt , Venerabiles Fratres , ac vehementius excitandi , ut sacri ministerii partes recte ac fideliter explendas curent ; docendi sunt quam gravi se culpa obstringant , qui messis multa cum sit laborare detrectent in agro Domini. Hortandi sunt , ut quanta sit divinae hostiae virtus ad propitiandum Deum , et flagitorum poenas avertendas frequenter explicit fidelibus , ut iidem salutari Missae sacrificio religiose adesse , uberesque ex illo fructus percipere studeant. Sane quidem promptiores alicubi fideles essent ad pietatis actus exercendos , si vehementiora haberent a Clero et incitamenta et praesidia. Videtis hinc , Venerabiles Fratres , ad comparandos idoneos ministros Christi quanta sit Seminariorum necessitas et opportunitas ; in quibus moderandis non civilis potestatis , sed Episcoporum dumtaxat versari debet cura et industria. Collectos ibi iuvenes in spem religionis succrescentes ad pietatem doctrinamque sedulo informetis , ut dupli quasi instructi gladio boni olim milites esse queant ad

praelienda praelia Domini. Tum in theologicis, tum vero in philosophicis etiam disciplinis probatae fidei scriptores eisdem proponatis, ne qua imbuantur opinione catholicae doctrinae minus consentanea.

Ita quidem Ecclesiae bono et incremento consultum per Vos erit, Venerabiles Fratres. Quo vero susceptae pro Ecclesiae curae secundissimos habeant exitus, summa extet concordia opus est consensusque animorum, longeque dissidia quaelibet prohibeantur, quae solvunt caritatis vinculum, quaeque fovere solet vaserrimus nostri generis inimicus ulti pote sibi ad nocendum opportunissima. Repetendum memoria est veteres illos catholicae fidei propugnatores de pertinacissimis haeresibus retulisse victoriā, quum scilicet una secum, et cum Apostolica Sede tamquam cum duce suo coniuncti milites firmo animo erectoque in certamen descendissent.

Haec sunt, quae significanda Vobis duximus, Venerabiles Fratres, in hac cura et sollicitudine satis Apostolico ministerio faciendo, quod divina clementia et bonitate impositum est infirmitati Nostrae. Erigimur primum, ac recreamur spe caelestis auxilii, deinde ab explorato vestro religionis ac pietatis studio non mediocre Nobis pollicemur in tantis rerum difficultatibus adiumentum. Aderit Ecclesiae suae Deus, aderit communibus votis Nostris, aderit praesertim si oratrix pro nobis accedat Virgo Sanctissima Dei parens Maria, cuius immunitatem ab originalis noxae macula Vobis magno cum Nostro gaudio adstantibus et plaudentibus divino adiuvante Spiritu pronunciavimus. Eximum sane privilegium, quod Dei Matrem plane decebat, in communi nostri generis exitio sospitem atque incolumen evasisse. Atque huius privilegii amplitudo plurimum quidem valitura est ad eos refellendos, qui deteriorem factam esse inficiantur ex primaeva culpa hominum naturam, viresque amplificant rationis ad negandum vel minuendum revelatae religionis beneficium. Faxit tandem Virgo Beatisima, quae interemit ac perdidit universas haereses, ut hic etiam evellatur stirpitus, ac deleatur rationalismi error perniciosissimus,

qui hac miserrima aetate non civilem modo societatem , sed vero etiam tantopere affligit et vexat Ecclesiam.

Reliquum nunc est , Venerabiles Fratres , ut quanto animi Nostri solatio summa Vos alacritate ex dissitis etiam terris prope-rasse conspeximus ad Apostolicam hanc Sedem propugnaculum fidei, magistram veritatis, catholicae unitatis firmamentum, tanto perinde amoris studio anteaquam sedes repetatis vestras omnia Vobis precemur fausta, felicia ac salutaria. Arbiter ille omnium rerum et bonorum auctor Deus det Vobis spiritum sapientiae et intellectus , ut prohibeatis ab ovium pernicie ubique latentes insidias , ac quidquid ad commoditatem vestrarum Ecclesiarum vel suscepistis iam, vel eritis suscepturi , id praepotenti numine suo bonus propitiusque confirmet ; permissis autem Vestrae curae fidelibus det illam mentem, ut abstrahere se nunquam velint a pastoris latere, sed vocem ipsius audiant, quoque ipse velit, accur-rant. Adsit Vobis Virgo Sanctissima ab origine Immaculata ; sit ipsa Vobis in dubiis rebus fidele consilium, in angustiis levamen, in adversis auxilium. Ad extremum levantes manus Nostras in caelum Vobis gregique vestro ex intimo cordis affectu benedici-mus. Sit porro Apostolicae huius benedictionis munus tamquam pignus certissimum caritatis erga Vos Nostrae , sit exploratissi-mum tamquam omen beatissimae vitae ac sempiternae , quam Vobis gregique vestro et optamus et poscimus a Supremo anima-rum pastore Christo Iesu, cui cum Patre et Sancto Spiritu sit et honor et laus et gratiarum actio per omnem aeternitatem.

ALLOCUTIO

HABITA IN CONSISTORIO SECRETO DIE XXII JANUARII
ANNI MDCCCLV.

VENERABILES FRATRES

Probe memineritis ¹, Venerabiles Fratres, quanto animi Nostri moerere ex hoc ipso loco Vobiscum saepe lamentati fuerimus maxima sane damna, quibus plures abhinc annos catholica Ecclesia in Subalpino Regno miserandum in modum affigitur, ac divexatur. Nullam certe quidem sollicitudinis, studii, et longanimitatis partem praetermisimus, ut pro Apostolici Nostri ministerii officio tot malis mederi possemus summopere optantes aliquid tandem Vobis nuntiare, quod Nostrum, Vestrumque dolorem aliqua saltem ex parte leniret. Irritae tamen fuere Nostrae omnes sollicitudines, nihilque valuerunt tum iteratae expostulationes per Nostrum Cardinalem a publicis negotiis, tum curae per alium Cardinalem Nostrum Plenipotentiarium adhibitae, tum familiares Nostrae Epistolae ad carissimum in Christo Filium Nostrum Sardiniae Regem Illustrem datae. Namque omnes norunt plurima facta, atque decreta, quibus illud Gubernium cum summo bonorum omnium luctu et indignatione, solemnes cum hac Apostolica Sede initas Conventiones plane contemnens, non dubitavit quotidie magis et Sacros Ministros, et Episcopos, Religiosasque Familias exagitare, et Ecclesiae immunitatem, libertatem, eiusque veneranda iura laedere, violare, ac bona usurpare, et gravissimas eidem

¹ Huc refertur Syllabi Propositio 53.

Ecclesiae ac Supremae Nostrae, et huius Sanctae Sedis auctoritatē iniurias inferre, eamque plane despicere. Nuper vero, ut scitis, alia in medio posita lex est vel ipsi naturali, divino, et sociali iuri omnino repugnans, et humanae societatis bono vel maxime adversa, ac perniciosissimis funestissimisque *Socialismi* et *Communismi* erroribus plane favens, qua inter alia proponitur, ut omnes fere Monasticae, Religiosaeque utriusque sexus Familiae, et Collegiatae Ecclesiae, ac Beneficia simplicia etiam iuris patronatus penitus exstinguantur, utque illorum bona, et redditus civilis potestatis administrationi et arbitrio subiificantur, et vindicentur. Insuper eadem proposita lege attribuitur laicae potestati auctoritas praescribendi conditiones, quibus reliquae Religiosae Familiae, quae de medio minime fuerint sublatae, subiacere debeant.

Evidem Nobis verba desunt ad explicandam amaritudinem, qua intime conficimur, cum videamus tot vix credibilia, planeque tetrica fuisse patrata, atque in dies patrari contra Ecclesiam, eiusque veneranda iura, contra supremam et inviolabilem huius Sanctae Sedis auctoritatem in illo Regno, ubi quamplurimi egregii existunt catholici, et ubi Regum praesertim pietas, religio, atque in hanc Beati Petri Cathedram, eiusque Successores observantia in exemplum olim vigebant, atque florebant. Cum autem res eo fuerint deductae, ut satis non sit illata Ecclesiae damna deploare, nisi curam omnem et operam ad illa tollenda adhibeamus, siccirco muneris Nostrri partes implentes, in hoc amplissimo Vestro consessu Nostram iterum vocem apostolica libertate attollimus, ac non solum omnia et singula decreta ab illo Gubernio in Religionis, Ecclesiae, et huius Sanctae Sedis iurium, et auctoritatis detrimentum iam prolata, verum etiam legem recens propositam reprobamus, et damnamus, illaque omnia irrita prorsus ac nulla declaramus. Praeterea tum eos omnes, quorum nomine, opera et iussu ipsa decreta iam edita sunt, tum illos, qui legi nuper propositae quovis modo favere, vel illam probare, aut sancire non formidaverint, gravissime monemus, ut etiam atque etiam animo menteque reputent poenas, et censuras, quae ab Apostolicis Constitutionibus, sacrorumque Conciliorum Canonibus maxime Tri-

dentini 1 adversus rerum sacrarum praedatores, et profanatores, ecclesiasticae potestatis, ac libertatis violatores, et Ecclesiae, Sanctaeque Sedis iurium usurpatores constitutae sunt. Utinam tantorum malorum auctores Nostris hisce vocibus, monitisque permoti atque excitati tandem aliquando cessent a tot ausibus contra ecclesiasticam immunitatem, et libertatem, ac properent reparare innumera damna Ecclesiae illata, atque ita paterno Nostro animo durissima avertatur necessitas animadvertisendi in ipsos illis armis, quae sacro Nostro ministerio divinitus fuere attributa !

Ut autem catholicus orbis perspiciat curas a Nobis pro Ecclesiae causa in Subalpino Regno tuenda susceptas, ac simul cognoscat agendi rationem, quae ab illo Gubernio adhibita fuit, peculiarem rerum expositionem typis edi, et cuique Vestrum tradi iussimus.

Antequam vero loquendi finem faciamus, haud possumus, quin summis meritisque laudibus efferamus Venerabiles Fratres eiusdem Subalpini Regni Archiepiscopos et Episcopos, qui propriae dignitatis et officii memores, Nostrisque volis quam cumulatissime respondentes, nunquam destiterunt singulari virtute et constantia qua voce, qua scriptis opponere murum pro Domo Israel, ac Dei, eiusque sanctae Ecclesiae causam strenue propugnare. Atque hic gratulamur quoque ex animo tot spectatissimis laicis Viris, qui in illo Regno morantes, et catholicis sensibus egregie animati, ac Nobis et huic Apostolicae Sedi firmiter adhaerentes, gloria sunt sacra Ecclesiae iura tum voce, tum scriptis palam publiceque defendere.

Interim a Vobis, Venerabiles Fratres, qui in partem sollicitudinis Nostrae vocati estis, exposcimus, ut una Nobiscum, potentissimo Immaculatae Virginis Mariae patrocinio suffulti, assiduas fervidasque preces Deo adhibere nunquam desinatis, ut caelesti sua ope Nostris curis et conatibus adesse, atque omnipotenti sua virtute Ecclesiae suae sanctae causam tueri, et errantes ad veritatis et iustitiae semitam reducere velit.

ALLOCUTIO

HABITA IN CONSISTORIO SECRETO DIE XXVI IULII
ANNI MDCCCLV.

VENERABILES FRATRES

Cum saepe ¹ in hoc Vestro consessu, veluti optime nostis, Venerabiles Fratres, non sine maximo animi Nostri dolore afflictas in Subalpino Regno sanctissimae religionis res lamentati simus, tum praesertim in Allocutione die vigesimo secundo Ianuarii huius anni ad Vos habita, typisque edita denuo conquesti sumus acerbissima sane vulnera, quae plures ab hinc annos Subalpinum Gubernium catholicae Ecclesiae, eiusque potestati, iuribus, sacrisque Ministris, Episcopis, ac supremae Nostrae et huius Sanctae Sedis potestali et dignitati in dies imponere non desinit. Qua quidem Allocutione Apostolicam nostram iterum extollentes vocem reprobavimus, damnavimus, et irrita prorsus ac nulla declaravimus tum omnia et singula decreta ab eodem Gubernio in Religionis, Ecclesiae, et huius Sanctae Sedis iurium detrimentum edita, tum iniustissimam, funestissimamque legem tunc in medio positam, qua inter alia proponebatur, omnes fere Monasticas ac Religiosas utriusque sexus Familias, et Collegiales Ecclesias, ac simplicia Beneficia iuris quoque patronatus penitus esse extinguenda, illorumque reditus et bona civilis potestatis administrationi et arbitrio subiicienda. Neque omisimus tantorum malorum auctores, fautoresque eademque Allocutione monere, ut eliam atque etiam animo reputarent censuras, poenasque spirituales,

¹ Huc refertur Syllabi Propositio 53.

quas Apostolicae Constitutiones , et Oecumenicorum Conciliorum decreta contra iurum, bonorumque Ecclesiae invasores facto ipso incurendas infligunt. Ea porro spe sustentabamur fore , ut ipsi, qui catholico nomine gloriantur, et in eo morantur Regno, in quo vel ipsum Statulum decernit, catholicam religionem esse debere solam ipsius Regni religionem, ac simul praescribit, omnes proprietates sine ulla exceptione inviolabiles esse tuendas , tandem aliquando iustissimis Venerabilium Fratrum ipsius Regni praestantium Antistitum expostulationibus , ac Nostris iteratis reclamacionibus , querelis , paternisque monitis commoti suas mentes , voluntatesque ad saniora consilia revocarent, atque a divexanda Ecclesia desisterent. Quam spem ostendebant nonnulla potissimum promissa iisdem Episcopis facta, quibus fidem haberi posse arbitrabamur.

At dolentes dicimus , non solum Subalpinum Gubernium nec suorum Episcoporum postulationibus , nec Nostris vocibus auditum praebuit, verum etiam graviores semper Ecclesiae ac Nostrae et huius Apostolicae Sedis auctoritati inferens iniurias , ac plures Nostras protestationes et paterna etiam monita plane contemnens haud reformidavit commemoratam quoque legem, verbis licet, et specie quadam immutatam, sed re tamen, fine ac spiritu prorsus eamdem approbare , sancire , et promulgare. Evidem gravissimum , molestissimumque Nobis est, Venerabiles Fratres, debere ab ea mansuetudine ac lenitate , quam a natura ipsa hau simus, expressimus , atque ab aeterno Pastorum Principe didicimus, et quam iccirco constanti voluntate semper libentissime exercuimus , deflectere , ac severitatis partes , a quibus paternus Noster animus vel maxime abhorret, suscipere. Attamen cum videamus, omnem curam, sollicitudinem, longanimitatem et patientiam pro reparandis illic Ecclesiae ruinis a Nobis sex et amplius ab hinc annos adhibitam nihil valuisse, nullamque affulgere spem fore , ut tantorum ausuum auctores velint hortationibus dociles praebere aures , quandoquidem ipsi Nostris monitis omnino despectis non cessant iniurias iniuriis cumulare, et omnia conari, ut in Subalpino Regno Ecclesiam, eiusque potestatem, iura, liberta-

tem opprimant, ac funditus evertant, cogimur in illos ecclesiastica severitate uti, ne officio Nostro deesse, et Ecclesiae causam deserere videamur. Atque hac agendi ratione, veluti probe scitis, illustribus inhaeremus exemplis tot Romanorum Pontificum Decessorum Nostrorum, qui sanctitate ac doctrina insignes non dubitarunt degeneres, contumacesque Ecclesiae filios, eiusque iurium pertinaces violatores et usurpatores iis poenis plectere, quae a Sacris Canonibus contra eiusmodi criminum reos sunt constitutae.

Quamobrem in hoc amplissimo Vestro conventu Apostolicam nostram iterum efferimus vocem, ac iam enunciatam legem, quam alia omnia et singula facta et decreta a Subalpino Gubernio in Religionis, Ecclesiae, ac Nostrae et huius Sanctae Sedis auctoritalis et iurium detrimentum edita, de quibus tum in Nostra Allocutione die vigesimo secundo Ianuarii vertentis anni habita, tum in hac praesenti dolenter loquuli sumus, denuo reprobamus, condemnamus, ac nulla prorsus et irrita decernimus. Praeterea cum incredibili animi Nostri moerore cogimur declarare, eos omnes, qui in Subalpino Regno praedicta decreta et legem contra Ecclesiae et huius Sanctae Sedis iura proponere, probare, sancire non extimuerunt, nec non illorum mandantes, fautores, consultores, adhaerentes, exsecutores maiorem excommunicationem, aliasque censuras et poenas ecclesiasticas a Sacris Canonibus, Apostolicis Constitutionibus, et generalium Conciliorum, Tridentini 1 praesertim, decretis inflictas incurrisse. Etsi vero inevitabili munieris Nostri implendi necessitate compulsi Apostolicam adhibeamus severitatem, tamen probe noscimus, atque meminimus, Illius vicariam hic in terris Nos, licet immeritos, gerere operam, qui cum iratus fuerit misericordiae recordatur. Quocirca levantes oculos Nostros ad Dominum Deum nostrum, ab Ipso humiliter enixeque exposcere non desistimus, ut degeneres Ecclesiae suae sanctae filios cuiusque ordinis, gradus, et conditionis tum laicos, tum Clericos sacro etiam charactere insignitos,

quorum errata nunquam satis lugeri possunt, caelestis suae gratiae lumine illustrare, illosque ad saniorem mentem reducere velit, cum nihil cordi Nostro gratius, nihil optabilius, nihil iucundius esse possit, quam ut errantes resipiscant, ac redeant ad cor. Neque omittimus in omni oratione et obsecratione cum gratiarum actione ipsum divitem in misericordia Deum exorare, ut uberrimis quibusque divinae suae gratiae donis omnes Venerabiles Fratres Subalpini Regni Archiepiscopos et Episcopos in tot angustiis ac tribulationibus constitutos adiuvare et consolari nunquam desinat, quo ipsi, veluti adhuc tanta cum sui nominis laude egerunt, pergent egregia sua episcopali virtute, constantia, et prudentia Religionis et Ecclesiae causam strenue defendere, ac proprii gregis saluti et incolumenti studiosissime advigilare. Atque humillimas quoque, fervidasque clementissimo miserationum Domino sine intermissione offerimus preces, ut caelesti sua ope confortare dignetur non modo fidelem illius Regni Clerum, qui maxima ex parte suorum Antislitum exempla sequens proprio munere praeclare fungitur, verum etiam tot spectatissimos ipsius Regni laicos viros, qui catholicis sensibus egregie animati, ac Nobis, et huic Petri Cathedrae ex animo addicti eorum operam in Ecclesiae iuribus tuendis impendere vehementer gloriantur.

ALLOCUTIO

HABITA IN CONSISTORIO SECRETO DIE XXVI IULII
ANNI MDCCCLV.

VENERABILES FRATRES

Nemo vestrum ¹ ignorat, Venerabiles Fratres, qualuor nondum elapsos esse annos, ex quo nullis neque curis, neque consiliis, neque laboribus Nobis parcendum esse duximus, ut ecclesiasticis in Hispania negotiis consuleremus. Notissima Vobis est Conventio a Nobis cum carissima in Christo Filia Nostra Maria Elisabeth Hispaniarum Regina Catholica anno millesimo octingentesimo quinquagesimo primo inita, ac veluti lex Status eo in Regno sancita, et sollemniter promulgata. Neque Vos latet quomodo in eadem Conventione inter plurima, quae statuta fuerunt ad catholicae religionis rationes tuendas, cautum in primis fuerit, ut ipsa augusta religio, quocumque alio cultu excluso, pergens esse sola religio hispanicae Nationis, esset ut antea in universo Hispaniarum Regno conservanda cum omnibus iuribus et praerogativis, quibus potiri debet iuxta Dei legem et Canonicas Sanctiones; ut institutio in omnibus quibusque publicis, privatisque scholis foret omnino conformis catholicae doctrinae; ut sacerorum praesertim Antistites in episcopali munere obeundo, et in iis, quae ad ius et exercilium ecclesiasticae auctoritatis, sacraeque Ordinationis pertinent, plena illa uterentur libertate, quam Sacri Canones statuunt; ut Ecclesia nativo suo iure libere omnino polleret, acquirendi scilicet legitimo quovis titulo novas pos-

¹ Huc refertur Syllabi Propositio 77.

sessiones , et inviolabilis esset eiusmodi Ecclesiae proprietas in omnibus, quae tunc possidebat, vel in posterum acquireret. Hinc ea profecto nitebamur fiducia fore , ut Pontificiae Nostrae curae et sollicitudines optatum assequerentur exitum , et catholica Ecclesia iuxta Nostra desideria in Hispania prospere feliciterque denuo magis in dies vigeret , atque floresceret , cum praesertim omnis illa inclyta Natio catholicam religionem profiteri , et huic Petri Cathedrae firmiter adhaerere vehementer glorietur.

Verum cum summa animi Nostri admiratione et amaritudine vidimus , quod nunquam fore putavissemus, eo in Regno commemoratam Nostram Conventionem , ipsa hispanensi Natione nedum invita , sed etiam summopere moerente et reclamante , impune frangi ac violari, novasque Ecclesiae, eiusque iuribus, Episcopis , ac supremae Nostrae , Sanctaeque huius Sedis potestati iniurias inferri , quas apud Vos condolere compellimur , Venerabiles Fratres. Etenim latae fuerunt leges , quibus primus et secundus ipsius Conventionis articulus non absque levi religionis detrimento invertitur , itemque praecipitur Ecclesia bona esse vendenda. Accedit etiam ut varia edita fuerint decreta , quibus interdicitur Episcopis sacros Ordines conferre , et Virgines Deo sacrae prohibentur in tirocinium proprii religiosi instituti alias mulieres admittere , et statuitur Cappellanias laicales , aliasque pias institutiones in saecularem plane statum esse redigendas. Ubi primum novimus tam graves religioni , Ecclesiae , Nobis et huic Sanctae Sedi parari iniurias, Nostro fungentes munere nulla interposita mora haud praetermisimus tum per Nostrum Cardinalem Secretarium Status , tum per Nostrum negotiorum Gestorem Matriti morantem contra omnes huiusmodi ausus apud Matritense Gubernium vehementer protestari et reclamare. Atque eidem Gubernio significandum quoque duximus, Nostras reclamationes ad fidelium notitiam esse deducendas , nisi proposita lex de bonis Ecclesiae alienandis reiiceretur , ut fideles ipsi ab illis emendis se abstinerent. Illud etiam ad Matritensis Gubernii memoriam revocavimus, veluti in Apostolicis nostris de eadem Conventione Litteris clare aperteque ediximus , quod cum pacta in

eadem Conventione sancita tam graviter violarentur et frangerentur, non amplius locum haberet indulgentia a Nobis ob ipsius Conventionis rationem adhibita, qua declaravimus, nullam a Nobis, ac Romanis Pontificibus Successoribus Nostris molestiam eos esse habituros, qui Ecclesiae bona ante eamdem Nostram Conventionem alienata acquisiverant.

Sed non solum irritae fuerunt iustissimae Nostrae reclamations, ac praestantium Hispaniae Sacrorum Antistitum expostulationes, verum etiam nonnulli ex spectatissimis illis Episcopis, qui merito atque optimo iure commemoratis legibus ac decretis obstiterant, a propriis Dioecesibus violenter avulsi fuerunt, et alio amandati ac relegati. Probe intelligitis, Venerabiles Fratres, quo conficiamur moerore, cum conspiciamus tot curas ac sollicitudines pro ecclesiasticis in illo Regno instaurandis negotiis frustra a Nobis fuisse susceptas, atque ibi denuo Christi Ecclesiam gravissimis affligi calamitatibus, eiusque libertatem et iura, ac Nostram et huius Sanctae Sedis auctoritatem conculcari. Itaque haud passi sumus, Nostrum negotiorum Gestorem longius ibi morari, illique mandavimus, ut ab Hispania decederet, et in hanc Urbem rediret. Vehementer quidem dolemus, propterea quod illustrem hispanam Nationem Nobis ob eximum eius in rem catholicam studium, et egregia in Ecclesiam, ac Nos, et hanc Apostolicam Sedem merita summopere dilectam, ex hac nova sacrarum rerum perturbatione in religionis periculum iterum adductam esse perspicimus. Cum autem Apostolici Nostri ministerii officium omnino postulet, ut Ecclesiae causam Nobis divinitus commissam totis viribus propugnemus, tum haud possumus, quin palam publiceque ac sollemniori modo Nostras querelas et expostulationes proferamus.

Quapropter in hoc vestro consessu nostram attollentes vocem etiam atque etiam de iis omnibus expostulamus, quae in Hispania a laica potestate perperam gesta sunt et geruntur adversus Ecclesiam, eiusque libertatem, iura, et adversus Nostram, atque huius Sanctae Sedis auctoritatem, ac praesertim maiorem in modum lamentamur, sollemnem nostram Conventionem vel ipso

gentium iure reclamante violatam, et propriam Episcoporum auctoritatem in sacri ministerii exercitio praepeditam, et violentiam contra ipsos Episcopos adhibitam, et Ecclesiae patrimonium contra omnia divina et humana iura usurpatum. Insuper commemoratas leges et decreta auctoritate Nostra Apostolica reprobamus, abrogamus, illaque prorsus irrita, ac nullius roboris fuisse et fore declaramus. Summa autem qua possumus contentione tantorum ausorum auctores monemus, hortamur et obsecramus, ut serio considerent, Dei manum eos omnes effugere non posse, qui Ecclesiam suam sanctam affligere et vexare non reformidant.

Nunc Nobis temperare non possumus, quin vel maxime gratulemur, et amplissimas meritasque laudes deferamus Venerabilibus Fratribus Hispaniae Archiepiscopis et Episcopis, qui proprium obeuentes munus, nulloque periculo deterriti coniunctis animis, studiis, consiliis episcopalem vocem efferre, et Ecclesiae causam strenue constanterque defendere non omiserunt. Praecipuas quoque laudes tribuamus oportet hispaniensi fideli Clero, qui propriae vocationis et officii memor sua omnia studia in id conferre non praetermisit. Debito etiam laudum praeconio prosequimur tot egregios laicos hispanos viros, qui singulari erga sanctissimam religionem, Ecclesiam, et erga Nos atque hanc Sanctam Sedem pietate et obsequio spectali, tum voce tum scriptis ipsius Ecclesiae iura defendere summopere sunt gloriati. Atque Apostolicae Nostrae caritatis affectu deplorandam sane miserantes conditionem, in qua illustris illa, Nobisque carissima Natio, eiusque Regina in praesentia versantur, enixis precibus Deo Optimo Maximo supplicamus, ut ipsam Nationem et Reginam omnipotenti sua virtute tueri, consolari, et a tantis angustiis eripere velit.

Iam vero noscatis velimus, Venerabiles Fratres, incredibili Nos angi aegritudine ob lucluosissimum sane statum, ad quem redacta est sanctissima nostra religio in Helvetia, ac praesertim, proh dolor! in quibusdam potioribus catholicis earum foederatarum regionum pagis. Namque ibi et catholicae Ecclesiae potestas, atque libertas oppressa, et Episcoporum, sanctaeque huius

Sedis proculcata auctoritas , et matrimonii ac iurisiurandi sanctitas violata et spreta , et Clericorum Seminaria , ac Religiosarum Familiarum Coenobia vel penitus extincta , vel civilis potestatis arbitrio omnino subiecta , et beneficiorum collatio alque ecclesiastica bona usurpata , et catholicus Clerus miserandum in modum exagitatus ac divexus. Haec sane tristissima , ac nunquam satis lugenda , et omnino improbanda Vobis hodierno die raptim significamus , quandoquidem consilium Nobis est in hoc vestro confessu alium super eiusmodi acerbissimo argumento habere sermonem.

Interim ne intermittamus unquam , Venerabiles Fratres , assiduis fervidisque precibus clementissimum misericordiarum Patrem et Deum totius consolationis dies noctesque orare et obsecrare , ut Ecclesiam suam sanctam tot undequaque calamitatibus pressam , tot undique procellis iactatam in potentia brachii sui adiuvet , defendat , eamque ab omnibus , quibus affligitur , adversitatibus eripiat.

EPISTOLA ENCYCLICA

**DILECTIS FILIIS NOSTRIS S. R. E. CARDINALIBUS,
 AC VENERABILIBUS FRATRIBUS ARCHIEPISCOPIS ET EPISCOPIS
 UNIVERSAE IMPERIALIS AC REGIAE AUSTRIACAE DITIONIS.**

PIVS PP. IX.

Dilecti Filii Nostri, et Venerabiles Fratres, Salutem et Apostolicam Benedictionem. Singulari quidem ¹ animi Nostri gaudio cognoscimus, Vos, Dilecti Filii Nostri, ac Venerabiles Fratres, Nostris, et carissimi in Christo Filii Nostri Francisci Iosephi Austriae Imperatoris, et Regis Apostolici desideriis cuique Vestrum uno fere eodemque tempore significalis quam libentissime obsequentes, pro egregia vestra religione, et pastorali sollicitudine statuisse convenire in istam Imperialem et Regiam Vindobonensem civitatem, quo ibi inter Vos colloqui, et consilia conferre posselis, ut rite ea omnia perficiantur, quae a Nobis cum eodem carissimo in Christo Filio Nostro sancita sunt in Conventione, quam idem clarissimus et religiosissimus Princeps cum summa Nostra consolatione, et immortali sui nominis gloria ob Ecclesiae iura vindicata, bonis omnibus p^raet laetitia gestientibus, ineundam Nobiscum curavit. Itaque dum Vobis, Dilecti Filii Nostri, et Venerabiles Fratres, vel maxime gratulamur, quod in hoc habendo conventu insigne ac perspectum vestrum pro Ecclesia studium impense ostenditis, Nobis temperare non possumus, quin Vos hac occasione peramanter alloquamur et intimos Vobis animi Nostri sensus aperiamus, ex quibus maiorem in modum intelligetis, quanta Vos, et

omnes amplissimi istius Imperii fideles populos curae vestrae commissos benevolentia prosequamur. Atque in primis quod attinet in commemoratae Conventionis exsecutionem, cum optime noscatis, multos in illa esse articulos, qui a Vobis praecipue sunt exsequendi, tum vehementer optamus, ut quoad modum in eorumdem articulorum exsecutione unam eamdemque certam viam atque rationem habere velitis, ea tamen circumspectione sedulo prudenterque adhibita, quam varia diversarum latissimi Austriaci Imperii Provinciarum adiuncta postulare poterunt. Si quae autem de alicuius articuli sensu dubitatio, vel difficultas oriatur, quod non fore arbitramur, gratissimum Nobis erit, illam a Vobis ad Nos deferri, ut, collatis inter Nos et Caesaream Apostolicam Maiestatem consiliis, veluti in tricesimoquinto eiusdem Conventionis articulo cautum est, oportunas declarationes dare possimus.

Iam vero ardentissima illa caritas, qua universum Dominicum gregem Nobis ab ipso Christo Domino divinitus commissum complectimur, et gravissimum Apostolici Nostri ministerii munus, quo omnium nationum, et populorum salutem totis viribus procurare debemus, urgent Nos, Dilecti Filii Nostri, ac Venerabiles Fratres, ut eximiam vestram pietatem, virtutem, et episcopalem vigiliam maiore, qua possumus, contentione etiam atque etiam excitemus, ut alacriori usque zelo pergatis omnes episcopalis vestri muneris partes diligentissime implere, ac nullis neque curis, neque consiliis, neque laboribus unquam parcere, quibus sanctissimae fidei nostrae depositum in vestris Dioecesibus integrum inviolatumque custodiatis, et vestri gregis incolumenti consulentes, illum ab omnibus defendatis inimicorum hominum fraudibus et insidiis. Namque probe noscitis nefarias, multiplicesque artes ac molitiones, et monstrosa omnis generis opinionum portenta, quibus callidissimi perversorum dogmatum architecti improvidos praesertim et imperitos a veritatis et iustitiae tramite avertere, atque in errorem exitiumque inducere connituntur. Neque ignorantis, Dilecti Filii Nostri, ac Venerabiles Fratres, inter plurima, et nunquam satis lugenda mala, quae ecclesiasticam et civilem societatem vel maxime perturbant, atque divexant, duo potissimum

nunc eminere, quae aliorum omnium quaedam veluti origo non immerito videantur. Vobis enim apprime nota sunt innumera, et funeslissima sane damna, quae in christianam, et civilem rempublicam ex putidissimo *indifferentismi* errore redundant. Hinc enim omnia erga Deum, in quo vivimus, movemur, et sumus, officia penitus neglecta, hinc sanctissima religio plane posthabita, hinc omnis iuris, iustitiae, virtutisque fundamenta concussa, ac proprium eversa. A qua turpissima sane *indifferentismi* forma haud admodum distat illud de religionum *indifferentia* sistema e tenebris eruptum, quo homines a veritate alienati, veraeque confessionis adversarii, suaequa salutis immemores, et inter se pugnantia docentes, et nunquam stabilitam sententiam habentes, nullum inter diversas fidei professiones discrimen admittunt, et pacem passim cum omnibus miscent, omnibusque aeternae vitae portum ex qualibet religione patere contendunt. Nihil enim interest illis, licet diversa tractantibus, dum ad unius veritatis expugnationem conspirent 1. Videtis profecto, Dilecti Filii Nostri, ac Venerabiles Fratres, qua vigilantia Vobis sit excubandum, ne tam dirae contagia pestis vestras oves misere inficiant, ac perdant. Itaque ne desinatis populos Vobis traditos ab hisce perniciosissimis erroribus sedulo defendere, eosque catholicae veritatis doctrina magis in dies accurate imbuere, et illos docere, quod sicut unus est Deus Pater, unus Christus Eius, unus Spiritus Sanctus, ita una est divinitus revelata veritas, una divina fides humanae salutis initium, omnisque iustificationis fundamentum, qua iustus vivit, et sine qua impossibile est placere Deo, et ad filiorum eius consortium pervenire 2; et una est vera, sancta, catholica, Apostolica, Romana Ecclesia, et Cathedra una super Petrum Domini voce fundata 3, extra quam nec vera fides, nec aeterna invenitur salus, cum habere non possit Deum Patrem, qui Ecclesiam non habet matrem, et falso confidat, se esse in Ecclesia, qui Petri Ca-

1 Tertull. de praescript. cap. 41.

2 Ad Rom. cap. 1. Ad Hebr. cap. 11. Trid. Sess. VI. cap. 8.

3 S. Cyprian. Epist. 43.

thedram deserat, super quam fundata est Ecclesia 1. Nullum vero maius potest esse delictum, et nulla macula deformior, quam aduersus Christum stetisse, quam Ecclesiam divino Eius Sanguine partam et acquisitam dissipasse, quam evangelicae dilectionis oblitum contra unanimem et concordem Dei populum hostilis discordiae furore pugnasse 2.

Cum autem ratio divini cultus ex hisce duobus constet, piis dogmatibus, et actionibus bonis, neque doctrina sine operibus bonis accepta sit Deo, neque opera recipiat Deus a religiosis dogmatibus seiuncta, neque in solo opere virtutum, aut in sola observantia mandatorum, sed etiam in tramite fidei augusta et ardua sit via, quae dicit ad vitam 3, tum ne intermittatis fideles vestros populos continenter monere et excitare, ut non solum in catholicae religionis professione magis in dies stabiles et immoti persistant, verum etiam per bona opera certam suam vocationem et electionem facere satagant. Dum autem in vestri gregis salutem procurandam incumbitis, ne omittatis in omni bonitate, patientia et doctrina miseros errantes ad unicum Christi ovile, atque ad catholicam unitatem revocare illis praesertim Augustini verbis: Venite, fratres, si vultis, ut inseramini in vite: dolor est, cum vos videamus praecisos ita iacere; numerate sacerdotes vel ab ipsa Petri Sede, et in ordine illo patrum quis cui successit, vide-te; ipsa est petra, quam non vincunt superbae inferorum portae 4. Quicumque extra hanc domum agnum comederit, profanus est; si quis in arca Noë non fuerit, peribit regnante diluvio 5.

Verum non minori sane pernicie alter nunc grassatur morbus, cui ab elatione, et quodam veluti rationis fastu, *rationalismi* nomine est inditum. Non improbat certe Ecclesia 6 eorum studium,

1 S. Cyprian. de unitat. Eccl.

2 S. Cyprian. Epist. 72.

3 S. Cyrill. Hierosol. Cath. IV. Illuminand. n. 2. S. Leo, Serm. 5 de Nativit. Dom.

4 In psalm. contr. part. Donat.

5 S. Hieronym. Epist. 14. al. 57. ad Damas.

6 Lactant. divin. institut. lib. 3. cap. 1.

qui veritatem scire voluerunt, quia Deus hominis naturam veri adipiscendi cupientissimam fecit, neque improbat rectae sanae-que rationis studia, quibus animus excolitur, natura investigatur, et abditissima quaeque eiusdem arcana in apertam proferuntur lucem. Siquidem novit, ac probe tenet pientissima mater, inter collata caelitus munera **1** illud esse praeclarum, quod ratione continetur et quo ea omnia, quae sensibus obnoxia sunt, praetergressi, insignem quamdam Dei imaginem in nobis ipsis praeferimus. Novit quaerendum esse donec invenias, et credendum quod credidisti, dum hoc insuper credas aliud non esse credendum, ideoque nec requirendum, cum id inveneris, et credideris quod a Christo institutum est, qui non aliud tibi mandat inquirendum, quam quod instituit **2**. Ecquid igitur est, quod ipsa non patitur, non sinit, et quod pro iniuncto sibi officio tuendi depositi omnino reprehendit, ac damnat? Illorum nimirum morem vehementer reprehendit, ac semper damnavit et damnat Ecclesia, qui ratione abutentes, eam Dei ipsius loquentis auctoritali impie et stulte opponere ac praeferre non erubescunt, neque reformidant, et dum insolenter se extollunt, propria superbia, suoque tumore caecali veritatis lumen amittunt, fidem, de qua scriptum est: qui non crediderit condemnabitur **3**, superbissime aspernantur, sibique praefidentes **4** diffidentur ipsi Deo de se credendum esse, et iis, quae cognitioni nostrae de se tribuit, obsequendum. Hi sunt, qui bus constantissime opponit, aequum esse **5**, ut de cognitione Dei ipsi Deo credamus, cuius scilicet totum est, quod de eo credimus, quia utique ab homine Deus, uti oportet, cognosci non potuit, nisi salutarem sui cognitionem ipse tribuisset. Hi sunt, quos ad mentis sanitatem hisce verbis revocare contendit: quid magis contra rationem, quam ratione rationem conari transcendere? et

1 Clemens Alex. Stromat. lib. **1**. cap. **3**. lib. **2**. cap. **2**. et Gregor. Thaumaturg. orat. panegyr. cap. **7**. **13**.

2 Tertull. de praescript. cap. **9**.

3 Marc. **XVI. 16**.

4 S. Hilar. de Trinit. lib. **4**.

5 Cassian. de Incarnat. lib. **4**. cap. **2**.

quid magis contra fidem, quam credere nolle quidquid non possis ratione altingere ¹? Atque his inculcare non desinit, fidem non rationi, sed auctoritati inniti ², nec enim decebat, ut cum Deus ad hominem loqueretur, argumentis assereret suas voces, tamquam fides ei non haberetur, sed ut oportuit, est loquutus, quasi rerum omnium maximus iudex, cuius non est argumentari, sed pronuntiare ³. His apertissime denuntiat, unam hominis spem, unamque salutem positam esse in christiana fide, quae veritatem docens, ac divina sua luce humanae ignorantiae tenebras discussiens per caritatem operatur, et in catholica Ecclesia, quae verum retinens cultum est stabile ipsius fidei domicilium, et Dei templum, extra quod, citra invincibilis ignorantiae excusationem, quisquis fuerit, est a spe vitae et salutis alienus. Et hos gravissime monet, ac docet, quod humanae artis peritia si quando tractandis sacris eloquiis adhibetur, non debet ius magisterii sibi arroganter arripere, sed veluti ancilla Dominae quodam famulatus obsequio subservire, ne si praecedit oberret, et dum exteriorum verborum sequitur consequentias, intimae virtutis lumen amittat, et rectum veritatis tramitem perdat ⁴. Neque existimari siccirco debet, nullum in Ecclesia Christi profectum haberi religionis. Habetur namque, idemque maximus, dummodo tamen vere profectus sit fidei, non permutable. Crescat igitur oportet, et multum vehementerque proficiat tam singulorum; quam omnium, unius hominis, quam totius Ecclesiae aetatum, ac saeculorum gradibus intelligentia, scientia, sapientia, qua intelligatur illustrius quod antea credebatur obscurius, qua posteritas intellectum gratuletur, quod vetustas non intellectum venerabatur, qua pretiosae divini dogmatis gemmae exsculpantur, fideliter coaptentur, adornentur sapienter et splendore, gralia, venustate ditescant in eodem tamen genere, in eodem scilicet dogmate, eodem sen-

¹ S. Bernard. epist. 190.

² S. Bernard. de Considerat. lib. 5. cap. 3.

³ Lactant. divin. Institut. lib. 3. cap. 1.

⁴ S. Petrus Damasian. opusc. 36. cap. 5.

su, eademque sententia, ut cum dicantur nove, non dicantur nova ¹.

Neminem Vestrum mirari arbitramur, Dilecti Filii Nostri, ac Venerabiles Fratres, si pro Nostro fidei primatu et principatu ² de luctuosissimis hisce, ac rei cum sacrae, tum publicae perniciosissimis erroribus denuo loquuti simus, eximiamque vestram episcopalem vigilantiam ad illos profligandos excitare censuerimus. Cum enim inimicus homo non casset superseminare zizania in medio tritici, tum Nos qui, divina disponente Providentia, dominico agro excolendo praesumus, atque uti servi fideles, et prudentes super Domini familiam constituti sumus ³, ab iis partibus explendis desistere non debeamus, quae ab Apostolico Nostro munere separari non possunt.

Nunc vero a singulari vestra pietate et prudentia exposcimus, ut in hoc congressu ea potissimum inter Vos consilia provide sapienterque inire studeatis, quae in amplissimi istius Imperii regionibus ad maiorem Dei gloriam promovendam, ac semperternam hominum salutem procurandam conducere existimaveritis. Etsi enim vehementer in Domino laetamur, cum noscamus multos existere tum ecclesiasticos, tum laicos homines, qui christiane fidei et caritatis spiritu egregie animati bonum Christi diffundunt odorem, tamen non mediocri afficimur dolore, cum haud ignoremus, in aliquibus locis nonnullos ex Clero suae dignitatis et officii oblitos minime ambulare pro ea vocatione, qua vocati sunt, et christianum populum sanctissimis divinae nostrae religionis praeceptionibus parum instructum, gravibusque obnoxium periculis a pietatis operibus, et Sacmentorum frequentia infeliciter abstinere, atque a morum honestate, christianaque vitae disciplina deflectere, et ad interitum ruere. Persuassimum Nobis est, Vos pro spectata vestra episcopali sollicitudine omnes curas, cogitationesque esse collaturos, ut commemorata damna omnino eliminentur. Et quoniam optime scitis, Dilecti Filii No-

¹ Vinc. Lirin. Commonitor.

² S. Ambros. de Incarnat. cap. 4. n. 32. Cassian. de Incarnat. lib. 3. cap. 12.

³ S. Ambros. de fide ad Gratian. Imperat. lib. 5. in prolog.

stri, ac Venerabiles Fratres, quantam ad ecclesiastici Ordinis disciplinam instaurandam, populorum mores corrigendos, eorumque damna avertenda vim habeant Provincialia Concilia a canonicis sanctionibus sapientissime praescripta, et a sanctis Antistitibus maximo semper Ecclesiae bono frequentata, idcirco vel maxime optamus, ut Provinciales Synodos ad sacrorum Canonum normam rite concelebretis, pro communibus cuiusque ecclesiasticae istius Imperii Provinciae malis opportuna ac salutaria adhibeatis remedia. Cum autem multa et gravia in hisce Provincialibus Synodis a Vobis sint agenda, Nostris in votis est, ut pro vestra sapientia in isto Vindobonensi conventu concordissimis animis ea inter Vos suscipiatis consilia, quibus unanimes esse possitis tum circa potiores praesertim res, quae in Provincialibus Synodis erunt tractandae, ac statuendae, tum circa illa, quae uno eodemque studio a Vobis erunt praestanda, ut in omnibus istius Imperii Provinciis divina nostra religio, eiusque salutaris doctrina magis in dies vigeat, floreat, dominetur, et fideles populi, declinantes a malo et facientes bonum, ambulent ut filii lucis in omni bonitate, iustitia, ac veritate. Et cum nihil sit, quod alias magis ad virtutem, pietatem, ac Dei cultum assidue instruat, quam eorum vita, et exemplum, qui se divino ministerio dedicarunt, ne praetermittatis omni industria inter Vos ea statuere, quibus Cleri disciplinam, ubi prolapsa est, instauretis, et accuratam illius institutionem, ubi opus fuerit, promoveatis. Quocirca, Dilecti Filii Nostri, ac Venerabiles Fratres, collatis inter Vos consiliis coniunctisque studiis, diligentissime prospicite, ut ecclesiastici viri propriae dignitatis et officii semper memores ab iis omnibus declinent quae Clericis velita, quaeque eos nequam decent, ac virtutum omnium ornatu praefulgentes exemplum sint fidelium in verbo, in conversatione, in caritate, in fide, in castitate, ut diurnas canonicas horas, qua decet, attentione, ac pietatis affectu recitent, ac sancta oratione se exerceant, et rerum caelestium meditationi instant, decorem Domus Dei diligent, sacras functiones et caeremonias iuxta Pontificale et Rituale Romanum peragant, et proprii ministerii munia naviter, scienter, ac

sancte obeant, et sacrarum praesertim disciplinarum studia nunquam intermittant, et sempiternae hominum saluti quaerendae assiduam navent operam. Ac pari cura consulite, ut omnes cuiusque Metropolitani, Cathedralis et Collegialis Templi Canonici aliquique Beneficiarii choro addicti morum gravitate, vitae integritate, ac pietatis studio undique praefulgere studeant tamquam lucernae ardentes positae super candelabrum in templo Domini, et omnes suscepti muneric partes diligenter expleant, residendi legem servent, divini cultus splendorem current, atque alacres in excubiiis Domini divinas laudes studiose, rite, pie, religiose, non vero mente vaga, non vagis oculis, non indecoro corporis statu concelebrent, memoria semper repetentes, quod ipsi ad chorum accedunt, non modo ut sanctissimum Deo cultum, venerationemque tribuant, verum etiam ut a Deo ipso et sibi et aliis omne bonum deprecentur.

Sed quam vehementer ad ecclesiasticum spiritum tuendum, et fovendum, atque ad salutarem constantiam retinendam conferant spiritualia Exercitia, innumeris iccirco per Romanos Pontifices Praedecessores Nostros ditata Indulgentiis, quisque Vestrum optime noscit. Ea proinde cunctis ecclesiasticis vestris viris etiam atque eliam commendare et inculcare ne desinatis, quo ipsi certo dierum spatio in opportunum aliquem locum saepe secedant, ubi quavis humanarum rerum cura abiecta, omnia sua facta, dicta, cogitata coram Deo quam diligentissime reputantes, et annos aeternos assidua meditatione habentes in mente, ac maxima beneficia sibi a Deo collata recolentes, studeant contractas de mundano pulvere sordes abluere, et resuscitare gratiam, quae ipsis data est per impositionem manuum, et expoliantes veterem hominem cum actibus suis novum induant, qui creatus est in iustitia et sanctitate.

Quoniam vero Sacerdotum labia custodire debent scientiam, qua et respondere possint iis, qui legem requirunt de ore ipsorum et contradicentes revincere, iccirco, Dilecti Filii Nostri, ac Venerabiles Fratres, in rectam, accuratamque Cleri institutionem omnes vestras curas convertatis oportet. Summa igitur contentionе omnia

conamini, ut in vestris praecipue Seminariis optima ac plane catholica vigeat studiorum ratio, qua adolescentes Clerici vel a prima pueritia per probatissimos magistros ad pietatem, omnemque virtutem, et ecclesiasticum spiritum mature fingantur, ac latinae linguae cognitione, et humanioribus litteris, philosophicisque disciplinis ab omni prorsus cuiusque erroris periculo alienis sedulo imbuantur. Atque in primis omnem adhibete vigilantiam, ut cum dogmaticam, tum moralem Theologiam ex divinis libris, sanctorumque Patrum traditione, et infallibili Ecclesiae auctoritate hau-stam ac depromptam, ac simul solidam divinarum litterarum, sa-crorum Canonum, ecclesiasticaeque historiae, rerumque liturgica-rum scientiam congruo necessarii temporis spatio diligentissime addiscant. Ac Vobis summopere cavendum in librorum delectu , ne in tanta grassantium errorum colluvie a sanae doctrinae semi-ta ecclesiastici adolescentes temere abducantur, cum praesertim haud ignoretis, viros eruditos a Nobis in religione dissidentes, et ab Ecclesia praecisos, in vulgus edere tam divinos libros, quam Sanctorum Patrum opera, concinna illa quidem elegantia , sed saepe, quod maxime est dolendum, vitiata, ac praeposteris com-mentariis a veritate detorta. Neminem Vestrum latet quantopere Ecclesiae hisce praesertim temporibus intersit idoneos habere mi-nistros qui vitae sanctitate, et salutaris doctrinae laude praestan-tes ac potentes in opere et sermone valeant Dei, eiusque sanctae Ecclesiae causam strenue tueri, et aedificare Domino domum fi-delem. Nihil itaque intentatum est relinquendum, ut iuniores Cle-rici vel a teneris annis sancte ac docte edacentur, quandoquidem nonnisi ex ipsis rite institutis utiles Ecclesiae ministri fieri pos-sunt. Quo vero facilius pro eximia vestra religione , ac pastorali sollicitudine accuralam Cleri institutionem, ex qua Ecclesiae bo-num, ac populorum salus tantopere pendet, quotidie magis pro-movere valeatis, ne Vos pigeat exhortari, rogare egregios vestra-rum Dioecesium ecclesiasticos, laicosque viros divitiis pollentes, et in rem catholicam paeclare animatos, ut vestrum sectantes exemplum aliquam pecuniae vim perlibenter tribuere velint, quo-nova etiam Seminaria erigere, et congrua dote instruere possitis,

in quibus adolescentuli Clerici vel ab ineunte aetate rite instituantur.

Nec minori studio, Dilecti Filii Nostri, ac Venerabiles Fratres, ea omnia consilia suscipienda curate, quibus vestiarum Dioecesium iuventus cuiusque conditionis, et sexus magis in dies catholicō plane modo educetur. Quapropter episcopalis vestrae vigilantiae nervos intendite, ut iuventus ante omnia spiritu timoris Dei mature imbuta, ac pietatis lacte enutrita nedum fidei elementis, sed pleniori sanctissimae nostrae religionis cognitione sedulo excolatur, atque ad virtutem, morumque honestatem, christianaèque vitae rationem conformetur, et ab omnibus perversionis, et corruptionis illecebris, et scopolis arceatur. Pari autem sollicitudine ne desinatis unquam fideles populos Vobis commissos opportunis quibusque modis ad religionem et pietatem etiam atque etiam excitare. Itaque ea omnia peragite, quibus ipsi fideles populi magis in dies salutari catholicae veritatis ac doctrinae pabulo enutriti Deum ex toto corde diligent, eiusque mandata apprime servent, Sanctuarium eius frequenter, ac religiose adeant, Sabbata eius sanctificant, ac saepe, qua par est, veneratione et pietate tum divini Sacrificii celebrationi intersint, tum ad sanctissima Poenitentiae, et Eucharistiae Sacraenta accedant, et singulari devotione Sanctissimam Dei Genitricem Immaculatam Virginem Mariam prosequantur, et colant, ac mutuam inter se continuam caritatem habentes, et precibus instantes ambulent digne Deo per omnia placentes, et in omni opere bono fructificant. Cum autem sacrae Missiones idoneis operariis peractae summopere conducant ad fidei, religionisque spiritum in populis excitandum, eosque ad virtutis ac salutis semitam revocandos, vehementer optamus, ut illas identidem in vestris Dioecesibus agendas curetis. Ac meritas summasque laudes iis omnibus deferimus, qui a vestro ordine in suas Dioeceses tam salutare sacrarum Missionum opus iam invexere, ex quo divina adspirante gratia uberes fructus perceptos fuisse gaudemus.

Haec potissimum in isto vestro conventu prae oculis habeatis oportet, Dilecti Filii Nostri, ac Venerabiles Fratres, ut communis

bus malis communibus studiis provide mederi possitis. Etenim ad praecipua cuiusque vestrae Dioecesis damna reparanda , eiusque prosperitatem promovendam , nihil frequenti eiusdem Dioeceseos lustratione, et Dioecesanae Synodi celebratione validius esse probe intelligitis. Quae duo quantopere a Concilio praesertim Tridentino sint praescripta et inculcata neminem Vestrum fugit. Quamobrem pro spectata vestra in gregem Vobis commissum sollicitudine et caritate , nihil antiquius habere velitis , quam ex canonicis sanctionibus vestras Dioeceses impensisimo studio invisere, et ea omnia accurate perficere , quae ad ipsam visitationem fructuose peragendam omnino pertinent. Quo in munere obeundo Vobis summopere cordi sit summa cura , ac paternis praesertim monitis, et frugiferis concionibus, aliisque opportunissimis modis errores, corruptelas , et vilia , si quae irrepserint, radicitus evellere, omnibus salutis documenta praebere, cleri disciplinam sartam tectamque tueri , et fideles spiritualibus praesertim quibusque subsidiis iuvare, munire , et omnes Christo lucrifacere. Nec dissimilem diligentiam impendite in Dioecesanis Synodis iuxta sacrorum Canonum normam celebrandis ea praecipue statuentes , quae ad maius cuiusque vestrae Dioecesis bonum spectare pro vestra prudentia duxeritis. Ne vero in Sacerdotibus, qui doctrinae et lectio ni attendere debent, quique obstricti sunt officio docendi populum ea, quae scire omnibus necessarium est ad salutem, et ministrandi Sacramenta ¹, sacrarum disciplinarum studium unquam restinguatur aut languescat industria, optatissimum Nobis est , ut a Vobis , ubi fieri possit , in omnibus vestrarum Dioecesium regionibus , instituantur opportunis regulis congressus de morum praesertim Theologia, ac de sacris Ritibus, ad quos singuli potissimum Presbyteri teneantur accedere , et afferre scripto consignatam propositae a Vobis quaestionis explicationem , et aliquo temporis spatio a Vobis praefiniendo inter se disserere de morali Theologia , deque sacrorum Rituum disciplina , postquam aliquis ex ipsis Praesbyteris sermonem de sacerdotalibus praecipue officiis habuerit. Cum autem in vestro grege procurando operam

prae ceteris, manum, auxiliumque Vobis praestent Parochi, quos in sollicitudinis partem adscitos, et in arte omnium maxima ob-eunda adiutores habetis, eorum zelum omni studio inflammare ne intermittatis, Dilecti Filii Nostri, ac Venerabiles Fratres, ut proprio munere ea, qua par est, diligentia, ac religione fungantur. Illics iccirco inculcate, ut nunquam cessent christianam plebem sibi traditam sedulo pascere divini verbi praeconio, ac Sacramento-rum et multiformis gratiae Dei dispensatione, et rudes homines, ac maxime puerulos christianaे fidei mysteriis, nostraeque Religionis documentis amanter, patienterque erudire, et errantes ad salutis iter adducere, ut summopere studeant odia, simultates, inimicitias, discordias, scandala tollere, et confortare pusillani-mes, et visitare infirmos, eosque omni praesertim spirituali ope iuvare, et miseros afflictos, atque aerumnosos consolari, omnes-que exhortari in doctrina sana, et monere, ut religiosissime red-dant quae sunt Dei Deo, et quae sunt Caesaris Caesari, docentes quod omnes non solum propter iram, sed etiam propter conscienciam Principibus et potestatibus subditi esse et obedire debent in iis omnibus, quae Dei, et Ecclesiae legibus minime adversantur. Pergite vero, ut facitis, cum summa vestri nominis laude, Dilecti Filii Nostri, ac Venerabiles Fratres, accuratam vestrarum Dioe-cesium relationem statutis temporibus ad Nostram Concilii Congregationem mittere, ac Nos de rebus ad ipsas Dioeceses perti-nentibus diligenter certiores facere, ut maiori cum vestræ, tum earumdem Dioecesium utilitati providere possimus. Nobis autem innotuit in quibusdam germanici territorii Dioecesis aliquas circa parochiarum potissimum collationem invaluisse consuetudi-nes, et nonnullos ex Vobis optare, ut huiusmodi consuetudines serventur. Nos quidem propensi sumus ad adhibendam indulgen-tiam, postquam tamen easdem consuetudines ab unoquoque Ve-strum specialim, ac per diligenter expositas debito examine per-penderimus, ut eas intra illos permittamus limites, quos necessi-tas, et praecipua locorum adiuncta suadere poterunt, cum pro Apostolici Nostri ministerii munere curare omnino debeamus, ut Canonicae praescriptiones generatim sedulo observentur.

Antequam finem huic Nostrae Epistolae faciamus, qua Vos omnes Austriaci Imperii Sacrorum Antistites alloqui summopere gaudemus, Nostrum ad Vos sermonem praesertim convertimus, Venerabiles Fratres Archiepiscopi et Episcopi, qui in eodem nobilissimo Imperio morantes, ac Nobiscum in vera fide et catholica unitate coniuncti, et huic Petri Cathedrae adhaerentes Orientalis Ecclesiae ritus et laudabiles consuetudines ab hac Sancta Sede probatas, seu permissas colitis. Compertum exploratumque Vobis est quo in pretio haec Apostolica Sedes vestros semper habuerit ritus, quorum observantiam tantopere inculcavit, quemadmodum luculenter testantur tot Romanorum Pontificum Decessorum Nostrorum Decreta et Constitutiones, inter quas commemo- rare satis est Litteras Benedicti XIV Praedecessoris pariter Nostri, die 26 Iunii Anno 1755 editas, quarum initium « Allatae », et Nostras die 6 Ianuarii Anno 1848 omnibus Orientalibus missas, quae incipiunt « In suprema Petri Apostoli Sede ». Itaque Vos etiam summopere excitamus, ut pro eximia vestra religione et episcopali sollicitudine ministerium vestrum implentes, atque ante oculos habentes ea omnia, de quibus loquuti sumus, vestram omnem curam, industriam et vigilantiam continenter impendatis, ut vester Clerus virtutibus omnibus ornatus, et optimis disciplinis potissimum sacris accurate excultus in sempiternam fidelium salutem quaerendam intentissimo studio incumbat, ut fideles populi instant viam, quae dicit ad vitam, ut quotidie magis sancta augatur et amplificetur catholicae Religionis unio, ut sacramenta administrentur, ac divina celebrentur officia iuxta vestram disciplinam, iis tamen liturgicis libris adhibitis, qui ab hac Sancta Sede probati fuerunt. Et cum nihil Nobis optatius, quam vestris et vestrorum fidelium indigentiis quam libentissime occurrere, ne omittatis ad Nos confugere, Nobisque exponere vestrarum Dioecesum res, et illarum relationem ad Nostram Congregacionem Fidei propagandae praepositam quarto quoque anno mittere.

Denique, Dilecti Filii Nostri, ac Venerabiles Fratres, Vos obtemperiamus, ut intentissimo studio connitamini magis in dies conservare, fovere, et angere pacem et concordiam inter universum ista-

rum omnium Dioecesum Clerum tum latini , tum graeci-catholici ritus, ut omnes, qui militant in castris Domini, mutuo fraternae caritatis affectu se invicem honore praevenientes, Dei gloriae, et animarum saluti unanimiter ac studiosissime inserviant.

Habetis quae pro impensisima Nostra erga Vos, et fideles istius vastissimi Imperii populos caritate Vobis, Dilecti Filii Nostri, ac Venerabiles Fratres, nunc polissimum significanda censuimus, ac pro certo habemus, Vos pro egregia vestra virtute, religione, pietate, ac perspecta in Nos, et hanc Petri Cathedram fide et observantia hisce paternis Nostris desideriis, monitisque quam libentissime, et cumulatissime esse obsequuturos. Ac plane non dubitamus, quin vos omnes, Dilecti Filii Nostri, ac Venerabiles Fratres, Pastorum Principem Christum Iesum continenter intuentes, qui se humilem et mitem corde est professus, quique dedit animam suam pro ovibus suis relinquens nobis exemplum, ut sequamur vestigia Eius, contendatis totis viribus Illius exempla sectari, documenta obsequi, et gregi, curae vestrae commisso, assidue advigilare, in omnibus laborare, ministerium vestrum implere, et quaerere non quae vestra sunt, sed quae Christi Iesu, neque iam ut dominantes in Cleris, sed uti Pastores, immo Patres amantissimi, et facti forma gregis ex animo nihil tam molestum, tam impeditum, tam arduum unquam fore putetis, quod in omni patientia, mansuetudine, lenitate, prudentia ferendum, expediendum ac providendum pro vestrarum ovium salute non curetis. Nos interim in humilitate cordis Nostri haud omittimus assiduas fervidasque clementissimo lumen et misericordiarum Patri Deo totius consolationis adhibere preces, ut uberrima quaeque suae Bonitatis dona super Vos propitius semper effundat, quae in dilectas quoque oves Vobis concreditas copiose descendant. Cuius divini praesidiis auspicem et propensissimae aeque ac studiosissimae Nostrae in Vos voluntatis testem Apostolicam Benedictionem ex imo corde depromptam Vobis singulis, Dilecti Filii Nostri, ac Venerabiles Fratres, cunctisque istarum Ecclesiarum Clericis, Laicisque fidelibus peramanter impertimur.

Datum Romae apud Sanctum Petrum , die XVII Martii , anno MDCCCLVI. Pontificatus Nostri Anno Decimo.

ALLOCUTIO

HABITA IN CONSISTORIO SECRETO DIE XV DECEMBRIS
ANNI MDCCCLVI.

VENERABILES FRATRES

Nunquam fore ¹ putavissemus , Venerabiles Fratres , ut magno cum animi Nostri dolore afflictas ac prostratas etiam in Mexicana republica catholicae Ecclesiae res lamentari , ac deplorare compelleremur. Illud enim Gubernium , postquam iam inde ab anno millesimo octingentesimo quinquagesimo tertio significaverat , suis in votis esse Conventionem inire cum hac Apostolica Sede , idipsum insequente anno per suum Ministrum dilectum Filium Emmanuelem Larrainzar hac in urbe morantem ac debita potestate munitum enixe efflagitavit. Nos itaque spirituali illorum fidelium bono consulere , et ecclesiastica illius Reipublicae negotia componere vel maxime optantes , huiusmodi postulationi perlibenter obsecundavimus , et oportunas cum eodem Mexicano Ministro tractationes suscipiendas esse constituimus. Quae quidem tractationes inchoatae fuerunt , sed absolvi et ad optatum exitum perduci minime potuere , propterea quod congruae retardabantur explicationes , quas a suo Gubernio commemoratus Plenipotentiarius Minister Romae degens postulabat , qui deinde in Mexicanum fuit revocatus ob notissimam rerum conversionem , et Gubernii immutationem , cui Mexicana Respublica misere fuit obnoxia.

Ubi autem novum extitit Gubernium , statim acerrimum Ecclesiae , eiusque sacris rebus , iuribus , Ministris bellum indixit. Postquam enim Clerum in popularibus electionibus utroque suffragio privavit , legem die vigesimo tertio mensis Novembris superiore anno condidit , qua ecclesiasticum forum de medio sustulit , quod in universa Mexicana Republica semper viguerat. Etsi vero Venerabilis Frater Lazarus Archiepiscopus Mexicanus tum suo , tum omnium illius Reipublicae Sacrorum Antistitum et Cleri nomine contra hanc legem protestari haud omiserit , tamen irrita fuit eiusmodi reclamatio , et Gubernium minime extimuit declarare , se nunquam sua acta supremae huius Apostolicae Sedis auctoritati esse subiecturum. Atque idem Gubernium molestissime ferens indignationem , quam fidelis praesertim Angelopolitanus populus ostenderat ob eamdem legem , duo edidit decreta , quorum altero omnia Angelopolitanae Ecclesiae bona civilis auctoritatis potestati et arbitrio subiecit , adiudicavit , altero normam praescripsit , qua bona ipsa essent administranda. Cum autem Venerabilis Frater Pelagius Episcopus Angelopolitanus suo munere egregie fungens contra tam iniusta aequa ac sacrilega de creta episcopalem extulerit vocem , tum Gubernium eumdem Antistitem vexare , insectari , eumque militari manu comprehendere , et in exilium pellere minime reformidavit. Ac nihil valuere expostulationes Venerabilis Fratris Aloisii Archiepiscopi Damasceni , Nostri ibi Delegati Apostolici , et Venerabilium Fratrum tum Petri Episcopi Guadalaxarensis , tum Petri Episcopi S. Aloisii Potosiensis , qui omni studio apud idem Gubernium agere non destiterunt , ut illa abrogarentur de creta. Mexicanum enim Gubernium his quoque iustissimis reclamationibus plane despectis , ulterius progrediens , et bona omnia , quae Ecclesia in tota illa Republica possidet , sibi ausu prorsus temerario et sacrilego vindicare cupiens , aliud die vigesimoquinto Iunii huius anni edit decretum , illudque die vigesimo octavo eiusdem mensis vulgavit , quo Ecclesiam suis omnibus in eadem Republica bonis ac proprietatibus omnino spoliare non exhorruit. Contra tam iniustum decretum suam vocem attollere haud omiserunt Venerabi-

les Fratres Lazarus Archiepiscopus Mexicanus , Clemens Episcopus Mecoacanus , et Petrus Episcopus Guadalaxarensis , qui suis expostulationibus eidem obstantes decreto , Ecclesiae causam strenue propugnarunt. Mexicanum vero Gubernium huiusmodi Sacrorum Antistitum reclamationes non solum contempsit , reiecit , verum etiam decretivit , Episcopum Guadalaxarensem exilio esse multandum , et legem promulgatam celeriter , ac severe exsequendam. Et quo facilius ac citius sacrilega haec bonorum Ecclesiae spoliatio conficeretur , haud extimuit varias stipulari alienationes , et ecclesiasticis Coetibus permittere , ut fundos distraherent , quin adhaererent normae ab ipso Gubernio praescriptae , dummodo tamen solveretur quod sibi Gubernium arrogat ob titulum translati dominii , et aliae servarentur conditiones in eadem lege statutae.

Atque hic , Venerabiles Fratres , illud vel maxime dolendum , quod nonnulli ex Religiosis Familia reperti sint viri , qui propriae vocationis , officii , et instituti prorsus obliti , ac regularem disciplinam perosi non erubuere cum maximo fidelium scandalo , et bonorum omnium luctu Apostolicae Visitationi a Nobis in ipsos Regulares constitutae , et Venerabili Fratri Episcopo Mecoacano commissae impudenter resistere , adversari , et nefariis Ecclesiae hostium consiliis favere , et commemoratam legem amplecti , ac proprii Coenobii fundos divendere , gravissimis quibusque canoniciis sanctionibus et poenis omnino despectis et contemptis. Ac pari dolore dicere cogimur , aliquos etiam e Clero saeculari fuisse viros , qui suae dignitatis , muneris , Sacrorumque Canonum immemores , et Ecclesiae causam deserere , et eadem iniustissima lege uti , et Gubernii voluntati obsequi haud veriti sunt.

Sed Mexicanum Gubernium , ecclesiasticis bonis direptis , alia fecit decreta , quorum uno legem de quadam Religiosa Familia in Mexicum revocanda abolevit , altero vero declaravit , se omnem opem et operam praebere iis omnibus utriusque sexus Regularium Ordinum Sodalibus , qui a suscepta religiosa vita descisere , claustra deserere , seque a debita propriis Moderatoribus obedientia eximere vellent. Neque id satis . Namque Nationalis ille

Conventus Deputatorum Consilio inter plurima contra sanctissimam nostram religionem, eiusque sacros Ministros, Pastores et Christi hic in terris Vicarium maledicta, et convicia novam proposuit Constitutionem multis conflatam articulis, quorum plures divinae ipsi religioni, eiusque salutari doctrinae, sanctissimisque institutis et iuribus plane adversantur. Hac enim nova proposita Constitutione praeter alia, et omne ecclesiastici fori privilegium tollitur; et statuitur, neminem ullo prorsus emolumento perfrui posse, quod grave sit societati; et cuique interdicitur, ut aliqua se obligatione obstringat seu contractus, seu promissionis, seu religiosi voti causa; et ad populorum mores animosque facilius corrumpendos, ac detestabilem, teterimamque *indifferentismi* pestem propagandam, ac sanctissimam nostram religionem convel lendam admittitur liberum cuiusque cultus exercitium, et omnibus quaslibet opiniones cogitationesque palam publiceque manifestandi plena tribuitur potestas. Et quoniam Angelopolitanus praecipue Clerus, eiusque Vicarius Generalis illum Deputatorum Congressum impensissime rogarunt et obsecrarunt, ut saltem articulus de libertate cuiusque religionis exercenda numquam sanciretur, iccirco plures spectatissimi, tum ecclesiastici, tum laici Angelopolitanici viri, idemque Vicarius Generalis, senectute licet confectus, pulsi sunt in exilium, et alii etiam egregii Mexicanae civitatis sacerdotes comprehensi et in oppidum Verae Crucis exportati, ut in exteris traducerentur regiones. Ne autem ad fideles illos populos suorum Antistitum voces et salutaria monita perveniant, qui pro pastoralis munera officio in tanta contra Ecclesiam violentia, tantaque insectatione silere non possunt, Mexicanum Gubernium omnibus illarum regionum Gubernatoribus severissime paecepit, ut assidue speculentur, et omni adhibita ratione impediant, quominus ullo modo Pastorales Episcoporum Litterae vel vulgentur, vel circumferantur, vel in sacris aedibus legantur. Ac simul gravissimas in ecclesiasticos potissimum viros constituit poenas, qui huic iniusto non obsequentes mandato, erunt etiam a loco, ubi morantur, expellendi et alio asportandi, vel in Mexicanam civitatem deducendi. Ad haec Gubernium idem iam penitus extinxit Reli-

giosam Familiam Ordinis S. Francisci in eadem Mexicana civitate sitam, eiusque redditus ad pia legata pertinentes nationali aerario attribuit, Coenobii aedificium magna ex parte destruxit, et nonnullos eiusdem Familiae religiosos Sodales in carcerem coniecit. Atque ipsius Gubernii iussu Venerabilis Frater Clemens Episcopus Mecoacanus comprehensus, et a sua Dioecesi crudeliter divulsus in ipsam Mexicanam civitatem interim fuit relegatus. Utinam ne alii egregii Sacrorum Antistites, et ecclesiastici, laicique viri eadem exagitentur procella !

Ex quibus luctuosissimis sane factis, quae dolenter commemo-ravimus, plane perspicitis, Venerabiles Fratres, quomodo a Mexi-cano Gubernio sanctissima nostra religio fuerit perculsa et afflita, et quantae ab ipso catholicae Ecclesiae, eiusque sacris iuribus, Ministris, Pastoribus, ac supremae Nostrae, et huius Sanctae Sedis auctorati iniuriae fuerint inlatae. Absit vero, ut Nos in tanta sacrarum rerum perturbatione, et Ecclesiae eiusque potestatis, ac libertatis oppressione Apostolici Nostri ministerii munus obire unquam praetermittamus. Quapropter, ut fideles ibi degentes sciant, et universus Catholicus Orbis cognoscat, a nobis vehemen-ter improbari ea omnia, quae a Mexicanae Reipublicae Moderato-ribus contra catholicam Religionem, Ecclesiam, eiusque sacros Ministros, Pastores, leges, iura, proprietates, et contra huius Sanctae Sedis auctoritatem gesta sunt, Pontificiam Nostram in hoc amplissimo vestro consessu apostolica libertate vocem attolli-mus, et praedicta omnia decreta ac cetera, quae ibi a civili pote-state cum tanto ecclesiasticae auctoritatis, et huius Apostolicae Sedis contemptu, ac tanta Religionis et Sacrorum Antistitum et ecclesiasticorum praeserium hominum iactura, ac detimento san-cita sunt, damnamus, reprobamus et irrita prorsus, ac nulla de-claramus. Insuper eos omnes, quorum opera, consilio, iussu illa patrata sunt, gravissime monemus, ut serio reputent poenas et censuras, quae adversus sacrarum personarum et rerum⁷, atque ecclesiasticae libertatis et potestatis violatores, profanatores, et huius Sanctae Sedis iurium usurpatores ab Apostolicis Constitu-tionibus, sacrisque Conciliorum Canonibus sunt constitutae.

Nunc autem haud possumus, quin ex animo gratulemur, et maximas meritasque laudes tribuamus Venerabilibus Fratribus illius Reipublicae Sacrorum Antistitibus, qui proprii episcopalis munieris optime memores singulari firmitate, et constantia Ecclesiae causam impavide propugnarunt, et invicto animo dura quaeque et aspera pro ipsius Ecclesiae defensione perpeti sunt gloriati. Debito quoque laudum praeterea illos omnes tum ecclesiasticos, tum laicos viros prosequimur, qui catholicis sensibus vere animati, et illustria suorum Antistitium exempla sectantes in idipsum suos etiam labores pro viribus conferre haud omiserunt, gravissima omnia subeuntes pericula et discrimina. Atque etiam summopere collaudamus fidelem Mexicanae Reipublicae populum, qui ex parte longe maxima vehementer dolens, et indignans tam tristia et iniqua contra suam religionem, suosque Pastores facta, nihil antiquius habet, quam et catholicam profiteri fidem, et suos Episcopos omni amore et obsequio prosequi, ac Nobis, et huic Petri Cathedrae firmiter constanterque adhaerere. Quocirca in eam spem erigimur fore, ut dives in misericordia Deus super illam vineam suam propitiatus respiciat, et eam ab omnibus, quibus tantopere affligitur, malis eripiatur.

Iam vero non minori moerore conficimur, Venerabiles Fratres, ob gravissima sane damna, quibus Ecclesia in plerisque meridionalis etiam Americae regionibus, Hispaniarum Regno olim subiectis, a civili potestate miserandum in modum premitur ac divexus. In illis enim regionibus laica potestas, inter alia, sibi temere arrogat ius praesentandi Episcopos, et ab illis exigit ut ineat Dioecesium procurationem, antequam ipsi canonicam ab hac Sancta Sede institutionem, et Apostolicas Litteras accipient. Atque in iisdem regionibus prohibentur Episcopi libere damnare acatholica scripta, nec fas est eis sine Gubernii venia vel ipsas Apostolicas Litteras promulgare. Insuper coarctatur Ecclesiae libertas in acquirendis proprietatibus, et impeditur exsecutio gratiarum huius Apostolicae Sedis, et studiorum methodus in Clericorum Seminariis adhibenda civili auctoritati subiicitur, et ab ipsa laica

polestate ecclesiasticae decimae vel penitus sublatae, vel publico aerario adiudicatae fuere, et iniuncta est Episcopis, ecclesiasticisque viris obligatio iurandi plures res Ecclesiae iuribus adversas, quae in civili Constitutione continentur. In una autem ex ipsis regionibus non solum haec omnia contra Ecclesiae potestatem et iura geruntur, verum etiam civile Gubernium novam de Episcopis eligendis normam praescripsit, qua disciplina ab Ecclesia statuta labefactatur, et legem sancivit, qua ecclesiastici fori privilegium, decimae, et parochorum emolumenta de medio sublata sunt. Praeterea in hac eadem regione et nativum Ecclesiae ius omnino oppugnatur, acquirendi scilicet proprietates, et non omnia admittuntur matrimonialia impedimenta ab Ecclesia statuta; et nullae prorsus declarantur gratiae a Romano Pontifice concessae, nisi per Gubernium fuerint imploratae; et proprio arbitrio immutata est aetas ab Ecclesia praescripta pro religiosa tam mulierum, quam virorum professione, et omnes Religiosae Familiae neminem sine Gubernii permisso ad sollemnia vota nuncupanda admittere possunt. Atque in aliis eiusdem Americae meridionalis regionibus laica potestas eo temeritatis devenit, ut etiam res vel maxime sacras et spirituales, quae ab Episcoporum voluntate unice pendent, suae auctoritati subiicere audeat.

Quae sane omnia, incredibili animi Nostri aegritudine a Nobis breviter cursimque enunciata, quam vehementer improbare ac detestari debeamus, probe intelligitis, Venerabiles Fratres, cum civilis potestas nefariis hisce molitionibus divinam Ecclesiae institutionem, eiusque sanctissimam doctrinam, ac venerandam auctoritatem, disciplinam, omniaque ipsius Ecclesiae iura, ac supremam huius Apostolicae Sedis dignitatem, potestatemque impetrare, convellere, et conculcare connitatur. In tanta vero acerbitate mirifice Nos recreat, et consolatur eximia Venerabilium Fratrum earumdem meridionalis Americae regionum Sacrorum Antistitum virtus, religio, pietas, qui divino auxilio freti, ac proprii muneric partes impletentes cum immortali sui nominis et ordinis laude non desistunt hisce saecularis potestatis conatibus fortiter obsistere,

et qua voce, qua scriptis Ecclesiae libertatem, ac iura tam iniuste occupata tueri, repetere, et confidenter profiteri paralissimi ad omnia subeunda pericula.

At vero minime ignoratis, Venerabiles Fratres, quam vehementer anxii et solliciti simus de tristissima conditione, ad quam sanctissima nostra religio redacta est in Helvetia, ac profecto memineritis, Nos in Consistoriali oratione, die vigesimo sexto mensis Iulii superiore anno habita, raptim perstrinxisse innumera fere damna ibi a laica potestate Ecclesiae, eiusque sacrae auctoritati, iuribus, rebus, Episcopis, et ministris allata. Evidem Nobis in animo est, cum id opportunum existimabimus, peculiarem de hoc molestissimo sane argumento habere sermonem, cum praesertim in illis regionibus multiplices, et omnino detestandi contra Ecclesiam ausus magis in dies invaluerint et excreverint. Interim vero etiamsi non levi animi Nostri solatio, et consolacione noscamus, fidelem illarum regionum Clerum ex parte longe maxima inter plurimas difficultates sui ministerii munia sedulo obire, et pro viribus praeliari bella Domini, tamen Nobis temperare non possumus quin summopere doleamus, improbemus, damnemus perversam paucorum ecclesiasticorum hominum agendi rationem, qui nefariis laicae potestatis conatibus favere, et in Ticinensi praesertim pago maximum bonis omnibus Catholicis scandalum afferre, ac Dei indignationem in se concitare non horrent. Ea porro spe sustentamur fore, ut illarum regionum Moderatores tandem aliquando velint saniora inire consilia, et cognoscere, veram populorum felicitatem prosperitatemque sine divina nostra Religione, eiusque salutari doctrina, ac debito erga veneranda Ecclesiae iura obsequio et reverentia non posse consistere. In quam spem eo magis inducimur quod audivimus, Episcopum ab exilio quamprimum revocatum iri. Faxit Deus, ut huiusmodi Nostrae spes minime sint fallaces!

Nos certe Deo auxiliante nunquam officio Nostro deerimus, et nunquam desinemus omnes perferre labores, omnes suscipere curas, omnia adhibere studia, ut Ecclesiae causam Nobis divini-

tus commissam pro Apostolici Nostri muneris debito viriliter tueamur ac propugnemns. Interea vero una Vobiscum, Venerabiles Fratres, levantes cor et oculos Nostros in montem excelsum et sanctum unde omne Nobis auxilium affuturum confidimus, nunquam intermittamus dies noctesque assiduis precibus gemitibusque misericordiarum Patrem et Deum totius consolationis orare et obsecrare ut omnipotenti sua virtute Ecclesiam suam sanctam a tantis, quibus tum in illis regionibus afflictatur, calamitatibus defendat, eripiat, ac simul dignetur caelesti sua gratia ipsius Ecclesiae inimicorum animos, mentesque illustrare, expugnare, eosque de impietatis et perditionis via ad iustitiae ac salutis semitas reducere.

EPISTOLA

AD EMINENTISSIMUM ARCHIEPISCOPUM COLONIENSEM
DE GÜNTHERIANISM DAMNATIONE

Dilecto Filio Nostro Ioanni, Tituli S. Laurentii in Viminali, Presbytero S. R. E. Cardinali De Geissel, Archiepiscopo Coloniensi.

PIUS PP. IX.

Dilecte Fili Noster, Salutem et Apostolicam Benedictionem. Eximiam Tuam 1 Nobisque plane cognitam pastoralem in catholica doctrina tuenda curam et sollicitudinem non mediocri certe animi Nostri iucunditate undique elucere perspeximus in Litteris, quas, Dilecte Fili Noster, die 16 proximi mensis Aprilis ad Nos dedisti super Decreto Pontificia Nostra auctoritate sancito, atque a Nostra Indicis Congregatione die 8 mensis Ianuarii huius anni edito, quo opera Dilecti Filii Presbyteri Antonii Günther proscripta fuerunt. Nos quidem pro Apostolici Nostri ministerii officio nullis unquam parcentes curis, nullisque laboribus, ut fidei depositum Nobis, divinitus concredimus, integrum inviolatumque custodiatur, ubi primum a pluribus Venerabilibus Fratribus spectatissimis Germaniae Sacrorum Antistitibus accepimus non pauca Güntheri libris contineri, quae ipsi in sincerae fidei, et catholicae veritatis perniciem cedere arbitrabantur, nulla interposita mora eidem Congregationi commisimus, ut ex more opera eiusdem Güntheri accurate diligenterque excuteret, perpenderet, examinaret, ac deinde omnia ad

1. *Huc refertur Syllabi Propositio 14.*

Nos referret. Cum igitur ipsa Congregatio Nostris mandatis obsequuta , suoque munere funcia omnem in hoc gravissimo sane, maximique momenti negotio curam et operam scite riteque collocauerit, nullumque pratermisserit studium in Güntheriana doctrina accuratissimo examine noscenda ac ponderanda , animadvertisit, plura in Güntheri libris reperiri omnino improbanda ac damnanda, utpote quae catholicae Ecclesiae doctrinae maxima adversarentur. Hinc rebus omnibus a Nobis etiam perpensis, eadem Congregatio Decretum illud suprema Nostra auctoritate probatum, Tibique notissimum edidit , quo Güntheriana opera prohibentur et interdicuntur. Quod quidem Decretum Nostra auctoritate sancitum , Nostroque iussu vulgatum sufficere plane debebat, ut quaestio omnis penitus dirempta censeretur , et omnes , qui catholico gloriantur nomine, clare aperteque intelligerent , sibi esse omnino obtemperandum , et sinceram haberi non posse doctrinam Güntherianis libris contentam, ac nemini deinceps fas esse doctrinam iis libris traditam tueri, ac propugnare, et illos libros sine debita facultate legere, ac retinere. A quo quidem obedientiae, debitique obsequii officio nemo immunis propterea videri censerique poterat , quod in eodem Decreto vel nullae nominatim propositiones notarentur , vel nulla certa, stataque adhiberetur censura. Ipsum enim per se valebat Decretum, ne qui sibi integrum putarent ab iis, quae Nos comprobavimus, ultcumque discedere. Sed vehementer errant, qui generalis eiusmodi prohibitionis causam inde profectam esse arbitrantur, quod ipsa Congregatio nullas singillatim Güntherianorum operum sententias, nullasque praecise opiniones censura dignas deprehenderit. Etenim non sine dolore apprime noscimus, in iisdem operibus erroneum, ac perniciosissimum, et ab hac Apostolica Sede saepe damnatum rationalismi sistema ampliter dominari; itemque noscimus, in iisdem libris ea inter alia non pauca legi, quae a catholica fide, sinceraqua explicatione de Unitate divinae substantiae in Tribus distinctis, sempiternisque Personis non minimum aberrant. In compertis pariter habemus, neque meliora , neque accuratiora esse, quae traduntur de Sacramento Verbi Incarnati, deque unitate divinae Verbi personae in duabus naturis divina et humana.

Noscimus, iisdem libris laedi catholicam sententiam ac doctrinam de homine, qui corpore et anima ita absolvatur, ut anima eaque rationalis sit vera per se, atque immediata corporis forma. Neque ignoramus, ea iisdem libris doceri et statui, quae catholicae doctrinae de supra Dei libertate a quavis necessitate soluta in rebus procreandis plane adversantur. Atque illud etiam vel maxime improbandum ac damnandum, quod Güntherianis libris humanae rationi et philosophiae, quae in religionis rebus non dominari, sed ancillari omnino debent, magisterii ius temere attribuatur ac propterea omnia perturbentur, quae firmissima manere debent tum de distinctione inter scientiam et fidem, tum de perenni fidei immutabilitate, quae una semper, atque eadem est, dum philosophia, humanaeque disciplinae neque semper sibi constant, neque sunt a multipli errorum varietate immunes. Accedit, nec ea Sanctos Patres reverentia haberi, quam Conciliorum Canones praescribunt, quamque splendidissima Ecclesiae lumina omnino promerentur, nec ab iis in catholicas Scholas dicteriis abstineri, quae recolendae memoriae Pius VI Decessor Noster solemniter damnavit. Neque silentio praeteribimus, in Güntherianis libris vel maxime violari sanam loquendi formam, ac si liceret verborum Apostoli Pauli oblivisci ¹, aut horum quae gravissime monuit Augustinus: « Nobis ad certam regulam loqui fas est, ne verborum licentia etiam de rebus, quae his significantur, impiam gignat opinionem ² ». Ex quibus omnibus profecto vides, Dilecte Fili Noster, qua cura et studio cum Tibi, tum Venerabilibus Fratribus Episcopis Tuis Suffraganeis sit advigilandum: ut ab istis Dioecesisibus Güntheriana opera amoveantur, et qua singulari sollicitudine excubandum, ne doctrina eisdem operibus contenta et iam proscripta ullo unquam modo sive in philosophicis, sive in theologicis disciplinis a quovis in posterum tradatur, aut comprobetur. Iam vero dum Güntheri opera damnanda esse censuimus, ac censemus, haud possumus, quin tibi significemus, ipsum Dilectum Filium Presbyterum An-

¹ 2. ad Thimoth. 13.

² De Civit. Dei lib. 10. cap. 23.

tonium Günther non mediocri Nos affecisse consolatione, quandoquidem obsequentissimis suis Litteris die 10 mensis Februarii ad Nos scriptis cum summa sui nominis laude amplissimis verbis semel iterumque professus est, nihil sibi potius, quam supremae Nostrae, et huius Apostolicae Sedis auctoritati semper obtemperare, et idcirco se humillime subiicere commemorato Decreto de suis operibus promulgato. Hoc autem egregium sane Güntheri exemplum pari animi Nostri gaudio imitati sunt plures Dilecti Filii Doctores Theologiae, Philosophiae, Historiae ecclesiasticae, et Canonici Iuris in variis Germaniae Lyceis, ac primarii Güntherianae doctrinae asseciae, qui suis ad Nos datis Litteris contestati sunt, se commemorato Decreto humillime subiicere, nihilque sibi magis cordi esse, quam Pontificiae Nostrae, et huius Sanctae Sedis auctoritati animo obedire. Dum vero hac re summopere laetamur, in eam porro spem erigimur fore, ut alii omnes Güntherianae doctrinae sectatores christianam tum ipsius auctoris, tum horum animi docilitatem, et obedientiam, debitamque magisterio Nostro subiectionem Deo bene iuvante aemulari velint, atque ita ipsius auctoris coronam augeant, et Nostram expleant cumulentque laetitiam. Habes, Dilecte Fili Noster, quae Tibi de hoc argumento rescribenda esse existimavimus, atque hac etiam occasione libentissime ultimur, ut iterum ostendamus et confirmemus praecipuam, qua Te in Domino complectimur, benevolentiam. Cuius quoque certissimum pignus esse volumus Apostolicam Benedictionem, quam toto cordis affectu Tibi ipsi, Dilecte Fili Noster, et gregi Tuae vigilantiae commisso peramanter impertimur.

Datum Bononiae, die XV Iunii, anno MDCCCLVII, Pontificatus Nostri Anno Undecimo.

LITTERAE APOSTOLICAE

QUIBUS MAIORIS EXCOMMUNICATIONIS POENA INFLIGITUR
 INVASORIBUS ET USURPATORIBUS ALIQUOT PROVINCiarum
 PONTIFICIAE DITIONIS.

PIUS PP. IX.

AD PERPETUAM REI MEMORIAM

Cum Catholica ¹ Ecclesia a Christo Domino fundata et instituta, ad sempiternam hominum salutem curandam, perfectae societatis formam vi divinae suae institutionis obtinuerit, ea proinde libertate pollere debet ut in sacro suo ministerio obeundo nulli civili potestati subiaceat. Et quoniam ad libere, ut par erat, agendum iis indigebat praesidiis quae temporum conditioni ac necessitali congruerent, idcirco singulari prorsus divinae providentiae consilio factum est, ut cum Romanum corruit imperium et in plura fuit regna divisum, Romanus Pontifex, quem Christus totius Ecclesiae suae caput centrumque constituit, civilem assequeretur principatum. Quo sane a Deo ipso sapientissime consultum est, ut in tanta temporalium Principum multitudine ac varietate Summus Pontifex illa frueretur politica libertate, quae tantopere necessaria est ad spiritualem suam potestatem, auctoritatem et iurisdictionem toto orbe absque ullo impedimento exercendam. Atque ita plane decebat, ne catholico orbi ulla oriretur occasio dubitandi, impulsu fortasse civilium potestatum, vel partium studio duci quandoque posse in universali procuratione gerenda Sedem illam,

¹ Huc referuntur Syllabi Propositiones 63 — 76.

ad quam propter potiorem principalitatem necesse est omnem Ecclesiam convenire.

Facile autem intelligitur quemadmodum eiusmodi Romanae Ecclesiae Principatus , licet suapte natura temporalem rem sapiat , spiritualē tamen induat indolem vi sacrae , quam habet , destinationis , et arctissimi illius vinculi , quo cum maximis Rei Christianae rationibus coniungitur. Quod tamen nil impedit quominus ea omnia, quae ad temporalem quoque populorum felicitatem conducunt , perfici queant , quemadmodum gesti a Romanis Pontificibus per tot saecula civilis regiminis historia luculentissime testatur.

Cum porro ad Ecclesiae bonum et utilitatem respiciat Principatus de quo loquimur, mirum non est quod Ecclesiae ipsius hostes persaepe illum convellere et labefactare multiplici insidiarum et conatum genere contenderint: in quo tamen nefaria illorum molimina , Deo Ecclesiam suam iugiter adiuvante , in irritum serius ocyus ceciderunt. Iam vero novit universus orbis quomodo luctuosis hisce temporibus infestissimi Catholicae Ecclesiae et huius Apostolicae Sedis osores *abominabiles facti in studiis suis* , ac *loquentes in hypocrisi mendacium*, hanc ipsam Sedem, proculcatis divinis humanisque iuribus, civili, quo potitur, Principatu spoliare nequiter admittantur, idque assequi studeant non manifesta quidem, uti alias, aggressione, armorumque vi, sed falsis aequis ac perniciosis principiis callide inductis, ac popularibus motibus malitiose excitatis. Neque enim erubescunt nefandam populis suadere rebellionem contra legitimos principes, quae ab Apostolo clare aper-teque damnatur ita docente : *Omnis anima potestatibus sublimioribus subdita sit. Non est enim potestas nisi a Deo: quae autem sunt, a Deo ordinatae sunt. Itaque qui resistit potestati, Dei ordinationi resistit. Qui autem resistunt ipsis sibi damnationem acquirunt* 1. Dum vero pessimi istiusmodi veteratores temporalem Ecclesiae dominationem aggrediuntur , eiusque venerandam au-

1 S. Paul. Ep. ad Rom. c. XIII. v. 1. et seq.

ctoritatem despiciunt, eo impudentiae deveniunt, ut suam in Ecclesiam ipsam reverentiam et obsequium palam iactare non desinant. Atque illud vel maxime dolendum, quod tam prava agendi ratione sese polluerit non nemo etiam ex iis, qui, uti Catholicae Ecclesiae filii, in ipsius tutelam atque praesidium impendere debent auctoritatem, qua in subiectos sibi populos potiuntur.

In subdolis ac perversis, quas lamentamur, machinationibus praecipuam habet partem Subalpinum Gubernium, a quo pridem omnes norunt quanta et quam deploranda eo in Regno damna ac detrimenta Ecclesiae eiusque iuribus, sacrisque Ministris fuerint inflata, de quibus in Consistoriali potissimum Allocutione, die XXII Ianuarii MDCCCLV habita, vehementer doluimus. Post despectas hactenus Nostras ea de re iustissimas reclamationes Gubernium ipsum eo temeritatis modo progressum est, ut ab irroganda universali Ecclesiae iniuria minime abstinuerit, civilem impetens Principatum, quo Deus hanc B. Petri Sedem instructam voluit ad apostolici ministerii libertatem, uti animadvertisimus, tuendam atque servandam. Primum sane ex manifestis aggressionis indiciis prodiit quum in Parisiensi Conventu, anno 1856 acto, ex parte eiusdem Subalpini Gubernii inter hostiles nonnullas expositiones speciosa quaedam ratio proposita fuit ad civile Romani Pontificis dominium infirmandum, et ad Ipsius Sanctaeque huius Sedis auctoritatem imminuendam. Ubi vero superiore anno Italicum exarsit bellum inter Austriae Imperatorem, et foederatos invicem Imperatorem Galliarum ac Sardiniae Regem, nihil fraudis nihil sceleris praetermissum est, ut Pontificiae Nostrae Ditionis populi ad nefariam defectionem modis omnibus impellerentur. Hinc instigatores missi, pecunia largiter effusa, arma suppeditata, incitamenta pravis scriptis et ephemeredis admota, et omne fraudum genus adhibitum vel ab illis, qui eiusdem Gubernii legatione Romae fungentes, nulla habita genium iuris honestatisque ratione, proprio munere perperam abutebantur ad tenebricosas molitiones in Pontificii Nostri Gubernii perniciem agendas.

Oborta deinde in nonnullis Ditionis Nostrae Provinciis, quae dudum occulte comparata fuerat, seditione, illico per fautores Regia Dictatura proclamata est, statimque a Subalpino Gubernio Commissarii adlecti, qui, alio etiam nomine postea appellati, provincias illas regendas sumerent. Dum haec agerentur, Nos gravissimi officii Nostri memores non praetermisimus binis Nostris Allocutionibus die XX Iunii et XXVI Septembris superiore anno habitis de violato civili huiusce S. Sedis principatu altissime conqueri, simulque violatores serio monere de censuris ac poenis per canonicas sanctiones inflictis, in quas ipsi proinde misere inciderant. Existimandum porro erat, patralae violationis auctores per iteratas Nostras monitiones ac querelas ab iniquo proposito destituros, praesertim cum universi Catholici Orbis Sacrorum Antistites, et fideles cuiusque ordinis, dignitatis et conditionis eorum curae commissi suas nostris expostulationibus adiungentes unanimi alacritate Nobiscum huius Apostolicae Sedis, et universalis Ecclesiae iustitiaeque causam propugnandam susceperint, cum optime intelligerent, quantopere civilis, de quo agitur, principatus ad liberam supremi Pontificatus iurisdictionem intersit. Verum (horrescentes dicimus!) Subalpinum Gubernium non solum Nostra monita, querelas, et ecclesiasticas poenas contempsit, sed etiam in sua persistens improbitate, populari suffragio, pecuniis, minis, terrore aliisque callidis artibus contra omne ius extorto, minime dubitavit commemoratas Nostras provincias invadere, occupare, et in suam potestatem dominationemque redigere. Verba quidem desunt ad tantum improbandum facinus, in quo plura et maxima habentur facinora. Grave namque admittitur sacrilegium, quo una simul aliena iura contra naturalem divinamque legem usurpantur, omnis iustitiae ratio subvertitur, et cuiusque civilis Principatus ac totius humanae Societatis fundamenta penitus evertuntur.

Cum igitur ex una parte non sine maximo animi Nostri dolore intelligamus, irritas futuras novas expostulationes apud eos qui *velut aspides surdae obturantes aures suas* nihil hucusque moni-

tis ac questibus Nostris commoti sunt ; ex altera vero parte intime sentiamus quid a Nobis in tanta rerum iniuitate omnino postulet Ecclesiae huiusque Apostolicae Sedis ac totius Catholici Orbis causa, improborum hominum opera tam vehementer oppugnata, idcirco cavendum Nobis est ne diutius cunctando gravissimi officii Nostri muneri deesse videamur. Eo nempe adducta res est ut illustribus Praedecessorum Nostrorum vestigiis inhaerentes suprema illa auctoritate utamur , qua cum solvere , tum etiam ligare Nobis divinitus datum est ; ut nimirum debita in sontes adhibetur severitas, eaque salutari ceteris exemplo sit.

Itaque post Divini Spiritus lumen privatis publicisque precibus imploratum, post adhibitum selectae VV. FF. NN. S. R. E. Cardinalium Congregationis consilium, Auctoritate Omnipotentis Dei et SS. Apostolorum Petri et Pauli ac Nostra denuo declaramus , eos omnes, qui nefariam in praedictis Pontificiae Nostrae Ditionis Provinciis rebellionem et earum usurpationem , occupationem , invasionem , et alia huiusmodi , de quibus in memoratis Nostris Allocutionibus die XX Iunii et XXVI Septembbris superioris anni conquesti sumus, vel eorum aliqua perpetrarunt, itemque ipsorum mandantes , fautores , adiutores , consiliarios , adhaerentes , vel alios quoscumque praedictarum rerum exequutionem quolibet praetextu et quovis modo procurantes , vel per se ipsos exequentes , Maiorem Excommunicationem , aliasque censuras ac poenas ecclesiasticas a SS. Canonibus , Apostolicis Constitutionibus , et Generalium Conciliorum , Tridentini praesertim ¹, Decretis inflictas incurrisse ; et si opus est , de novo Excommunicamus , et Anathematizamus , item declarantes , ipsos omnium et quorumcumque privilegiorum , gratiarum , et indultorum sibi a Nobis , seu Romanis Pontificibus Praedecessoribus Nostris, quomodolibet concessorum amissionis poenas eo ipso pariter incurrisse ; nec a censuris huiusmodi a quoquam , nisi a Nobis, seu Romano Pontifice pro tempore existente (praeterquam in mortis articulo , et

¹ Sess. XXII. cap. 11. de Reform.

tunc cum reincidentia in easdem censuras eo ipso quo convaluerint) absolvit ac liberari posse; ac insuper inhabiles et incapaces esse qui absolutionis beneficium consequantur, donec omnia quomodolibet attentata publice retractaverint, revocaverint, cassaverint et aboleverint, ac omnia in pristinum statum plenarie et cum effectu redintegraverint, vel alias debitam et condignam Ecclesiae, ac Nobis, et huic Sanctae Sedi satisfactionem in praemissis praestiterint. Idcirco illos omnes, etiam specialissima mentione dignos, nec non illorum successores in officiis a retractatione, revocatione, cassatione et abolitione omnium ut supra attentatorum per se ipsos facienda, vel alias debita et condigna Ecclesiae, ac Nobis, et dictae S. Sedi satisfactione realiter et cum effectu in eisdem praemissis exhibenda, praesentium Litterarum, seu alio quocumque praetextu, minime liberos et exemptos, sed semper ad haec obligatos fore et esse, ut absolutionis beneficium obtinere valeant, earumdem tenore praesentium decernimus et pariter declaramus.

Dum autem hanc munera Nostri partem, tristi Nos urgente necessitate, moerentes implemus, minime obliviscimur, Nosmet-ipsos Illius hic in terris vicariam operam agere, qui *non vult mortem peccatoris, sed ut convertatur et vivat*, qui in mundum *venit quaerere, et salvum facere quod perierat*. Quapropter in humilitate cordis Nostri ferventissimis precibus Ipsius misericordiam sine intermissione imploramus et exposcimus, ut eos omnes, in quos ecclesiasticarum poenarum severitatem adhibere coacti sumus, divinae suae gratiae lumine propitiis illustret, atque omnipotenti sua virtute de perdilionis via ad salutis tramitem reducat.

Decernentes, praesentes Litteras, et in eis contenta quaecumque, etiam ex eo quod praefati, et alii quicumque in praemissis interesse habentes, seu habere quomodolibet praetendentes, cuiusvis status, gradus, ordinis, praeminentiae, et dignitatis existant, seu alias specifica et individua mentione et expressione digni illis

non consenserint, seu ad ea vocati, citati et audit, causaeque, propter quas praesentes emanaverint, sufficienter adductae, verificatae, et iustificatae non fuerint, aut ex alia qualibet causa, colore, praetextu, et capite, nullo unquam tempore de subreptionis vel obreptionis, aut nullitatis vitio, aut intentionis Nostrae, vel interesse habentium consensus, ac alio quocumque defectu notari, impugnari, infringi, retractari, in controversiam vocari, aut ad terminos iuris reduci, seu adversus illas aperitionis oris, restitutionis in integrum, aliudve quodcumque iuris, facti, vel gratiae remedium intentari vel impetrari, aut impetrato, seu etiam motu, scientia, et potestatis plenitudine paribus concessso, et emanato, quempiam in iudicio, vel extra illud uti, seu iuvari ullo modo posse; sed ipsas praesentes Litteras semper firmas, validas, et efficaces existere et fore, suosque plenarios et integros effectus sortiri, et obtainere, ac ab illis, ad quos spectat, et pro tempore quandocumque spectabit, inviolabiliter et inconcusse observari: sicque et non aliter in praemissis per quoscumque iudices ordinarios et delegatos, etiam causarum Palatii Apostolici Auditores, et S. R. E. Cardinales, etiam de Latere Legatos, et Sedis praedictae Nuncios, aliasve quoslibet quacumque praeminentia et potestate fungentes, et funcluros, sublata eis et eorum cuiilibet quavis aliter iudicandi et interpretandi facultate et auctoritate, iudicari et definiri debere; ac irritum et inane, si secus super his a quoquam quavis auctoritate scienter vel ignoranter contigerit attentari.

Non obstantibus praemissis, et quatenus opus sit, Nostra et Cancellariae Apostolicae regula de iure quaesito non tollendo, aliisque Constitutionibus et Ordinationibus Apostolicis, nec non quibusvis etiam iuramento, confirmatione Apostolica, vel quavis firmitate alia roboratis statutis, et consuetudinibus, ac usibus, et stylis etiam immemorabilibus, privilegiis quoque, indultis, et Litteris Apostolicis praedictis, aliisque quibuslibet Personis, etiam quacumque ecclesiastica vel mundana dignitate fulgentibus, et

alias quomodolibet qualificatis, et specialem expressionem requirentibus sub quibuscumque verborum tenoribus et formis, ac cum quibusvis etiam derogatoriis derogatoriis, aliisque efficacioribus, efficacissimis, et insolitis clausulis, irritantibusque, et aliis Decretis, etiam motu, scientia, et potestatis plenitudine similibus, et consistorialiter, et alias quomodolibet in contrarium praemissorum concessis, editis, factis ac pluries iteratis et quantiscumque vicibus approbatis, confirmatis, et innovatis. Quibus omnibus et singulis, etiamsi pro illorum sufficienti derogatione de illis eorumque totis tenoribus specialis, specifica, expressa, et individua, ac de verbo ad verbum, non autem per clausulas generales idem importantes, mentio, seu quaevis alia expressio habenda, aut aliqua alia exquisita forma ad hoc servanda foret, tenores huiusmodi, ac si de verbo ad verbum, nil penitus omissio, et forma in illis tradita observata, exprimerentur et insererentur, praesentibus pro plene et sufficienter expressis et insertis habentes, illis alias in suo robore permansuris, ad praemissorum effectum hac vice dumtaxat specialiter et expresse derogamus, et derogatum esse volumus, ceterisque contrariis quibuscumque non obstantibus.

Cum autem eaedem praesentes Litterae ubique, ac praesertim in locis, in quibus maxime opus esset, nequeant tute publicari, uti notorie constat, volumus illas, seu earum exempla ad valvas Ecclesiae Lateranensis, et Basilicae Principis Apostolorum, nec non Cancellariae Apostolicae, Curiaeque Generalis in Monte Cittorio, et in Acie Campi Florae de Urbe, ut moris est, affigi et publicari, sicque publicatas et affixas omnes et singulos, quos illae concernunt, perinde arctare, ac si unicuique eorum nominatim et personaliter intimatae fuissent.

Volumus autem ut earumdem Litterarum Transumptis, seu Exemplis, etiam impressis, manu alicuius Notarii Publici subscriptis, et sigillo alicuius Personae in dignitate ecclesiastica constitutae munitis, eadem prorsus fides ubique locorum et gentium

tam in iudicio, quam extra illud ubique adhibeatur, quae adhibe-
retur ipsis praesentibus, ac si forent exhibitae vel ostensae.

Datum Romae apud S. Petrum, sub Annulo Piscatoris, die
XXVI Martii Anno MDCCCLX. Pontificatus Nostri Anno Decimo
Quarto.

Lo+co Sigilli

PIUS PP. IX.

*Anno a Nativitate Domini MDCCCLX. Indict. III. die vero 29 Martii
Pontificatus SS^mi in Christo Patris et Domini Nostri Domini PII divina
providentia PAPAE NONI anno XIV. praesentes Litterae Apostolicae
affixae et publicatae fuerunt ad valvas Basilicarum Lateranensis et Vati-
canae, Cancellariae Apostolicae, ac Magnae Curiae Innocentianae atque
in Acie Campi Florae per me Aloisium Serafini Apost. Curs.*

Philippus Ossani Magis. Curs.

LITTERAE

VENERABILI FRATRI HENRICO EPISCOPO WRATISLAVIENSI
DIE XXX APRILIS ANNI MDCCCLX

PIUS PP. IX.

Venerabilis Frater, Salutem et Apostolicam Benedictionem. Dolorre haud ¹ mediocri litteris, quas nuper ad Nos dedisti, percepimus dissidia Catholicorum per Antonii Güntheri philosophiam enata, posteaquam Sedes Apostolica de huius scriptoris operibus et doctrina iudicasset, nondum esse penitus extincta; propterea quod cum alibi tum in ista Wratislaviensi Academia etiam inter sacrae doctrinae Magistros reperiantur, qui nonnulla saltem Güntheriana dogmata retinere atque defendere multis videantur. Quorum unus, dilectus scilicet Filius Ioannes B. Baltzer Wratislaviensis Ecclesiae Canonicus, cum libellum, in quo de hominis natura disseritur, Tibi, Venerabilis Frater, tradidisset, precibus eius obsecundans, libellum eundem ad Nos transmisisti, rogans, ut Nostro iudicio, quid de doctrina in eo contenta sentiendum sit definiretur. Ac Nos quidem Tuum, Venerabilis Frater, studium catholicae doctrinae tuendae magnopere laudantes, atque pro munera Nostri officio nihil magis curae habentes quam *fidei depositum* ubique terrarum intactum custodire, interque Christifideles *serbare unitatem spiritus in vinculo pacis*, Baltzeri scriptum nonnullis huius almae Urbis Theologis discutiendum tradidimus. Quorum fida relatione compertum Nobis est, in eo doctrinam eandem, quae in Güntheri libris

1 *Huc refertur Syllabi Propositione 14.*

traditur et ante horum proscriptionem a Baltzero quoque propugnabatur, retineri, nihilque aliud agi, nisi ut haec doctrina demonstretur et Verbo Dei scripto ac tradito conformis, nec ulla ratione contraria esse iis, quae SS. Concilia, nominatim Conc. Oecumenicum VIII et Viennense sub Clemente V, statuerunt, aut ipsi Nos litteris ad dilectum Filium nostrum Cardinalem Presbyterum De Geissel Archiepiscopum Coloniensem, die 15 Junii 1857 datis, iudicavimus, dicentes *hominem corpore et anima ita absolvī*, *ut anima eaque rationalis sit vera per se atque immediata corporis forma*. At vero Nos non modo his verbis catholicam de homine doctrinam declaravimus, sed etiam hanc ipsam *catholicam doctrinam doctrina Güntheri laedi* pronuntiavimus. Ad quod si Baltzer animum advertisset, intellexisset sane, doctrinam de homine, quam in suo scripto profitetur, tamquam ecclesiasticis dogmatibus consentaneam defendere idem esse atque Nosmet incusare, quod in Güntheriana doctrina iudicanda erraverimus.

Notatum praeterea est, Baltzerum in illo suo libello cum omnem controversiam ad hoc revocasset, sitne corpori vitae principium, proprium ab anima rationali re ipsa discretum, eo temeritatis progressum esse, ut oppositam sententiam et appellaret haereticam, et pro tali habendam esse multis verbis argueret. Quod quidem non possumus non vehementer improbare, considerantes hanc sententiam, quae unum in homine ponit vitae principium, animam scilicet rationalem, a qua corpus quoque et motum et vitam omnem et sensum accipiat, in Dei Ecclesia esse communissimam atque Doctoribus plerisque, et probatissimis quidem maxime, cum Ecclesiae dogmate ita videri coniunctam, ut huius sit legitima solaque vera interpretatio, nec proinde sine errore in fide possit negari.

Quae cum Tibi, Venerabilis Frater, ex certa scientia et motu proprio rescribimus, ardenter cupimus, imo fidenter speramus fore, ut dilectus Filius Ioannes Baltzer et ceteri, qui huic aliisve Güntheri opinionibus a Nobis reprobatis quocunque modo adhaeserint, iam se erga hanc Ecclesiam, quam Christus Dominus reliquarum omnium Matrem et Magistrum esse voluit, dociles et

morigeros exhibeant, quemadmodum et Baltzer ipse et alii dum laudabiliter sunt polliciti. Te vero, Venerabilis Frater, hortamur, ut Apostoli exemplo *in captivitatem redigens omnem intellectum in obsequium Christi*, hanc plenam submissionem ab iis praesertim, qui alias docent, auctoritate Tua postules, licentiam autem eorum, qui forte audire detrectant, potestate, quam dedit Tibi Deus, coerceas.

Superest, ut Tibi, Venerabilis Frater, ac gregi universo tuis curis commisso Apostolicam Benedictionem toto cordis affectu impertiamur.

Datum Romae apud Sanctum Petrum, die XXX Aprilis Anno MDCCCLX. Pontificatus Nostri Anno Decimoquarto.

ALLOCUTIO

**HABITA IN CONSISTORIO SECRETO DIE XXVIII SEPTEMBRIS
ANNI MDCCCLX.**

VENERABILES FRATRES

Novos et ante¹ hunc diem inauditos ausus a Subalpino Gubernio contra Nos, hanc Apostolicam Sedem, et Catholicam Ecclesiam admissos denuo cum incredibili animi Nostri dolore vel moerore potius deplorare ac detestari cogimur, Venerabiles Fratres. Ipsum, uti nostis, Gubernium victoria abutens, quam bellicosae magnaenque nationis opibus adiutum ex funestissimo bello reportavit, suum per Italianam regnum contra omnia divina et humana iura extendens, populis ad rebellionem excitatis, legitimisque Principibus ex propria dominatione per summam iniustitiam expulsis, aliquot Pontificiae Nostrae in Aemilia ditionis provincias iniustissimo ac prorsus sacrilego ausu invasit et usurpavit. Dum autem universus Catholicus Orbis iustissimis gravissimisque nostris respondens querelis contra hanc impiam usurpationem vehementer clamare non desinit, idem Gubernium alias huius Sanctae Sedis provincias in Piceno, Umbria, et Patrimonio sitas sibi vindicare constituit. At cum videret, earum provinciarum populos omni perfrui tranquillitate, eosque Nobis fideliter adhaerere nec posse pecuniis largiter profusis, aliisque improbis adhibitis dolis a legitimo Nostro et huius Sanctae Sedis civili imperio alienari ac divelli, iccirco in ipsas provincias immisit tum perditorum hominum manum, qui turbas seditionemque ibi excitarent, tum ingen-

1 Huc referuntur Syllabi Propositiones 62 — 76.

tem suum exercitum, qui easdem provincias hostili impetu armorumque vi subiiceret.

Optime nostis, Venerabiles Fratres, impudentes litteras a Subalpino Gubernio ad suum tuendum latrocinium Nostro Cardinali a publicis negotiis scriptas, quibus haud erubuit nuntiare, se suis copiis in mandatis dedisse, ut commemoratas Nostras provincias occuparent nisi dimitterentur exteri homines adscripti parvo Nostro exercitui, qui ceteroquin ad Pontificiae ditionis, eiusque populorum tranquillitatem servandam fuerat instructus. Nec ignoratis, a Subalpinis copiis easdem provincias ipso fere tempore fuisse occupatas, quo illae litterae accipiebantur. Evidem nemo non potest magnopere commoveri, et summa affici indignatione reputans mendaces criminationes, variasque calumnias et contumelias, quibus idem Gubernium haud pudet huiusmodi suam hostilem impiamque contra civilem Romanae Ecclesiae principatum aggressionem tegere, Nostrumque Gubernium impetere. Equis enim non summopere miretur audiens, Nostrum reprehendi Gubernium, propterea quod Nostro exercitui externi homines fuerint adscripti, cum omnes noscant nulli legitimo Gubernio denegari unquam posse ius cooptandi in suas copias exteriores homines? Quod quidem ius potiori quadam ratione ad Nostrum et huius Sanctae Sedis Gubernium pertinet, cum Romanus Pontifex, veluti communis omnium catholicorum pater, non possit non libentissime eos omnes catholicos excipere, qui religionis studio impulsu velint in Pontificiis copiis militare et ad Ecclesiae defensionem concurrere. Atque hic animadvertisendum existimamus, huiusmodi catholicorum exterorum concursum fuisse praesertim excitatum illorum improbitate, qui civilem huius Sanctae Sedis principatum aggressi sunt. Nemo enim ignorat qua indignatione, et quo luctu universus catholicus orbis fuerit commotus ubi novit tam impiam, tamque iniustam civili huius Apostolicae Sedis dominio agressionem fuisse illatam. Ex quo porro factum est, ut quamplurimi ex variis christiani orbis regionibus fideles sua sponte et summa alacritate ad Pontificiam Nostram ditionem convolaverint, suumque nomen Nostrae militiae dederint, quo Nostra, huius Sanctae

Sedis, et Ecclesiae iura strenue defenderent. Singulari autem malignitate Subalpinum Gubernium Nostris militibus mercenarii notam per summam calumniam inurere minime veretur, cum non pauci ex indigenis exterisque Nostris militibus nobili genere natii, et illustrium familiarum nomine conspicui, ac religionis amore unice excitati, sine ullo emolumento in Nostris copiis militare voluerint. Neque latet Subalpinum Gubernium qua fide et integritate Noster exercitus praestet, cum eidem Gubernio perspectum sit, irritas fuisse omnes dolosas artes adhibitas ut Nostri milites corrumperentur. Nihil vero est cur immoremur in refellenda feritatis accusatione Nostris copiis improbe illata, cum nullum plane argumentum obtrectatores valeant adducere, quin potius huiusmodi criminatio in ipsos iure converti possit, quemadmodum vulgatae Subalpini exercitus Ducum truculentae proclamationes manifestissime ostendunt.

Hic autem animadvertere praestat, Nostro Gubernio minime suspicandum fuisse de huiusmodi hostili invasione, cum ipsi asseveratum esset Subalpinas copias prope territorium Nostrum accessisse non quidem invadendi animo, immo vero ut inde perturbatorum turmas arcerent. Hinc summus Nostrarum copiarum Dux ne cogitare quidem poterat, sibi cum Subalpino exercitu esse pugnandum. Verum ubi, rebus praeter omnem expectationem perperam immutatis, agnovit hostilem irruptionem ab illo exercitu factam, qui sane pugnantium numero armorumque vi maxime praevalebat, providum suscepit consilium se Anconam, utpote arce munitam, recipiendi, ne Nostri milites tam facili mortis periculo exponerentur. Cum autem ingruentibus hostium copiis in itinere interciperetur, manus conserere coactus est, ut sibi militibusque suis viam aperiret.

Ceterum dum meritas debitasperaque laudes tribuimus commemo-rato Nostrarum copiarum Duci, ac illarum ductoribus, et militibus, qui inspectata hostili irruptione lacessti pro Dei, Ecclesiae, huius Apostolicae Sedis, ac iustitiae causa fortiter, viribus licet longe imparibus, dimicarunt; vix lacrimas contineri possumus noscentes quot strenui milites, ac lectissimi praesertim iuvenes in

hac iniusta et crudeli invasione occubuerint, qui religioso sane nobilique animo ad civilem Romanae Ecclesiae principatum tuendum advolarunt. Nos insuper summopere commovet luctus, qui in illorum familias redundat. Utinam eisdem familiis fletum Nostris verbis abstergere possemus! Confidimus vero non levi ipsis solatio et consolationi futuram honorificentissimam mentionem, quam de extinctis suis liberis et propinquis merito facimus ob splendidum sane eximiae eorum erga Nos et hanc Sanctam Sedem fidei, pietatis et amoris exemplum, quod christiano orbi cum immortali eorum nominis laude exhibuerunt. Atque in eam profecto spem erigimur fore, ut ii omnes, qui gloriosam pro Ecclesiae causa mortem obierunt, illam sempiternam assequantur pacem et beatitatem, quam a Deo Optimo Maximo apprecaui sumus, et apprecari nunquam omitteremus. Quo loco debitissimae laudibus prosequimur dilectos Filios Praesides provinciarum, praesertim Urbino-Pisaurensis, et Spoletanae, qui in hac tristissima temporum vicissitudine suo munere sedulo constanterque perfuncti sunt.

Iam vero, Venerabiles Fratres, quis ferre unquam poterit insignem impudentiam et hypocrisim, qua nequissimi invasores insuis programmatibus asserere nou dubitant, se Nostras aliasque Italiae adire provincias, ut ibi moralis ordinis principia restituant? Atque id ab eis temere affirmatur, qui acerrimum Catholicae Ecclesiae, eiusque Ministris, ac rebus iamdiu bellum inferentes, et ecclesiasticas leges, censurasque plane despicientes ausi sunt spectatissimos tum S. R. E. Cardinales, tum Episcopos, tum probatissimos ultriusque Cleri Viros in vincula coniicere, Religiosas Familias e propriis Coenobiis expellere, Ecclesia bona diripere, et civilem huius Sanctae Sedis principatum vastare. Scilicet moralis ordinis principia ab iis reslituentur, qui publicas cuiusque falsae doctrinae scholas, et meretricias etiam domos constituunt, qui abominandis scriptis et scenicis spectaculis pudorem, pudicitiam, honestatem, virtutem offendere, eliminare, et sacrosancta divinae nostrae religionis mysteria, sacramenta, praecepta, et instituta, sacrosque ministros, ritus, caeremonias irridere, con-

temnere, omnemque iustitiae rationem de medio tollere, ac tum religionis tum civilis societatis fundamenta labefactare et evertere connituntur!

In hac igitur tam iniusta, tam hostili et horrenda civilis Nostri et huius Sanctae Sedis principatus aggressione et occupatione a Subalpino Rege, eiusque Gubernio contra omnes iustitiae leges et universale gentium ius peracta, Nostri officii probe memores in hoc amplissimo Vestro consessu, et coram universo Catholico Orbe Nostram vocem denuo vehementer attollimus, ac omnes nefarios sacrilegosque eiusdem Regis et Gubernii ausus reprobamus, penitusque damnamus, omnesque actus plane nullos et irritos declaramus, decernimus, ac civilis, quo Romana pollet Ecclesia, principatus integritatem, eiusque iura, quae ad omnes catholicos pertinent, etiam atque etiam reclamamus, et reclamare nunquam desistemus.

Verum dissimulare non possumus, Venerabiles Fratres, summa Nos opprimi amaritudine, cum in tam scelestata et nunquam satis exsecranda aggressione alieni auxilii opem, variis exortis difficultibus adhuc desideremus. Evidem notissimae Vobis sunt iteratae declarationes Nobis factae ab uno ex potentissimis Europae Principibus. Attamen dum illarum iamdiu expectamus effectum, non possumus non vehementer angi ac perturbari cum inspiciamus nefandae usurpationis auctores fautoresque audacter insolenterque in nefario suo proposito persistere ac progredi, tamquam certo confidentes neminem sibi reapse adversari.

Haec autem perversitas eo devenit, ut hostilibus Subalpini exercitus copiis ad moenia fere huius almae Nostrae urbis immissis, quaecumque fuerit implicata communicatio, publicae privataeque rationes in discrimen adductae, commeatus intercepti, et, quod gravissimum est, Summus totius Ecclesiae Pontifex in molestam redactus difficultatem Ecclesiae ipsius negotiis, prout res postulat, consulendi, propterea quod maxime coarctetur via cum variis orbis partibus communicandi. Quamobrem in tantis Nostris angustiis, tantoque rerum discrimine vel facile intelligitis, Venerabiles Fratres, Nos tristi necessitate eo iam ferme impelli, ut vel invit

cogitare debeamus de opportuno suscipiendo consilio ad Nostram dignitatem tuendam.

Interim abstinere non possumus, quin praeter alia deploremus funestum ac perniciosum principium, quod vocant de *non Interventu* a quibusdam Guberniis haud ita pridem, ceteris tolerantibus, proclamatum, et adhibitum etiam cum de iniusta alicuius Gubernii contra aliud aggressione agatur: ita ut quaedam veluti impunitas ac licentia impetendi ac diripiendi aliena iura, proprietates, ac ditiones ipsas contra divinas humanasque leges sanciri videatur; quemadmodum luctuosa hac tempestate cernimus evenire. Et mirandum profecto, quod uni Subalpino Gubernio impune liceat eiusmodi principium despicere ac violare, cum videamus ipsum hostilibus suis copiis, universa Europa inspectante, in alienas ditiones irrumpere, legitimosque ex illis Principes exturbare: ex quo perniciosa consequitur absurditas, alienum nempe interventum dumtaxat admitti ad rebellionem suscitandam atque fovendam.

Hinc autem opportuna Nobis oritur occasio excitandi omnes Europae Principes, ut pro spectata ipsorum consilii gravitate et sapientia serio perpendant quae quantaque mala in detestabili, quem lamentamur, eventu cumulentur. Agitur enim de immani violatione, quae contra universale gentium ius nequiter est patrata, quaeque nisi omnino coercentur, nulla deinceps legitimi cuiusque iuris firmitas ac securitas poterit consistere. Agitur de rebellionis principio, cui Subalpinum Gubernium turpiter inservit, et ex quo primum est intelligere, quantum cuicumque Gubernio discrimen in dies comparetur, et quanta in universam civilem societatem redundet pernicies, cum ita fatali *Communismo* aditus aperiatur. Agitur de violatis solemnibus Conventionibus, quae, uti aliorum in Europa Principatum, ita etiam civilis Pontificiae ditionis integritatem sartam tectamque servari omnino postulant. Agitur de violenta direptione illius Principatus, qui singulari divinae providentiae consilio Romano Pontifici datus est ad Apostolicum suum Ministerium in universam Ecclesiam plenissima libertate exercendum. Quae profecto libertas summae

omnibus Principibus curae esse debet, ut Pontifex ipse nullius civilis potestatis impulsui subiaceat, atque ita spirituali pariter catholicorum in eorumdem Principum dominis degentium tranquillitati cautum sit.

Itaque omnibus Supremis Principibus persuasum esse debet, Nostram cum Ipsorum causa plane esse coniunctam, eosque suum Nobis auxilium afferentes Nostrorum aequa ac suorum iurum incolumenti esse prospecturos. Maxima proinde cum fiducia ipsos hortamur et obsecramus, ut opem Nobis, pro sua quisque conditione et opportunitate, velint impendere. Non dubitamus autem, quin catholici praesertim Principes ac Populi omnem eorum curam et operam studiosissime conferant, ut pro communi eorum officio universi Dominici gregis Patrem et Pastorem, parricidialibus degeneris filii armis oppugnatum, modis omnibus adiuvare, tueri et defendere properent atque festinent.

Cum autem apprime sciatis, Venerabiles Fratres, omnem spem Nostram in Deo esse collocandam, qui adiutor et refugium est nostrum in tribulationibus nostris, quiue vulnerat et medetur, percutit et sanat, mortificat et vivificat, deducit ad inferos et reducit; iccirco in omni fide et humilitate cordis nostri assiduas ferventissimasque ad Ipsum, adhibito in primis efficacissimo Immaculatae Sanctissimaeque Deiparae Virginis Mariae patrocinio, ac suffragio Beatorum Petri et Pauli, preces effundere non intermittamus, ut faciens potentiam in brachio suo inimicorum suorum superbiam elidat, et expugnet impugnantes nos, omnesque Ecclesiae suae sanctae hostes humiliet et conterat; atque omnipotenti suae gratiae virtute efficiat, ut omnium praevaricantium corda resipiscant, deque optatissima illorum conversione sancta mater Ecclesia quam primum laetetur.

ALLOCUTIO

HABITA IN CONSISTORIO SECRETO DIE XVII DECEMBRIS
ANNI MDCCCLX.

VENERABILES FRATRES

Multis gravibusque ¹ vel ab ipso sui exordio iactata procellis Ecclesia miserrima hac nostra aetate tot tanisque hostium aggressionibus petita est, ut conceptum iampridem ab ipsis odium omnisque furoris maturitas in Nostri Pontificatus tempus erupisse videatur. Neque vero persequamur singula necesse est, Venerabiles Fratres, quae haud ita longo annorum intervallo acerba et gravia contigerunt, quorum memoria Nostrum aequa Vestrumque animum non levi moerore perfundat. Illud vero dissimulare non possumus, pro arcano Dei iudicio, nullum adhuc fuisse impositum tam multis calamitatibus modum, novas quippe dolemus ingruere tum ex fautoribus perversae doctrinae, quae a funestissimae Reformationis principiis orta publici veluti iuris robur alicubi obtinuit, tum ex impiorum hominum pravitate, qui Catholicae Ecclesiae se filios praedicant, appellandi vero sunt filii tenebrarum, tum denique ex ethnicorum furore, qui per Orientis regiones in caedem exitiumque fidelium vehementius efferbuit.

Et sane maxime est deplorandum, in quampluribus Europae partibus de Ecclesiae potestate ac iuribus perniciosissimos errores invaluisse: hinc adhibitum assidue studium ad vim omnem abiudicandam initis cum Apostolica Sede de re sacra conventione

¹ Huc referuntur Syllabi Propositiones 19 — 37 — 43 — 73.

nibus, hinc omnis impensa cura, ut ne conventiones aliae contrahantur in posterum ad componenda Ecclesiae negotia, utque iis componendis moderandisque civilis dumtaxat accedat auctoritas. Quod quidem non sine gravi animi Nostri molestia experti nuper sumus, Venerabiles Fratres. Pro Apostolici enim muneric officio ad relevandas in Magno Badarum Ducatu Catholicae Ecclesiae res, et extinguenda illic exorta cum civili potestate dissidia, superiore, ut scitis, anno cum Celsissimo illo Duce conventionem inivimus, quae quum rata fuisse habita, et vero etiam in vulgus emissâ, eiusdem executionem, ut par erat, praestolabamur. Verumtamen, refragante huic rei publico illius ditionis Consilio, a Magno Duce decretum fuit editum, quo conventioni vis omnis adimitur, in eiusque locum rogata lex est Ecclesiae libertati vel maxime adversa. Id porro ex falsa protestantium doctrina derivatum intelligimus, qui autumant Ecclesiam in civili Imperio quoddam veluti Collegium existere, nullisque proinde pollere iuribus, praeter ea quae concessa illi sint atque attributa a civili potestate. Id autem quantopere abhorreat a veritate ecquis non intelligat? Ecclesia nempe ut vera et perfecta societas a divino auctore suo fuit instituta, quae nullis circumscripta regionum finibus, nulli etiam civili subdatur imperio, suamque potestatem ac iura ubique terrarum in hominum salutem libere exerceat. Nec sane aliter indicant solemnia illa Christi Domini ad Apostolos verba: « Data est mihi omnis potestas in caelo et in terra, ite docete omnes gentes . . . docentes eas servare omnia quaecumque mandavi vobis ». Quibus excitati vocibus Evangelii praecones Apostoli, repugnantibus et regibus et principibus nullisque seu minis seu suppliciis deterriti demandatum sibi ministerium alacriter sunt executi. Nos itaque de salutaribus Ecclesiae iuribus tutandis vehementer solliciti, vix dum cogitari atque agi audivimus de eadem conventione infirmando, Nostras continuo Magno Duci dedimus litteras ad malum hoc avertendum, atque adeo per Cardinalem publicis negotiis praepositum apud Gubernium illud instandum curavimus, ut debitae executioni con-

ventio mandaretur. Sed enim quum impensa omnia studia curaeque in irritum cesserint, quod Nostri officii est, abrogatam contra omnes iustitiae regulas sine alterius partis consensu solemnem conventionem, Vestro in coetu, Venerabiles Fratres, palam conquerimur, et Catholicae Ecclesiae, sanctaeque Sedis iura violata pessumdata vehementiori, quo possumus, studio reclamamus. Quae Nostrae expostulationes ut ad Badense Gubernium transmittantur mandavimus, simulque declaretur Archiepiscopo Friburgensi agendi ratio tantis in difficultatibus adhibenda; cuius praeclarri Antistitis eiusque etiam Cleri commendare satis non possumus in Ecclesiae libertate tuenda constantiam, a qua nunquam ipsos vel in summo rerum discrimine discessuros plane confidimus.

Iam vero quum ob turbatas iterum in Magno Badarum Ducatu sacras res, expositamque illic novis iactationibus Ecclesiam doleremus, alia Nobis accessit molestiae causa ex nequissimo libello nuper Parisiis edito, in quem tam multa prorsus a veritate aliena, tam multa etiam absurdia atque inter se pugnantia auctor congesit, ut respuendus potius atque aspernandus, quam refutandus videatur. Illud tamen non est ferendum, quod eo audaciae atque impietatis devenerit, ut posteaquam sacrum civilemque Ecclesiae Romanae principatum impetere non sit veritus, peculiarem quamdam novique generis sibi fingat Ecclesiam in Galliarum Imperio ex illius sententia excitandam, quae ab auctoritate Romani Pontificis subducta sit planeque divisa. Id porro quid est aliud, quam distrahere, ac proscindere Catholicae Ecclesiae unitatem? De qua quidem necessaria unitate ita Christus Dominus ad Patrem: « Non « pro eis rogo tantum, sed pro eis etiam, qui credituri sunt per « verbum eorum in me, ut omnes unum sint, sicut tu, Pater, in « me es et ego in te ». Atqui huius unitatis vis et ratio omnino postulat, ut tamquam membra cum capite, sic universi per orbem fideles cum Romano Pontifice, qui Christi in terris Vicarius est, coniungantur et coalescant. Quamobrem ad Praedecessorem Nostrum sanctae memoriae Damasum scribebat Ecclesiae doctor

Hieronymus: « Beatitudini tuae hoc est Petri Cathedrae, communio-
 « ne consocior, supra illam Pelram aedificatam Ecclesiam scio ,
 « quicumque extra hanc domum agnum comederit profanus est ».
 Quantam vero memorati libelli auctor infert iniuriam perillustri
 Galliarum genti, utpote quam Catholicae unitatis retinentissimam
 schismaticis putat erroribus posse implicari ! Quanta illius temeri-
 tas est, quod ab obsequio ac fide erga Apostolicam Sedem abs-
 trahendum fore confidat Clerum illum et spectatissimos praeser-
 tim Antistites, qui Praedecessores inter suos Irenaeum recenseant
 Lugdunensis Ecclesiae Pastorem, paeclara ista scribentem: « Ad
 « Romanam Ecclesiam propter potiorem principalitatem necesse
 « est omnem convenire Ecclesiam, hoc est eos, qui sunt undique
 « fideles »: qui nullo fracti metu, nullo retardali periculo, tum voce
 tum scriptis Nostra Sanctaeque Sedis iura vindicare certaverint ,
 Nobisque exhibere nunquam intermiserint certissima devotionis
 argumenta ! Quorum Nos, aliorumque per orbem Antistitum dum
 meritis ornamus paeconiis pastoralem curam, vigilantiam, firmi-
 tatem, ipsos licet sponte sua incensos erectosque ad Catholicae fi-
 dei defensionem, hortari tamen atque excitare pro hac temporum
 iniquitate praetermittimus, ut quo validiores quotidie hostiles im-
 petus fiant, eo firmiori animo sustinendos ac frangendos curent ,
 atque adeo commissos suae curae fideles de fallaciis insidiisque
 admonere non desinant, quibus avellere ipsos a Matris Ecclesiae
 gremio vaferimi homines connitantur. Iam vero ex damnando
 illo libello, quaenam tandem sint auctoris et ceterorum omnium
 consilia, qui civilem Sanctae Sedi principatum extorquere conan-
 tur, detracta veluti larva manifeste deprehendimus. Scilicet nihil
 aliud intendunt ac moliuntur, quam ut Sanctissimae Religionis
 fundamenta subvertant. Id sane per provincias a civili Nostra
 dominatione iniuste subreptas, id per reliquas Italiae regiones perfi-
 dissimis quibusque artibus studiose curari et videmus et ingemi-
 scimus. Huc spectant disseminatae quaquaversus perversae sacro-
 rum librorum interpretationes ad fidem corrumpendam, diffusa ad
 contaminandos iuventutis mores turpissimorum libellorum collu-

vies, inventa quocumque effraenis vivendi licentia, despecta, proculata Ecclesiae potestas, sacra immunitas violata, subducta ab auctoritate et vigilantia Episcoporum publica iuventutis institutio omnisque doctrinae morumque disciplina, praepositi docendo homines de religione prave sentientes, evulgatum in Umbria decretum de cunctis ferme religiosis familiis e claustro exturbanis, de extinguendis Collegiatis Capitulis, delendisque simplicibus cuiusvis generis Beneficiis, piisque Sodalitiis eorumque bonis per summam iniuriam occupandis; huc spectant coniecti in vincula ecclesiastici viri, ipsique sacri Antistites, quos inter Venerabilis Frater Archiepiscopus Urbinas, nuper septus armis in custodiam traditus, et Cardinalitia etiam dignitate fulgens Venerabilis Frater Firmanus Antistes per vim abreptus a Sede sua, alioque relegatus, et ab omni commissi gregis curatione prohibitus, ac plures etiam Antistites et Sacerdotes e Regno Neapolitano vel in carcerem missi, vel ad fugam coacti; huc spectant (nec sine acerbissimo doloris sensu memoramus) patefacta per nonnullas Italiae civitates protestantibus tempa, et publicae etiam scholae instituae, ubi in perniciem Catholicae Religionis quaelibet impune tradatur doctrinae perversitas; denique promulgatum in Umbria decretum, quo matrimonium, nuncupatum ab Apostolo magnum Sacramentum, peculiaribus civilibus disciplinis illigatur, ac ferme subtrahitur ab Ecclesiae potestate, eo fortasse consilio ut postea civilibus dumtaxat subdatur legibus, eaque ratione, quod Deus avertat, legalis invehatur concubinatus cum extremo animarum detimento. Atque hic, uti Apostolici Nostri munera ratio postulat, quidquid contra Ecclesiae iura et patrimonium, contra religiosas personas earumque bona actum hucusque est, vel peragatur in posterum, damnamus, reprobamus, ac nullius vis et roboris, ac prorsus irritum palam edicimus. Quanta vero ubique sit rerum omnium tum publicarum tum privatarum perturbatio, quantus in Europa motus, quantis dissidiis flagret Italia, ecquis non videat ac Nobiscum non maxime doleat? Tam multa tamque gravia rei sacrae et civili inflictis vulnera considerantes exclamare cogimur

cum Propheta: « Infecta est terra ab habitatoribus suis quia trans-
« gressi sunt leges, mulaverunt ius, dissipaverunt foedus semi-
« ternum ».

Haec autem malorum congeries ab iis maxime repetenda, qui ut suam per Italiae fines ditionem extendant humana quaeque iura ac divina audacter pervertunt, qui publicae se felicitatis autores iactant ac praedicant, quocumque tamen pervaserint, ibidem saevissimae veluti tempestates impressa relinquunt furoris excidiique vestigia. Utinam aliquando redeant insipientes ad cor, nimirum intelligent, Religione sublata, nullum humanae societati superesse praesidium tum ad stabilitatem tum ad quietem! Utinam sibi aliquando persuadeant, unam esse Catholicam Religionem veritatis magistrum, virtutum omnium altricem, in qua civitatum, regnorum incolumitas salusque nilatur! Meminerint aliquando, Apostolicam hanc Sedem nedum adversatam nunquam fuisse verae ac solidae populorum felicitati, quin etiam quovis tempore de universo hominum genere fuisse egregie promeritam; per illam namque traductae ad humanitatem barbarae gentes, vereque religionis praeceptis institutae, sedati bellorum tumultus, proiectae modis omnibus bonae artes ac disciplinae, calamitosis aegrisque recreandis publica caritatis excitata domicilia, asserta, promulgata et principibus et populis vel in maximis perturbationibus iustitiae atque honestatis principia. Haec atque alia quamplura per Apostolicam Sedem in bonum humanae societatis provide sapienterque peracta, multis eximiisque testata monumentis, ad omnis praedicationem temporis celebrabit historia.

Sed iam paternum animum Nostrum ad se revocat plurimis afflita malis per Orientem Ecclesia, quae tamen cruentis martyrum palmis nobilitari ornarique non desinit. Loquimur nempe, Venerabiles Fratres, de regno Chorea, de Sinensium Imperio regnisque finitimus, ubi neque atrocissimis cruciatibus, nec dirissimo quovis mortis genere debilitata aut victa est Christianorum in fide constantia; loquimur de Conchinchinae ac Tonchini regionibus, in quibus ad extinctionem prorsus christiani nominis acerbissime

recruduit ethnicorum immanitas. Quid enim memorabimus collegia, coenobia, templa, publicas privatasque aedes vel solo eversas, vel flammis absumptas? Quid Christifideles referemus cuiusque aetatis, conditionis, ordinis partim saevissime exagitatos, nudatosque rebus omnibus hac illac errantes vitam trahere coactos quovis suppicio acerbiorem, partim in carcerem detrusos, omnibusque tormentorum genere excruciatos, qui tamen in ferendis pro Christo suppliciis ac morte obeunda veterum Ecclesiae Martyrum fortitudinem retulerunt? Neque minus Nos tangit ac movet miserrima Christianorum per Syriam conditio, qui, licet a crudelissimae caedis perpessione quieverint, assiduo turbantur metu ne compressus tantisper militaribus Europae copiis infidelium impetus in rapinas iterum caedesque furentius erumpat. Illorum Nos relevandis infortuniis, sin minus paternis desideriis parem, aliquam tamen pro angustis nostris rebus pecuniae partem transmittendam curavimus, quam offerre Nobis nunquam intermisit pia Catholicarum gentium liberalitas. Quarum etiam non sine laude commemoratum volumus egregium caritatis exemplum in recreandis subsidiorum largitate afflictis per Syriam fidelibus, atque adeo maximopere laetamur, nunquam languescere in Ecclesia virtutem illam, quam divinus Reparator praecipuum esse signum voluit Christianae Religionis.

Hic, quem hactenus exposuimus, sacrarum rerum et publicarum status, deplorandus quidem ac luctuosus, Nos vehementer angit atque perturbat, et gravi etiam moerore complet, Venerabiles Fratres; Vosque in partem vocatos procurationis Nostrae in partem etiam doloris venire non dubitamus. Sed tamen non concidamus animo, atque iteralis quotidie precibus levemus oculos nostros in montem, unde in tantis rerum asperitatibus opportum expectemus auxilium. Aderit Ecclesiae suae Deus, aderit humilitati Nostrae, Eiusque Nos virtute roboratos ab officio et constantia Apostolici Ministerii nullus plane periculi metus, nulla deterrebit adversitas. Innocens Christianorem sanguis, quo perfusa Orientalis terra est, in odorem suavitatis ascendat ad Dominum,

illoque salutari velut sacrificio placatus gravissimas, quibus pre-
mimur quaeque impendent, calamitates propitius avertat; atque
accidente Sanctissimae Genitricis Dei ab origine Immaculatae pa-
trocino, et beatissimis Apostolis Petro et Paulo suffragantibus,
concedat Ecclesiae suae de acerbissimis inimicis referre victoriam.
Exsurgat aliquando in iudicium Deus, hostesque sui nominis re-
ligionis excidium anhelantes, multa et nefaria in Ecclesiam mo-
lientes in fortitudine brachii sui disperdat et conterat, vel, quod
potius et optamus et poscimus, divinae gratiae lumine collustra-
tos in viam iustitiae et veritatis dives in misericordia clementis-
sime traducat.

ALLOCUTIO

HABITA IN CONSISTORIO SECRETO DIE XVIII MARTII
ANNI MDCCCLXI.

VENERABILES FRATRES

Iamdudum cernimus ¹, Venerabiles Fratres, quo misero sane conflictu ob invicem pugnantia inter veritatem et errorem, inter virtutem et vitium, inter lucem et tenebras principia, hac miserrima nostra praesertim aetate civilis exagitetur societas. Namque alii ex una parte luentur quaedam modernae, uti appellant, civilitatis placita, alii ex altera iustitiae sanctissimaeque nostrae Religionis iura propugnant. Ac primi postulant, ut Romanus Pontifex cum *Progressu*, cum *Liberalismo*, uti vocant, ac recenti civilitate se reconciliet et componat. Alteri vero merito efflagitant, ut immobilia et inconcussa aeternae iustitiae principia integra et inviolata custodiantur, et saluberrima divinae nostrae Religionis vis omnino servetur, quae et Dei gloriam amplificat, et opportuna tot malis, quibus humanum genus affligitur, affert remedia, quaeque est unica veraque norma, qua filii hominum in hac mortali vita omni virtute instituti ad beatae aeternitatis portum perducuntur. Sed hodiernae civilitatis patroni huiusmodi haud acquiescunt, quandoquidem sese veros et sinceros Religionis amicos affirmant. Ac Nos fidem eis adhibere vellemus, nisi tristissima sane facta, quae ante omnium oculos quotidie versantur, contrarium prorsus ostenderent. Et quidem una est vera ac sancta super terram religio ab ipso Christo Domino fundata et instituta, quae virtutum

¹ Huc referuntur Syllabi Propositiones 37 — 61 — 76 — 80.

omnium foecunda parens et altrix, ac vitiorum expultrix, et animorum liberatrix, veraeque felicitatis index, appellatur Catholica, Apostolica, Romana. Quid autem sentiendum de iis, qui extra hanc salutis arcam vivunt, iam alias declaravimus in Consistoriali Nostra Allocutione diei 9 Decembris anni millesimi octingentesimi quinquagesimi quarti, atque hic eamdem doctrinam confirmamus. Iam vero ab iis, qui pro Religionis bono Nos ad hodiernae civilitati dexteram porrigendam invitant, quaerimus utrum facta talia sint, quae Christi hic in terris Vicarium ab Ipso ad caelestis suae doctrinae puritatem tuendam, atque ad agnos ovesque eadem doctrina pascendas et confirmandas divinitus constitutum possint inducere, ut sine gravissimo conscientiae piaculo, et maximo omnium scandalo se cum hodierna civitate consociet, cuius opera tot nunquam satis deploranda eveniunt mala, tot tetricae opiniones, errores et principia promulgantur, quae catholicae Religioni eiusque doctrinae omnino adversantur. Atque inter haec facta nemo ignorat quomodo vel ipsae solemnes conventiones inter hanc Apostolicam Sedem et Regios Principes rite initae penitus destruantur, veluti nuper Neapoli accidit. Qua quidem de re in hoc amplissimo vestro consessu etiam atque etiam querimur, Venerabiles Fratres, et summopere reclamamus eo prorsus modo, quo contra similes ausus et violationes alias protestati sumus.

Haec autem moderna civitas dum cuique acatholicis cultui favet, ipsosque infideles a publicis muneribus obeundis minime prohibet, et catholicas scholas illorum filiis recludit, irascitur adversus Religiosas Familias, adversus Instituta catholicis scholis moderandis fundata, adversus quamplurimos cuiusque gradus ecclesiasticos Viros amplissima etiam dignitate insignitos, quorum non pauci vitam in exilio incerto aut in vinculis misere agunt, et adversus etiam spectatos laicos viros, qui Nobis et huic Sanctae Sedi addicti Religionis iustitiaeque causam alacriter defendunt. Haec civitas dum acatholicis institutis ac personis subsidia largitur, catholicam Ecclesiam iustissimis suis possessionibus spoliat, et omnia adhibet consilia ac studia ad salutarem ipsius Ecclesiae efficaciam imminuendam. Insuper dum omnem tribuit li-

bertatem quibusque verbis et scriptis, quae Ecclesiam omnesque ipsi ex corde devotos aversantur, ac dum licentiam animat, alit et foveat, eodem tempore se omnino cautam moderatamque exhibit in reprehendenda violenta et immiti interdum agendi ratione contra eos adhibita, qui optima vulgant scripta ; et omnem in puniendo exercet severitatem , si ab his moderationis fines vel leviter praeteriri arbitretur.

Huiusmodi igitur civilitati posset ne unquam Romanus Pontifex amicam pretendere dexteram, et cum ea foedus concordiamque ex animo inire ? Vera rebus vocabula restituantur, et haec Sancta Sedes sibi semper constabit. Siquidem ipsa verae civilitatis continenter fuit patrona et altrix; atque historiae monumenta eloquentissime testantur ac probant, omnibus aetatibus ab eadem Sancta Sede in disiunctissimas quasque et barbaras terrarum orbis regiones veram rectamque fuisse invectam morum humanitatem, disciplinam, sapientiam. At cum civilitatis nomine velit intelligi sistema apposite comparatum ad debilitandam ac fortasse etiam delendam Christi Ecclesiam, nunquam certe quidem haec Sancta Sedes et Romanus Pontifex poterunt cum huiusmodi civitate convenire. *Quae enim, uti sapientissime clamat Apostolus, participatio iustitiae cum iniquitate, aut quae societas luci ad tenebras? Quae autem conventio Christi ad Belial 1?*

Qua igitur probitate perturbatores, et seditionis patroni suam vocem attollunt ad exaggerandos conatus frustra ab ipsis adhibitos, ut se cum Romano Pontifice componant ? Hic enim, qui suam omnem vim haurit ex aeternae iustitiae principiis, quoniam pacto posset illa unquam deserere , ut sanctissima debilitetur fides, atque adeo Italia in discrimin adducatur amittendi maximum suum splendorem et gloriam, qua undeviginti ab hinc saeculis refulget ob centrum et sedem, qua praestat, catholicae veritatis ? Neque obiici potest, hanc Apostolicam Sedem in rebus civilis principatus clausas habuisse aures illorum postulationibus, qui liberiorem administrationem exoptare significarunt.

Ut vetera omittamus exempla, de hac nostra infelici aetate loquemur. Ubi enim Italia a legitimis suis Principibus liberiores institutiones obtinuit, Nos paternum animum gerentes filiorum partem Pontificiae Nostrae ditionis in civilem administrationem cooptavimus, et oportunas dedimus concessiones, propriis tamen prudentiae modis ordinatas, ne munus paterno animo concessum per malorum hominum operam veneno inficeretur. At vero quid inde factum est? Effraena licentia innocua Nostra largitate potita est, et Aulae, quo publici Ministri ac Deputati convenerant, limina sanguine respersa, et impia manus in eum sacrilege conversa qui beneficium concesserat. Quod si recentissimis hisce temporibus consilia circa civilem procriptionem Nobis data fuerunt, haud ignoratis, Venerabiles Fratres, illa a Nobis admissa fuisse, eo tamen excepto ac reiecto, quod non ad civilem administrationem respiciebat, sed eo spectabat, ut spoliationis parti iam patratae assentiremur. Nihil vero est cur de consiliis bene acceptis, deque Nostris sinceris ad illa exsequenda promissis loquamur, cum usurpationum moderatores alta voce profiterentur, se non quidem reformationes, sed absolutam ribellionem, omnemque a legitimo Principe seiunctionem omnino velle. Atque ipsi erant gravissimi facinoris auctores et antesignani, qui suis clamoribus omnia replebant, non vero populus, ut de illis merito dici possit, quod Venerabilis Beda de Pharisaeis et Scribis Christi inimicis aiebat ¹ *Non haec aliqui de turba sed Pharisaei calumniabantur et Scribae, sicut Evangelistae testantur.*

Sed Romani Pontificatus oppugnatio non solum eo spectat, ut haec Sancta Sedes et Romanus Pontifex legitimo suo civili principatu omnino privetur, sed eo etiam tendit, ut infirmetur, et, si fieri unquam posset, plane tollatur salutaris catholicae religionis virtus: ac propterea impedit Dei ipsius opus, redemptionis fructum, et sanctissimam illam fidem, quae pretiosissima est haereditas in nos derivata ex ineffabili sacrificio, quod in Golgotha

¹ Lib. I. c. 48. in c. 11. Lucae.

consummatum est. Atque ita se rem habere satis superque demonstrant tum commemorata iam facta , tum ea quae in dies e- venire videmus. Quot enim in Italia Dioeceses ob illata impedimenta suis Episcopis orbatae , plaudentibus modernae civilitatis patronis, qui tot christianos populos sine pastoribus derelinquunt, et illorum bonis potiuntur, ut ea in pravos etiam usus convertant! Quot sacrorum Antistites in exilio versantur ! Quot (cum incredibili animi Nostri dolore dicimus) apostatae, qui non Dei sed Satae nomine loquentes, ac impunitate ipsis a fatali regiminis systemate concessa fidentes , et conscientias exagitant , et infirmos ad praevericandum impellunt , et misere lapsos in turpissimis quibusque doctrinis obfirmant , et Christi vestem lacerare contendunt , cum minime reformident Nationales , uti dicunt , Ecclesias , aliasque id genus impietates proponere ac suadere ! Postquam vero ita religioni insultaverint, quam per ipocrisim invitant ut cum hodierna civilitate conveniat , non dubitant pari cum hypocrisi Nos excitare ut cum Italia reconciliemur. Scilicet cum omni fere civili Nostro principatu spoliati gravissima Pontificis et Principis onera sustineamus piis Catholicae Ecclesiae filiorum largitionibus quotidie amantissime ad Nos missis , cumque gratis invidiae et odii signum facti simus eorum ipsorum opera , qui conciliationem a Nobis postulant ; id vellent praeterea , ut palam declararemus , usurpatas Pontificiae Nostrae ditionis Provincias in liberam usurpatorum proprietatem cedere. Qua sane audaci et hactenus inaudita postulatione quaererent, ut ab hac Apostolica Sede , quae semper fuit et erit veritatis iustitiaeque propugnaculum , sanciretur , rem iniuste violenterque direptam posse tranquille honesteque possideri ab iniquo aggressore ; utque ita falsum constitueretur principium , fortunatam nempe facti iniustitiam nullum iuris sanctitati detrimentum afferre. Quae postulatio iis etiam repugnat solemnibus verbis, qui in magno et illustri Senatu nuperrimis hisce diebus declaratum est : *Romanum Pontificem esse Repraesentatorem praecipuae vis moralis in humana societate.* Ex quo illud consequitur , eum nullo modo posse vandalicae spoliationi consentire , quin fundamentum violet illius

moralis disciplinae , cuius ipse veluti prima forma et imago dignoscitur.

Iam vero quicumque vel errore deceptus vel timore percusus praebere velit consilia iniustis perturbatorum civilis societatis votis consentanea, necesse est ut hisce potissimum temporibus sibi omnino persuadeat , illos nunquam contentos fore , nisi viderint omne auctoritatis principium, omne religionis frenum, omnemque iuris iustitiaeque regulam de medio tolli. Atque huiusmodi subversores in civilis societatis calamitatem illud iam tum voce tum scriptis assequuti sunt , ut humanas mentes perverterint , morallem sensum debilitaverint , et iniustitiae horrorem eripuerint ; atque omnia conantur ut cunctis persuadeant , ius ab honestis gentibus invocatum nihil aliud esse , nisi iniustam voluntatem quae debeat omnino contemni. Heu ! vere *luxit et defluxit terra et infirmata est , defluxit orbis , infirmata est altitudo populi terrae. Et terra infecta est ab habitatoribus suis : quia transgressi sunt leges, mutaverunt ius, dissipaverunt foedus sempiternum* 1.

Verum in tanta tenebrarum obscuritate , qua Deus inscrutabili suo iudicio gentes sinit offundi , Nos omnem Nostram spem fiduciamque plane collocamus in ipso clementissimo misericordiarum Patre et Deo totius consolationis, qui Nos consolatur in omni tribulatione Nostra. Ipse namque est , qui Vobis , Venerabiles Fratres , concordiae et unanimitalis inter Vos spiritum ingerit , et quotidie magis ingeret, ut Nobiscum arctissime aequa ac concordissime coniuncti parati sitis una Nobiscum sortem illam subire, quae arcano divinae suae providentiae consilio cuique nostrum reservata sit. Ipse est , qui caritatis vinculo inter se, et cum hoc catholicae veritatis et unitatis centro coniungit sacrorum christiani orbis Antistites, qui fideles sibi commissos evangelicae veritatis doctrina instituunt , eisque iter in tanta caligine tuto secundum monstrant, nuntiantes virtute prudentiae populis sanctissima verba. Ipse super omnes catholicas gentes effundit spiritum precum, et acatholicis aequitatis sensum inspirat , ut rectum de ho-

diernis eventibus ferant iudicium. Haec autem tam mira in universo catholico orbe precum consensio , tamque unanimes erga Nos amoris significationes , tot sane variisque modis expressae (quod in anteactis aetatis haud facile queat inveniri) manifestissime ostendunt, quemadmodum hominibus recte animatis opus omnino sit tendere ad hanc Beatissimi Principis Apostolorum Cathedram, lucem terrarum orbis, quae magistra veritatis et nuntia salutis semper docuit, et usque ad consummationem saeculi immutabiles aeternae iustitiae leges docere nunquam desinet. Tantum vero abest, ut Italiae populi ab hisce luculentissimis filialis erga Apostolicam hanc Sedem amoris et observantiae testimentiis abstinuerint, ut immo quamplura centena ipsorum millia Nos amantissimis litteris adiverint non eo quidem consilio ut conclamatam a veteratoribus reconciliationem peterent, sed ut Nostras molestias , poenas , angores summopere dolerent, suumque erga Nos affectum omnimode confirmarent, et nefariam sacrilegamque civilis Nostri eiusdemque Sedis principatus spoliationem etiam atque etiam detestarentur.

Cum porro ita se res habeant , antequam loquendi finem faciamus, coram Deo et hominibus clare aperteque declaramus , nullam prorsus adesse causam quare cum quopiam Nos reconciliari debeamus. Quoniam vero, licet immerentes , Illius hic in terris vice fungimur, qui pro transgressoribus rogavit veniamque petiit, probe sentimus a Nobis parcendum iis qui Nos oderunt , ac pro ipsis orandum ut divinae gratiae auxilio resipiscant , atque ita illius, qui Christi hic in terris vicariam gerit operam, benedictionem promereantur. Libenter utique pro illis oramus , iisque, statim ac resipuerint, ignoscere ac benedicere parati sumus. Interim tamen non possumus inertes haerere, veluti qui nullam de huminis calamitatibus curam capiunt ; non possumus non vehementer commoveri et angi, ac uli Nostra non reputare maxima damna et mala iis nequiter illata, qui persecutionem patiuntur propter iustitiam. Quocirca dum intimo moerore conficimur , Deumque obsecramus , gravissimum supremi Nostri Apostolatus munus implemus loquendi , docendi et damnandi quaecumque Deus Eiusque

Ecclesia docet et damnat, ut ita cursum Nostrum consummemus, et ministerium verbi, quod accepimus a Domino Iesu, testificari Evangelium gratiae Dei.

Itaque si iniusta a Nobis petantur, praestare non possumus: si vero postuletur venia, illam ultro libenterque, uti nuper declaravimus, impertiemur. Ut autem huiusce veniae verbum eo proferamus modo, qui Pontificiae Nostrae dignitatis sanctitatem omnino decet, flectimus ante Deum genua, et triumphale nostrae redemptionis amplectentes vexillum, Christum Iesum humillime deprecamur, ut Nos eadem sua repleat caritate, ut eo prorsus modo ignoscamus quo Ipse suis pepercit inimicis, antequam sanctissimum suum spiritum in aeterni Patris Sui traderet manus. Atque ab Ipso impensissime exposcimus, ut quemadmodum post veniam ab Eo tributam, inter densas tenebras, quibus universa terra fuit obducta, inimicorum suorum mentes illustravit, qui horrendi facinoris poenitentes revertebantur percutientes pectora sua, ita in hac tanta nostrae aetatis caligine velit ex inexhaustis infinitae suae misericordiae thesauris caelestis ac triumphaticis suae gratiae effundere dona, quibus omnes errantes ad unicum suum ovile redeant. Quaecumque autem futura sint investigabilia divinae suae providentiae consilia, ipsum Christum Iesum Ecclesiae suae nomine rogamus, ut Vicarii sui causam, quae Ecclesiae suae causa est, iudicet, eamque contra hos illum suorum conatus defendat, ac gloria Victoria exornet et augeat. Ipsum item exoramus ut perturbatae societati ordinem tranquillitatemque restituat, et optatissimam pacem tribuat ad iustitiae triumphum, quem ab Eo unice expectamus. In tanta enim trepidatione Europae totiusque terrarum orbis, et eorum, qui arduo funguntur munere moderandi populorum sortes, Deus unus est, qui Nobiscum et pro Nobis pugnare possit: *Iudica nos, Deus, et discerne causam nostram de gente non sancta: da pacem, Domine, in diebus nostris, quia non est aliis qui pugnet pro nobis, nisi tu, Deus Noster.*

ALLOCUTIO

HABITA IN CONSISTORIO SECRETO DIE XXX SEPTEMBRIS
ANNI MDCCCLXI.

VENERABILES FRATRES

Meminit unusquisque ¹ vestrum, Venerabiles Fratres, quanto animi Nostri dolore in hoc amplissimo vestro consessu saepissime lamentati simus gravissima et nunquam satis deploranda damna catholicae Ecclesiae, huic Apostolicae Sedi, Nobisque cum maximo ipsius civilis societatis detimento illata a Subalpino Gubernio, atque a funestissimae rebellionis auctoribus et fautoribus in miseria praesertim Italiae regionibus, quas idem Gubernium iniuste aequa ac violenter usurpavit. Nunc vero inter alia innumera et semper graviora vulnera sanctissimae nostrae religioni ab ipso Gubernio, et nefariae conspirationis hominibus indesinenter inflicta, dolere cogimur, Dilectum Filium Nostrum clarissimum vestrum Collegam, ac vigilantissimum Neapolitanae Ecclesiae Archiepiscopum pietate ac virtute conspicuum, quem hic praesentem intuemini, militari manu fuisse comprehensum, et a proprio grege cum ingenti bonorum omnium luculu avulsum. Omnes autem norunt quomodo eiusdem Gubernii et rebellionis satellites omni dolo et fallacia pleni, atque abominabiles facti in viis suis veterum haereticorum molitiones et furores renovantes, et contra sacra omnia debacchantes, Dei Ecclesiam, si fieri unquam posset, funditus evertere, et catholicam religionem, eiusque salutarem do-

¹ Huc refertur Syllabi Proposito 20.

ctrinam ex omnium animis radicitus extirpare , et pravas quasque cupiditates excitare et inflammare connilantur. Hinc , omnibus divinis humanisque proculcatis iuribus, et ecclesiasticis censoris omnino spretis , Sacrorum Antistites audacius in dies a propriis Dioecesibus expulsi , atque etiam in carcerem missi , et quamplurimi fideles populi suis orbati pastoribus , et utriusque Cleri viri miserandum in modum divexati , omnibusque iniuriis exagitati , et Religiosae Familiae extinctae , earumque Sodales e suis Coenobiis electi , ad rerum omnium inopiam redacti , et Virgines Deo Sacrae panem emendicare coactae, et religiosissima Dei Templa spoliata , polluta , et in latronum speluncas conversa , et sacra bona direpta , et ecclesiastica potestas , ac iurisdictio violata , usurpata , et Ecclesiae leges despectae et concuplicatae. Hinc publicae depravatarum doctrinarum scholae constitutae , et pestiferi libelli et ephemeredes e tenebris emissae , ac late per omnia loca immanibus huius scelestae coniurationis sumptibus dissipatae. Quibus perniciosissimis et abominandis scriptis sanctissima fides, religio, pietas, honestas, pudicitia, pudor, omnisque virtus oppugnantur, ac vera et inconcussa aeternae naturalisque legis, ac publici privatique iuris principia, praecpta evertuntur, et legitima cuiusque libertas, proprietas impeditur, ac domesticae cuiusque familiae et civilis societatis fundamenta labefactantur, omniumque bonorum fama falsis criminibus, maximisque laceratur conviciis , et effraenis vivendi, et quidlibet audendi licentia, omniumque vitiorum et errorum impunitas maiorem in modum fovet, propagatur, ac promovetur. Nemo vero non videt quam luctuosa omnium calamitatum, scelerum, et exitiorum series ex hoc tanto impiae rebellionis incendio in miseram praesertim Italiam redundaverit. Etenim, ut Prophetae verbis utamur : « *Maledictum, et mendacium, et homicidium,*
 « *et furtum, et adulterium inundaverunt, et sanguis sanguinem*
 « *tetigit 1* » Horret quidem refugilque dolore animus, et commemorare reformidat, plura in Neapolitano Regno oppida incensa

et solo aequata, et innumerabiles prope, integerrimosque Sacerdotes Religiososque viros, et cuiusque aetatis, sexus et conditionis cives, ac vel ipsos aegrotantes indignissimis contumeliis affectos, et, indicta etiam causa, aut in carcerem detrusos, aut crudelissime necatos. Ecquis non acerbissimo conficiatur moerore videns, a furentibus rebellionis hominibus, nullam sacris Ministris, nullam Episcopali et Cardinalitiae dignitati, nullam Nobis, et huic Apostolicae Sedi, nullam sacris templis et rebus, nullam iustitiae, nullam humanitati reverentiam haberí, sed omnia excidiis et vastationibus compleri? Haec autem ab iis patrantur, qui minime erubescunt summa impudentia asserere, se velle Ecclesiae libertatem dare, et moralem sensum Italiae restituere. Neque illos pudet a Romano Pontifice postulare, ut iniustis eorum desideriis annuere velit, ne maiora in Ecclesiam damna redundant.

Atque illud quoque vel maxime dolendum, Venerabiles Fratres, quod nonnulli ex utroque Clero in Italia viri, ecclesiastica etiam dignitate ornati, tam funesto aberrationis et rebellionis spiritu misere abrepti, ac propriae vocationis et officii omnino obliti a veritatis tramite declinaverint, et pravis impiorum hominum consiliis faventes cum incredibili bonorum omnium luctu facti sint lapis offendit et petra scandali.

Ad haec autem, quae deploramus, mala illud etiam per molestem accedit, quod haud ita pridem in Mexicana ditione eiusdem generis homines simili contra catholicam Ecclesiam odio incensi non extimuerunt iniquissimas leges eiusdem Ecclesiae potestati, iuribus, doctrinae plane adversas promulgare, ecclesiastica bona praedari, sacras aedes spoliare, in ecclesiasticos religiososque viros saevire, Virgines Deo devotas divexare, Episcopos variis oppressos iniuriis a suis gregibus distrahere, et in exilium pellere, qui fere omnes in hanc almam urbem Nostram venerunt, et non levi Nobis solatio fuere propter egregias virtutes, quibus tantopere praestant.

Neque id satis; nam in alia Americae parte, scilicet in Neogranatensi ditione, recentissimis hisce diebus rerum civilium per-

turbatores suprema auctoritate potiti infandum protulere decre-
tum, quo ecclesiastica potestas suam auctoritatem exercere prohi-
betur absque civilis gubernii venia et assensu, et inclytae Socie-
tatis Iesu Sodales, de re christiana et civili optime meritos, extur-
barunt, atque insuper Nostrum Sanctaeque huius Sedis Delega-
tum a ditionis finibus triduo abire coegerunt.

Enimvero in hac tanta tamque tristi omnium divinarum hu-
manarumque rerum perturbatione vel facile intelligitis, Venera-
biles Fratres, quanta afflictionem amaritudine. In maximis vero
curis et angustiis, quas, sine peculiari Dei auxilio, ferre nullo mo-
do possumus, summae certe consolationi Nobis est eximia Vene-
rabilium Fratrum tum Italiae, tum universi catholici orbis Sa-
crorum Antistitum religio, virtus ac fortitudo. Namque iidem Vene-
rabilis Fratres arctissimo fidei, caritatis et observantiae vin-
culo Nobis et huic Petri Cathedrae mirifice obstricti, nullisque
periculis deterriti, cum immortali sui nominis et ordinis laude
proprium ministerium implentes, non desinunt, tum voce, tum
sapientissimis scriptis, Dei Eiusque Sanctae Ecclesiae, et huius
Apostolicae Sedis causam, iura, doctrinam, et iustitiae atque hu-
manitatis rationes impavide defendere, propriique gregis incolu-
mitati diligenter consulere, ac falsas et erroneas inimicorum ho-
minum doctrinas refellere, et impiis illorum conatibus viriliter
constanterque obsistere. Nec minori quidem iucunditate perfundi-
mur, cum videamus quot splendidis sane modis ecclesiastici tum
cuiusque Italicae regionis, tum totius christiani orbis viri, et fide-
les populi illustria suorum Antistitum vestigia sectantes singularem
suum erga Nos et hanc Apostolicum Sedem amorem, veneratio-
nemque, et egregium in sanctissima nostra religione profitenda ac
tutanda studium magis in dies ostendere ac declarare glorientur.
Cum autem iidem Venerabiles Fratres, eorumque Clerus et fide-
les populi summopere doleant, Nos fere omni civili Nostro, et
huius Sanctae Sedis principatu spoliatos in angustis rebus ver-
sari, iccirco nihil sibi gratius, nihil gloriosius, nihil religiosius
esse existimant, quam ut piis ac spontaneis suis largitionibus

gravissimas Nostras, et huius Sanctae Sedis omni studio amantisime sublevent angustias. Quocirca dum in humilitate cordis Nostri maximas Deo totius consolationis agimus gratias, qui tam insigni Episcoporum et populorum fidelium pietate ac largitate acerbissimas Nostras molestias et aerumnas lenire, solari ac sustentare dignatur, gratissimi animi Nostri sensus eisdem Episcopis populisque fidelibus iterum palam publiceque testari et confirmare laetamur, quandoquidem eorum dumtaxat ope auxilioque maximis et in dies crescentibus Nostris et huius Sanctae Sedis indigentiis occurrere possumus.

Atque hic, Venerabiles Fratres, silentio praeterire non possumus assiduas impensi amoris, firmissimae fidelitatis, devotissimi obsequii, et munificae liberalitatis significationes, quibus Romanus hic populus ostendere et probare studet ac gestit, nihil sibi potius esse quam ut Nobis et huic Apostolicae Sedi, ac legitimo Nostro, eiusdemque Sedis civili imperio constantissime adhaereat, omnesque nefarios perturbatorum et insidianum hominum motus conatusque repellat, et ex animo aduersetur ac detestetur. Vos ipsi, Venerabiles Fratres, locupletissimi testes estis, quibus sinceras, publicis ac locupletissimis declarationibus idem Romanus Populus Nobis carissimus huiusmodi egregios avitae suae fidei sensus, amplissimis laudibus omnino dignos, profiteri et in medium proferre non intermittat.

Iam vero cum divinum promissum habeamus, Christum Dominum usque ad consummationem saeculi cum Ecclesia sua futurum, et inferi portas contra eam numquam esse praevalituras, certi sumus, divinis suis promissis non defuturum Deum, qui faciens mirabilia ostendet aliquando, tantam tempestatem non ad Ecclesiae navem demergendam, sed ad eam altius attollendam fuisse excitatam. Interim non desistamus, Venerabiles Fratres, potentissimum Immaculatae sanctissimaeque Dei Genitricis Virginis Mariae patrocinium enixe et assidue implorare, ac ferventissimis precibus dies noctesque ipsum clementissimum Deum, cuius natura bonitas, cuius voluntas potentia, cuius opus miseri-

cordia est, orare et obtestari, ut velit cito abbreviare dies tentationis, christianaे civilique reipublicae tam vehementer afflictæ auxiliariam suam porrigere dexteram, utque divinae suae gratiae et misericordiae divitias super omnes propitijs effundens, omnes Ecclesiae et huius Sanctae Sedis hostes convertat, ed ad iustitiae semitas reducat, atque omnipotenti sua virtute efficiat, ut, omnibus depulsis erroribus, omnibusque de medio sublatiſ impietatiſ, sanctissima sua religio, qua temporalis quoque populiſ felicitas et tranquillitas vel maxime continetur, ubique terrarum magis in dies vigeat, floreat ac dominetur.

ALLOCUTIO

HABITA IN CONSISTORIO DIE IX IVNII
ANNI MDCCCLXII.

*Adstantibus etiam Patriarchis, Primatibus, Archiepiscopis, Episcopis
solemnis sanctorum Martyrum in Iaponia et Michaelis De Sanctis
canonizationis causa Romae congregatis.*

VENERABILES FRATRES

Maxima quidem ¹ laetitia affecti fuimus, Venerabiles Fratres, cum Sanctorum honores et cultum, Deo bene iuvante, septem et viginti invictissimis divinae nostrae religionis heroibus hesterno die decernere potuerimus, Vobis lateri Nostro adstantibus, qui egregia pietate ac virtute praediti, et in sollicitudinis Nostrae partem vocati in hac tanta temporum asperitate strenue dimicantes pro Domo Israel summo Nobis solatio et consolationi estis. Utinam vero dum huiusmodi perfundimur gaudio, nulla moeroris luctusque causa Nos aliunde contristaret. Non possumus enim non vehementer dolere et angi, cum videamus tristissima, et nunquam satis deploranda mala ac damna, quibus cum permagno animarum detimento catholica nunc Ecclesia, et ipsa civilis societas miserandum in modum premitur ac divexusatur. Optime enim noscitis, Venerabiles Fratres, teterimum sane bellum contra rem catholicam universam ab iis hominibus conflatum, qui inimici Crucis Christi sanam non sustinentes doctrinam, ac nefaria inter se societate coniuncti quaecumque ignorant, blasphemant, ac pravis cuiusque

¹ Huc referuntur Syllabi Propositiones 1 — 2 — 3 — 4 — 5 — 6 — 7 — 15 — 19 — 27 — 39 — 44 — 49 — 56 — 57 — 58 — 59 — 60 — 76.

generis artibus sanctissimae nostrae religionis, et humanae societatis fundamenta labefactare, immo, si fieri unquam posset, penitus evertere, omniumque animos mentesque perniciosissimis quibusque erroribus imbuere, corrumpere, et a catholica religione avellere moliuntur. Nimirum callidissimi isti fraudum artifices, et fabricatores mendacii non cessant monstrosa quaeque veterum errorum portenta iam sapientissimis scriptis toties profligata ac depulsa, gravissimoque Ecclesiae iudicio damnata e tenebris excitare, eaque novis, variis ac fallacissimis formis verbisque expressa exaggerare, et modis omnibus usquequaque disseminare. Hac funestissima ac diabolica prorsus arte rerum omnium scientiam contaminant, deturpant, mortiferum ad animarum perniciem virus diffundunt, effraenatam vivendi licentiam, et pravas quasque cupiditates fōvent, religiosum ac socialem ordinem invertunt, et omnem iustitiae, veritatis, iuris, honestatis ac religionis ideam extinguere conantur, et sanctissima Christi dogmata, doctrinam irrident, contemnunt, oppugnant. Horret quidem refutque animus, ac reformidat vel leviter attingere praecipuos tantum pestiferosque errores, quibus huiusmodi homines miserrimis hisce temporibus divina et humana cuncta permiscent.

Nemo Vestrū ignorat, Venerabiles Fratres, ab huiusmodi hominibus plane destrui necessariam illam cohaerentiam, quae Dei voluntate intercedit inter utrumque ordinem, qui tum in natura, tum supra naturam est, itemque ab ipsis omnino immutari, subverti, deleri propriam, veram germanamque divinae revelationis indolem, auctoritatem, Ecclesiaeque constitutionem et potestatem. Atque eo opinandi temeritate progrediuntur, ut omnem veritatem, omnemque legem, potestatem et ius divinae originis audacissime denegare non metuant. Siquidem haud erubescunt asserere, philosophicarum rerum, morumque scientiam, itemque civiles leges posse ac debere a divina revelatione, et Ecclesiae auctoritate declinare, et Ecclesiam non esse veram perfectamque societatem plane liberam, nec pollere suis propriis et constantibus iuribus sibi a divino suo Fundatore collatis, sed civilis potestatis esse definire, quae sint Ecclesiae iura et limites, intra quos eadem iura

exercere queat. Hinc perverse comminiscuntur, civilem potestatem posse se immiscere rebus, quae ad religionem, mores, et regimen spirituale pertinent, atque etiam impedire, quominus Sacrorum Antistites et fideles populi cum Romano Pontefice, supremo totius Ecclesiae Pastore divinitus constituto, libere ac mutuo communient, ut plane dissolvatur necessaria et arctissima illa coniunctio, quae inter membra mystici corporis Christi, et adspectabile suum Caput ex divina ipsius Christi Domini institutione esse omnino debet. Nihil vero timent omni fallacia ac dolo in vulgus proferre, sacros Ecclesiae ministros, Romanumque Pontificem ab omni rerum temporalium iure ac dominio esse omnino excludendos.

Summa praeterea impudentia asserere non dubitant, divinam revelationem non solum nihil prodesse, verum etiam nocere hominis perfectioni, ipsamque divinam revelationem esse imperfetam, et iccirco subiectam *continuo et indefinito* progressui, qui humanae rationis progressioni respondeat. Nec verentur proinde iactare, prophetias et miracula in sacris Litteris exposita et narrata esse poetarum commenta, et sacrosancta divinae fidei nostrae mysteria philosophicarum investigationum summam, ac divinis utriusque testamenti libris mythica contineri inventa, et ipsum Dominum Nostrum Iesum Christum, horribile dictu! mythicam esse fictionem. Quare hi turbulentissimi perversorum dogmatum cultores blaterant, morum leges divina hand egere sanctione, et minime opus esse, ut humanae leges ad naturae ius conformentur, aut obligandi vim a Deo accipient, ac propterea asserunt, nullam divinam existere legem. Insuper inficiari audent omnem Dei in homines mundumque actionem, ac temere affirmant, humana rationem, nullo prorsus Dei respectu habito, unicum esse veri et falsi, boni et mali arbitrum, eamdemque humanam rationem sibi ipsi esse legem, ac naturalibus suis viribus ad hominum ac populorum bonum curandum sufficere. Cum autem omnes religionis veritates ex nativa humanae rationis vi perverse derivare audeant, tum cuique homini quoddam veluti primarium ius tribuunt, ex quo possit libere de religione cogitare et

loqui , eumque Deo honorem et cultum exhibere , quem pro suo libito meliorem existimat.

At vero eo impietatis et impudentiae deveniunt , ut caelum petere , ac Deum ipsum de medio tollere conentur. Insigni enim improbitate ac pari stultitia haud timent asserere , nullum supremum sapientissimum providentissimumque Numen divinum existere ab hac rerum universitate distinctum , ac Deum idem esse ac rerum naturam , et ictus immutationibus obnoxium , Deumque reapse fieri in homine et mundo , atque omnia Deum esse , et ipsissimam Dei habere substantiam , ac unam eamdemque rem esse Deum cum mundo , ac proinde spiritum cum materia , necessitatem cum libertate , verum cum falso , bonum cum malo , et iustum cum iniusto. Quo certe nihil dementius , nihil magis impium , nihil contra ipsam rationem magis repugnans fangi et excoigitari unquam potest. De auctoritate autem et iure ita temere effutiunt , ut impudenter dicant , auctoritatem nihil aliud esse , nisi numeri , et materialium virium summam , ac ius in materiali faclo consistere , et omnia humana facta iuris vim habere.

Iam porro commenta commentis , deliramenta deliramentis cumulantibus , et omnem legitimam auctoritatem , atque omnia legitima iura , obligationes , officia conculcantes nihil dubitant in veri legitimique iuris locum substituere falsa ac mentita virium iura ac morum ordinem rerum materialium ordini subiicere. Neque alias vires agnoscent , nisi illas , quae in materia positae sunt , et omnem morum disciplinam honestatemque collocant in cumulandis et augendis quovis modo divitiis , et in pravis quibusque voluptatibus explendis. Atque hisce nefariis abominandisque principiis reprobum carnis spiritui rebellis sensum tuentur , fovent , extollunt , illique naturales dotes ac iura tribuunt , quae per catholicam doctrinam conculcari dicunt , omnino despicientes monitum Apostoli clamantis: « Si secundum carnem vixeritis moriemini , si autem spiritu facta carnis mortificaveritis , vivetis ¹ ». Omnia praeterea legitimae cuiusque proprietatis iura invadere , destrue-

¹ Ad Rom. c. 8. v. 13.

re contendunt, ac perperam animo et cogitatione confingunt et imaginantur ius quoddam *nullis circumscriptum limitibus*, quo reipublicae Statum pollere existimant, quem omnium iurium originem et fontem esse temere arbitrantur.

Dum vero hos praecipuos infelicissimae nostrae aetatis errores dolenter ac raptim perstringimus, recensere omittimus, Venerabiles Fratres, tot alias fere innumerabiles falsitates et fraudes Vobis apprime notas ac perspectas, quibus Dei hominumque hostes rem tum sacram tum publicam perturbare et convellere connituntur. Ac silentio praetermittimus multiplices gravissimasque iniurias, calumnias, convicia, quibus sacros Ecclesiae ministros, et hanc Apostolicam Sedem dilacerare et insectari non desinunt. Nihil loquimur de iniqua sane hypocrisi, qua funestissimae in Italia praesertim perturbationis ac rebellionis duces et satellites dictitant, se velle, Ecclesiam sua gaudere libertate, dum sacrelego prorsus ausu omnia ipsius Ecclesiae iura et leges quotidie magis proculcant, ei usque bona diripiunt, et Sacrorum Antistites, ecclesiasticosque viros, suo munere paeclare fungentes, quoquo modo divexant, et in carcerem detrudunt, et Religiosorum Ordinum Alumnos, ac Virgines Deo sacras e suis coenobiis violenter exturbant, suisque propriis bonis spoliant, nihilque intentatum relinquunt, ut ipsam Ecclesiam in turpissimam redigant servitutem, et opprimant. Ac dum singularem certe ex optatissima Vestra praesentia voluptatem percipimus, Vos ipsi videtis, quam libertatem nunc habeant Venerabiles Fratres Sacrorum in Italia Antistites, qui strenue constanterque praeliantes praelia Domini minime potuerunt cum summo animi Nostri dolore, adversantium opera, ad Nos venire, et inter Vos versari, atque huic adesse conventui, quod summopere optavissent, quemadmodum infelicis Italiae Archiepiscopi et Episcopi suis Litteris summi erga Nos et hanc Sanctam Sedem amoris et obsequii plenissimis significarunt. Neminem etiam ex Sacrorum in Lusitania Antistitibus hic adesse cernitis, ac non parum dolemus, inspecta difficultatum natura, quae obstiterunt, quominus ipsi romanum iter aggredi possent. Recensere autem omittimus tot alia sane

tristia et horrenda , quae ab hisce perversarum doctrinarum cultoribus cum incredibili Nostro ac Vestro , et omnium bonorum luctu patrantur. Nihil item dicimus de impia conspiratione, et pravis cuiusque generis molitionibus ac fallaciis , quibus civilem huius Apostolicae Sedis principatum omnino everttere ac destruere volunt. Iuvat potius hac de re commemorare miram prorsus concessionem , qua Vos ipsi una cum aliis Venerabilibus Fratribus universi catholici orbis Sacrorum Antistitibus numquam intermissitis et epistolis ad Nos datis , et pastoralibus litteris ad fideles scriptis huiusmodi fallacias detegere, refutare , ac simul docere, hunc civilem Sanctae Sedis principatum Romano Pontifici fuisse singulari divinae providentiae consilio datum , illumque necessarium esse , ut idem Romanus Pontifex nulli unquam Principi aut civili potestati subiectus supremam universi Dominici gregis pa scendi regendique potestatem auctoritatemque ab ipso Christo Domino divinitus acceptam per universam Ecclesiam plenissima libertate exercere , ac maiori eiusdem Ecclesiae et fidelium bono , utilitati et indigentiis consulere possit.

Quae hactenus lamentati sumus, Venerabiles Fratres, luctuosum plane exhibent spectaculum. Quis enim non videt tot pravorum dogmatum iniquitate, ac tot nequissimis deliramentis et machinationibus magis in dies christianum populum misere corrumpi , et ad exitium impelli , et catholicam Ecclesiam , eiusque salutarem doctrinam ac veneranda iura et leges, sacrosque ministros oppugnari , et ideo omnia vitia et scelera invalescere ac propagari , et ipsam civilem societatem exagitari ?

Nos itaque Apostolici Nostri ministerii probe memores ac de spirituali omnium populorum bono et salute Nobis divinitus commissa vel maxime solliciti, cum « aliter » ut sanctissimi decessoris Nostri Leonis verbis utamur, « Nobis commissos regere non possumus, nisi hos, qui sunt perditores et perditi, zelo fidei Dominicae « persequamur, et a sanis mentibus , ne pestis haec latius divulgetur, severitate, qua possumus, abscindamus ¹ », in hoc am-

¹ Epist. VII. ad Episc. per Ital. c. 2. Edit. Baller.

plissimo vestro consessu Apostolicam nostram attollentes vocem omnes commemoratos praesertim errores non solum catholicae fidei ac doctrinae, divinis ecclesiasticisque legibus, verum etiam ipsi sempiternae ac naturali legi et iustitiae, rectaeque rationi omnino repugnantes et summopere adversos reprobamus, proscribimus atque damnamus.

Vos autem, Venerabiles Fratres, qui estis sal terrae, et Domini gregis Custodes ac Pastores, etiam atque etiam excitamus et obtestamur, ut pro eximia Vestra religione et episcopali zelo pergatis, veluti adhuc cum summa Vestri Ordinis laude fecistis, omni cura, sedulitate et studio fideles Vobis traditos ab hisce venenatis pascuis arcere, et qua voce, qua opportunis scriptis tot perversarum opinionum monstra refellere et profligare. Optime enim scitis de summa re agi, cum agatur de sanctissimae fidei nostrae, ac de catholicae Ecclesiae, eiusque doctrinae causa, de populorum salute, et humanae societatis bono ac tranquillitate. Itaque, quantum in Vobis est, ne desinatis unquam a fidelibus avertere tam dirae pestis contagia, idest ab eorum oculis manibusque perniciosos libros et ephemrides eripere, ipsosque fideles sanctissimis augustae nostrae religionis praeceptionibus assidue imbuere et erudire, ac monere et exhortari, ut ab hisce iniquitatis magistris, tamquam a facie colubri, effugiant. Pergite Vestras omnes curas cogitationesque in id potissimum conferre, ut Clerus sanctae scienterque instituatur, omnibusque virtutibus fulgeat, ut utriusque sexus iventus ad morum honestatem, pietatem, omnemque virtutem sedulo formetur, ut salutaris sit studiorum ratio. Ac diligentissime advigilate et prospicite, ne in humaniores litteras, severioresque disciplinas tradendas aliquid unquam irrepat quod fidei, religioni, bonisque moribus adersetur. Viriliter agile, Venerabiles Fratres, et ne animo unquam concidatis in hac tanta temporum perturbatione et iniquitate, sed divino auxilio omnino freti, ac *sumentes in omnibus scutum inexpugnabile aequitatis et fidei, atque assumentes gladium spiritus, quod est verbum Dei*, ne intermittatis omnium catholicae Ecclesiae, et huius Apostolicae Sedis hostium conatibus obsistere, eorumque tela retundere et impetus frangere.

Interim vero dies noctesque, sublatis ad caelum oculis, non desistamus, Venerabiles Fratres, clementissimum misericordiarum Patrem, et Deum totius consolationis, qui de tenebris facit lucem splendescere, quique potens est de lapidibus suscitare filios Abrahae, in humilitate cordis nostri ferventissimis precibus indesinenter orare et obsecrare, ut per merita Unigeniti Filii Sui Domini Nostri Iesu Christi velit christianaee et civili reipublicae auxiliariam porrigere dexteram, omnesque disperdere errores et impietates, ac divinae suae graliae lumine omnium errantium mentes illustrare, illosque ad se convertere et revocare, quo Ecclesia sua sancta optatissimam assequatur pacem, et ubique terrarum maiora in dies incrementa suscipiat, ac prospere vigeat et efflorescat. Ut autem quae petimus et quaerimus facilius consequi possimus, ne cessemus adhibere primum deprecaticem apud Deum Immaculatam Sanctissimamque Deiparam Virginem Mariam, quae misericordissima, et omnium nostrum amantissima mater cunctas semper interemit haereses, et cuius nullum apud Deum praesentius patrocinium. Petamus quoque suffragia tum sancti eiusdem Virginis Sponsi Iosephi, tum sanctorum Apostolorum Petri et Pauli, omniumque Caelitum, et illorum praesertim, quos nuper Sanctorum fastis adscriptos colimus et veneramur.

Antequam vero dicendi finem faciamus, Nobis temperare non possumus, quin iterum testemur et confirmemus, summa Nos uti consolatione, dum iucundissimo Vestrum omnium conspectu fruimur, Venerabiles Fratres, qui tanta fide, pietate et observantia Nobis et huic Petri Cathedrae firmiter obstricti, ac ministerium Vestrum implentes maiorem Dei gloriam, et animarum salutem omni studio procurare gloriamini, quique concordissimis animis, atque admirabili sane cura et amore una cum aliis Venerabilibus Fratribus totius catholici orbis Episcopis et fidelibus Vestrae et illorum curae commissis gravissimas Nostras angustias et acerbitates modis omnibus lenire et sublevare non desinitis. Quocirca hac etiam occasione amantissimi aequae ac gratissimi

animi Nostri sensus erga Vos , et alios omnes Venerabiles Fratres , et ipsos fideles amplissimis verbis palam publiceque profitemur. A Vobis autem exposcimus , ut cum ad Vestras redieritis Dioeceses velitis eiusdem fidelibus Vestrae vigilantiae concreditis hos animi Nostri sensus Nostro nomine nuntiare , illosque certiores facere de paterna Nostra in illos caritate , deque Apostolica Benedictione , quam ex intimo corde profectam , et cum omnis verae felicitatis voto coniunctam Vobis ipsis, Venerabiles Fratres, et eisdem fidelibus impertire vehementer laetamur.

LITTERAE

VEN. FRATRI GREGORIO ARCHIEP. MONACENSI ET FRISINGENSI
DIE XI DECEMBRIS ANNI MDCCCLXII.

PIUS PP. IX.

Venerabilis Frater , Salutem et Apostolicam Benedictionem. Gravissimas 1 inter acerbitates , quibus undique preminur , in hac tanta temporum perturbatione et iniuitate vehementer dolemus , cum noscamus , in variis Germaniae regionibus reperiri nonnullos catholicos etiam viros, qui Sacram Theologiam ac Philosophiam tradentes minime dubitant quamdam inauditam adhuc in Ecclesia docendi scribendique libertatem inducere , novasque et omnino improbandas opiniones palam publiceque profiteri et in vulgus disseminare. Hinc non levi moerore affecti fuimus , Venerabilis Frater , ubi tristissimus ad Nos venit nuntius , Presbyterum Iacobum Froschhammer in ista Monacensi Academia Philosophiae Doctorem huiusmodi docendi scribendique licentiam prae ceteris adhibere , eumque suis operibus in lucem editis perniciosissimos tueri errores. Nulla igitur interposita mora , Nostrae Congregationi, libris notandis praepositae mandavimus, ut praecipua volumina , quae eiusdem Presbyteri Froschhammer nomine circumferuntur, cum maxima diligentia sedulo perpenderet , et omnia ad Nos referret. Quae volumina germanice scripta titulum habent: « Introductio in philosophiam » ; De libertate scientiae « Athenaeum », quorum primum anno 1858, alterum anno 1861,

tertium vero vertente hoc anno 1862 istis Monacensibus typis in lucem est editum.

Itaque eadem Congregatio Nostris mandatis diligenter obsequens summo studio accuratissimum examen instituit, omnibusque semel iterumque serio ac mature ex more discussis et perpensis iudicavit, Auctorem in pluribus non recte sentire, eiusque doctrinam a veritate catholica aberrare. Atque id ex duplii praesertim parte, et primo quidem propterea quod Auctor tales humanae rationi tribuat vires, quae rationi ipsi minime competit, secundo vero, quod eam omnia opinandi, et quidquid semper audendi libertatem eidem rationi concedat, ut ipsius Ecclesiae iura, officium, et auctoritas de medio omnino tollantur. Namque Auctor in primis edocet, philosophiam, si recta eius habeatur notio, posse non solum percipere et intelligere ea christiana dogmata, quae naturalis ratio cum fide habet communia (tamquam commune scilicet perceptionis obiectum), verum etiam ea quae christianam religionem, fidemque maxime et proprie efficiunt, ipsumque scilicet supernaturalem hominis finem, et ea omnia, quae ad ipsum spectant, atque sacratissimum Dominicae Incarnationis mysterium ad humanae rationis et philosophiae provinciam pertinere, rationemque, dato hoc obiecto, suis propriis principiis scienter ad ea posse pervenire. Etsi vero aliquam inter haec et illa dogmata distinctionem Auctor inducat, et haec ultima minori iure rationi adtribuat, tamen clare aperieque docet, etiam haec contineri inter illa, quae veram propriamque scientiae seu philosophiae materiam constituunt. Quocirca ex eiusdem Auctoris sententia concludi omnino possit ac debeat, rationem in abditissimis etiam Divinae Sapientiae ac Bonitatis, immo etiam et liberae eius voluntatis mysteriis, licet posito revelationis obiecto, posse ex seipsa, non iam ex divinae auctoritatis principio, sed ex naturalibus suis principiis et viribus ad scientiam seu certitudinem pervenire.

Quae Auctoris doctrina quam falsa sit, et erronea nemo est qui christianae doctrinae rudimentis vel leviter imbutus, non illico videat planeque sentiat. Namque si isti philosophiae cultores

vera ac sola rationis et philosophicae disciplinae tuerentur principia et iura , debit is certe laudibus essent prosequendi. Siquidem vera ac sana philosophia nobilissimum suum locum habet, cum eiusdem philosophiae sit, veritatem diligenter inquirere, humanamque rationem licet primi hominis culpa obtenebratam, nullo tamen modo extinctam recte ac sedulo excolere, illustrare, eiusque cognitionis obiectum, ac permultas veritates percipere, bene intelligere, promovere, earumque plurimas, uti Dei existentiam, naturam, attributa, quae etiam fides credenda proponit, per argumenta ex suis principiis petita demonstrare, vindicare, defendere, atque hoc modo viam munire ad haec dogmata fide rectius tenenda, et ad illa etiam reconditiora dogmata, quae sola fide percipi primum possunt, ut illa aliquo modo a ratione intelligentur. Haec quidem agere, atque in his versari debet severa et pulcherrima verae philosophiae scientia. Ad quae praestanda si viri docti in Germaniae Accademiis enitantur pro singulari inclytæ illius Nationis ad severiores gravioresque disciplinas excolendas propensione, eorum studium a Nobis comprobatur et commendatur, cum in sacrarum rerum utilitatem profectumque convertant, quae illi ad suos usus invenerint.

At vero in hoc gravissimo sane negotio tolerare nunquam possumus, ut omnia temere permisceantur, atque ratio illas etiam res, quae ad fidem pertinent, occupet atque perturbet, cum certissimi, omnibusque notissimi sint fines, ultra quos ratio nunquam suo iure est progressa, vel progredi potest. Atque ad huiusmodi dogmata ea omnia maxime et apertissime spectant, quae supernaturalem hominis elevationem, ac supernaturale eius cum Deo commercium respiciunt, atque ad hunc finem revelata noscuntur. Et sane cum haec dogmata sint supra naturam, sic circa naturali ratione, ac naturalibus principiis attingi non possunt. Nunquam siquidem ratio suis naturalibus principiis ad huiusmodi dogmata scienter tractanda effici potest idonea.

Quod si haec isti temere asseverare audeant, sciant, se certe non a quorumlibet Doctorum opinione, sed a communi et nunquam immutata Ecclesiae doctrina recedere. Ex divinis enim

Litteris, et Sanctorum Patrum traditione constat, Dei quidem existentiam, multasque alias veritates, ab iis etiam, qui fidem nondum suscepérunt, naturali rationis lumine cognosci, sed illa reconditiora dogmata Deum solum manifestasse, dum notum facere voluit *mysterium, quod absconditum fuit a saeculis et generationibus 1, et ita quidem, ut postquam multifariam multisque modis olim locutus esset patribus in prophetis, novissime Nobis locutus est in Filio, per quem fecit et saecula 2* Deum enim nemo vidit unquam. *Unigenitus Filius, qui est in sinu Patris, ipse enarravit 3.* Quapropter Apostolus, qui gentes Deum per ea, quae facta sunt, cognovisse testatur, disserens *de gratia et veritate 4, quae per Iesum Christum facta est, loquimur, inquit, Dei sapientiam in mysterio, quae abscondita est..... quam nemo principum huius saeculi cognovit..... Nobis autem revelavit Deus per Spiritum Suum..... Spiritus enim omnia scrutatur, etiam profunda Dei. Quis enim hominum scit quae sunt hominis, nisi spiritus hominis, qui in ipso est? Ita et quae Dei sunt, nemo cognovit, nisi Spiritus Dei 5.*

Hisce aliisque fere innumeris divinis eloquiis inhaerentes SS. Patres in Ecclesiae doctrina tradenda continenter distinguere curarunt rerum divinarum notionem, quae naturalis intelligentiae vi omnibus est communis ab illarum rerum notitia, quae per Spiritum Sanctum fide suscipitur, et constanter docuerunt, per hanc ea nobis in Christo revelari mysteria, quae non solum humanam philosophiam, verum etiam Angelicam naturalem intelligentiam transcendunt, quaeque etiamsi divina revelatione innotuerint, et ipsa fide fuerint suscepta, tamen sacro adhuc ipsius fidei velo tecta et obscura caligine obvoluta permanent, quamdiu in hac mortali vita peregrinamur a Domino 6.

¹ Col. 1. 26.

² Heb. v. 12.

³ Ioan. 1. v. 18.

⁴ Ioan. 1. v. 17.

⁵ 1. Cor. II. v. 7. 8. 10. 11.

⁶ S. Io. Chrys. Homil. 7. (9) in 1. Cor. S. Ambr. de Fide ad Grat. 1. 10. S. Leo de Nativ. Domini, Serm. 9. S. Cyrill. Alex. contra Nest. lib. 3.

Ex his omnibus patet, alienam omnino esse a catholicae Ecclesiae doctrina sententiam, qua idem Froschhammer asserere non dubitat, omnia indiscriminatim christianaे Religionis dogmata esse obiectum naturalis scientiae, seu philosophiae, et humana rationem historice tantum exultam, modo haec dogmata ipsi rationi tamquam obiectum proposita fuerint, posse ex suis naturalibus viribus et principio ad veram de omnibus etiam reconditionibus dogmatibus scientiam pervenire.

Nunc vero in memoratis eiusdem Auctoris scriptis alia dominatur sententia, quae catholicae Ecclesiae doctrinae, ac sensu plane adversatur. Etenim eam philosophiae tribuit libertatem, quae non scientiae libertas, sed omnino reprobanda et intoleranda philosophiae licentia sit appellanda. Quadam enim distinctione inter philosophum et philosophiam facta tribuit philosopho ius et officium se submittendi auctoritati, quam veram ipse probaverit, sed utrumque philosophiae ita denegat, ut nulla doctrinae revelatae ratione habita, asserat, ipsam numquam debere, ac posse auctoritati se submittere. Quod esset tolerandum et forte admittendum, si haec dicerentur de iure tantum, quod habet philosophia suis principiis, seu methodo, ac suis conclusionibus uti, sicut et aliae scientiae, ac si eius libertas consistaret in hoc suo iure utendo, ita ut nihil in se admitteret, quod non fuerit ab ipsa suis conditionibus acquisitum aut fuerit ipsi alienum. Sed haec iusta philosophiae libertas suos limites noscere et experiri debet. Nunquam enim non solum philosopho, verum etiam philosophiae licebit, aut aliquid contrarium dicere iis quae divina revelatio, et Ecclesia docet, aut aliquid ex eisdem in dubium vocare, propter ea quod non intelligit, aut iudicium non suspicere, quod Ecclesia auctoritas de aliqua philosophiae conclusione, quae hucusque libera erat, proferre constituit. Accedit etiam, ut idem Auctor philosophiae libertatem, seu potius effraenatam licentiam tam acriter, tam temere propugnet, ut minime vereatur asserere, Eccle-

siam non solum non debere in philosophiam unquam animadverte, verum etiam debere ipsius philosophiae tolerare errores, ei-que relinquere ut ipsa se corrigat, ex quo evenit, ut philosophi hanc philosophiae libertatem necessario participant, atque ita etiam ipsi ab omni lege solvantur. Ecquis non videt quam vehe-menter sit reiicienda, reprobanda, et omnino damnanda huius-modi Froschhammer sententia atque doctrina? Etenim Ecclesia ex divina sua institutione et divinae fidei depositum integrum in-violatumque diligentissime custodire, et animarum saluti summo studio debet continenter advigilare, ac summa cura ea omnia a-movere et eliminare, quae vel fidei adversari, vel animarum sa-lutem quovis modo in discrimen adducere possunt. Quocirca Ec-clesia ex potestate sibi a divino Auctore commissa non solum ius, sed officium praesertim habet non tolerandi, sed proscribendi ac damnandi omnes errores, si ita fidei integritas, et animarum sa-lus postulaverint, et omni philosopho, qui Ecclesiae filius esse ve-lit, ac etiam philosophiae officium incumbit, nihil unquam dicere contra ea, quae Ecclesia docet, et ea retractare, de quibus eos Ecclesia monuerit. Sententiam autem, quae contrarium edocet, omnino erroneam et ipsi fidei Ecclesiae eiusque auctoritati vel maxime iniuriosam esse edicimus et declaramus.

Quibus omnibus accurate perpensis, de eorumdem VV. FF. NN. S. R. E. Cardinalium Congregationis libris notandis praepo-sitae consilio, ac motu proprio et certa scientia, matura delibe-ratione Nostra, deque Apostolicae Nostrae potestatis plenitudine praedictos libros Presbyteri Froschhammer tamquam continentes propositiones, et doctrinas respective falsas, erroneas, Ecclesiae eiusque auctoritati ac iuribus iniuriosas reprobamus, damnamus, ac pro reprobatis et damnatis ab omnibus haberi volumus, at-que eidem Congregationi mandamus, ut eosdem libros in indicem prohibitorum librorum referat.

Dum vero haec Tibi significamus, Venerabilis Frater, non pos-sumus non exprimere magnum animi Nostri dolorem, cum videa-mus hunc filium, eorumdem librorum auctorem, qui ceteroquin de Ecclesia benemereri potuisset, infelici quodam cordis impetu

misere abreptum in vias abire , quae ad salutem non ducunt , ac magis magisque a recto tramite aberrare. Cum enim alias eius liber de animarum origine prius fuisse damnatus , non solum se minime submisit, verum etiam non extimuit, eumdem errorem in his etiam libris denuo docere , et Nostram Indicis Congregacionem contumeliis cumulare, ac multa alia contra Ecclesiae agendi rationem temere mendaciterque pronuntiare. Quae omnia talia sunt, ut iis merito, atque optimo iure indignari potuissemus. Sed nolumus adhuc paternae Nostrae caritatis viscera erga illum depolare, et iccirco Te, Venerabilis Frater, excitamus , ut velis eidem manifestare cor Nostrum paternum , et acerbissimum dolorem , cuius ipse est causa, ac simul ipsum saluberrimis monitis hortari et monere, ut Nostram, quae communis est omnium Patris, vocem audiat, ac resipiscat , quemadmodum catholicae Ecclesiae filium decet , et ita nos omnes laetitia afficiat, ac tandem ipse feliciter experiatur quam iucundum sit , non vana quadam et perniciosa libertate gaudere , sed Domino adhaerere , cuius iugum suave est , et onus leve, cuius eloquia casta, igne examinata, cuius iudicia vera, iustificata in semetipsa , et cuius universae viae misericordia et veritas. Denique hac etiam occasione libentissime ulimur, ut iterum testemur et confirmemus praecipuam Nostram in Te benevolentiam. Cuius quoque pignus esse volumus Apostolicam Benedictionem, quam intimo cordis affectu Tibi ipsi , Venerabilis Frater , et gregi tuae curae commisso peramanter impertimus.

Datum Romae apud S. Petrum , die XI Decembris anno MDCCCLXII. Pontificatus Nostri Anno Decimoseptimo.

EPISTOLA ENCYCLICA

AD CARDINALES, ARCHIEPISCOPOS, ET EPISCOPOS ITALIAE

PIUS PP. IX.

Dilecti Filii Nostri ac Venerabiles Fratres, Salutem et Apostolicam Benedictionem. Quanto conficiamur ¹ moerore ob saevissimum sacrilegumque bellum in omnibus fere terrarum orbis regionibus catholicae Ecclesiae hisce asperrimis temporibus allatum, ac praesertim in infelici Italia ante Nostros oculos a Subalpino Gubernio plures abhinc annos indictum, et magis in dies excitatum, quisque Vestrum vel facile cogitatione assequi potest, Dilecti Filii Nostri ac Venerabiles Fratres. Verum inter gravissimas Nostras angustias, dum Vos intuemur, maximo afficimur solatio et consolatione. Siquidem Vos, quamvis omnibus iniustissimis violentisque modis miserandum in modum vexali, et a proprio grege avulsi, in exilium electi, atque etiam in carcerem detrusi, tamen virtute ex alto induti nunquam intermisistis qua voce, qua salutaribus scriptis, Dei eiusque Ecclesiae, et Apostolicae huius Sedis causam, iura, doctrinam strenue tueri, vestrique gregis incolumitati consulere. Itaque Vobis ex animo gratulamur, quod vehementer laetamini pro nomine Iesu contumeliam pati, ac meritis Vos laudibus efferimus utentes Sanctissimi Nostri Decessoris Leonis verbis: « Licet laboribus dilectionis vestrae, « quos pro observantia catholicae fidei suscepistis, toto corde « compatiar, et ea quae Vobis illata sunt, non aliter accipiām, quam si ipse pertulerim, intelligo tamen magis esse

« gaudii, quam moeroris, quod, confortante Vos Domino Iesu Christo, in evangelica apostolicaque doctrina insuperabiles perstitistis... Et cum Vos inimici fidei christiana ab Ecclesiarum vestrarum sede divellerent, maluistis peregrinationis iniuriam pati, quam ulla impietatis ipsorum contagione violari 1 ».

Atque utinam Vobis tanatarum Ecclesiae calamitatum finem nuntiare possemus! Sed nunquam satis lugenda morum corruptela undique ingravescens, et irreligiosis, nefandis obscoenisque scriptis, ac scoenicis spectaculis, et meretriciis domibus fere ubique constitutis, ac aliis pravis artibus promota, et monstrosa omnium errorum portenta quaquaversus disseminata, et abominanda vitiorum omniumque scelerum increscens colluvies, et mortiferum *incredulitatis* ac *indifferentismi* virus longe lateque diffusum, et ecclesiasticae potestatis, ac sacrarum rerum, legumque contemptio, despicientia, et iniusta ac violenta bonorum Ecclesiae depopulatio, et acerrima ac continua contra sacros Ministros, ac Religiosarum Familiarum Alumnos, Virginesque Deo devotas insectatio, ac diabolicum prorsus adversus Christum, eiusque Ecclesiam, doctrinam, et hanc Apostolicam Sedem odium, et innumera fere alia, quae ab infensissimis rei catholicae hostibus paltrantur, et quotidie lamentari cogimur, videntur optatissimum illud protrahere ac differre tempus, quo plenum sanctissimae nostrae religionis, iustitiae, ac veritatis triumphum videre possimus. Qui quidem triumphus deesse non poterit, etiamsi Nobis datum non sit noscere tempus eidem triumpho ab omnipotenti Deo destinatum, qui omnia admirabili divina sua providentia regit ac moderatur, et ad nostram dirigit utilitatem. Etsi vero caelestis Pater Ecclesiam suam sanctam in hac miserrima et mortali peregrinatione militantem, variis aerumnis et calamitatibus affligi et vexari permittit, tamen cum ipsa a Christo Domino supra immobilem et firmissimam petram sit fundata, non solum nulla vi nulloque impetu convelli et labefactari unquam potest, verum etiam ipsis « persecutionibus non minuitur, sed augetur,

« et semper dominicus ager segete ditiori vestitur, dum grana,
 « quae singula cadunt, multiplicata nascuntur 1 ». Quod, Dilecti
 Filii Nostri et Venerabiles Fratres, luctuosissimis etiam hisce
 temporibus singulari Dei beneficio evenire conspicimus. Nam
 quamvis immaculata Christi sponsa impiorum hominum opera in
 praesentia vehementer afflictetur, tamen de suis hostibus agit
 triumphum. Enimvero ipsa suos triumphat hostes, et mirifice
 splendescit tum singulari vestra, et aliorum Venerabilium Fra-
 trum totius catholici orbis Sacrorum Antistitum erga Nos et
 hanc Petri Cathedram fide, amore, observantia et eximia constan-
 tia in catholica unitate tuenda, tum tot pientissimis religionis, et
 Christianae caritatis operibus, quae, Deo auxiliante, magis in dies
 multiplicantur in catholico orbe, tum sanctissimae fidei lumine,
 quo magis in dies tot illustrantur regiones, tum egregio Catholico-
 rum erga ipsam Ecclesiam, ac Nos, et hanc Sanctam Sedem amo-
 re et studio, tum insigni et immortali martyrii gloria. Nostis enim
 quomodo in Tunkini, et Cochinchinae praesertim regionibus Epi-
 scopi, Sacerdotes, laicique viri, ac vel ipsae imbelles mulie-
 res, ac teneri adolescentuli et adolescentulæ veterum martyrum
 exempla aemulantes animo invicto, heroica virtute crudelissimos
 quoque cruciatus despiceret, et exultantes pro Christo vitam pro-
 fundere vehementer laetantur. Quae sane omnia non levi Nobis,
 Vobisque consolationi esse debent inter maximas, quibus premi-
 mur, acerbitates.

Verum cum Apostolici Nostri ministerii officium omnino po-
 stulet, ut Ecclesiae causam Nobis ab ipso Christo Domino com-
 missam omni cura studioque defendamus, illosque omnes repro-
 bemus, qui Ecclesiam ipsam, eiusque sacra iura, Ministros et
 hanc Apostolicam Sedem oppugnare et conculcare non dubitant,
 iccirco hisce Nostris Litteris denuo ea omnia et singula confirma-
 mus, declaramus, ac damnamus, quae in pluribus consistoriali-
 bus Allocutionibus, aliisque Nostris Litteris cum ingenti animi

1 S. Leo Serm. 82. in natal. Apost. Petri et Pauli.

Nostri molestia lamentari , declarare , atque damnare coacti fui-
mus 1.

Atque hic , Dilecti Filii Nostri et Venerabiles Fratres , iterum commemorare et reprehendere oportet gravissimum errorem , in quo nonnulli catholici misere versantur , qui homines in erroribus viventes , et a vera fide atque a catholica unitate alienos ad aeternam vitam pervenire posse opinantur. Quod quidem catholicae doctrinae vel maxime adversatur. Notum Nobis Vobisque est , eos , qui invincibili circa sanctissimam nostram religionem ignorantia laborant , quique naturalem legem , eiusque praecepta in omnium cordibus a Deo insculpta sedulo servantes , ac Deo obedi- re parati , honestam rectamque vitam agunt , posse , divinae lucis et gratiae operante virtute , aeternam consequi vitam , cum Deus , qui omnium mentes , animos , cogitationes , habitusque plane in- tuetur , scrutatur et noscit , pro summa sua bonitate et clementia minime patiatur quempiam aeternis puniri suppliciis , qui volun- tariae culpae reatum non habeat. Sed notissimum quoque est ca- tholicum dogma , neminem scilicet extra catholicam Ecclesiam posse salvari , et contumaces adversus eiusdem Ecclesiae auctori- tam , definitiones , et ab ipsius Ecclesiae unitate , atque a Petri Successore Romano Pontifice , cui *vineae custodia a Salvatore est commissa* 2 pertinaciter divisos , aeternam non posse obtainere salutem. Clarissima enim sunt Christi Domini verba : « Si Eccle- « siam non audierit , sit tibi sicut ethnicus , et publicanus 3. Qui « vos audit , me audit , et qui vos spernit , me spernit , qui autem « me spernit , spernit eum , qui misit me 4. Qui non crediderit « condemnabitur 5. Qui non credit , iam iudicatus est 6. Qui non

1 Allocut. 20. Iunii 1859. — 26. Septemb. 1859. — 13. Iulii 1860. — 28. Septemb. 1860. — 17. Decemb. 1860. — 18. Martii 1861. — 30. Se- ptemb. 1861. — 9. Iunii 1862. — Epist. Encycl. 18. Iun. 1859. — 19. Ian. 1860. — Apost. Litt 26. Mart. 1860.

2 Concil. Oecum. Chalcedonen. in Relat. ad Leonem Papam.

3 Matth. c. 28. v. 17.

4 Luc. c. 10. v. 16.

5 Marc. c. ult. v. 16.

6 Ioan. c. 3. v. 18.

« est mecum, contra me est, qui non colligit mecum, dispergit 1». Hinc Apostolus Paulus huiusmodi homines dicit *subversos*, et *proprio iudicio condemnatos* 2, et Apostolorum Princeps illos appellat « magistros mendaces, qui introducunt sectas perditio- « nis, Dominum negant, superducentes sibi celerem perditio- « nem 3 ».

Absit vero, ut catholicae Ecclesiae filii ullo unquam modo inimici sint iis, qui eisdem fidei caritatisque vinculis, nobiscum minime sunt coniuncti, quin immo illos sive pauperes, sive aegrotantes, sive aliis quibusque aerumnis afflictos omnibus christianaे caritatis officiis prosequi, adiuvare semper studeant, et in primis ab errorum tenebris, in quibus misere iacent, eripere, atque ad catholicam veritatem, et ad amantissimam Matrem Ecclesiam reducere contendant, quae maternas suas manus ad illos amanter tendere, eosque ad suum sinum revocare nunquam desinit, ut in fide, spe et caritate fundati ac stabiles, et in omni opere bono fructificantes, aeternam assequantur salutem.

Nunc autem, Dilecti Filii Nostri ac Venerabiles Fratres, silencio praeterire non possumus alium perniciosissimum errorem et malum, quo hac nostra infelicissima aetate hominum mentes animique misere abripiuntur, ac perturbantur. Loquimur nempe de effraenato ac damoso illo proprio amore et studio, quo non pauci homines, nulla plane proximi sui ratione habita, proprias utilitates et commoda unice spectant et quaerunt; loquimur de insatiabili illa dominandi et acquirendi cupiditate, qua, honestatis iustitiaeque regulis omnino posthabitatis, divitias quovis modo cupidissime congerere, et cumulare non desinunt, ac terrenis tantum rebus assidue intenti, et Dei, religionis animaeque suaem immemores suam omnem felicitatem in comparandis divitiis et pecuniae thesauris perperam collocant. Meminerint huiusmodi homines, ac serio meditentur gravissima illa Christi Domini verba:

1 Luc. c. 11. v. 23.

2 Ad Tit. c. 3. v. 11.

3 Epist. 2. c. 2. v. 1.

« Quid prodest homini si mundum universum lucretur , animae
 « vero suae detrimentum patiatur 1 ? » et animo sedulo reputent
 quae Apostolus Paulus docet : « Qui volunt divites fieri , incidunt
 « in tentationem et in laqueum diaboli , et desideria multa inuti-
 « lia, et nociva , quae mergunt homines in interitum et perditio-
 « nem. Radix enim omnium malorum est cupiditas , quam qui-
 « dam appetentes, erraverunt a fide , et inseruerunt se doloribus
 « multis 1 ».

Evidenter homines iuxta propriam ac diversam cuiusque conditionem suis laboribus necessaria vitae praesidia sibi comparare debent seu in litteris ac scientiis excolendis , seu in artibus tum ingenuis , tum vulgaribus exercendis , seu in publicis privatisque muneribus obeundis , seu in rerum commercio habendo , sed omnino oportet , ut omnia cum honestate , iustitia , integritate et caritate agant , et Deum p[re]e oculis semper habeant , eiusque manda ac p[re]cepta diligentissime obseruent.

Iam vero dissimulare non possumus, acerbissimo Nos angi dolore, cum in Italia nonnulli ex utroque Clero reperiantur viri, qui adeo sanctae suae vocationis sunt obliti, ut minime erubescant exitialibus etiam scriptis falsas disseminare doctrinas ac populorum animos contra Nos et hanc Apostolicam Sedem excitare, ac civilem Nostrum et ipsius Sedis principatum oppugnare, et nequissimis catholicae Ecclesiae, eiusdemque Sedis hostibus omni opera studioque impudenter favere. Qui ecclesiastici viri a suis Antistitibus, et a Nobis, atque ab hac Sancta Sede desciscentes, et Subalpini Gubernii, eiusque Magistratum favore, et auxilio freti, eo temeritatis devenerunt, ut, ecclesiasticis censuris et poenis plane spretis, minime extimuerint, quasdam omnino improbandas Societas *Clerico-liberali*, *Di mutuo soccorso*, *Emancipatrice del Clero italiano* vulgo appellatas, aliasque eodem pravu spiritu animatas constituere, et quamvis a propriis Antistitibus merito interdicti a sacro ministerio obeundo, tamen minime pa-

1 Matt. c. 16. v. 27.

2 Epist. I. ad Timoth. c. 6. v. 9. 10.

vent illud, veluti intrusi, in pluribus Templis perperam et illicite exercere. Quapropter et commemoratas detestandas Societates, et improbam eorumdem ecclesiasticorum hominum agendi rationem reprobamus, damnamus. Atque eodem tempore hos infelices ecclesiasticos viros etiam atque etiam monemus, hortamur, ut resipiscant, et redeant ad cor, propriaeque saluti consulant, serio considerantes, quod « nullum ab aliis magis praeiudicium, quam « a Sacerdotibus tolerat Deus, quando eos, quos ad aliorum correctionem posuit, dare de se exempla pravitatis cernit 1 », ac diligenter meditantes, districtam ante tribunal Christi rationem aliquando esse reddendam. Faxit Deus, ut hi miseri ecclesiastici homines paternis Nostris monitis obtemperantes velint Nobis eam adhibere consolationem, quam Nobis afferunt illi utriusque Cleri viri, qui misere decepti, et in errorem induci ad Nos in singulos dies confugiunt poenitentes, ac supplici prece errati veniam et a censuris ecclesiasticis absolutionem humiliter enixeque implorantes.

Optime autem noscitis, Dilecti Filii Nostri ac Venerabiles Fratres, impia omnis generis scripta e tenebris emissa, ac dolis, mendaciis, calumniis et blasphemias plena, et scholas acatholicis magistris traditas, et templa acatholico cultui destinata, ac multiplices alias diabolicas sane insidias, artes, conatus, quibus Dei hominumque hostes in misera Italia catholicam Ecclesiam, si fieri unquam posset, funditus evertere, ac populos, et improvidam praesertim iuventutem quotidie magis depravare, corrumpere, et ex omnium animis sanctissimam nostram fidem religionemque radicitus extirpare connituntur. Itaque nihil dubitamus, quin Vos, Dilecti Filii Nostri ac Venerabiles Fratres, confortati in gratia Domini Nostri Iesu Christi pro egregio vestro episcopali zelo pergatis, ut adhuc cum maxima vestri nominis laude fecistis, concordissimis animis et ingeminatis studiis constanter opponere murum pro Domo Israel, et certare bonum certamen fidei, et ab adversariorum insidiis fideles curae vestrae commissos defendere,

1 S. Gregor. M. Homil. 17. in Evangel.

illosque assidue monere et exhortari, ut sanctissimam fidem, sine qua impossibile est placere Deo, et quam a Christo Domino per Apostolos tenet ac docet catholica Ecclesia, constantissime teneant, ac stabiles et immoti permaneant in divina nostra religione, quae una est vera, aeternamque parat salutem, ac civilem etiam societatem vel maxime sospitat atque fortunat. Quapropter ne desinatis, per parochos praesertim aliosque ecclesiasticos viros vitae integritate, morum gravitate, ac sana solidaque doctrina spectatos, tum divini verbi praedicatione, tum catechesi populos curae vestrae traditos veneranda augustae nostrae religionis mysteria, doctrinam, praecepta, disciplinam continenter et accurate docere. Etenim apprime scitis, ingentem malorum partem ex divinarum rerum, quae ad salutem necessariae sunt, inscitia plerumque oriri, ac propterea probe intelligitis, omnem curam industriamque esse adhibendam, ut huiusmodi malum a populis depellatur.

Antequam vero huic Nostrae Epistolae finem faciamus, Nobis temperare non possumus, quin meritas Italiae Clero laudes tribuamus, qui ex parte longe maxima Nobis et huic Petri Cathedrae, ac suis Antistitibus ex animo adhaerens a recta via minime declinavit, sed illustria suorum Antistitum exempla sequens, et asperrima quaeque patientissime perferens munere suo egregie perfungitur. Ea profecto spe nitimur fore, ut Clerus idem, divina auxiliante gratia, digne ambulans vocatione, qua vocatus est, splendidiora suae pietatis ac virtutis specimina exhibere semper contendat.

Debito quoque laudum praeconio prosequimur tot Virgines Deo sacras, quae a propriis Monasteriis violenter exturbatae, ac suis redditibus spoliatae, et ad mendicitatem redactae, haud tamen fregerunt fidem, quam Sponso dederunt, sed omni constantia tristissimam suam conditionem tolerantes non cessant diurnis nocturnisque precibus levare manus suas in sancta, Deum pro omnium et suorum etiam persecutorum salute obsecrantes, et misericordiam a Domino patienter expectantes.

Meritis etiam laudibus Italiae populos ornare gaudemus, qui catholicis sensibus egregie animati tot impias contra Ecclesiam molitiones detestantur, et filiali Nos, et hanc Sanctam Sedem, ac suos Antistites pietate, observantia et obedientia prosequi vehementer gloriantur, quique gravissimis licet difficultatibus ac periculis praepediti singularis sui erga Nos amoris, studiisque significaciones modis omnibus quotidie exhibere, et maximas Nostras, et Apostolicae huius Sedis angustias tum collatitia pecunia, tum aliis largitionibus sublevare non desistunt.

In tantis autem acerbitatibus, tantaque contra Ecclesiam excitata tempestate, ne despondeamus unquam animum, Dilecti Filii Nostri ac Venerabiles Fratres, cum « consilium nostrum, et fortificatio sit Christus, ac sine quo nihil possumus, per ipsum cuncta possimus, qui confirmans praedicatores Evangelii, et Sacramentorum ministros, ecce ego, inquit, vobiscum sum omnibus diebus usque ad consummationem saeculi 1 », et cum certo sciamus, inferi portas nunquam esse praevalituras adversus Ecclesiam, quae semper stetit, stabitque immota, custode et vindice Christo Iesu Domino Nostro, qui eam aedificavit, et qui fuit *heri*, et *hodie*, ipse et in *saecula* 2.

Ne desinamus autem, Dilecti Filii Nostri ac Venerabiles Fratres, ardentiore usque studio in humilitate cordis nostri orationes et postulationes Deo per Iesum Christum dies noctesque offerre, ut, hac turbulentissima tempestate depulsa, Ecclesia sua sancta a tantis calamitatibus resipiret, et ubique terrarum optatissima pace ac libertate fruatur, et novos ac splendidiores de suis inimicis agat triumphos, utque omnes errantes divinae suae gratiae lumine perfusi ab erroris via ad veritatis iustitiaeque iter revertantur, ac dignum poenitentiae fructum facientes perpetuum sancti sui nominis amorem et timorem habeant. Ut autem dives in misericordia Deus ferventissimis nostris precibus facilius annuat, invocemus potentissimum Immaculatae Sanctissimaeque Dei Genitricis Virgi-

1 S. Leo Epist. 167. ad Rustic. Narbon. Episcop.

2 S. Paul. Epist. ad Hebr. c. 13. v. 8.

nis Mariae patrocinium, ac suffragia petamus Sanctorum Apostolorum Petri et Pauli , omniumque Beatorum Caelitum , ut validis suis apud Deum deprecationibus implorent omnibus misericordiam et gratiam in auxilio opportuno, et omnes calamitates et pericula, quibus Ecclesia ubique, ac potissimum in Italia, affligitur, potenter avertant.

Denique certissimum singularis Nostrae in Vos benevolentiae pignus Apostolicam Benedictionem ex intimo corde profectam Vobis ipsis, Dilecti Filii Nostri ac Venerabiles Fratres, et gregi curae vestrae commisso peramanter impertimus.

Datum Romae apud S. Petrum, die X Augusti anno MDCCCLXIII.
Pontificatus Nostri Anno Decimoctavo.

EPISTOLA ENCYCLICA

AD ARCHIEPISCOPUM ET EPISCOPOS NEOGRANATENSIS
REIPUBLICAE.

Venerabilibus Fratribus Antonio Archiepiscopo S. Fidei De Bogota , et Episcopis eius Suffraganeis in Neogranatensi Republica.

PIUS PP. IX.

Venerabiles Fratres, Salutem et Apostolicam Benedictionem. Incredibili 1 afflictamur dolore , et una Vobiscum ingemiscimus , Venerabiles Fratres , cum noscamus quibus nefariis , dirisque modis a Neogranatensis Reipublicae Gubernio catholica impetitur, perturbatur, ac dilaceratur Ecclesia. Evidem verbis satis exprimere haud possumus multiplices sacrilegosque ausus , quibus Gubernium idem gravissimas Nobis, et huic Apostolicae Sedi injurias afferens, sanctissimam nostram religionem, eiusque veneranda iura, doctrinam, cultum, sacrosque Ministros conculcare ac destruere contendit. Namque idem Gubernium duos praesertim ab hinc annos infandas edidit leges et decreta , quae catholicae Ecclesiae, eiusque doctrinae , auctoritati , iuribusque vel maxime adversantur. Hisce enim iniquissimis legibus ac decretis inter alia, sacri ministri prohibiti sunt ecclesiasticum ministerium exercere sine civilis potestatis venia , et omnia Ecclesiae bona usurpata , divendita , ac propterea parochiae , et Religiosae utriusque sexus Familiae et Clerus , ac Valetudinaria , Domusque Refugii ,

1 Huc refertur Syllabi Propositio 26.

piaeque Sodalitates, Beneficia, et Capellaniae etiam iuris patronatus suis redditibus spolia tae. Atque per easdem iniustissimas leges, et decreta legitimum Ecclesiae acquirendi, ac possidendi ius omnino oppugnatum, et cuiusque acatholici cultus libertas sancita, et omnes utriusque sexus Religiosae Familiae in Neogranatensi territorio morantes de medio sublatae, earumque existentia plane interdicta, et vetita etiam omnium Litterarum, et cuiusque Apostolicae huius Sedis Rescripti promulgatio, et exilii poena ecclesiasticis viris, laicis vero multae et carceris indicta, si huic ordinationi obedire recusaverint. Insuper eisdem detestandis legibus ac decretis statuitur, ut ultriusque Cleri viri exilii poena afficiantur, qui legi circa bonorum Ecclesiae spoliationem obtulerare detrectaverint, utque omnes ecclesiastici homines sacri ministerii munia obire minime queant, nisi primum iuraverint, se Neogranatensis Reipublicae constitutioni, cunctisque illius legibus Ecclesiae tantopere adversis iam editis, et in posterum edendis obsequi, ac simul exilii poena iis omnibus infligitur, qui huiusmodi impium, illicitumque iusurandum praestare minime voluerint. Haec et alia multa omnino iniusta et impia, quae singillatim commemorare laedet, contra Ecclesiam a Neogranatensis Reipublicae Gubernio, proculcatis omnibus divinis humanisque iuribus, sunt constituta.

Cum autem vos, Venerabiles Fratres, pro egregia vestra religione, et virtute haud omiseritis tum voce, tum scriptis constanter obsistere tot inquis sacrilegisque eiusdem Gubernii ausibus, et decretis, atque Ecclesiae causam et iura impavide propugnare, tum eiusdem Gubernii furor in Vos, omnesque ecclesiasticos viros Vobis addictos, ac proprii officii, et vocationis memores, et in omnia, quae ad Ecclesiam pertinent, saevire non destitit. Quapropter Vos fere omnes miserandum in modum afflicti, ac militari manu comprehensi, a vestro grege violenter distracti, in vincula coniecti, in exilium pulsi, et in pestiferi aeris regiones amandati, et ecclesiastici viri, ac Religiosarum Familiarum Alumni pravis Gubernii ordinationibus merito obstantes vel in carcere detrusi, vel exilio multati mortem occubuere, vel in silvis

vitam agere coacti sunt. Cum vero omnes Virgines Deo votae ab ipso Gubernio furenter , crudeliterque a propriis Monasteriis expulsae , et ad rerum omnium inopiam redactae , fuerint a piis fidelibus, tristissima illarum conditione vehementer commotis, humaniter in proprias domos receptae et admissae, id aegerrime ferens Gubernium minitatur, velle illas ex eorumdem fidelium dominibus expellere ac disperdere. Hinc sacra Templa et Coenobia nudata , spoliata , polluta , et in militarium stationum usum commutata , eorumque sacra suppellex , et ornamenta direpta , hinc sacrorum cultus sublatus , et christianus populus legitimis suis pastoribus orbatus , omnibusque divinae nostrae religionis praesidiis misere destitutus , cum summa Nostra , Vestaque aegritudine in maximo aeternae salutis discrimine versatur. Ecquis catholicis, humanisque sensibus animatus non vehementer ingemiscet , cum videat a Neogranatensi Gubernio tam gravi , tamque crudeli persecutione catholicam Ecclesiam , eiusque doctrinam , auctoritatem , sacrasque personas oppugnari , ac tantas ab ipso supremae Nostrae , et Apostolicae huius Sedis auctoritati iniurias et contumelias inferri ?

Atque illud vel maxime dolendum , Venerabiles Fratres , quod nonnulli ecclesiastici homines existere potuerint, qui pravis ipsius Gubernii legibus et consiliis obsequi, favere, et commemoratum illicitum obedientiae iuramentum praestare non dubitarunt cum maximo Nostro, vestroque moerore, et bonorum omnium admiratione ac luctu.

In hac igitur tanta rei catholicae clade , tantaque animarum pernicie Apostolici Nostri officii probe memores , ac de omnium Ecclesiarum bono vel maxime solliciti, et Nobis, uti olim Prophetae, indictum existimantes : « Clama ne cesses, quasi tuba exalta « vocem tuam , et annuncia populo meo scelera eorum , et do- « mui Iacob peccata eorum 1 » , hisce Litteris Apostolicam Nostram attollentes vocem , omnia gravissima damna et iniurias a Neogranatensi Gubernio Ecclesiae, eiusque sacris personis ac re-

1 Isaias c. 58. v. 1.

bus, et huic Sanctae Sedi illatas incessanter querimur, et gravissime exprobramus. Atque omnia et singula, quae sive in his, sive in aliis rebus ad Ecclesiam, eiusque ius spectantibus ab eodem Neogranatensi Gubernio, et ab inferioribus quibusque illius Magistratibus decreta, gesta, seu quomodolibet attentata sunt, Auctoritate Nostra Apostolica reprobamus, damnamus, et leges ac decreta ipsa cum omnibus inde sequutis eadem Nostra Auctoritate abrogamus, et irrita prorsus, ac nullius roboris fuisse et fore, declaramus. Ipsos autem illorum auctores etiam atque etiam in Domino obtestamur, ut tandem aliquando suos oculos aperiant super gravissima vulnera Ecclesiae imposita, ac simul recordentur, serioque considerent censuras et poenas, quas Apostolicae Constitutiones, et Generalium Conciliorum Decreta contra Ecclesiae iurium invasores facto, ipso incurrendas infligunt, et iccirco animae suae misereantur, praे oculis habentes: « Quoniam durissimum iis, qui praesunt fiet iudicium 1 ». Atque etiam omni studio illos ecclesiasticos viros, qui Gubernio faventes a proprio officio misere declinarunt, monemus, et exhortamur, ut sanctam suam vocationem animo reputantes in iustitiae, veritatisque viam redire properent, et illorum ecclesiasticorum hominum exempla aemulentur, qui etiamsi infeliciter lapsi praescriptum a Gubernio obedientiae iuramentum praestiterunt, tamen cum ingenti Nostro, ac suorum Antistitum gaudio idem iusiurandum retractare, ac damnare gloria sunt.

Interim vero amplissimas meritasque Vobis tribuimus laudes, Venerabiles Fratres, qui laborantes sicut boni milites Christi Iesu, ac strenue in agone certantes singulari constantia et fortitudine, quoad per Vos fieri potuit, seu voce, seu Litteris Ecclesiae causam, eiusque doctrinam, iura, libertatem defendere, vestrique gregis saluti accurate consulere, eumque contra impias inimicorum hominum molitiones, et circumstantia Religionis pericula praemunire haud omiseritis, gravissimas omnes iniurias, molestias, et asperrima quaeque episcopali robore tolerantes. Itaque

dubitare non possumus, quin pari studio et contentione, quantum in Vobis est, pergatis, ut adhuc cum maxima vestri nominis laude fecistis, divinae nostrae religionis causam propugnare, et fidelium saluti prospicere.

Debitas quoque laudes deferimus fideli Neogranatensis Reipublicae Clero, qui suae vocationis servantissimus, et Nobis, atque huic Petri Cathedrae, suisque Antistitibus addictus propter Ecclesiam, veritatem et iustitiam tam vehementer exagitatus, immanem omnis generis insectationem patientissime est perpessus et patitur.

Non possumus quin admiremur et laudemus tot Virgines Deo sacras, quae etiamsi a suis monasteriis violenter expulsae, et ad tristem egestatem redactae, tamen caelesti Sponso firmiter adhaerentes, ac miserrimam, in qua versantur, conditionem christiana virtute perferentes, non cessant dies noctesque effundere corda sua coram Deo, Eumque humiliter enixeque pro omnium, ac suorum etiam persecutorum salute exorare. Collaudamus item catholicum Neogranatensis Reipublicae populum, qui ex parte longe maxima in veteri suo erga catholicam Ecclesiam, ac Nos, et hanc Apostolicam Sedem, et erga suos Antistites amore, fide, reverentia et obedientia perseverat.

Ne cessemus autem, Venerabiles Fratres, adire, cum fiducia ad thronum gratiae, et humillimis ac ferventissimis precibus misericordiarum Patrem ac Deum tolius consolationis sine intermissione orare et obsecrare, ut exurgat et iudicet causam suam, et Ecclesiam suam sanctam a tantis, quibus istic et ubique fere orbis premitur, calamitatibus eripiat, eamque opportuno auxilio solletur, et optatissimam diu in tot, tantisque adversis serenitatem, et pacem clementissime largiatur, omniumque misereatur secundum magnam misericordiam suam, atque omnipotenti sua virtute efficiat, ut omnes populi, gentes, nationes Ipsum, et Unigenitum Filium suum Dominum Nostrum Iesum Christum una cum Sancto Spiritu agnoscant, adorent, timeant, ac ex toto corde, anima ac mente diligent, et omnia divina mandata ac paecepta religiose

observantes, ut filii lucis ambulent in omni bonitate, iustitia, et veritate.

Demum omnium caelestium munerum auspicem, et certissimum praecipuae Nostrae in Vos benevolentiae pignus Apostolicam Benedictionem ex imo corde depromptam Vobis ipsis, Venerabiles Fratres, et gregi vestrae vigilantiae concredito peramanter impertimus.

Datum Romae apud Sanctum Petrum, die XVII Septembris anno MDCCCLXIII. Pontificatus Nostri Anno Decimoctavo

LITTERAE

VEN. FRATRI GREGORIO ARCHIEP. MONACENSI ET FRISINGENSI
DIE XXI DECEMBERIS ANNI MDCCCLXIII.

PIUS PP. IX.

Venerabilis Frater, Salutem et Apostolicam Benedictionem. Tuas libenter ¹ accepimus Litteras, die 7 proxime elapsi mensis Octobris datas, ut Nos certiores faceres de Conventu in ista Monacensi civitate proximo mense Septembri a nonnullis Germaniae Theologis, doctisque catholicis viris habito de variis argumentis, quae ad theologicas praesertim ac philosophicas tradendas disciplinas pertinent. Ex Litteris Tibi Nostro iussu scriptis a Venerabili Fratre Matthaeo Archiepiscopo Neocaesariensi Nostro, et Apostolicae huius Sedis apud istam Regiam Aulam Nuntio vel facile noscere potuisti, Venerabilis Frater, quibus Nos sensibus affecti fuerimus, ubi primum de hoc proposito Conventu nuntium accepimus, et postquam agnovimus quomodo commemorati Theologi, et viri ad huiusmodi Conventum invitati et congregati fuere. Nihil certe dubitare volebamus de laudabili fine, quo huius Conventus auctores, fautoresque permoti fuere, ut scilicet omnes Catholici viri doctrina praestantes, collatis consiliis, coniunctisque viribus, germanam catholicae Ecclesiae scientiam promoverent, eamque a nefariis, ac perniciosissimis tot adversariorum opinionibus, conatibusque vindicarent ac defenderent. Sed in hac sublimi Principis Apostolorum Cathedra, licet immerentes, collocati asperrimis

¹ Huc referuntur Syllabi Propositiones 9 — 10 — 12 — 13 — 14 — 22 — 23.

hisce temporibus , quibus Sacrorum Antistitum auctoritas , si unquam alias , ad unitatem et integritatem catholicae doctrinae custodiendam , vel maxime est necessaria , et ab omnibus sarta tecta servari debet , non potuimus non vehementer mirari videntes memorati Conventus invitationem privato nomine factam et promulgatam , quin ullo modo intercederet impulsus , auctoritas , et missio ecclesiasticae potestatis , ad quam proprio , ac nativo iure unice pertinet advigilare ac dirigere theologicarum praesertim rerum doctrinam. Quae sane res , ut optime nescis , omnino nova , ac prorsus inusitata in Ecclesia est. Atque ictcirco voluimus , Te , Venerabilis Frater , noscere hanc nostram fuisse sententiam , ut cum a Te , tum ab aliis Venerabilibus Fratribus Sacrorum in Germania Antistitibus probe iudicari posset de scopo per Conventus programma enuntiato , si nempe talis esset , ut veram Ecclesiae utilitatem afferret. Eodem autem tempore certi eramus , Te , Venerabilis Frater , pro pastorali Tua sollicitudine ac zelo omnia consilia et studia esse adhibitum , ne in eodem Conventu tum catholicae fidei ac doctrinae integritas , tum obedientia , quam omnes cuiusque classis et conditionis catholici homines Ecclesiae auctoritati ac magisterio praestare omnino debent , vel minimum detrimentum caperent. Ac dissimulare non possumus , non levibus Nos angustiis affectos fuisse , quandoquidem verebamur , ne huiusmodi Conventu sine ecclesiastica auctoritate congregato exemplum paeberetur sensim usurpandi aliquid ex iure ecclesiastici regiminis , et authentici magisterii , quod divina institutione proprium est Romano Pontifici , et Episcopis in unione et consensione cum ipso S. Petri Successore , atque ita , ecclesiastico ordine perturbato , aliquando unitas , et obedientia fidei apud aliquos labefactaretur. Atque etiam timebamus , ne in ipso Conventu quaedam enunciarentur , ac tenerentur opiniones et placa*ta* , quae in vulgus praesertim emissā et catholicae doctrinae puritatem , et debitam subiectionem in periculum ac discrimen vocarent.

Summo enim animi Nostri dolore recordabamur , Venerabilis Frater , hanc Apostolicam Sedem pro gravissimi sui munieris offi-

cio debuisse, ultimis hisce temporibus, censura notare, ac prohibere nonnullorum Germaniae Scriptorum opera, qui cum nescirent decidere ab aliquo principio, seu methodo falsae scientiae, aut hodiernae fallacis philosophiae, praeter voluntatem, uti confidimus, inducti fuere ad proferendas ac docendas doctrinas dissentientes a vero nonnullorum sanctissimae fidei nostrae dogmatum sensu et interpretatione, quique errores ab Ecclesia iam damnatos e tenebris excitarunt, et propriam divinae revelationis et fidei indolem et naturam in alienum omnino sensum explicaverunt. Noscebamus etiam, Venerabilis Frater, nonnullos ex catholicis, qui severioris disciplinis excolendis operam navant, humani ingenii viribus nimium fidentes errorum periculis haud fuisse absterritos, ne in asserenda fallaci, et minime sincera scientiae libertate abriperentur ultra limites, quos praetergredi non sinit obedientia debita erga magisterium Ecclesiae ad totius revelatae veritatis integritatem servandam divinitus institutum. Ex quo evenit, ut huiusmodi catholici misere decepti et iis saepe consentiant, qui contra huius Apostolicae Sedis, ac Nostrarum Congregationum decreta declamat, ac blaterant, ea liberum scientiae progressum impedire, et periculo se exponunt sacra illa frangendi obedientiae vincula, quibus ex Dei voluntate eidem Apostolicae huic obstringuntur Sedi, quae a Deo ipso veritatis magistra, et vindex fuit constituta.

Neque ignorabamus, in Germania etiam falsam invaluisse opinionem adversus veterem scholam, et adversus doctrinam summorum illorum Doctorum, quos propter admirabilem eorum sapientiam, et vitae sanctitatem universalis veneratur Ecclesia. Qua falsa opinione ipsius Ecclesiae auctoritas in discrimen vocatur, quandoquidem ipsa Ecclesia non solum per tot continentia saecula permisit, ut ex eorumdem Doctorum methodo, et ex principiis communi omnium catholicarum scholarum consensu sancitis theologica excoleretur scientia, verum etiam saepissime summis laudibus theologicam eorum doctrinam extulit, illamque veluti fortissimum fidei propugnaculum et formidanda contra suos inimicos arma vehementer commendavit. Haec sane omnia

pro gravissimi supremi Nostri Apostolici ministerii munere , ac pro singulari illo amore , quo omnes Germaniae catholicos carissimam Dominici gregis partem prosequimur , Nostrum sollicitabant et angebant animum tot aliis pressum angustiis, ubi, accepto memorati Conventus nuntio , res supra expositas Tibi significandas curavimus. Postquam vero per brevissimum nuntium ad Nos relatum fuit, Te, Venerabilis Frater, huiusce Conventus auctorum precibus annuentem tribuisse veniam celebrandi eumdem Conventum , ac sacrum solemni ritu peregisse, et consultationes in eodem Conventu iuxta catholicae Ecclesiae doctrinam habitas fuisse, et postquam ipsius Conventus viri per eumdem nuntium Apostolicam Nostram imploraverunt Benedictionem , nulla interposita mora, piis illorum votis obsecundavimus.

Summa vero anxietate Tuas expectabamus Litteras , ut a Te, Venerabilis Frater , accurassime noscere possemus ea omnia , quae ad eumdem Conventum quovis modo possent pertinere. Nunc autem cum a Te acceperimus, quae scire vel maxime cupiebamus , ea spe nilimur fore , ut huiusmodi negotium , quemadmodum asseris , Deo auxiliante, in maiorem catholicae in Germania Ecclesiae utilitatem cedat. Evidem cum omnes eiusdem Conventus viri , veluti scribis , asseruerint , scientiarum progressum , et felicem exitum in devitandis ac refutandis miserrimae nostrae aetatis erroribus omnino pendere ab intima erga veritates revelatas adhaesione , quas catholica docet Ecclesia , ipsi noverunt ac professi sunt illam veritatem , quam veri catholici scientiis excolendis et evolvendis dediti semper tenuere , ac tradiderunt. Atque hac veritate innixi potuerunt ipsi sapientes , ac veri catholici viri scientias easdem tuto excolere , explanare , easque utiles certasque reddere. Quod quidem obtineri non potest , si humanae rationis lumen finibus circumscriptum eas quoque veritates investigando , quas propriis viribus et facultatibus assequi potest , non veneretur maxime, ut par est, infallibile et increatum Divini intellectus lumen , quod in christiana revelatione undique mirifice elucet. Quamvis enim naturales illae disciplinae suis propriis ratione cognitis principiis nitantur , catholici tamen earum

cultores divinam revelationem veluti rectricem stellam prae oculis habeant oportet, qua praelucente sibi a syrtibus et erroribus ca-veant, ubi in suis investigationibus, et commentationibus animad-vertant, posse se illis adduci, ut saepissime accidit, ad ea profe-renda, quae plus minusve adversentur infallibili rerum veritatē, quae a Deo revelatae fuere. Hinc dubitare nolumus, quin ipsius Conventus viri commemoratam veritatem noscentes, ac profitentes uno eodemque tempore plane reiicere ac reprobare voluerint re-centem illam ac praeposteram philosophandi rationem, quac etiam si divinam revelationem veluti historicum factum admittat, tamen ineffabiles veritates ab ipsa divina revelatione propositas humanae rationis investigationibus supponit, perinde ac si illae veritates rationi subiectae essent, vel ratio suis viribus et principiis posset consequi intelligentiam et scientiam omnium supernarum sanctissimae fidei nostrae veritatum, et mysteriorum, quae ita supra hu-manam rationem sunt, ut haec nunquam effici possit idonea ad illa suis viribus, et ex naturalibus suis principiis intelligenda, aut demonstranda.

Eiusdem vero Conventus viros debitum prosequimur laudibus, propterea quod reiicientes, uti existimamus, falsam inter philoso-phum et philosophiam distinctionem, de qua in aliis Nostris Litteris ad Te scriptis loquuti sumus, neverunt, et asseruerunt, omnes catholicos in doctis suis commentationibus debere ex con-scientia dogmaticis infallibilis catholicae Ecclesiae obedire decre-tis. Dum vero debitas illis deferimus laudes, quod professi sint veritatem, quae ex catholicae fidei obligatione necessario oritur, persuadere Nobis volumus, noluisse obligationem, qua catholicī Magistri, ac Scriptores omnino adstringuntur, coarctare in iis tan-tum, quae ab infallibili Ecclesiae iudicio, veluti fidei dogmata ab omnibus credenda proponuntur. Atque etiam Nobis persuademus, ipsos noluisse declarare, perfectam illam erga revelatas veritates adhaesionem, quam agnoverunt necessariam omnino esse ad ve-rum scientiarum progressum assequendum, et ad errores confu-tandos, obtineri posse, si dumtaxat Dogmatibus, ab Ecclesia ex-presse definitis, fides et obsequium adhibeatur.

Namque etiamsi ageretur de illa subiectione, quae fidei divinae actu est praestanda, limitanda tamen non esset ad ea, quae expressis oecumenicorum Conciliorum, aut Romanorum Pontificum, huiusque Sedis decretis definita sunt, sed ad ea quoque extendenda, quae ordinario totius Ecclesiae per orbem dispersae magisterio tamquam divinitus revelata traduntur, ideoque universali et constanti consensu a catholicis Theologis ad fidem perlinere retinentur. Sed cum agatur de illa subiectione, quae ex conscientia ii omnes catholici obstringuntur, qui in contemplatrices scientias incumbunt, ut novas suis scriptis Ecclesiae afferant utilitates, ideocirco eiusdem Conventus viri recognoscere debent, sapientibus catholicis haud satis esse, ut praefata Ecclesiae dogmata recipient ac venerentur, verum etiam opus esse, ut se subiiciant tum decisionibus, quae ad doctrinam pertinentes a Pontificiis Congregationibus proferuntur, tum iis doctrinae capitibus, quae communi et constanti Catholicorum consensu retinentur, ut theologicae veritates et conclusiones ita certae, ut opiniones eisdem doctrinae capitibus adversae quamquam haereticae dici nequeant, tamen aliam theologicam merentur censuram. Itaque haud existimamus viros, qui commemorato Monacensi interfuerere Conventui, ullo modo potuisse, aut voluisse obstare doctrinae nuper expositae, quae ex verae theologiae principiis in Ecclesia retinetur, quin immo ea fiducia sustentamur fore, ut ipsi in severioribus excolendis disciplinis velint ad enunciatae doctrinae normam se diligenter conformare. Quae Nostra fiducia praesertim nititur iis Litteris, quas per Te, Venerabilis Frater, Nobis miserunt. Siquidem eisdem Litteris cum summa animi Nostri consolatione ipsi profitentur, sibi in cogendo Conventu mentem nunquam fuisse vel minimam sibi arrogare auctoritatem, quae ad Ecclesiam omnino pertinet, ac simul testanlur, noluisse eumdem dimittere Conventum, quin primum declararent summam observantiam, obedientiam, ac filiale pietatem, qua Nos et hanc Petri cathedralm catholicae unitatis centrum prosequuntur. Cum igitur hisce sensibus supremam nostram, et Apostolicae huius Sedis potestatem, auctoritatemque ipsi recognoscant, ac simul intelligent, gravissimum officium Nobis ab ipso

Christo Domino commissum regendi , ac moderandi universam suam Ecclesiam, ac pascendi omnem suum gregem salutaris doctrinae pascuis, et continenter advigilandi, ne sanctissima fides, eiusque doctrina ullum unquam detrimentum patiatur , dubitare non possumus, quin ipsi severioribus disciplinis excolendis , tradendis, sanaeque doctrinae tuendae operam navantes uno, eodemque tempore agnoscant, se debere et religiose exsequi regulas ab Ecclesia semper servatas, et obedire omnibus decretis, quae circa doctrinam a Suprema Nostra Pontificia auctoritate eduntur. Haec autem omnia Tibi communicavimus , ac summopere optamus , ut ea iis omnibus significes viris , qui in memorato Conventu fuere , dum si opportunum esse censuerimus, haud omittemus alia Tibi, et Venerabilibus Fratribus Germaniae Sacrorum Antislitibus hac super re significare , postquam Tuam , et eorumdem Antislitum sententiam intellexerimus de huiusmodi Conventuum opportunitate. Demum pastoralem Tuam sollicitudinem , ac vigilantiam iterum vehementer excitamus , ut una cum aliis Venerabilibus Fratribus Sacrorum in Germania Antislitibus curas omnes , cogitationesque in tuendam et propagandam sanam doctrinam assidue conferas. Neque omittas omnibus inculcare , ut profanas omnes novitates diligenter devitent, neque ab illis se decipi unquam patientur, qui falsam scientiae libertatem, eiusque non solum verum profectum, sed etiam errores tamquam progressus impudenter iactant. Atque pari studio et contentione ne desinas omnes hortari , ut maxima cura, et industria in veram christianam et catholicam sapientiam incumbant, atque, uti par est, in summo pretio habeant veros solidosque scientiae progressus, qui sanctissima ac divina fide duce, et magistra, in catholicis scholis habiti fuerunt, utque theologicas praesertim disciplinas excolant secundum principia, et constantes doctrinas, quibus unanimiter innixi sapientissimi Doctores immortalem sibi nominis laudem , et maximam Ecclesiae, et scientiae utilitatem , ac splendorem pepererunt. Hoc sane modo catholici viri in scientiis excolendis poterunt, Deo auxiliante magis in dies, quantum homini fas est, noscere, evolvere, et explanare veritatum thesaurum , quas in naturae et gratiae operibus Deus posuit , ut

homo postquam illas rationis et fidei lumine noverit, suamque vitam ad eas sedulo conformaverit, possit in aeternae gloriae claritate summam veritatem, Deum scilicet, sine ullo velamine intueri, Eoque felicissime in aeternum perfrui et gaudere. Hanc autem occasionem libentissimo animo amplectimur, ut denuo testemur et confirmemus praecipuam nostram in Te caritatem, cuius quoque pignus esse volumus Apostolicam Benedictionem, quam effuso cordis affectu Tibi ipsi, Venerabilis Frater, et gregi Tuae curae commisso peramanter impertimus.

Datum Romae apud S. Petrum, die XXI Decembris anno MDCCCLXIII. Pontificatus Nostri Anno Decimoctavo.

LITTERAE

VEN. FRATRI HERMANNO ARCHIEP. FRIBURGENSI IN BRISGOVIA
DIE XIV IULII ANNI MDCCCLXIV.

PIUS PP. IX.

Venerabilis Frater, Salutem et Apostolicam Benedictionem. Quum non sine ¹ maxima animi Nostri aegritudine ex pluribus nunciis accepimus, in magno isto Badensi Ducatu de novo popularium scholarum regimine parari ordinationes, quae variis modis christianam iuventutis institutionem, et educationem in magnum adducunt discrimen, propterea quod illas a salutari catholicae Ecclesiae magisterio ac vigilantia quotidie magis amovent, nihil dubitavimus, quin Tu, Venerabilis Frater, pro eximio Tuo in animalium salute curanda studio, ac pro perspecta Tua in Ecclesiae libertate, eiusque iuribus tuendis constantia fortiter iis omnibus obsisteres, quae vel minimum animalium saluti damnum afferre, vel quovis modo episcopalnis Tui ministerii liberam auctoritatem coarctare possent. Quod autem pro certo habebamus, id luculenter confirmarunt Tuae Litterae super hoc tanti momenti negotio ad Nos datae, et commentarius eisdem adiectus. Ac vehementer laetamur, cum videamus, Te, Venerabilis Frater, licet aetate gravem, pro Ecclesia strenue pugnare eadem illa fortitudine, qua in episcopalnis Tui ministerii decursu summopere praestitisti, ac Nostras, et huius Sanctae Sedis laudes merito, optimoque iure Tibi comparasti. Evidem inter maximas, quibus affligimur, acerbitates, summa ultimur consolatione, noscentes quomodo dives in misericordia Deus Sacrorum Antistites eo maiore divinae suaे gra-

¹ Huc referuntur Syllabi Propositiones 47 — 48.

tiae auxilio roboret ad Christi Iesu gregem tuendum, quo graviora in ipsum gregem luctuosissimis hisce temporibus damna ini-
micorum hominum opera irruunt et invadunt.

Nemo certe ignorare potest, tristissimam ac deplorandam con-
ditionem, in quam hodierna societas magis in dies prolabitur, de-
rivare ex tot funestissimis machinationibus, quae adhibentur, ut
a publicis Institutionibus, ac domesticis familiis quotidiae magis
sanctissima Christi fides, religio, eiusque salutaris doctrina amo-
veatur, et saluberrima eius vis coangustetur, ac praepediatur.
Quae perniciosissimae machinationes ex tot pravis doctrinis ne-
cessario originem habent, quas hac miserrima nostra aetate cum
maximo christianaे civilisque reipublicae damno undique maio-
rem in modum invalescere, et caput altius extollere vehementer
dolemus. Et sane cum veritates a Deo revelatae impudenter dene-
gentur, vel humanae rationis examini subiificantur, evenit, ut illa
naturalium rerum plane tollatur subiectio, quae supernaturali or-
dini omnino debetur, utque homines ab aeterno suo fine arcean-
tur, eorumque cogitationes actionesque ad materialium, fugacium-
que huius mundi rerum limites redigantur. Et quoniam Ecclesia,
quae columna et firmamentum veritatis a Divino suo Auctore fuit
constituta, ut omnes homines divinam edoceat fidem, eiusque de-
positum sibi traditum integrum inviolatumque custodiat, ac homi-
nes, eorumque consortia et actiones ad morum honestatem, vitae-
que integritatem iuxta revelatae doctrinae normam dirigat et fin-
gat, ideo pravarum doctrinarum fautores et propagatores omnia
conantur, ut ecclesiasticam potestatem sua erga humanam societa-
tem auctoritate spolient. Quamobrem nihil intentatum, nihilque
inexpertum relinquunt, ut omnem Ecclesiae potestatem, eiusque
salutarem vim, quam ipsa Ecclesia ex divina sua institutione sem-
per exercuit, et in humanae societatis Instituta exercere debet vel
magis in dies coarctent, vel ab eisdem Institutis arceant, et ipsa
Instituta pleno civilis, politicaeque auctoritatis arbitrio subiificant
ad imperantium placita, et ad volubilium aetatis opinionum
rationem.

Nihil vero mirum si huiusmodi funestissimi sane conatus in publicam iuventutis institutionem educationemque in primis comparentur, nihilque dubitandum, quin humana societas gravissimis repleatur et vexetur damnis, ubi a publica et privata iuventutis institutione, qua rei cum sacrae, tum publicae felicitas tantopere continetur, fuerit moderatrix Ecclesiae auctoritas, eiusque salutifera vis amota. Hoc enim modo humana societas vero illo christiano spiritu sensim privatur, qui unus potest et publici ordinis, tranquillitatisque fundamenta stabiliter servare, ac verum utilemque civilitatis progressum efficere ac moderari, et ea omnia hominibus praebere subsidia, quae ad ultimum suum post mortalis huiusce vitae statutum finem assequendum, scilicet ad aeternam salutem obtinendam sunt necessaria. Et sane institutio, quae non solum rerum dumtaxat naturalium scientiam, ac terrenae socialis vitae fines spectat, verum etiam a veritatibus a Deo revelatis dedit, in erroris mendacique spiritum prolabatur oportet, et educatio, quae sine christianae doctrinae, morumque disciplinae auxilio teneras adolescentium mentes, eorumque cerea in vitium flecti corda informat, non potest non parere progeniem, quae pravis cupiditatibus propriisque rationibus tantum permota, et impulsa maximas tum privatis familiis, tum reipublicae affert calamitates.

At vero cum huiusmodi perniciossima docendi ratio seiuncta a catholica fide et ab Ecclesiae potestate maximo sit hominibus et societati damno, dum agitur de litteris severioribusque disciplinis tradendis, ac de educatione curanda in scholis publicisque Institutis, quae honestioribus societatis classibus sunt destinata, ecquis non videt, multo graviora mala et damna ex hac methodo derivare, si eadem in populares inducatur scholas? Etenim in hisce potissimum scholis omnes cuiusque e populo classis pueri vel a teneris annis sanctissimae nostrae Religionis mysteriis, ac praceptionibus sedulo sunt erudiendi, et ad pietatem, morumque honestalem, et ad religionem, civilemque vivendi rationem accurate formandi. Atque in eisdem scholis religiosa praesertim doctrina ita primarium in institutione et educatione locum habere,

ac dominari debet, ut aliarum cognitiones, quibus iuventus ibi imbuitur, veluti adventiciae appareant. Quapropter iuventus maximis exponitur periculis nisi eius in memoratis scholis institutio arctissimo cum religiosa doctrina vinculo consocietur. Cum igitur populares scholae ad populum religiose formandum, eiusque pietatem et christianam morum disciplinam fovendam sint praesertim statutae, ictcirco omnem Ecclesiae curam, sollicitudinem et vigilantiam prae ceteris educationis Institutis sibi merito atque optimo iure semper vindicarunt. Ac propterea consilia conatusque arcendi a popularibus scholis Ecclesiae potestatem proficiscuntur ex animo eidem Ecclesiae summopere adverso, atque ex studio extingueri in populis divinum sanctissimae fidei nostrae lumen. Quocirca Ecclesia, quae easdem fundavit scholas summa cura studioque eas semper est prosequuta, illasque veluti potiorem ecclesiasticae suae auctoritatis ac regiminis partem consideravit, et quaecumque earum ab Ecclesia seiunctio maximum eidem Ecclesiae, ipsisque scholis affert detrimentum. Ii autem omnes, qui perperam contendunt, Ecclesiam debere salutarem suam moderatricem vim erga populares scholas deponere, aut intermittere, iidem nihil aliud profecto vellent, quam ut Ecclesia contra divini sui Auctoris mandata ageret, et gravissimo officio curandi omnium hominum salutem, sibi divinitus commisso, deesset. Certe quidem ubi in quibusque locis regionibusque perniciosissimum huiusmodi vel susciperetur, vel ad exitum perduceretur consilium expellendi a scholis Ecclesiae auctoritatem, et iuventus misere exponeretur damno circa fidem, tunc Ecclesia non solum deberet intentissimo studio omnia conari, nullisque curis unquam parcere, ut eadem iuventus necessariam christianam institutionem et educationem habeat, verum etiam cogeretur omnes fideles monere, eisque declarare, eiusmodi scholas catholicae Ecclesiae adversas haud posse in conscientia frequentari.

Tibi autem, Venerabilis Frater, summopere gratulamur, quod catholicae Ecclesiae doctrinae quoad iuventutis institutionem educationemque firmiter inhaerens, Tuo commentario omnibus opinionibus ordinationibusque sapienter et constanter obstitisti,

quae ab isto Magno Badarum Ducatu propositae fuere circa popularium scholarum reformationem, quaeque maximam christiana educationi perniciem afferunt, et veneranda Ecclesiae in tanto negotio iura omnino destruunt. Ac persuasissimum Nobis est, Te nihil umquam inespertum esse relictum, ut eiusdem Ecclesiae iura impavide defendas, utque ab adolescentium institutione et educatione diligentissime removeas quidquid fidei firmitatem vel leviter turbare, labefactare, aut religiosam eorumdem conscientiam corrumpere, morumque honestatem contaminare possit, quae unice a fide nostra sanctissima producitur, alitur et augetur. Summa vero afficimur consolatione, cum istius Tuae Dioecesis Clerus, suae vocationis et officii probe memor, una Tecum suam omnem in Ecclesiae, eiusque catholici populi iuribus tutandis operam impendat. Nec minori gaudio perfundimur, proterea quod iste fidelis populus optime sentiens de catholica suae prolis educatione, nihil antiquius habeat, quam ut eadem proles omnino instituatur in scholis, quae a catholica dirigantur Ecclesia. Iam vero levantes oculos Nostros ad Dominum Deum nostrum, ab Ipso humiliter enixeque exposcimus, ut in abundantiam divinae suae gratiae Tibi, Venerabilis Frater, et isti Clero populoque fidi semper propitius adesse velit, quo omnes caelesti ope roborati pro Ecclesiae suae sanctae causa sub Tuo ductu strenue dimicare pergent. Atque superni huius praesidii auspicem, et peculiaris, qua Te in Domino complectimur, benevolentiae pignus Apostolicam Benedictionem ex intimo corde profectam Tibi ipsi, Venerabilis Frater, cunctisque Clericis laicisque fidelibus Tuae vigilantiae concreditis peramanter impertimus.

Datum Romae apud S. Petrum, die XIV Iulii anno MDCCCLXIV,
Pontificatus Nostri Anno Decimonono.

LITTERAE

VENERABILI FRATRI IOANNI THOMAE EPISCOPO MONTIS REGALIS
DIE XXIX SEPTEMBRIS ANNI MDCCCLXIV.

PIUS PP. IX.

Venerabilis Frater, Salutem et Apostolicam Benedictionem. Singularis Nobisque ¹ iamdiu notissimus Tuus erga Nos amor, et pietas efficit, ut vehementer gratuleris de bona valetudine, qua inter maximas acerbitates, Deo auxiliante, fruimur, veluti significas amantissimis Tuis Litteris die 17 huius mensis datis, quae Nobis gratae admodum fuere. Perlibenter autem accepimus duo opuscula a Te conscripta, typisque edita, quorum uno, Venerabilis Frater, oppugnes iniustissimam legem istic adversus religiosas praesertim Familias propositam, altero vero iniquissimam pariter legem istic quoque propositam de Clericis militiae adscribendis, quae infandae sane leges omnibus divinis, Ecclesiasticis humanisque iuribus vel maxime adversae omnino sunt reprobanda ac damnandae. Vehementer autem gaudemus, Venerabilis Frater, pro egregia Tua religione ac sacerdotali zelo tum commemoratis opusculis, tum aliis scriptis in lucem editis sanctissimae nostrae religionis causam et doctrinam sine intermissione strenue defendere et nefariis inimicorum hominum consiliis conatibusque constanter obsistere. Etenim si unquam alias, in hac potissimum tanta impiorum hominum contra catholicam Ecclesiam conspiratione Episcopi, veluti optime noscis, omni studio et contentione debent fortiter praeliari praelia Domini, eiusque

¹ Huc refertur Syllabi Propositio 32.


Sanctae Ecclesiae causam impavide propugnare. Iam vero ex eisdem Tuis Litteris non mediocri certe voluptate novimus, Tibi magnae consolationi fuisse ultimum Prosynodalem Conventum a Te habitum, in quem convenere Canonici istius cathedralis Tui Templi, et universus istius civitatis clerus, ac centum decem istius dioeceseos parochi. Namque eodem in Conventu omnia religiosissimae peracta fuere, omnesque luculentissimis verbis professi sunt, nihil sibi gratius, nihil potius esse posse, quam sanctissimam Nostram fidem et catholicae Ecclesiae doctrinam defendere, et immobili fide et observantia Nobis et huic Petri Cathedrae firmiter adhaerere. Quod quidem non leve Nobis solatium laetitiamque attulit. Evidem ex huiusmodi Congressibus summa, Deo auxiliante, in clerus, et in christianam plebem bona redundant, et circa omni laude sunt dignissimi sacrorum Antistites, qui Conventus ipsos hisce praesertim asperrimis temporibus provide sapienterque habere curant. Perge, Venerabilis Frater, ut adhuc fecisti, omnes Tuas curas cogitationesque in Tui gregis salutem procurandam, in Dei eiusque Sanctae Ecclesiae causam tuendam atque in pravas impiorum hominum insidias detegendas, errores profligandos conatusque reprimendos conferre. Tibi autem persuade, peculiarem esse, qua Te in Domino prosequimur, benevolentiam. Cuius quoque certissimum pignus accipe Apostolicam Benedictionem, quam effuso cordis affectu Tibi ipsi, Venerabilis Frater, cunctisque Clericis Laicisque fidelibus Tuae vigilantiae commissis peramanter impertimus.

Datum Romae apud S. Petrum, die XXIX Septembris anno MDCCCLXIV. Pontificatus Nostri Anno Decimonono.

INDEX

ACTORUM SS. D. N. PII PAPAE IX.

EX QUIBUS EXCERPTUS EST SYLLABUS



<i>EPISTOLA ENCYCLICA</i> Qui pluribus, 9 Nov. 1846. —	
<i>Huc referuntur Syllabi Propositiones 4 - 5 - 6 -</i>	
<i>7 - 16 - 40 - 63 - 74.</i>	. pag. 3
<i>ALLOCUTIO</i> Quisque vestrum, 4 Oct. 1847. — <i>Huc re-</i>	
<i>fertur Syllabi Propositio 63.</i>	» 19
<i>ALLOCUTIO</i> Ubi primum, 17 Dec. 1847. — <i>Huc refer-</i>	
<i>tur Syllabi Propositio 16.</i>	» 23
<i>ALLOCUTIO</i> Quibus quantisque, 20 Aprilis 1849. — <i>Huc</i>	
<i>referuntur Syllabi Propositiones 40 - 64 - 76.</i>	» 29
<i>EPISTOLA ENCYCLICA</i> Nostis et Nobiscum, 8 Decembris	
<i>1849. — Huc referuntur Syllabi Propositiones</i>	
<i>18 - 63.</i>	» 50
<i>ALLOCUTIO</i> Si semper antea, 20 Maii 1850. — <i>Huc re-</i>	
<i>fertur Syllabi Propositio 76.</i>	» 70
<i>ALLOCUTIO</i> In consistoriali, 4 Nov. 1850. — <i>Huc refe-</i>	
<i>runtur Syllabi Propositiones 43 - 44 - 45.</i>	» 79
<i>DAMNATIO</i> Multiplices inter, 10 Iunii 1851. — <i>Huc</i>	
<i>referuntur Syllabi Propositiones 15 - 24 - 25 -</i>	
<i>30 - 51 - 54 - 68 - 74.</i>	» 87

- DAMNATIO* Ad apostolicae , 22 Augusti 1851. — *Huc referuntur Syllabi Propositiones* 24 — 25 — 34 — 35 — 36 — 38 — 41 — 42 — 65 — 66 — 67 — 69 — 70 — 71 — 72 — 73 — 74 — 75 . pag. 91
- ALLOCUTIO* Quibus luctuosissimis , 5 Sept. 1851. — *Huc refertur Syllabi Propositio* 45 » 97
- LETTERA di S. S. P. Pio IX al Re di Sardegna*, 9 Sept. 1852. — *Huc refertur Syllabi Propositio* 75. » 104
- ALLOCUTIO Acerbissimum*, 27 Sept. 1852. — *Huc referuntur Syllabi Propositiones* 31 — 51 — 53 — 55 — 67 — 73 — 74 — 78. » 110
- ALLOCUTIO Singulari quadam*, 9 Dec. 1854. — *Huc referuntur Syllabi Propositiones* 8 — 17 — 19. » 120
- ALLOCUTIO Probe memineritis*, 22 Ianuarii 1855. — *Huc refertur Syllabi Propositio* 53. » 129
- ALLOCUTIO Cum saepe*, 26 Iulii 1855. — *Huc refertur Syllabi Propositio* 53 . » 132
- ALLOCUTIO Nemo vestrum*, 26 Iulii 1855. — *Huc refertur Syllabi Propositio* 77. » 136
- EPISTOLA ENCYCLICA Singulari quidem*, 17 Martii 1856. — *Huc referuntur Syllabi Propositiones* 4 — 16. . » 141
- ALLOCUTIO Nunquam fore*, 15 Dec. 1856. — *Huc referuntur Syllabi Propositiones* 26 — 28 — 29 — 31 — 46 — 50 — 52 — 79. » 156
- EPISTOLA ad Card. Archiep. Coloniensem*, Eximiam, 15 Junii 1857. — *Huc refertur Syllabi Propositio* 14. » 165
- LITTERAE APOSTOLICAE Cum catholica*, 26 Martii 1860. — *Huc referuntur Syllabi Propositiones* 63 — 76. » 169
- LITTERAE ad Episc. Wratislaviensem*, Dolore haud, 30 Apr. 1860. — *Huc refertur Syllabi Propositio* 14. » 178
- ALLOCUTIO Novos et ante*, 28 Sept. 1860. — *Huc referuntur Syllabi Propositiones* 62 — 76.. » 181

- ALLOCUTIO** Multis gravibus, 17 Dec. 1860. — *Huc referuntur Syllabi Propositiones 19 — 37 — 43 — 73.* pag. 188
- ALLOCUTIO** Iamdudum cernimus, 18 Martii 1861. —
Huc refer. Syllabi Proposit. 37 — 64 — 76 — 80. » 196
- ALLOCUTIO** Meminit unusquisque, 30 Sept. 1861. —
Huc refertur Syllabi Propositio 20. » 204
- ALLOCUTIO** Maxima quidem, 9 Iunii 1862. — *Huc referuntur Syllabi Propositiones 1 — 2 — 3 — 4 — 5
— 6 — 7 — 15 — 19 — 27 — 39 — 44 — 49 — 56 —
57 — 58 — 59 — 60 — 76.* » 210
- LITTERAE** ad Archiep. Frisingensem, Gravissimas, 11 Dec. 1862. — *Huc referuntur Syllabi Propositiones 9 — 10 — 11.* » 219
- PISTOLA ENCYCLICA** Quanto conficiamur, 10 Aug. 1863.
— *Huc referuntur Syllabi Propositiones 17 — 58.* » 226
- PISTOLA ENCYCLICA** Incredibili, 17 Sept. 1863. —
Huc refertur Syllabi Propositio 26. » 236
- LITTERAE** ad Archiep. Frisingensem, Tuas libenter, 21 Dec. 1863. — *Huc referuntur Syllabi Propositiones 9 — 10 — 12 — 13 — 14 — 22 — 33.* » 242
- LITTERAE** ad Archiep. Friburgensem, Quum non sine, 14 Iulii 1864. — *Huc referuntur Syllabi Propositiones 47 — 48.* » 250
- LITTERAE** ad Episc. Montisregalensem, Singularis nobisque, 29 Septemb. 1864. — *Huc refertur Syllabi Propositio 52.* » 255

I N D E X

EORUMDEM ACTORUM DISTRIBUTUS IUXTA VERBA QUIBUSILLA EXORDIUNTUR

ACERBISSIMUM	<i>27 Sept.</i>	<i>1852.</i>	.	pag. 110
AD APOSTOLICAE	<i>22 Augusti</i>	<i>1851.</i>	»	91
CUM CATHOLICA .	<i>26 Martii</i>	<i>1860.</i>	»	169
CUM SAEPE .	<i>26 Iulii</i>	<i>1855.</i>	»	132
DOLORE HAUD	<i>30 Aprilis</i>	<i>1860.</i>	»	178
EXIMIAM .	<i>15 Iunii</i>	<i>1857.</i>	»	165
GRAVISSIMAS	<i>11 Dec.</i>	<i>1862.</i>	»	219
IAMDUDUM CERNIMUS .	<i>18 Martii</i>	<i>1861.</i>	»	196
IN CONSISTORIALI	<i>1 Nov.</i>	<i>1850.</i>	»	79
INCREDIBILI . . .	<i>17 Sept.</i>	<i>1863.</i>	»	236
LETTERA DI S. S. AL Re di SARDEGNA	<i>9 Sept.</i>	<i>1852.</i>	»	104
MAXIMA QUIDEM	<i>9 Iunii</i>	<i>1862.</i>	»	210
MEMINIT UNUSQUISQUE	<i>30 Sept.</i>	<i>1861.</i>	»	204
MULTIPlices INTER	<i>10 Iunii</i>	<i>1851.</i>	»	87
MULTIS GRAVIBUSQUE	<i>17 Dec.</i>	<i>1860.</i>	»	188
NEMO VESTRUM .	<i>26 Iulii</i>	<i>1855.</i>	»	136
NOSTIS ET NOBISCUM.	<i>8 Dec.</i>	<i>1849.</i>	»	50
NOVOS ET ANTE .	<i>28 Sept.</i>	<i>1860.</i>	»	181
NUNQUAM FORE	<i>15 Dec.</i>	<i>1856.</i>	»	156
PROBE MEMINERITIS	<i>22 Ian.</i>	<i>1855.</i>	»	129
QUANTO CONFICIAMUR	<i>10 Augusti</i>	<i>1863.</i>	»	226
QUIBUS LUCTUOSISSIMIS.	<i>5 Sept.</i>	<i>1851.</i>	»	97
QUIBUS QUANTISQUE .	<i>20 Aprilis</i>	<i>1849.</i>	»	29
QUI PLURIBUS.	<i>9 Nov.</i>	<i>1846.</i>	»	3
QUISQUE VESTRUM .	<i>4 Oct.</i>	<i>1847.</i>	»	19
QUUM NON SINE .	<i>14 Iulii</i>	<i>1864.</i>	»	250
SINGULARI QUADAM	<i>9 Dec.</i>	<i>1854.</i>	»	120
SINGULARI QUIDEM .	<i>17 Martii</i>	<i>1856.</i>	»	141
SINGULARIS NOBISQUE	<i>29 Sept.</i>	<i>1864.</i>	»	255
SI SEMPER ANTEA .	<i>20 Maii</i>	<i>1850.</i>	»	70
TUAS LIBENTER	<i>24 Dec.</i>	<i>1863.</i>	»	242
UBI PRIMUM	<i>17 Dec.</i>	<i>1847.</i>	»	23

IMPRIMATUR

Fr. Hieronymus Gigli O. P. S. P. A. Magister.

IMPRIMATUR

Petrus De Villanova Castellacci Arch. Petrae, Vicesgerens.